



BIBL. NAZ.  
Vitt. Emanuele III

164

L

13

NAPOLI

4  
10  
12







INSTITUTIONES THEOLOGICÆ

AD USUM STUDIOSE JUVENTUTIS.

AUCTORE

CAJETANO DE EULGURE

AVERSANÆ

CATHEDRALIS ECCLESIE CANONICO

OLIM

IN AVERSANO CLERICORUM SEMINARIO  
S. THEOLOGIE PRÆCEPTORE.

*Editio quarta auctior, et emendatior.*

TOMUS I.

Complectens Tractatus  
*De veritate Religionis Christianae.*  
*De Locis Theologicis.*  
*De Deo uno.*

Accedit SS. Pontificum, Conciliorum generalium, Patrum, et Haereticorum brevis historia.



NEAPOLI 1822.

EX TYPOGRAPHIA JANUARIJ REALE.

*Superiorum Facultate.*

*Quodcumque in hac Ecclesiae agricultura fide Patrum satum est, hoc idem filiorum industria decet excolatur, et observetur, hoc idem floreat, et maturescat, hoc idem proficiat, et perficiatur. Fas est etenim, ut prisca illa caelestis Philosophiae dogmata processu temporis excurentur, limentur, poliantur; sed nefas est, ut commutentur, nefas, ut detruncentur, ut mutilantur.*

*Vincentius Lirinensis Commonit. 1 Cap. 30.*

Πισιν ημεις κτε παρ αλλων γραφομεχων ημιν νεωτεραν παραδεχομεθα κτε αυτοι τα της ημετερας διανοιας γεννηματα παραδιδουσι· τολμωμεν, ινα μη ανθρωπινα λογιζωνται τα της ευσεβειας ρηματα αλλ' απερ παρα των αγιων πατερων δεδιδαγματα, ταυτα τοις ερωτησιν ημας διαγγελλομεν.

*Basilius Epist. ad Antioch. Eccles.*

## P R Æ F A T I O

Q Uam doctrinam non in *Academiae*, aut *Lycet*  
*spatiis* natam, sed ab ipsa aeterni Patris men-  
*te* haustam, unus totius humani generis magister Chri-  
*stus Dominus* tradidit, eam quantum mediocri inge-  
*nio* assequi, ac rudi eloquio explicare potero, tironi-  
*bus*, enucleare proposui, ut sacris litteris eruditi, et  
*suos ipsorum mores* ad pietatem, et religionem com-  
*ponere*, et aliorum, cum tempus feret, emendare vi-  
*tia*, excolere virtutes valeant; donec omnes ad sum-  
*mmum rerum omnium principium*, ac finem Deum,  
*unde hæc disciplina profecta est*, Deo ipso operante,  
*atque adjuvante*, perveniamus. Qua in re utrum ope-  
*rae pretium* sim facturus, ignorare me fateor: illud  
*tamen certo affirmare possum*, nihil esse a me labo-  
*ris*, ac diligentiae praetermissum, ut adolescentium  
*commodo*, atque utilitati hac in parte deservirem.

Atque eum quidem laborem non eo consilio susce-  
*pi*, quo eos omnes, qui hucusque a viris doctissimis  
*editi sunt de hoc eodem argumento*, libros aut con-  
*temnerem*, aut reprehenderem, quod utrumque, cum  
*me ex illis profecisse sciam*, aut superbi esset animi,  
*aut certe ingrati*. Verum illud semper, nec immeri-  
*to*, persuasum habui, idque etiam negaturum esse  
*arbitror neminem*, veterum labores non eam legem  
*imposuisse posteris*, ut ceterum inertes semper, atque  
*otiosos esse nos oporteat*, neque ita palmam omnibus  
*praeripuisse*, nullum ut reliquerint industriae locum:  
*imo potius nostram excitasse*, atque exacuisse diligen-  
*tiam*, ut ipsorum laudabile studium in sacris disci-  
*plinis excolendis*, quas limari semper, atque expo-  
*liri fas est*, si non aemulari, at saltem quantum pro  
*ingenio possumus*, imitari conaremur.

Jam vero illud in plerisque dissimulari non poterat incommodum, quod nonnulli nimia rerum copia prolixiores tironum opprimebant animos; alii contra majori, quam par erat, brevitate jejuni, atque obscuri, nec ab omnibus intelligi facile poterant, nec intellecti satis eruditos adolescentes educebant. Mitto peculiare auctorum opiniones, veterisque philosophiae, scholaeve praejudicia, quae uno in tractatu posita per omnes ferme Theologiae partes veluti principia vagabantur. Quaestiones vero post eorum aetatem exortas, sed hoc tempore scitu maxime necessarias omnino intactas reliquere veteres. Quibus, aliisque de causis, jam a multis novum aliquod Theologicarum Institutionum corpus nostrorum ingeniis accommodatum desiderari intellexeram; praesertim postquam nonnulla magno studio elaborata, vel ipse Scholarum non receperat, aut antiquaverat usus, vel Romani Pontificis judicium improbaverat.

Ceterum ut ea, quae commemoravi nulla essent, ipsa me compulit ad scribendum optimi olim Antistitis nostri FRANCISCI DE TUFO auctoritas, qui id sibi esse vehementer in optatis affirmavit, ut hanc provinciam susciperem, in eaque adornanda curam, et industriam collocarem. Cumque opere jam affecto, et pene ad umbilicum perducto, in turbulentissima illa tempora inciderimus saeculo superiore exeunte, quibus temporibus inter ingruentium undique bellorum strepitus, perturbationesque populorum, de vita potius fuit, quam de litteris cogitandum, ipse Praesul amantissimus supremo jam fato proximus non aliud mihi commendavit, nisi ut ea quae scripsissem, in publicum (ut pro sua in me benevolentia existimabat) edere commodum non omitterem. Cujus votis etsi me satisfecisse tantum abest, ut affirmem, quin potius multos in hoc ispo opere naevos a viris doctis deprehensum iri, facile mihi persuadam; erit tamen haec meae qualiscumque temeritatis purgatio, atque hic aliis

fortasse stimulus, ut quod ego frustra conatus sum, ipsi meliore ingenio, diligentia majore perficiant.

Habes igitur instituti mei rationem. Nunc de Theologiae ipsius nobilitate, ac dignitate satis unicuique perspecta, non est, cur longiori praefatione disseram, cujus orationis difficilior esset exitus, quam principium invenire. Nam si eo nobiliorem, atque illustriorem existimari scientiam oportet, quo praestantiores ei quasi materia subjecta est, quatenus est, quae cum Theologia ullo pacto comparari possit, quae circa id versatur, quo nihil non solum esse, sed ne cogitari quidem majus potest? Si magistri nobilitas, si scientiae ipsius utilitas; si jucunditas, si explorata veritas, si denique necessitas in ullius unquam disciplinae commendatione, ac laude commemorari possunt; quid ista praestantius, quae ab ipsa Dei Sapientia hominibus tradita, neque ad inanem gloriam aucupandam, aut ad interitura vitae hujus commoda comparanda, sed ad beatam vitam capessendam instituta, ad ipsum aeternae veritatis fontem erigit animum, atque attollit, illumque veritatis ipsius siti perpetuo anhelantem, quantum in hac vita optari fas est, reficit interim, ac recreat; donec eum pleno divinitatis lumine circumfusus, Deique consortem uberrimo caelestis voluptatis torrente satiet penitus, et inebriet, ac beatitudine repleat sempiterna?

Unum est, quod hic praetermitti non oportet, ut scilicet Graeculis quibusdam ora obstruamus, qui ut sunt homines ad despicienda ea, quae nesciunt, procliviores, ita dictitant: prostratas hodie, atque extinctas esse haereses, nihil ut jam opus sit Theologorum disputationibus, qui cum Arianos, Macedonianos, Manichaeos tanto molimine oppugnant, veluti cum umbris conficiantur, frustraue tempus terunt, quod utilius in moralibus disciplinis, quae solae usui esse possunt, excolendis collocarent. Qua quidem in oratione stultitiae plenissima nihil aliud, nisi suam ipsi in-

sci-

( VI )

scitiam, atque imprudentiam produnt. Primum quippe extinctas hodie esse haereses, utinam verum esset! Nam ut omittam Nestorianorum, Eutychianorum, aliorumque adhuc in Oriente spirantem factionem, nonne hodie Sabellianorum, Arianorum, aliorumque veterum haereticorum somnia, atque portenta Soeciniani ambabus ulnis amplexi, incredibili subtilitate, ac pari pertinacia defendunt? Nonne fratres olim nostri, nunc autem inimici Lutherani, et Calvinistae longe, lateque per universam Europam pervagati, magno cum matris Ecclesiae luctu ab ejus sinu recedentes, antiquas plerasque haereses renovarunt? Ipsi omnium vetustissimi, atque impurissimi Simoniani, Marcionistae, Manichaei in Libris Petri Baelii revixerunt; quos libros avidissime legentes increduli, non unum aut alterum religionis caput, ut alii olim haeretici, sed totum Christianae doctrinae corpus irrident, et oppugnant. Quas quidem omnes saepe numero redargui oportet, vel ad ipsorum mentes, si fieri potest, sanandas, vel ad aliorum avertendam perniciem. Sed fac, bellum esse hac tempestate nullum adversus Christianae religionis dogmata: quis ignorat in pace parari arma, erudiri milites consuevisse, ne improvise ingruente bello suis ipsi cladibus rem militarem ediscant? Accedit, quod adolescentes, qui populi doctores futuri sunt, summa diligentia aliorum perspecta habere oportet errata, quae variis temporibus catholicam doctrinam temerarunt, ne forte et ipsi errore lapsi pro veritate errantium haereticorum somnia obtrudant; quae si admoniti retractare nolint, jam vetera illa monstra, quae extincta isti dicunt, reviviscent. Quod vere de moralibus disciplinis, posthabita Theologia, excolendis addunt, adeo putidum est, et ineptum, ut refutatione non indigeat. Qui enim illas sine Theologiae principiis velit addiscere, ne minimum quidem ab eo abluat, qui aedificium sine ullo prorsus fundamento extruere moliretur. Neque vero per tot absurda opi-

niq.

nionum portenta postremis hisce temporibus, tanta facta esset disciplinae moralis ruina, si illi, qui Casuistae vocitantur, ejus scientiae molem solidis Theologiae fundamentis constituere studuissent. Sed jam vereor, ne aut nimium molestus sim lectoribus, aut eorum ingenio injuriam inferre videar, si eos de rebus tam perspicuis longius disserendo fatigem.

His igitur omissis, quid in hoc opere praestiterim, paucis in antecessum monere lectores necesse est. Primum inter varias, quae in Theologorum Scholis agitari solent, controversias eas selegi, quae adolescentibus scitu maxime necessaria videbantur, in eis quae quid ad fidei dogmata pertineret adnotavi, ne aut tirones in haereseos nota contrariis opinionibus inurenda, quod valde periculosum est, essent procliviores, aut pari contentione pro fidei dogmate, ac pro Theologicis conclusionibus decertarent. Scholasticam vero disputandi rationem, non horridam illam quidem, atque hispidam, sed paulo liberaliorem sectatus sum, utpote quam infingendis profundius adolescentium animo Theologicis disciplinis aptiorem esse multorum annorum experientia sum edoctus. In proponendis vero adversariorum objectis saepe fui parcior, tum quia tirones magis de argumentis, quibus nostra probantur, oportet esse sollicitos, quae si rite teneant, facile omnia quae in contrarium opponi poterunt, argumenta dissolvent, tum ut assuescerent etiam ipsi per se, ac Marte suo novas excogitare, aut invenire rationes, quas in publicis, privatisque disputationibus exercitationis gratia proponerent, quod quidem ad exacuendum eorum ingenium, ac diligentiam excitandam plurimum valet. Deinde ea, quae a se mutuo sejuncta esse videbantur, per scholia, et corollaria ad unum idemque principium revocare studui. Nihil vero habui antiquius, quam ut res omnes quanta maxima fieri potuit brevitate, ac perspicuitate explicarem. Sed ne iis, qui promptiori essent ingenio, deessem in unoquoque fer-

me capite libros indicavi alios, in quibus rem eandem plenius, ac fusius pertractatam invenire possint. Quod non ideo feci, ut tironibus auctor essem plures libros cum elementis addiscendis dant operam evolvendi: distrahit enim potius hoc eorum animos, redditque instabiles; sed ut emenso harum institutionum cursu, cum maturo jam iudicio pollebunt, si quando occasio se obtulerit, scirent fontes, unde uberiorem rerum copiam haurire possint; neque ut omnes nullo discrimine libros perlegant, sed ut si quos Ecclesia improbat, eos tunc tantum, cum per Ecclesiam ipsam liceat, caute consulant. Denique ne in recitandis Patrum testimoniis essem longior, quod adolescentium memoriam frustra praegravare, atque opprimere potuisset; contentus paucis, reliquos in imaginum paginae ora indicavi, ut essent duo, vel tres ejus dogmatis, quod proponitur, testes, et adstipulatores, nec deessent alii; qui veluti subcenturiati pro re nata produci possent.

Erit fortasse aliquis, qui optasset, ut in tanta litterarum luce a vocibus nonnullis minime latinis usurpandis abstinuissem, atque elegantiori usus essem sermone, ac stilo. Verum is si instituti mei rationem perspexerit, facile mihi indulgendum hac in parte existimabit. Nam praeterquamquod habet unaquaeque scientia peculiare sibi vobes, quas si Latinorum vocabulis commutare voles, longo tibi verborum circuitu utendum esse animadvertes, sunt nonnullae a Patribus, atque ab Scholasticis Theologis usurpatae voces, quibus nihil significantius, et expressius apud Latinos invenimus. Quapropter si Romani ipsi Scriptores hanc sibi veniam dandam esse existimarunt, ut nova etiam aliquando vocabula fingerent, quando aliter ea, quae a Graecis in Philosophia fuerant tractata, latinis litteris explicare non poterant, ut a Cicerone, Lucretio, aliisque factum esse scimus, quanto magis existimabimus, licuisse semper, ac licere Theologo res divinas, latinis

pro-



prorsus ignotas, novis, ac propriis vocibus exponere? Accedit quod, si quis omnia vitare velit Scholae vocabula, is in volutandis veterum Theologorum libris, velut hospes, ac peregrinus inter homines alienae, atque ignotae linguae nihil prorsus intelliget. Quibus de causis ita mihi rem componendam, ac temperandam putavi, ut neque nimis solliciti dicendi ornamenta persequerer, nec tamen adeo putide, ac barbaramente scriberem, ut singulis fere verbis honor praefandus esset, quorum alterum minus perspicuam orationem effecisset, alterum maximo fuisset fastidio lectoribus. Ad elegantiam vero stili quod attinet, habenda mihi ratio fuit non eorum dumtaxat adolescentium, qui Latinis, Graecisque litteris satis exculti in Ciceronis, Livii, aliorumque veterum lectione versati sunt; sed et eorum praecipuo, quibuscum praeclare agitur, si rude aliquod, et incomitum, nullaue verborum translatione exornatum dicendi genus intelligant. Ceterum juxta Augustini monitum non timui ferulas Grammaticorum; dum tamen ad veritatem solidam, et certiore pervenirem; magisque spectavi, quid adolescentium exposceret utilitas, quam quid humaniorum litterarum studiosis placeret, eorumque delectare oculos, aut aures mulcere posset.

In omnibus autem quaestionibus, in illud maxime omnes ingenii nervos intendere, atque omnem adhibere sollicitudinem, ac diligentiam curavi, ut ne latum quidem unguem a Catholicae Ecclesiae doctrina, atque a Sedis Apostolicae sententia recederem, cujus judicio haec omnia, si quid fortasse humanae imbecillitatis vitio sit erratum, tamquam filius obediens eo quo par est obsequio, reverentia, ac veneratione subjicio.

## M O N I T U M.

**Q**Uamquam in Institutionibus hîsce concinnandis summam, ut in *Praefatione* professus sum, diligentiam adhibuerim, ut ne quid ab Ecclesiae Catholicae doctrina discreparet; tamen cum ipse Paulus Apostolus, magnis a Christo *revelationibus* illustratus, Jerosolymam venerit, ut Evangelium, quod praedicabat, cum Apostolis aliis conferret, *ne forte in vacuum curreret, aut cucurrisset*, Galat. II. 2. tali utique exemplo tremefactus, meoque iudicio diffusus, maximos rogavi Theologos, quorum doctrinae, ac pietatis fama longe, lateque vagata est, ut hoc, quaelocumque esset, lucubrationum mearum, attentis oculis, atque animis perlegerent, ac si quid in iis fortasse offenderent, quod veritati ullo pacto vel leviter nocere posset, aut pietati, id severiori censura notarent, et Christiana libertate patefacerent. Quorum iudicia, ac testimonia hic invitus inserere coactus sum, non ut libros meos tantorum virorum facerem commendatione celebres, sed quia nulla mihi nunc patebat via, ac ratio qua lectores certiores facerem, nihil hic contineri religioni, bonisque moribus adversum, nihil quod Theologica censura castigandum esse videretur.

*Responsum Illustriss. ac Reverendiss. Domini Aloysii Elefante, Metropolitanae Neapolitanae Ecclesiae Canonici, Examinatoris Synodalis, Clerique Studiis Deputati.*

**C**UM me rogaveris, ut de tuis institutionibus theologicis Ecclesiasticae juventuti in primis excolendae accommodatis, tibi quid sentiam, sine ulla assentatione aperirem: id non mediocriter, ut vere dicam, animum meum commovit. Tanti enim me ipse non facio, ut hac super re, me aliquod iudicium quantumcumque id sit, proferre posse existem, et mearum virium tenuitatem, et sentio,  
et

et fateor libentissime. At ne qua in re tibi deessem, operamq. homini amicissimo denegarem, summa, quoad ejus fieri poterat, diligentia opus tuum perlegi, animumq. induxi tuae obsequi voluntati. Dicam igitur quod sentio. Opere tuo nihil gravius, nihil splendidius, nihil castigatius legi unquam posse censeo. Omnia enim ex divinis eloquiis, traditionibus sacris, ac SS. Patrum libris deprompta, sunt uberime disputata, et quod magna in laude ponendum, abstrusa quaeque ita inoffenso pede exsoluta, ut nemo unus ea delibaverit, quin velit statim avidissime exhaustire, quasi sit diurnam sitim expleturus. Plerumque sunt, qui ita vagantur, nullis ut coerceantur cancellis, et vicissim, sunt, qui jejuna exilitate ita tabescunt, ut quae in rem dicenda essent, non sine magno Juvenum dispendio, saepe praetermittant. Tu ea, qua longe omnium excellis, ingenii felicitate ab utroque vitio abhorres; eam enim docendi rationem es persecutus, quae nec jejuna statim a mente delaberetur, nec latius diffusa, legentibus stomachum facesseret. Ratio vero scribendi ornata, polita, elegans mirum in modum animos pervadit, tantaeque suavitate permulcet, ut veluti prono alveo effluere videatur. Quod admirari satis, vix possum. Haereticorum denique deliramenta, qui ex composito quaquaersus arcem Sion invadunt, ut iteratis ictibus, si id fieri posset, labefactata corruat, tam acriter frangis, ut nihil magis desiderari queat. Quapropter cave credas, hocce opus tuum inscriptum *Institutiones Theologicae ad usum studiosae juventutis* etc. tantum adolescentibus, quorum commodis studes, et usui futurum, et adjumento: mea quidem sententia vel in tanta saeculi luce se se viris et ingenii ubertate, et doctrinae copiâ praestantibus, nullo negotio commendabit; habebunt enim opus theologicum numeris omnibus absolutum, in quo illis deinceps licebit conquiescere. Quare te etiam atque etiam rogo, ut illud quamprimum typis in lucem publicam edas. Est igitur quod tibi gratuler hoc potissimum, quod nihil habes antiquius quam ut curas,

stu-

studia, labores ad Christianae Religionis praesidium tam sedule impendas quam qui maxime. Utinam Ecclesia haberet multos tui similes! Sed de hoc fortasse plura quam constitueram.

Interea te rogo, valetudini inservias, tibi que persuadeas, te a me ita observari, et coli insigniter, ut paucos admodum invenias tui, quam ego sum, studiosiores. Vale.

Neapoli . . . an. 1806.

Aloysius Canonicus Elefante.

*Responsum Illustriss., ac Reverendiss. Domini Cajetani Gaglione, Metropolitanae Neapolitanae Ecclesiae Canonici Poenitentiarum, et Examinatoris Synodalis.*

**Q**uod me constitutum volueris, Vir clarissime, tuarum dogmaticae Theologiae Institutionum quasi censorem, et judicem, undenam oriri potuerit, quamquam exploratum non habeo, tamen benignitati tuae, ac modestiae adscribere, ac referre non dubito. Nam obscuri nominis hominem ad hujusmodi materias examinandas destinare, tot doctissimis viris praetermissis, quid aliud esse existimandum est, quam, certo naufragii periculo rem totam exponere? Nisi dicere velimus, Te in hoc negotio ad vanam huriolandi artem confugisse, qua nihil levius, et infirmius ab homine sanae mentis haberi potest. Sed dicam melius. Quod Benignitas, et modestia tua, ut me praeceteris electum velles in opere discutiendo fuerit causa, certissime sentio, et firmissime teneo, utpote auditor neque recens, neque rarus non magis famae nominis tui, et tuae doctrinae, quam morum, et virtutis. Ut vero voluntati tuae obsequar; quid de tuis Theologicis Institutionibus opiner, imo judicem, brevissime dico: Opus illud omnibus esse omnino, numeris absolutum. Et quidem Te verbis oris tui ego judico. Tu enim sapientissime statuisti, Tractatorem rerum Theologicarum in tribus dotibus excellere oportere, in sanitate scilicet

( xiii )

licet doctrinae, in ordine, in proprietate, et castitate sermonis. Quae tria cum Te exactissime servasse vidissem, non possum quin Te promissis stantem, non solum fide liberatum, verum etiam opus ex omni parte beatum confecisse pronunciem. Doctrina enim libri tui eadem est ac Ecclesiae Catholicae doctrina; ordo perspicuus, stilus proprius, et castus. Quid reliqui ergo est, si opinionem meam ratam habere velis, nisi ut publici juris facias lucubrationem tuam, quam non modo Tibi privatus homo familiariter approbo, sed quantocius fieri potest edendam in lucem, publice sententiam meam flagitantibus declarando, dicere non formido; et quotquot in sacra scientia vel delectari, vel proficere intacta, et tuta conscientia cupiunt, ut legant, versent sedula et perpetua manu, hortor, et exoro. Denique, Te, Vir sapientissime, ut sincerissimum hunc animi mei sensum benignissime accipias, demississime precor.

Neapoli . . . an. 1806.

Cajetanus Canonicus Gaglione.

*Reponsum Illustriss. ac Reverendiss. Domini Joachim Lavitrano, Metropolitanae Neapolitanae Ecclesiae Canonici Theologi, et Examinatoris Synodalis.*

**L**ibentissime accepi Institutiones theologicas Te auctore conscriptas, et pro tua in me benevolentia mihi transmissas. Quod enim in re theologica potissimum exoptandum est, ut Catholicae Ecclesiae doctrina fideliter exponatur, et ab Adversariorum objectionibus liberetur, id in tuis Institutionibus reperiri gratulatus sum. Accedit, quod methodo etiam, atque ordine digestae sint, ita ut veritatem suo in lumine collocatam, et veluti per gradus quosdam procedentem habeant in iisdem perlegendis Adolescentes Ecclesiae mancipati. Postremo certam dicendi mensuram, qua nec superfluis locus sit, nec necessaria desiderentur, servatam agnovi; quod scientiam

tiam

tiam sacram faciliorem reddit, atque amoeniorem. Si quid igitur meum hac de re amice prolatum valet iudicium, id opto, ut quam citissime in publicum bonum typis vulgetur. Vale.

Neapoli . . . an. 1806.

Joachim Canonicus Lavitrano.


*Responsum Admod. Reverendi Patris Domini Philippi Carfora, Congregationis Piorum Operariorum Presbyteri, et Metropolitanae Neapolitanae Ecclesiae Examinatoris Synodalis.*

**L**Egi, tuas litteras, quas proxime ad me cum Theologicis Institutionibus tuis miseras; ex quibus intellexi, Te de illis quid sentirem, scire velle. Valde miror, cur in animum tuum hoc induxeris, quasi aliquid tibi hoc in genere sapere viderer. Eas tamen diligenter, ut par erat cum perlegissem, facere non potui, quin admirationem tibi meam, laetitiamque, qua affectus sum, patefacerem. Nihil enim Tironum aetati, eorum captui, temporique studiis praefinito accomodatius per te fieri poterat. Neque tamen majori fraudari subsidio illos voluisti, qui acrioribus in Theologiam stimulis incitati, uberiores illius cognitionem optarent. Hac face praelucente quam facile Ss. Pp. Scriptorumque Ecclesiasticorum opera versabunt, ex quibus quasi fontibus fecundis ampliore Divinae hujus scientiae haurient plenitudinem. Quanto heic in lumine mirari licet sanam Orthodoxamque Doctrinam! Quam firmis argumentis munitam! Quam facili via ducuntur ad argumenta adversariorum, fallaciasque refellendas! Quapropter gratulor summopere adolescentibus, qui in Ecclesiae spem succrescunt; quibus plana, facilis, ac munita satis per te parata est ad Theologiam via. Quid vero de scribendi genere loquor? nec obscuro, aut inculto, nec exquisito, ac nimis concinno sermone usum te suspexi: illud enim adolescentes offendisset, hoc autem minime dignum caelesti illa

se praebuisset doctrina. Ita mediam ingressus viam et illorum captui, et sacrae scientiae Majestati consulum iri providisti. Cum vero Scholasticam methodum persequaris, nihil tamen asperum, aut fastidiosum offendere ibi quis poterit omni illius aevi barbarie penitus ablegata. In Polemicis autem, ac Dogmaticis quaestionibus, mirum est, quanto ingenio, quantaque sollertia et Novatorum tenebras expellis, simul et Divini Verbi ejusque Interpretum Sacram venerandamque Auctoritatem a calumniantium calumniis vindicas. Verae Critices praeceptis inhaerens, atque Evangelicae Caritatis flammis incensus errores detegis, quin injuria quemvis afficias. At quis ego, aut quid ego? Manum de tabula. Quare ignoscas rogo, qui me coegeris. Cui enim omni officio satisfacere semper optavi, hac in re morem tibi gerere, mei immemor, indignum duxi. Quod unum tamen a te peto illud est, ut quamprimum haec in lucem, aspectumque proferas, quae adolescentibus plurimo erunt emolumento, usui, delectationi, ornamento, ut caelesti illa divinaque scientia per te locupletati, ad animarum salutem proferant de thesauris suis nova, et vetera.

Neapoli ex aedibus S. Georgii . . . an. 1806.

Philippus Carfora Piorum Operariorum.





## DISSERTATIO PRODROMA

*De Theologia ipsâ, ejusque proprietatibus*

DE Theologiae natura multa Scholastici disputarunt, quae nos breviter, et sobrie attingemus, ad solidiora properantes. Theologia itaque Graecum nomen, Latine *sermo, sive ratio de divinitate* dicitur ab *Augustino Lib. VIII. de Civ. Dei cap. 1.* Sermone autem de divinitate instituere possumus vel sola ratione naturali, vel ex ipsius Dei revelatione. Hinc duplex est Theologia, naturalis, et Christiana, sive *supernaturalis*. Prior illa ad Philosophos pertinet, unde idem *Augustinus* Theologiam vocat eam Philosophiae partem, qua *Plato* disserit de Deo, quem Gentiles ex creaturarum testimonio cognoverunt, sed non sicut Deum glorificaverunt, ut inquit *Apostolus Rom. I., 21.* De posteriori tantum Theologia hic agimus, quae longe sublimior, et certior est. Cavendum tamen, et enixe orandum, ne postquam Deum cognoverimus, non sicut Deum glorificemus, aut gratias agamus.

### C A P. I.

*Theologiae definitio, atque divisio.*

#### §. I.

*Theologiae definitio.*

Nostra igitur Theologia definiri potest: *Scientia, et Sapientia, quae ex principiis divinitus revelatis de Deo, rebusque divinis certas conclusiones elicit (a).*

A

Qua

(a) Patres Graeci pressius loquentes eam solum sacrae doctrinae partem *θεολογίαν* appellant, quae tractat de natura divina, ejusque proprietatibus, unde disserentes de Christo eam partem, qua de ejus divinitate tractatur *θεολογίαν*, ubi vero de humanitate, *ανθρωπιναν* dicunt. *V. Petav. in Proleg.* Nos ampliori significatione hoc nomen usurpamus.

Qua una definitione probe explicata, multae solvuntur, quae in Scholis agitari solent, controversiae.

Est itaque Theologia 1. *scientia*. Nam scientia est cognitio certa, evidenti ratiocinatione, ex certis principiis deducta. At Theologia talis est. Ex principiis enim certissimis, quia a Deo revelatis, evidenti ratiocinatione suas deducit theses.

Nec quemquam moveat *Aristoteles*, a quo scientia definitur: *cognitio certa, et evidens per demonstrationem acquisita*, cum e contrario nostra Theologia utut certa, non tamen evidens sit, quippe quae principiis fidei certis quidem, sed tamen obscuris, innitatur. Etenim ad rationem scientiae sufficit explorata veritas, sive *certitudo* principii, et evidentiæ consequentiæ. Cum autem in naturalibus scientiis, de quibus loquebatur *Aristoteles*, non possit esse certitudo principii, nisi innitatur evidentiæ, quae veritatis naturalis *criterium* est; merito ille scientiam definiit cognitionem certam, et evidentem. Sed eam certitudinem, quam principia naturalium scientiarum habent ex evidentiæ, principia Theologiae habent, et quidem longe maiorem, ex auctoritate, et veritate Dei.

2.º Theologia est etiam *sapientia*. Cognitio enim rerum per altissimas causas *sapientia* est. At Theologia est cognitio divinarum rerum, per altissimam causam, Dei scilicet revelationem. Merito igitur sibi vindicat etiam sapientiae nomen.

3.º Verba illa quae ex principiis divinitus revelatis, indignant tum differentiam Theologiae a quacumque alia naturali scientia, tum etiam fontes, unde Theologus haurire certa argumenta debeat. Quod enim sunt axiomata Geometris, id sunt Theologis propositiones a Deo revelatae.

4.º De Deo rebusque divinis Theologia disserit. Deus ergo est ejus *objectum* quod vocant *materiale primum*, et *attributionis*: Reliqua vero, quae ad Deum quoquo modo referuntur, quatenus divinae revelationi subsunt, *objectum secundarium*. Unde Deus ipse, et omnia, quae ad Deum referri possunt, *objectum* sunt Theologiae *adaequatum*,

5.º Ex principiis revelatis certas conclusiones Theologia

logia deducit, qua in re Theologiae habitus a fide differt; fidelis enim rebus a Deo revelatis sine rationatione simpliciter adhaeret propter summam ejus veritatem, ut suo loco fufius explicabimus: at Theologus conclusionibus suis assentitur propter earum nexum cum propositionibus revelatis: unde *objectum formale*, ut ajunt, seu *motivum fidei quæritur*, sive *immediate* est Dei veritas; *motivum* vero Theologiae *immediate* est nexum cum propositionibus revelatis, qui naturali lumine conspicitur; *mediate* vero est Dei veritas.

Ex hac porro Theologiae definitione varia consequuntur. Ac I. quidem cum Theologia sit scientia simul, et sapientia, sapientis autem sit de rebus omnibus judicare, utpote qui res omnes in altioribus principiis consideret; consequens est, ut Theologia de rebus omnibus, imo et de principiis aliarum scientiarum judicet; ita ut, si quae in iis sint, quae rebus a Deo revelatis repugnent, ea tamquam falsa rejiciat.

II. Cum sacra haec doctrina ex principiis a Deo revelatis pendeat, sequitur, ut humana ratio, non ut domina, sed tantum ut ancilla in ea versari debeat. *Quid enim magis contra rationem est*, inquit Bernardus Tract. De error. Petri Abael. *quam ratione rationem conari transcendere*, et ea, quae supra naturam, supra rationem a Deo revelata sunt, ad humanae rationis regulam exigere? Accedit, quod humana ratio, omnino caeca in rebus supernaturalibus, facta est etiam in naturalibus infirmior ex peccato, ex quo tamen exarsit simul cupiditas, quae judicium rationis, etiam in rebus facilioribus, saepenumero pervertit; et impotens libido omnia curiosius investigandi, vagandique ultra eos fines, quos humanae scientiae fixit Deus. Unde fit, ut ipse *scientiarum Dominus*, qui superbis constantissime resistit, confundat aliquando humanae mentis intemperantem curiositatem, et audaciam, eamque, ultra subs fines vagantem, in gravissimos errores labi permittat. Quae in re terrere nos debent magnorum sive veterum, sive recentiorum exempla Scriptorum, qui, dum intemperantius

divinorum mysteriorum majestatem scrutari voluerunt, ab eorum gloria oppressi sunt.

III. Etiam sequitur, humanam rationem non esse a Theologia penitus ablegandam, imo maximo usui esse posse, si intra praestitutos sibi cancellos coërceatur. Primo enim humana ratio ad id valet, ut contra incredulos demonstremus, principia Theologiae non esse humanae rationis figmenta, sed divinitus revelata. Deinde, ut haereticorum, et incredulorum sophismata detegamus, et exufllemus. Denique, ut ex principiis revelatis recta ratiocinatione Theologicas conclusiones deducamus. Christum ipsum naturalibus quibusdam argumentis esse usum, ex Evangelio constat, ut cum exemplo volatilium, ac liliiorum nos ad fiduciam in Deum cohortatur, *Matth. VI. 26.* Apostolus etiam exemplo seminis, veritatem futurae resurrectionis insinuat. *I. Cor. XV.* Patres vero quam frequenter, atque utiliter ratione usi sint, nemo, qui vel leviter eorum opera attigerit, ignorat.

IV. Inde etiam sequitur, neminem eximium fore Theologum, qui dogmata divinitus revelata non calculet, ea enim principia Theologiae sunt; ac proinde parum in hac sacra facultate proficiet, qui non fuerit in Scripturarum, Patrum, et Conciliorum lectione versatus, iis enim libris, ut suo loco dicemus, divina revelatio continetur.

V. Quidquid ergo contrarium est vel Scripturae, vel Patrum auctoritati, id a Theologo rejiciendum est, non secus ac in Geometria rejicitur ut absurdum quidquid contra axiomata ipsa pugnat. Hinc illa *Tertulliani* regula *Lib. De Praescript. cap. 31.* *Verum quod prius traditum, falsum, quod posterius immissum.* Quod et *Lyrinensis* in *Commonitorio* egregie confirmat. Qua quidem una regula omnia facile errata detegi, caverique possunt. *Dignum est*, inquit *Fulgentius, Lib. De verit. praedest. Cap. 14.*, *ut in singulis quibusque sentiis, in quibus nubilo cujusdam obscuritatis ambigimus, Sanctorum Patrum definitionibus haereamus.*

VI. Rursus sequitur, ut non solum ea, quae Scripturis, et Patribus aperte contraria sunt, sed etiam quae omnino nova, atque ignota Patribus, ut falsitatis

suspecta, rejici debeant. Christus enim ipse doctrinam suam ex eo commendat, quod non esset sua, sed a Patre accepta *Joh. VII. 16. Mea doctrina non est mea, sed ejus qui misit me.* Apostoli non aliud se docere professi sunt, quam quod a Christo acceperant *I. Joh. I. Quod vidimus, et audivimus, annunciamus vobis.* Patres omnes non alia ratione suas confirmarunt sententias, quam quod illas a majoribus acceperunt: *Responsionum formas, ut inquit Leo M. Epist. XXXVII, vel ex Sanctarum Scripturarum disciplina, vel ex Patrum regulis colligentes.* Quisquis igitur unquam in rebus Theologicis errore lapsus est, ex hujus regulae transgressione peccavit. In hanc insipientiam cadunt, inquit idem Leo M. *Epist. X. ad Flav., qui ad cognoscendam veritatem, cum aliquo impediuntur obscuro, non ad propheticas voces, non ad Apostolicas litteras, non ad Evangelicas auctoritates, sed ad se recurrunt, et ideo magistri erroris existunt, qui veritatis discipuli non fuere.* Quibus novitates suas effluentibus dicendum cum Propheta *Ezech. XIII. 2. Dices prophetantibus de corde suo: haec dicit Dominus Deus: Vae prophetis insipientibus, qui sequuntur spiritum suum.*

VII. Consequens est etiam, ut quaestiones illae, quae ex revelatis principiis definiri non possunt, cujusmodi sunt plurimae a plurimis Scholasticis agitatae controversiae, censi non debeant Theologiae, sed humanae Philosophiae foetus, imo a Theologia exterminandae; iis tantummodo exceptis, quae ad revincendos haereticos, et incredulos homines necessariae sunt. Non enim ad charitatis aedificium, sed ad contentionem, et emulationem valent, et frustra occupantes tempus, quod utilius Scripturarum, et Patrum lectioni daretur, ad liquidam veritatem pervenire non possunt, ut ex ipso *Scholarum aeterno dissidio patet.*

VIII. Hinc etiam prono alveo fuit, easdem animi dispositiones in Theologo requiri, quae ad contemplandam veritatem a Deo revelatam requiruntur, cum tota ex revelatis principiis Theologia pendeat. Sunt autem 1.<sup>o</sup> cordis mundities, in malevolam enim animam non introibit sapientia *Sap. I. 4. Hinc Apostolus Ephes,*

Ephes. III. 17. rerum divinarum scientiam in cordis munditie, veluti fundamento, inaedificatam esse docet: *In charitate, inquit radicati, et fundati ut possitis comprehendere cum omnibus sanctis. quae sit latitudo, et longitudo, et sublimitas, et profundum; scire etiam, supereminentem scientiae charitatem Christi.* Et Rom. XV., 14. *Et ipsi pleni estis dilectione, repleti omni scientia.* 2.<sup>o</sup> Recta intentio, scilicet, ut non inflamur a scientia, sed ut scientia praelucente, aedificemur a charitate, atque alios aedificemus. 3.<sup>o</sup> Humilitas, et summa erga Dei verbum reverentia. *Ad quem respiciam, inquit ipse Deus apud Isaiam Cap. LXVI. 2. nisi ad pauperculum, et contritum spiritu, et tremantem sermones meos?* 4.<sup>o</sup> Amor veritatis; sic enim Spiritus S. nos admonet: *Eccle. VI. 19. Quasi is, qui arat, et seminat, accede ad eam, hoc est magno labore; et flagranti desiderio.* Unde Augustinus, qui tanto veritatis amore incensus erat, ut diceret. *O aeterna veritas. . . tu es Deus meus, ubi suspiro die, ac nocte, Lib. VII. Confess. Cap. 10.* sic praecipit Lib. I. De morib. Eccl. cap. 17. n. 31. *Si veritas non totis animi viribus concupiscatur, inveniri nullo pacto potest; at si ita quaeratur, ut dignum est, subtrahere sese, atq. abscondere a suis dilectoribus non potest.* Et Tract. XCVI. in Joh. n. 4. *Non diligitur quod penitus ignoratur, sed cum diligitur quod ex quantulacumque parte cognoscitur, ipsa efficitur dilectione, ut melius, et plenius cognoscatur.* Hinc generalis sententia ejus est: *Non intratur ad veritatem, nisi per charitatem, Lib. XXX. cont. Faust. cap. 18.* Qui quidem veritatis amor in omnibus aliis scientiis necessarius est, maxime vero in Theologia, cujus objectum est, qui est summa veritas, Deus.

IX Cum principia Theologiae sint divinitus revelata, inferebant passim veteres, Theologiam quoad se esse certiolem qualibet naturali scientia, quia certiori, ac firmiori principio, scilicet auctoritate Dei revelantis innititur, quamvis quoad nos, hoc est, ex infirmitate nostra accidat, ut mens firmius adhaereat aliquando demonstrationi Geometricae ex. gr.; quam Theologicae, quia scilicet principia, lumine naturali nota, movent mentem modo magis naturae con-

sen-

*Dissertatio Prodroma.*

7

sentaneo, ita ut intellectum satient, et quietum reddant. At recentiores nonnulli, inter quos *Holdenus Lib. 1. Cap. 3. De Resolut. Fidei* concedunt, Theologiae, certitudinem esse altioris ordinis, sed negant esse majorem certitudine scientiarum naturalium, et primorum axiomatum, quia, inquirunt, quando certitudo summa est, non potest altera fingi major, ac proinde docent, aequalem esse Theologiae, aliarumque scientiarum certitudinem. Nos veterum sententiam sequimur, ut fusius explicabimus, ubi agemus de certitudine fidei.

X. Ex eo quod Theologici assensus ratio, sive *motivum* est nexus propositionis Theologicae cum veritate revelata, ex qua Theologus conclusionem deducit; hic autem nexus lumine naturali conspicitur; sequitur, Theologiam esse scientiam intrinsecus naturalem, extrinsecus vero *supernaturalem*.

§. II.

*Theologiae partitio.*

Dividitur Theologia 1. in *Dogmaticam*, et *moralem*. Prior in probandis, illustrandis, et vindicandis fidei dogmatis occupatur; posterior in moribus, juxta Dei legem, et fidei regulam dirigendis.

Quapropter, cum Theologia generatim nonnisi principiis divinitus revelatis innitatur, patet, non solum dogmaticam, verum etiam moralem Theologiam ex Scripturarum, et Patrum fontibus hauriendam esse; ideoque illam propositionem, nuper a quibusdam Casuistis vulgatam, *Theologia moralis nova est*, non solum esse falsam, sed etiam contradictionem involvere; si enim nova est, Theologia non est.

Dividitur 2. in *Positivam*, et *Scholasticam*. Prima ex iis, quae posita, et definita sunt in Scripturis, et Traditione, disserit stilo fusiori, atque oratorio, cujusmodi est SS. Patrum Theologia. Altera vero addit etiam dialecticam, stilum pressiorem, et certam methodum, cujusmodi est illa, quae ducibus *Petro Lombardo*, (qui *sententiarum Magister* dicitur) *Joanne Da-*

*Damasceno*, aliisque, jam obtinet in Scholis.

Celebris etiam 3.<sup>o</sup> est divisio Theologiae in *speculativam*, et *practicam*. Eam tamen divisionem *S. Thomas I. P. Q. I. art. 4.* merito rejicit; quia sicut ea, quae Deus revelavit, omnia ad charitatem nutriendam, atque roborandam, et cupiditatem vincendam, atque extinguendam valent, ut ait *Augustinus Lib. III. de Doct. Christ. cap. 10.* ita quidquid Theologia disputat, etsi in sola veritatis contemplatione sistere videatur; tamen ad inflammandam charitatem, moresque nostros dirigendos aptari potest; cujus rei specimen eximium dedit *Vincentius Contensonius* in sua *Meitis, et cordis Theologia*. Idem ergo habitus Theologicus eminenter est *speculativus*, et *practicus*.

## C A P U T II.

*Ostenditur, Theologiam positivam non singulis fidelibus, sed Ecclesiae necessariam esse; Scholasticam non necessariam sed maxime utilem.*

**A**dverte. **N**ecessitas multiplex est, ut suo loco explicabimus. Quod tamen attinet ad rem praesentem, illud dicitur absolute, et simpliciter necessarium ad finem, sine quo ex ordinaria Dei lege finis attingi nullo pacto potest. Quapropter, cum varias Theologiae species supra descripserimus *Cap. 1. §. 2.* quatenam ex illis, et cui necessaria sit, explicabimus subjectis thesibus.

## P R O P O S I T I O I.

*Nulla Theologiae species est singulis fidelibus absolute necessaria ad salutem.*

*Prob.* Fides enim, quae per charitatem operatur, sufficit singulis ad salutem. *Habacuc II. 4. Justus in fide sua vivet*; quod repetit *Apostolus Rom. I. 17. Marci XVI. 16. Qui crediderit, et baptizatus fuerit, salvus erit, et 1. Cor. XII. 29. Numquid omnes doctores?* Patrum loca praetermittimus, ne tempore abutamur in re clarissima. Quod



Quod ergo Petrus *Epist. I. Cap. III. 15.* singulis fidelibus praecepit, his verbis *Parati semper ad satisfactionem omni poscenti vos rationem de ea, quae in vobis est, spe,* non eum habet sensum, ut quilibet fidelis more Theologorum fidem exquisitè defendat, sed tantum, ut simpliciter exponere sciat, eamque, si oporteat, generalibus quibusdam rationibus, captui imperitorum accomodatis, defendere, ex. gr. quia Ecclesia tot miraculis fundata falli non potest in fidei articulis proponendis; quia nihil apud Deum est impossibile, quamvis humanam rationem superet; etc. Vide *Estii Commentaria* in hunc Petri locum.

## PROPOSITIO II.

*Theologia positiva est simpliciter et absolute necessaria toti Ecclesiae.*

*Prob. I.* Apostolus *Ephes. IV. 11.* de Christo ait: *Et ipse dedit quosdam quidem Apostolos, quosdam autem prophetas, alios vero Evangelistas, alios autem pastores, et doctores ad consummationem Sanctorum, in opus ministerii, in aedificationem corporis Christi.....* ut jam non simus parvuli fluctuantes, et circumferamur omni vento doctrinae in nequitia hominum, in astutia ad circumventionem erroris. Et ad *Tit. I. 9.* *Oportet, Episcopum sine crimine esse . . . amplectentem eum, qui secundum doctrinam est, fidelem sermonem, ut potens sit exhortari in doctrina sana, et eos, qui contradicunt, arguere. Sunt enim multi etiam inobedientes, vaniloqui, et seductores . . . quos oportet redargui, qui universas domos subvertunt, docentes quae non oportet, turpis lucri gratia.* Sunt ergo ex ipsa Christi institutione necessarii in Ecclesia Doctores, qui sacram hanc scientiam doceant, atque defendant.

*Prob. Augustinus* Theologiae quatuor munera esse docet, *Lib. XIV. de Trin. cap. 1.* *Est scientia, inquit, qua fides saluberrima, quae ad veram beatitudinem ducit, gignitur, nutritur, defenditur, roboratur.* Atqui quatuor ista sunt Ecclesiae absolute necessaria. Licet enim praedixerit Deus apud *Isaiam Cap. LIV. 13.* sci-

psum

psum fore fidelium doctorem: Ponam universos filios tuos doctos a Domino; et apud Jeremiam Cap. XXXI. 33. *Dabo legem meam in visceribus eorum, et in corde eorum scribam eam*, tamen non exclusit ministerium Pastorum, et doctorum, quos ipse Deus se daturum promissit apud Jeremiam Cap. III. 15. *Dabo vobis pastores juxta cor meum, et pascent vos scientia, et doctrina*. Sed id tantum sibi voluit, nempe pastoribus extrinsecus loquentibus, ipsum Deum per gratiam Spiritus Sancti docturum, et moturum intrinsecus corda hominum; sicut etiam Apostolus ait I. Cor. III. 6. *Ego plantavi, Apollo rigavit, sed Deus incrementum dedit; Itaque neque qui plantat est aliquid, neque qui rigat, sed qui incrementum dat Deus*. Sed de his uberius, ubi de Gratia disputabimus. Necessaria est igitur Ecclesiae sacra Theologiae doctrina.

### PROPOSITIO III.

*Theologia Scholastica non est Ecclesiae simpliciter necessaria.*

*Prob.* Ecclesiae enim fides, et doctrina per plura saecula stetit sine ope scholasticae Theologiae, scilicet apud Graecos usque ad VIII. saeculum, quo floruit S. Joannes Damascenus, et apud Latinos usque ad Saeculum XII. quo Petrus Lombardus, alique Scholasticam methodum adhibere in Scholis coeperunt. Ergo illa methodus absolute necessaria non est.

### PROPOSITIO IV.

*Scholastica Theologia Ecclesiae adprime est utilis.*

Haec propositio maximi momenti est; in eam enim haeretici vesano impetu debacchantur non amore, sed odio veritatis; quippe Scholasticam Theologiam experti sunt sibi maxime infestam, suisque cavillationibus, et sophismatis exufflandis aptissimam. Eis autem arma suppeditaverant Rhenanus in suis ad Tertul-

lia-

lianum Commentariis, et Erasmus in I. ad Timot. I. aliisque in locis.

Prob. autem I. Iudicio, atque usu ipsius Ecclesiae, quae non solum Theologicas Scholas privilegiis, et honoribus auxit, principesque Scholasticorum in sanctorum album relatos semper ob doctrinam commendavit, verum etiam in Concilio Constantiensi Sess. XVIII. inter Wicleffi errores damnavit eum, quo asseruerat, Universitates, Studia, et Collegia vana garritulitate introducta esse.

II. Theologia Scholastica tria tantum addit positivae, stilum, methodum, et dialecticae usum. Atqui tria haec, recte adhibita, utilissima sunt, 1<sup>o</sup>. enim stilo simpliciiori, et pressiori, quo utitur Scholastica, status quaestionis rectius intelligitur, ambiguitates explicantur, et haereticorum fallaciae deprehenduntur 2<sup>o</sup>. Methodus, qua Scholae utuntur, utilitatem simul, et jucunditatem habet, imò et laboris compendium, dum res singulae ad propria capita revocantur. 3<sup>o</sup>. Sobriam dialecticam ipsi laudarunt, et usurparunt SS. Patres. Basilius ad Cap. I. Isaiae. *Vis dialectices*, inquit, *dogmatum est mirus, quae ea a quibuslibet, qui vellent, facile interverti, aut facile expugnari non sinit.* Tom. I. Edit. Garnerii Paris. 1721. Et Augustinus Lib. II. de doctr. Christ. Cap. 31. *Disputationis disciplina ad omnia genera quaestionum, quae in sacris litteris sunt, penetranda, et dissolvenda plurimum valet: tantum ibi cavenda est libido rixandi, et puerilis quaedam ostentatio decipiendi adversarium.* Et Lib. I. contra Crescentium Cap. 13. 14. et 15. probat dialecticam esse laudabilem, eaque usum esse Apostolum Paulum, imò ipsum Christum Dominum. Cumque haereticus ille dialecticam in scriptis Augustini reprehenderet, et tamen ipse eadem uteretur, respondet S. Doctor Cap. 13. *si noxia sunt, quare hoc facis? si non sunt, cur arguis?* Quod in adversarios nostros aptissime quadrat, qui in Scholasticis dialecticam arguunt, et tamen ipsi innumeris dialecticae tricis, et cavillationibus pugnant. Vide de hoc argumento Petavium in Prolegomenis. Canonum Lib. VIII. De loc. Theol. Hieronymum Augustinum Lib. de Academicis cont. Luther.

Sol-

## Solvuntur Objecta.

*Objic. I.* Apostolus ad Coloss. II. 8. *Videte, inquit, ne quis vos decipiat per philosophiam, et inanem fallaciam.* Ergo dialectica a Theologia prorsus ableganda est, atque adeo rejicienda Scholastica.

*¶. Dist. ant.* Per philosophiam captiosam, qua haeretici abutebantur ad destruendam fidem *conc.* Per philosophiam rectam, et fidei pedisequam, quam solum admittimus, et laudamus in Scholastica, *neg.*

*Objic. II.* Plerique Patres adversus philosophiae, et praesertim dialecticae usum declamant, tamquam Religioni inimicum. *Tertullianus enim Lib. De anima Cap. 3.* vocat Philosophos *Patriarchas haereticorum*, et *Cap. 18.* argumenta philosophica ait esse tormenta cruciandae simplicitatis, et suspendendae veritatis, Et lib. De Praescript. *Cap. 7.* *Miserum, inquit, Aristotelem, qui illis (haereticis) dialecticam instituit artificem struendi, et destruendi versipellē.* Gregorius Nazianzenus *Orat. XXVI.* artificium Aristotelicae artis, et alia hujus generis quasi *Aegyptiacas quasdam plagas in Ecclesiam incubuisse* conqueritur. Similia docent Augustinus *Serm. LXXXVII. de Tempore*, Ambrosius in *Psal. CXVIII.* De Scholastica vero Theologia Catholici ipsi, et quidem viri doctissimi, multa conquesti sunt, ut Mabillonius *De Stud. monast. Part. 2. Cap. 6.* Harlayus *Lib. De myst. Eucharist. etc.* Ergo.

*¶. Dist. ant.* Declamant adversus philosophiae usum sive abusum impium illum quidem, atque perversum, qualis erat in Gentilibus, et haereticis, qui Religionem Christianam, et Catholicam Philosophorum, et praesertim *Platonis*, et *Aristotelis* auctoritate, et captiosis, sophismatis impugnabant, *conc.* Adversus usum rectum philosophiae, quam ipsi Patres contra inimicos Religionis adhibebant, *neg.* Idem esto responsum ad catholicorum illorum auctoritatem, qui de Scholastica queruntur. Philosophia ergo, modo non ut domina, sed ut famula in Scholis Theologicis versetur, utilis, et laudabilis est. Vide *Cap. 1. §. 1.*

*Inst.* Scholasticis hoc vitium est, ut primas dent dia-

dialecticae, et *Aristoteli*; rarissima sint apud eos testimonia Scripturarum, et SS. Patrum; de ipsis fidei articulis excitent controversiam, eosque, ex philosophiae regulis explicare conentur, quod Religionem incredulorum ludibrio posset exponere; innumeras cieant quaestiones partim frivolas, et ridiculas, partim gravissimas quidem, sed inutiles, et quae humano ingenio solvi non possunt: denique linguae utuntur barbara, et vocabulis insuetis. Quanto praestabilior est igitur positiva Theologia, quae, ut inquit Petavius *Tom. I. Cap. 1. ad eruditae vetustatis expressa speciem, hoc est a Dialecticorum dumetis liberioris ad campi revocata spatia, solam ad ornatum, cultumque sui, nativam, et domesticam copiam ostendat?* Ergo.

R. *Dist. ant.* Et hoc vitium est omnibus, *neg.* Nonnullis, *subdist.* et hoc vitium est ipsius doctrinae, *neg.*; ipsorum docentium, et saeculi durioris, in quo scribebant, *conc.* Itaque dum Scholasticam doctrinam commendamus, vitia doctorum non defendimus, sed cavenda praecipimus. Dialecticorum dumeta vitamus, et nativam, ac domesticam Theologiae copiam, quantum necesse est, non ad eloquentiae ostentationem, sed ad adolescentium utilitatem, non respuimus. *Quem vero intelligimus Scholasticum Theologum,* inquit Melch. Canus. *Lib. VIII. Cap. 1. aut hoc verbum in quo homine ponemus? Opinor in eo, qui de Deo, rebusque divinis apte, prudenter, docte e litteris, institutisque sacris ratiocinetur.* De vocabulis vero Theologiae peculiaribus non est cur adversarii litem intendant; nam, preterquam quod unaquaeque disciplina habet peculiare voces, ut observat ipse Tullius *Lib. 1. Academ.* Theologia cum disputet de rebus, quae praeis Latinis ignotae erant, novas etiam debuit usurpare voces. Ridueulus vero esset, qui haec latinis vocabulis explicare conaretur, ut observat ipse Heineccius Lutheranus in *Fundamentis stili cultioris Part. 1. Cap. 2. §. 12. Mundanis Scripturibus tota cura de verbis est; nostris, de rebus,* inquit Augustinus *Lib. cont. Adimant. Cap. 2.* qui et alibi ait: *Non timeamus ferulas Grammaticorum, dum tamen ad veritatem solidam, et certioram perveniamus. Tract.*

II. in Joh. Et Lib. IV. De doct. Christ. Capit. 11. Quid prodest clavis aurea, si aperire quod volumus non potest, aut quid obest lignea, si hoc potest? Quando nihil quaerimus, nisi patere quod clausum est? Unde Melchior Canus elegantissimus utique Scriptor Lib. XII. Cap. 3. Puto, inquit, nobis concedi oportere, ut Scholae verbis utamur, si quando minus occurrent latina. Quin latina etiam interdum relinquenda sunt, ne in Scholastica disputatione non tam explicasse res, sed verba affectasse videamur. (a)

Objic. III. Si adeo utilis esset Scholastica methodus, profecto recentiores Theologi essent doctiores veteribus, qui ante inventam istam methodum floruerunt. Atqui hoc manifeste falsum est; quis enim est Scholasticus, qui cum Athanasio, Nazianzeno, Augustino sit ullo pacto comparandus? Ergo.

R. Neg. maj. Non enim ad hoc dicimus valere Scholasticam methodum, ut recentiores efficiat veteribus Ecclesiae Patribus doctiores; quod quidem egregie absurdum esset, cum ex illis ad nos sacrae hujus disciplinae traditio manaverit; sed ut ea, quae Patres docuerunt, et tradantur clarius, et ediscantur facilius.

### C A P U T III.

#### *Partitio totius operis.*

Q Uoniam ergo scientia Theologica ex principiis divinitus revelatis disserit de Deo rebusque divinis, haec erit totius operis nostri partitio, et series. Libro primo demonstrabimus, revera a Deo revelata fuisse principia theologiae, hoc est, veram esse Religionem Christianam, quae ea divinitus revelata docet. Quamquam enim unaquaeque scientia non probet principia sua, sed habeat ut certa; tamen, quoniam in tempora incidimus periculosa, quibus homines im-

pii

(a) Vide Petavium in Prologomen. Cap. 7. ubi multa erudite disserit de elocutione Theologica.

pri non minus Religionis inimici, quam rectae rationis impotes insipientiam suam jactare non cessant; non oportet Theologum nostrum eorum telis, et cavillationibus imparatum, atque inermem obicere. Altero deinde Libro de Locis Theologicis disputabimus. Tertius erit de Deo. Quartus de Trinitate. Quintus de rerum creatione, et peccato originali. Sextus de Incarnatione. Septimus de Gratia. Octavus de Sacramentis. Nonus de Actibus humanis, eorumque regula, et de Virtutibus, praesertim Theologicis. Quae vero ad morales virtutes pertinent, quoniam usus invaluit, ut non eodem tempore tradantur tironibus, quo Theologiae dogmaticae dant operam, ea duobus seorsim libris explicare, si Deus dederit, est animus; quos libros si quis huic operi adjiciendos putaverit, ut unum veluti corpus Theologiae dogmaticae, ac moralis efficiant; nihil erit per nos impedimenti.

### *M O N I T U M*

Si cui fortasse brevius ad Theologicas Institutiones sive explicandas, sive addiscendas concessum fuerit temporis spatium, poterit is Institutiones has nostras efficere breviores, suoque tempori satis aptas, si in unaquaque propositione, explicatis scripturarum locis, unum dumtaxat ex Patribus testimonium accipiat, reliqua vero omnia, ipsasque objectiones si opus fuerit, praetermittat. Ita fiet, ut nullo posthabito dogmate totum Theologiae cursum tempore quam brevissimo possit absolvere.

## LIBER PRIMUS

## S E U

## TRACTATUS

*De veritate Religionis Christianae (a).*

## P R Æ F A T I O.

**N**e in ambiguo laboremus, nomine Religionis non hic eam virtutem intelligimus, qua colitur Deus, sed ipsum doctrinae corpus, sive complexionem dogmatum omnium, ac praeceptorum, quæ ad veram Dei cognitionem, ac legitimum cultum pertinent, ideoque partes habet duas *theoreticam*, et *practicam*, quarum una ad alteram ducit. Ea igitur doctrina, quæ ab Ecclesia Christiana, tamquam divinitus revelata proponitur, contra ejus adversarios adserenda, et vindicanda est.

## CAPUT I.

*Recensentur hujus Religionis hostes.*

I. Religionem Christianam oppugnant 1. Athei, Polytheistæ, Pantheistæ, seu Spinozistæ, et Epicurei.

2. *Deistæ*, qui naturalem quandam sibi fingentes religionem, negant necessariam esse religionem revelatam.

---

(a) *Monitum.* Poterit totus iste liber, si Praeceptorum videbitur, in Insequentem aliquem annum reservari, quo, emenso aliorum tractatum cursu, vacul aliquid supererit temporis.



latam Deistae autem dividuntur in partes duas; alii enim Religionem illam naturalem in praecipendis actibus solum internis constituunt; alii admittunt etiam externum aliquem Dei cultum naturali ratione definitum.

3°. *Indifferentistae*, qui quamlibet religionem utcumque monstrosam, bonam esse, et homini ad salutem sufficere effutiant.

4°. *Judaei*, qui solam Judaicam religionem a Deo revelatam esse concedunt, negant vero Christianam.

5°. Denique *Mahumetani*, et cujuscumque alterius religionis homines, qui divinas jactant revelationes Christianae religioni contrarias.

II. Porro adversus Atheos, Polytheistas, Pantheistas, et Epicureos in Metaphysicis Institutionibus disputatum est. Restant ergo hic refutandi Deistae, Indifferentistae, alique, et adversus eos Religionis Christianae veritas stabilienda est. Igitur demonstrabimus

1°. necessariam homini esse religionem non solum internam, et occultam, verum etiam externam 2°. naturalem religionem non sufficere: 3°. possibilem esse, imo et necessariam revelationem; 4°. Religionem Christianam revera a Deo esse revelatam. 5.º denique *indifferentissimum* in religionis negotio esse absurdissimum, atque idcirco, si Religio Christiana a Deo revelata, atque fundata est, quamcumque aliam religionem non solum falsam esse, verum etiam noxiam.

## C A P U T. II.

*Ostenditur, necessariam esse homini religionem et cultum Dei tum internum, tum externum.*

### P R O P O S I T I O I.

*Necessaria est homini religio, et cultus Dei, cumque ipse Deus ab homine exigit.*

*Prob. 1. pars I.* **N**ecessarium enim est, et ab ipsa lege naturali praeceptum; ut creatura conditorem suum, a quo ex nihilo edu-

cta est, agnoscat, revereatur, adoret, diligat, ei que gratias agat, et obediat. Sed haec est religionis totius summa. Ergo etc.

II. Homo natura duce necessario beatitudinem appetit. Est autem beatitudo summa felicitas, quam neque amittere, neque in melius commutare possis; timor enim amittendi bonum, quod habes, aut desiderium boni melioris, quod non habes, in beatitudine esse non potest. Atqui beatitudo isthaec, seu summa felicitas in nullius boni creati possessione sita esse potest; quidquid enim creatum est, et amitti, et in melius mutari potest. Appetit igitur homo, natura doce, summum bonum, quod non est, nisi Deus. Atqui homo in Deo requiescere non potest, nisi eum agnoscat, diligat, revereatur, adoret etc: qui actus ad religionem pertinent. Ergo necessaria est homini religio erga Deum.

*Prob. 2. pars.* Deus iustissimus, ac rectissimus non potest non exigere id, quod postulat necessarius ordo inter creaturam, et creatorem. Ergo etc.

Hanc propositionem mirifice confirmat omnium populorum consensus, qui *Lex naturae putandus est*, ut observat Cicero *Lib. I. Tuscul. Cap. 13.* Nulla enim extitit, nec modo extat gens adeo cfferata, quae non aliquam habeat religionem. De priscis gentibus id testantur Cicero *Lib. de Leg. Cap. 8.*, Plutarchus *contra Colotem*, alique, quos vide apud Huetium *Lib. II, Quaest. Alnet.* Vossium *de Idololatria*, et Cudworthum *Tom: I. System. Intellect.* Gentes vero recens detectas, quarum aliquas (ut *Cafros, Hottentottos, Canarienses*) Baelius et Lokius falso atheismi accusaverant, suam etiam habere religionem, eruditissime demonstrarunt Vincentius Patuzzi *Lib. De futuro impiorum statu, Cap. 9.* et Vincentius Monilia *Lib. contra Fatalistas, in Praefat.*

*Dices.* Deus nullius rei indiget. Ergo. non exigit ab homine cultum.

*R. Nego cons.* Non enim ideo Deus ab homine cultum exigit, quia illo indiget, sed quia id postulat rectus ordo, et bonum ipsius creaturae. Nam sicut mundum condidit, non quia creaturis indigebat, sed quia

quia bonus erat; et bonitatis suae divitias in creaturas voluit effundere; ita etiam exigit ab homine cultum, quia id postulat rectus ordo, quem Deus iustissimus non potest non diligere, et quia aliter creatura rationalis ad beatitudinem pervenire non potest.

## PROPOSITIO II.

*Necessarius est homini cultus Dei non solum internus, sed etiam externus.*

*Prob. 1. pars.* Primo enim cultus internus in actibus amoris, reverentiae, obedientiae, gratique animi situs est. Atqui Deo huiusmodi officia ab homine debentur. Deinde debet homo Deum colere ex animo; nempe ex ea parte, quae in homine nobilior est. Praeterea externus actus hominis signum est actus interni. Si ergo religio solis exterioribus actibus exerceretur, non posset placere Deo, qui cum sit Spiritus, et veritas, in spiritu et veritate colendus est.

*Prob. 2. pars. I.* Ex cultu interno, dummodo sincerus sit, non potest non prodire externus; ita enim a natura comparati sumus, ut quem vere diligimus et reveremur, in eum dilectionis, et reverentiae nostrae signa expromamus.

II. Ideo cultus internus Deo debetur, quia ipse animus nostrum ex nihilo creavit. At haec ratio cultum etiam externum adstruit; non solum enim animus, verum etiam corpus a Deo creatum est, ac proinde utrumque Deo famulari pro modo suo debet.

III. Exigit recta ratio, ut cultum internum, quantum possumus, atqueamus, et confirmemus cum infinita sit Dei majestas, potentia, sapientia, bonitas. Atqui noster animus ita est corpori, sensibusque illigatus, ut actus externi internos excitent, foveant, reddantque vividiores, alioquin ipsi actus interni languescunt, et cessant, lique tantum actus in animo esse pergunt, qui ab externis actibus, atque a sensibus, excitantur.

IV. Amor erga Deum, et proximum exigit, ut sicut ipsi Deum diligimus, et reveremur, ita etiam, quantum in nobis est, efficiamus, ut ceteri quoque homines, quibuscum vivimus, eum diligant, et reverantur. Hoc autem fit per externos religionis actus. Ergo debetur Deo cultus exterior (a).

### Solvuntur Objecta.

*Objic. I.* Ex iis, quae supra dicta sunt in 1. parte Deus in spiritu, et veritate colendus est. Rejiciendus est ergo cultus externus.

¶ *Neg. cons.* Imo contrarium potius inferri debet; tum quia si cultus internus, et spiritalis est in veritate, h. e. verus, et sincerus, non potest in exteriores actus non prodire; tum quia ipsi externi actus internos excitant, redduntque vividiores; tum denique ex aliis, quas supra posuimus, rationibus. Ex eo igitur, quod Deus in spiritu, et veritate colendus est, evincitur tantummodo, externos actus, si cum internis conjuncti non sint, Deo placere non posse.

*Objic. II.* Deus intimos cordis nostri recessus intuetur, nec ei opus est, ut interiores mentis nostrae sensus exterius explicemus. Ergo.

¶ *Neg. cons. et suppositum.* Non enim ideo cultus externus exigitur, ut Deo mentis nostrae sensus aperiamus, sed alias ob rationes, quas supra explicavimus.

### Corollarium.

Ergo, vel solo rationis lumine cognosci potest, quantum a vero aberraverint nuperi quidam Theologi, qui docuerunt, solos externos actus sufficere ad obeunda religionis officia, ut recitare preces, adesse sacrificio, sine ulla mentis attentione, ac interiori religionis affectu.

CA-

---

(a) Vide haec fusiùs apud Ignatium a Cruce in *vindicis Religionis revelatas Diatrib. II. Cap. 2. § 10. Nouvelle Dictionnaire Philosophique, et c. Tom. I. verbo Culte de Religion* &c.

C A P U T III.

*Ostenditur, Religionem naturalem humano generi non sufficere, sive rationem naturalem generi humano non satis esse ad veram religionem cognoscendam, atque exercendam, qua possit ad beatam vitam pervenire.*

*Adv. I.* **D**Eistae, sive Naturalistae religionem quamdam sibi fingunt naturalem; asserunt nimirum, rationem hominis naturalem posse integrum quoddam *Systema* invenire; quod humano generi sine ulla Dei revelatione, et supernaturali adjutorio sufficiat ad beatam vitam capessendam.

II. Nos autem *religionem* non agnoscimus *naturalem* a revelata distinctam; sed cum Deus revelaverit non solum ea, quae humanam rationem superant, verum etiam nonnulla, quae ratione naturali cognoscuntur, hinc dogmata ista compendii gratia appellamus *religionem naturalem*.

P R O P O S I T I O I.

*Ad ea dogmata religionis cognoscenda, quae naturalem mentis humanae vim non excedunt, sola humana ratio, ut nunc est, non erat moraliter humano generi sufficiens.*

*Prob. I.* Religio ad beatam vitam sufficiens singulis hominibus necessaria est, et quidem a teneris annis, ex quo ratione uti incipiunt. Atqui non omnes homines eo sunt ingenio, ut valeant proprio Marte dogmata illa cognoscere, sed pauci hujusmodi sunt.

II. Etiam ii, qui ingenio sunt acriori, non possunt statim a teneris errores, quos veluti cum lacte hausserunt, agnoscere, et dogmata religionis a sensibus remota invenire; praesertim in tanta primae illius aetatis infirmitate, et veluti dementia, qua rebus sensibilibus, et ineptis occupata, in seria studia non incurrit. Requiritur ergo praeter ingenium *matura aetas*,  
lon-

longum studium, et meditatio, atque animus ab omnibus vitiis alienus, imo ab omni vitiorum cupiditate liber; aliter enim, prout est affectus, ita iudicabit. Quis autem Philosophorum ad eum iustitiae apicem pervenit?

III. Denique etiam ii, qui ingenio sunt sublimiori, maturaque aetate, licet ad ultimum usque spiritum in studia rerum divinarum incumbant, non tamen veritatem de rebus altissimis ita detegunt, ut falsa aliqua veris non admisceant. Falsa autem Deo placere non possunt, multoque minus ad beatam vitam perducere. Ergo ec. Hinc S. Thomas I. P. Q. I. art. 1. haec tria paucis complexus, *Veritas*, inquit, *de Deo per rationem investigata paucis, et post longum tempus, et cum admixtione multorum errorum perveniret, a cujus tamen veritatis cognitione dependet tota hominis salus, quae in Deo est.* Vide etiam lib. I. cont. Gent. cap. 4.

IV. Id confirmat experientia tot saeculorum, quae Evangelii praedicationem praecesserunt. Excepta enim Abrahami familia, in qua divina revelatio servabatur, universum genus humanum, etiam in politioribus Civitatibus, densissimis, ac turpissimis idololatriae tenebris obvolutum creaturas, etiam scelestissimas, pro creatore adorabat, et quidem ceremoniis flagitiosissimis, et infandis. Ipsimet philosophi in religionis negotio caecutiebant. Nam ut omittamus Epicureos apertos religionis hostes, illi ipsi, qui inter ceteros excellebant, Platonici, Peripatetici, Stoici, licet pauca quaedam vera de Deo, de mente humana, legeque naturali scripserint, quae etiam ab Hebraeis acceptis se constans est veterum Patrum doctrina, ut erudite ostendit *Natalis Alexander*; tamen ea tot absurdis foedarunt, ut nullus eorum potuerit integrum, et verum religionis *summa*, sive corpus informare. Ut cetera eorum errata praetermittam, quae commemorare non sinit harum institutionum brevitates, sed legi possunt apud *Clementem Alexandrinum Lib. V. Strom.*, et *Ciceronem* in Libris *De natura Deorum*; hoc eorum erat commune praeceptum, unumquemque sequi debere religionem populi, licet falsam, scelestamque. Huc redibat philosophicae religionis *summa*; quo quid ab-

sur-

surdus, et scelestus? et tamen ipse Tullius *Lib. II. de Leg. cap. 10.* et Epictetus *cap. 38.* hos praecipunt. De lege etiam naturali agentes in quot errorum portenta impegerint, erudite demonstravit P. Baltus (a). Praeterea etiam in iis, quae vera scripserunt, inter se non consentiebant, sed perpetuo digladiabantur, et licet unanimi consensu ea docuissent, homines tamen erant, fallique poterant, ac proinde, ut observat ipse *Lokius* non ignobilis apud incredulos, auctor (b), generi humano persuadere non poterant quae docebant, sicut revera numquam persuaserunt. Porro quantum humana ratio, qualis nunc est, valeat, non potest melius aestimari, quam ex tot saeculorum experientia.

### Solvuntur Objectiones.

*Obje. I. Veteres Patres, ut Justinus, Clemens Alexandrinus, Eusebius Caesariensis* ex testimonio Philosophorum revincunt infideles, Christianam religionem oppugnantes. Praeterea Grotius *de Verit. Relig. Christi.* Huetius *in Quaest. Aetn.* Pfannerus *in System. Theologiae Gentilis purior:* innumeras colligunt veterum philosophorum sententias, ex quibus pateat, eos omnia religionis, legisque naturalis dogmata cognovisse. Ergo.

¶ *Neg. cons. 1º.* Enim Patres illi docent, Gentiles Philosophos, quidquid veri de religione scripserint, ab Hebraeis accepisse; revera credibile non est, eos, qui tot regiones peragrabant, ut rerum notitiam adipiscerentur, ignorasse religionem Hebraeorum, quam Graecis, et Romanis non fuisse ignotam patet ex Tacito, Diodoro Siculo, aliisque. Vide *Nat. Alexandr. Hist. IV. Mundi aetatis cap. 7. art. 1. 2º.* numquam docent Patres, nec docere poterant, singulos Philosophos omnes simul religionis naturalis ve-

ri-

---

(a) Baltus *Parallele de la philosophie Chrétienne avec celle des Payens.*

(b) *Christianisme raisonnable tom. 1. cap. 14.*

ritates unanimi consensu tradidisse; sed tantum sper-  
sas esse in variis eorum libris veritatis scintillas, ita  
ut unus unam, alius aliam cognoverit: 3.<sup>o</sup> has ipsas  
veritatis scintillas innumeris erroribus eos obscurasse,  
et veluti extinxisse; 4.<sup>o</sup> inter se non consensisse,  
ac proinde populo persuadere non potuisse quod do-  
cebant.

*Objic.* II. Recentiores Deistae, imo ipsi religionis  
Christianae acerrimi defensores ex ratione demonstrant  
veritatem omnium dogmatum religionis naturalis.  
Ergo.

¶ *Dist. ant.* Ex ratione illustrata per revelati-  
onem, quam ipsi cum lacte hauserunt, *conc.* Ex ra-  
tione sola, *neg.* Postquam enim humana ratio divi-  
nae revelationis lumine illustrata est; facile demon-  
strat, dogmata naturalis religionis esse rationi naturali  
consentanea, ut observat etiam *Lokius* (a) et ipse  
*Russojus* in *Emilio* Tom. III, sed id efficere non po-  
tuit humana ratio per tot saecula, quae Evangelii  
praedicationem praecesserunt, neque modo efficere po-  
test iis in regionibus, in quibus Evangelium non est  
praedicatum. Imo quod animadversione dignum est,  
ipsi Deiste, etiam in tanta luce Evangelii caecutiunt,  
multaque docent rationi naturali contraria, in quibus  
utique recensendis nisi obstarēt instituti brevitās, pos-  
semus esse deserti; ita ut si inter idololātras nati es-  
sent, non modo religionem illam coluissent, et de-  
fendissent, verum et multo turpius, quam Gentiles  
Philosophi errassent. (b)

*Objic.* III. Ratio naturalis ideo homini a Deo indi-  
ta est, ut religionis, legisque naturalis dogmata co-  
gno-

(a) *Christianisme raisonnable* Cap. 14. Vide *D. Le lande*  
*Nouvelle Demonstration evangelique* Part. I. Cap. 21. *Bru-*  
*ker Dissert. Praet. ad Hist. Philos.*

(b) *V. Lettres Critiques de M. Gauchat*, ubi recentiorum  
incredulorum errores recenset. Vid. etiam *D. Nonnotte*, qui  
errores *Volterri* late confutat, et *Valsecchium* *Lib. II. Pen-*  
*dam. della Relig.*



gnosceret. Absurdum igitur est, homini ad isthac cognoscenda rationem naturalem non sufficere.

*¶ Neg. cons.* Hoc enim est unum ex iis arcanis, ad quae explicanda naturalem rationem non sufficere, sed necessariam esse Dei revelationem, inferius dicemus. Certum est, rationem ad hoc homini fuisse a Deo inditam, ut naturalem saltem cognosceret veritatem. Et tamen exploratum est ex tot saeculorum experientia, rationem naturalem, qualis nunc est, ad id non posse pervenire. Unde hoc? Certe hoc arcanum ratione naturali explicari non potest, confugiendumque ad divinam revelationem, quae nos edocet, rationem naturalem non esse talem, qualem Deos homini indiderat, sed originali peccato obscuratam, et corruptam.

## PROPOSITIO II.

*Sunt nonnulla scitu maxime necessaria ad veram religionem cognoscendam, beatamque vitam obtinendam, quae homo ratione naturali intelligere non potest.*

*Probatur earum rerum enumeratione.* I. Si quis hominem attentè consideret, admirabilem in eo partium discordiam deprehendet. Nam; ut praeterritam dolores infirmitates, ipsamque mortem, quas miseras non potest intelligi solo naturae lumine, cur Deus sapientissimus tam nobili; atque exae creaturae suae intulerit; quis non videt, quantus sit in intellectu erga veritatem impetus, et tamen quantae in rebus etiam naturalibus tenebrae, ita ut hominis intellectus perpetuum erroris ludibrium sit? Quis non experitur, quantus in voluntate summi boni; et iustitiae amor, et quanta simul abjectio, et cupido rerum pessimiarum, ita ut semper nitatur in vetitum, et licet meliora videat, probetque, deteriora tamen sequatur: uno verbo quis non experitur, carnem contra spiritum, rectamque rationem perpetuo concupiscere.

scere, praeliari, et vincere (a) ? Atqui ratio naturalis ista explicare non potest, ut patet ex veteribus philosophis, qui ad haec enodanda vel se impares lesse fassi sunt, unde ait Plinius *Lib. VII. Hist. nat.* *Non satis aestimari, parensne homini natura, an tristior noverca fuerit*, vel tot monstrosas slexerunt opiniones, inter quas illae absurdissimae, et simul maximo plautu exceptae, vel duo scilicet esse rerum principia, unum bonum, et alterum malum, et utrumque in hominis creatione suam contulisse symbolam, vel perpetuam esse animarum humanarum μεταψυχωσιν, sive transmigrationem. Et tamen necessarium est hominibus tot malorum causam, et remedium cognoscere. Ergo.

II. Ratio naturalis praecipit, cultum externum Deo deberi. Atqui ratio naturalis cum cultum, qui summo nomini sit gratus, definire non potest, ut patet ex tot saeculorum experientia. Gentiles enim sola ratione ducti flagitiosis, obscenis, ridiculis ceremoniis numina coluerunt, quas ceremonias, licet sacrilegas, ipsimet Philosophi servandas docebant. Hinc Pilato in *Epinomide*, et, in *Secundo Alcibiade* hanc definitionem ab ipso Deo expectandam clare pronuntiat, omnesque ii, qui falsos religionis instituerunt ritus, eos a Diis se didicisse finxerunt, adeo omnium animis opinio insederat, externum religionis cultum nonnisi ab ipso Deo dictari posse. Ergo.

III. Nullus hominum a peccato immunis est, licet ad solam legis naturalis regulam attendat. At ratio naturalis cognoscit, Deum esse malorum vindicem. Ergo post peccatum aut desperandum est, aut videndum, utrum, et qua ratione Deo reconciliari, aeternasque poenas vitare possimus. Atqui hic omnino deficit ratio naturalis. Quis enim sola ratione definiat, Deum peccatoris poenitentia ad misericordiam flecti, nec justitiae; quae in eo summa est, dare locum; imo toties misereri Deum, quoties homo in peccata relabitur? Certe hoc in homine judi-

eo videretur reprehendendum, imo innumeris sceleribus aperire viam. Placariue Deus sacrificiis poterit? At ipse nulla re indiget, neo venalis, corruptusque iudex est, ut muneribus flectatur. Certe hic humana ratio, quocumque se vertat, omnino haeret, et tamen hoc est scitu maxime necessarium. Ergo. Vide de hoc argumento *Jacobum Ode Tholog. naturalis. Prop. 66. 67. et 68.*

*Corollarium.*

Ergo necessaria erat homini divina revelatio, qua edisceret ea, quae scitu necessaria erant ad religionem exercendam, sive illa rationi essent impervia *ex prop. II.*, sive non essent *ex prop. I.*

## CAPUT IV.

*Ostenditur, Divinam bonitatem, et misericordiam maxime deceuisse, ut humano generi in iis ignorantiae tenebris, de quibus dictum est Capite superiori, succurreret, veramque religionem revelaret.*

*Ado.* **N**ecessariam fuisse homini revelationem verae religionis, satis ostendimus. Nunc inspicendum est, utrum decuerit, Deum ad hoc suam demittere maiestatem, ut in re tot, tantisque tenebris implicata, hominum praeceptor factus, eos veritatem edoceret.

## PROPOSITIO

*Divinam bonitatem maxime decebat, ut humano generi maximis ignorantiae tenebris obruto succurreret, veramque religionem revelaret.*

*Prob.* Deus ab homine cultum exigebat, nec aliter homo poterat ad beatam vitam pervenire, ut *Cap. II* demonstratum est; nemo tamen sola naturali ratione

ne veram religionem, qua et Deo placeret, et ad beatam vitam perveniret, cognoscere poterat, ut *Cap. III.* ostendimus. Atqui divinam bonitatem, et misericordiam non decebat, ut hominem, quem ipse creaverat, omnino in peccato, et aeterna miseria dereliqueret. Ergo.

*Dices* Vel homo ratione naturali veram religionem cognoscere poterat, vel non. Si primum; frustra a Deo revelationem expectabat. Sin alterum; jam ei error non vertebatur culpae; ac proinde nec Deo displicuisset, nec excidisset a vita beata, si in negotio religionis errasset. Ergo.

*¶ Dist. 1. prop.* Nonnulla dogmata absolute cognoscere non poterat, de quibus dictum est *Cap. III. prop. II.* alia vero absolute quidem poterat; sed ob naturae humanae corruptionem, passiones, aliaque impedimenta moraliter non poterat cognoscere, ut diximus supra *Cap. III. prop. I.* Nec inde sequitur, errorem si non fore vertendum culpae; tum quia plerumque ex suis cupiditatibus manasset error, tum quia pro veritate, quam ignorabat, scelestissimam sibi finxisset religionem, ut revera fecerunt Gentiles, quae religio horrendum est dicere, quod aut Deo placuerit, aut ad beatam vitam perduxerit.

Cum ergo docuerimus, et homini divinam revelationem fuisse necessariam, et Deum maxime decuisse, ut hominem divino magisterio instrueret in negotio religionis; videamus nunc, quales esse oportebat divinae revelationis dotes, et characteres, si Deus homini veram religionem patefacere voluisset; ne forte falsam revelationem cum vera confundamus, nec alteram ab altera valeamus discernere.

## CAPUT V.

*Si Deus homini veram religionem revelare voluisset, demonstratur, eum sicut nihil proponere poterat humanæ rationi contrarium, sic multa proponere potuisse dogmata, quæ rationem humanam exsuperant.*

*Adv.* Docet *Baelius* variis in locis suorum operum, quæ Scepticismi, et impietatis promptuaria dici possunt, Deum multa posse revelare, imo revera revelasse rationi naturali contraria. Ex adverso *Deistæ* passim contendunt, nihil Deum revelare posse supra humanam rationem. Utrumque falsum est.

## PROPOSITIO I.

*Nihil Deus revelare potest rationi contrarium.*

Non possumus id evidentius demonstrare, quam verbis *S. Thomæ Lib. I. cont. Gent. Cap. 7. Ea, quæ naturaliter rationi sunt insita* (adde et quæ ex iis evidenter sequuntur), *verissima esse constat, in tantum, ut nec ea esse falsa sit possibile cogitare.* Quia igitur solum falsum vero contrarium est, ut ex eorum definitionibus inspectis manifeste apparet, impossibile est, illis principiis, quæ ratio naturaliter cognoscit, veritatem fidei (h. e. a Deo revelatam) contrariam esse.

*Item . . . Principiorum naturaliter notorum cognitio nobis divinitus est indita, cum ipse Deus sit auctor nostræ naturæ. Haec ergo principia etiam divina sapientia continet. Quidquid igitur principiis hujusmodi contrarium est, est divinæ sapientiae contrarium. Ea igitur, quæ ex revelatione divina per fidem tenentur, non possunt naturali cognitioni esse contraria, Baelium autem fust confutavit Leibniti in Praeloquio Theodiceæ, aliique.*

*Hinc insert S. Thomas, quaecumque argumenta contra fidei*

*fidei dogma ponantur, haec a principiis primis naturae inditis non recte procedere: unde nec demonstrationis vim habent, sed vel sunt rationes probabiles, vel sophisticae. Quod est animadversione dignissimum. Ex quo etiam sequitur, falsam esse illam Pomponatii doctrinam, scilicet posse aliquid esse verum ex philosophia, et ratione naturali, et falsum ex fide; cui doctrinae innituntur Philosophi nonnulli, qui dum aliqua contra fidem effutunt, satis se putant a censura tutos, dum ajunt, se loqui ut philosophos.*

*Hinc etiam patet, si quae religio aliqua doceat rationi naturali evidenter contraria, eam non posse a Deo esse revelatam.*

## PROPOSITIO II.

*Potest Deus nonnulla homini revelare mysteria, quorum modus, et ratio humanae mentis captum longe superant.*

*Prob. I. Deus in rerum corporearum creatione multa nobis ostendit, quorum naturam, modum, et rationem intelligere non possumus, licet certo sciamus, ea existere. Ergo pariter in revelatione rerum, a sensibus nostris remotarum, multa potest nobis arcana patefacere, quorum modum, et rationem investigare intellectus noster non valeat.*

*II. Inter ipsos homines, licet ejusdem sint naturae, tanta est ingeniorum inaequalitas, ut alter clare intelligat, quae alter intelligere, et explicare non possit. Ergo Deus, qui humanae mentis aciem infirmam, atque hebetem infinite superat, multo magis infinita intelligit, et comprehendit, quorum rationem homines percipere non valeant. Porro, si stultus esset rusticus fidem abnuens iis, quae a doctore proponuntur, ea tantum ratione, quod illa intelligere, et explicare non potest; multo stultior esset homo, qui fidem habere detrectaret Deo proponenti mysteria humanae rationi impervia.*

*Ergo non ideo putandum est, religionem non fuisse*

se a Deo revelatam, quod multa contineat dogmata, quorum rationem intelligere non possumus.

*Solvuntur objectiones.*

*Objic. I.* Divinam sapientiam maxime decet; ut si homines alloqui velit, humanae mentis imbecillitati sese accomodet. Ergo non decet, Deum revelare homini mysteria.

#. *Dist. ant.* Ut se se ita accomodet, ut nihil proponat, quod homo intelligere non possit *quoad substantiam*, *conc.* Quoad modum, et rationem, *Neg.* Sicut ergo non dedecet Dei sapientiam, quod multa creaverit, quae licet certo sciamus existere, tamen explicare nesciamus; ita non dedecet, quod aliquid revelet, quod licet sciamus, esse verum; et intelligamus quoad substantiam, nesciamus tamen ejus explicare modum, et rationem.

*Objic. II.* Inutilis est homini mysteriorum notitia, Ergo.

#. *Neg. ant.* Sicut enim non ad discipulum, sed ad magistrum pertinet videre quid ipsi discipulo scire sit utile, quid non; ita Dei est definire quid expediat scire hominem in religionis negotio caccutientem, hominis vero est Deo agere gratias, quod occulta sapientiae suae ei revelaverit; et subjiciendo intellectum in obsequium Dei, summam illius sapientiam venerari, et agnoscere dominatum, quem ille habet in ipsum creaturae intellectum. Praeterea mysteria scire nedum utile, sed necessarium est, ut *ex. gr.* humanae naturae corruptionem per peccatum, reparationem per Christum, adjutorium per Dei gratiam etc.

*Objic. III.* Deus homini rationem indidit. Absurdum igitur est, ut ei rationis usum impediat per revelationem mysteriorum.

#. *Dist. ant.* Ut cognosceret ea, quae scire expedit, *conc.* Ut omnium rerum intelligat causas, modum, et rationem, *neg.* Multarum enim rerum etiam naturalium scire sufficit existentiam, licet causam, et rationem ignoremus. *Ad conf.* vero *nego suppositum*; non enim revelatio mysteriorum impedit rationis usum;

imo

imo hoc est rationi maxime consentaneum, ut fidem habeamus ei, quem plus quam nos intelligere, certo scimus.

*Objic. IV.* Mysteria sunt supra rationem. Atqui quod est supra rationem, est etiam contra rationem; nam 1°. eorum, quae sunt supra rationem non apparet convenientia cum ratione; deinde quae supra rationem sunt, talibus argumentis oppugnari possunt, quae humana ratio dissolvere non valet. Ergo. Ita *Baelius*.

*¶. Neg. min.* Illud enim supra rationem esse dicitur, cujus humana mens nequit explicare causam, rationem, atque modum: illud vero contra rationem, quod mens cognoscit repugnare rationi; quae duo maxime discrepant. Ad 1. *confirm. resp.* aliud est non videre alicujus dogmatis congruentiam cum naturali ratione; aliud est videre ejus discrepantiam, et repugnantiam. Ad 2. *dist.* Non potest argumenta illa dissolvere, explicando mysteriorum rationem, *conc.* non potest dissolvere demonstrando, ipsa argumenta non recte procedere ex principiis naturalibus, *neg.*

## CAPUT VI.

*Si Deus homini aliquid revelare voluisset, expenditur quibus signis revelationem confirmare pro sua sapientia debuerit.*

**J**AM videamus utrum Deus veram religionem homini patefecerit, et quibus signis ea internosci queat, cum omnes ferme religionem suam a Deo revelatam esse jactent.

## PROPOSITIO I.

*Deus ex sua sapientia revelationem talibus confirmare debebat signis, quae nonnisi ab ipso Deo patrari poterant.*

*Prob.* Deus enim nihil frustra molitur. At frustra homini religionem revelasset, nisi eam talibus confirmasset signis; adhuc enim homines dubitare potuissent,



sent, utrum Deus locutus esset; atque ita adhuc inter opinionum ambages fluctuare, praecipue si revelatio contineret mysteria humanae rationi impervia. Ergo.

PROPOSITIO II.

*Prophetiae, et miracula proprie dicta sunt signa, quae non nisi ab ipso Deo patrari possunt, ac proinde ea sunt signa, quibus revelationem a Deo confirmari oportebat.*

*Prob. I. de Prophetiis.* Prophetia enim est praedictio futuri, quod a libera hominis, aut. etiam ipsius Dei voluntate pendeat. At id nequit efficere ulla creata mens, etiam Angelica; licet enim homines, aut Angeli praedicere possint ea, quae a naturalibus causis orientur, in quibus etiam falli possunt, si Deus causarum naturalium vim impediat; tamen quae pendunt ab hominis, aut etiam Dei libera voluntate, nemo, nisi Deus praevidere, et praedicere certo valet. Unde *Isaias*, falsa esse numina a gentibus culta ex eo demonstrat, quod futura praedicere non possunt. *Annuntiate quae ventura sunt in futurum, et sciemus quia dii estis vos. Is. XLI. 23.* et *Tertullianus Apolog. 20. Idonum, inquit, testimonium divinitatis est veritas divinationis.* Hinc Idololatrae divinationem affinxerunt numinibus suis, quorum tamen oracula erant vel falsa, vel ambigua, et si non semper (ut contendit *Antonius Van Dale* in *Historia Oraculorum*) plerumque saltem a sacerdotum calliditate concinnata.

*Prob. II. de Miraculis.* Miraculi enim nomine intelligimus opus rarum, quod vel ratione substantiae, vel ratione modi sit, praeter ordinem, et vires totius naturae creatae, corporeae scilicet, et spiritalis. Unde ad veri miraculi rationem requirimus, ut sit opus non modo rarum, et extraordinarium, cujusmodi esse queunt multa vel naturae, vel Angelorum sive bonorum, sive malorum opera; verum etiam totius creatae naturae vires superans. Ergo verum miraculum non nisi ab ipso Deo patrari potest.

## Corollaria.

I. Hinc sequitur, divinam revelationem prophetiis, et miraculis confirmari debuisse; alia enim signa etiam ab creaturis fieri poterant.

II. Religionem prophetiis, et miraculis firmatam, falsam esse non posse, Prophetiae enim, et miracula edi non possunt, nisi a Deo, qui non potest esse falsi auctor, aut adstipulator, licet ad verum confirmandum uti possit ministerio hominum malorum, *Matth. VII. 22.* imo etiam brutorum, ut de asina *Balaam* legimus *Num. XXII. 30.*

III. Religionem docentem evidenter falsa, non posse veras habere prophetias, aut miracula; atque ideo postquam in aliqua religione demonstraverimus contineri dogmata rationi contraria, ut in Mahumetana, et Idololatrica, frustra nos in ejus miraculis confutandis tempus terere.

## Solvuntur objectiones.

*Objic. I. Cum Spinoza, et Boulengero.* Verum miraculum a Deo fieri non potest. Miraculum enim derogaret naturae legibus; atqui Deus naturae legibus, quas ipse statuit, derogare non potest, cum sit immutabilis. Ergo incepte ad divinam revelationem firmandam miracula exiguntur.

*¶. Neg. ant. Ad confirm. resp.* Data maj. quae negari posset, cum miraculum potius sit supra, quam contra naturae leges, *Neg. min.* Non enim mutatur Deus miracula faciens, qui ita ab aeterno sanxit naturae leges, ut etiam ab aeterno exceperit certos effectus, quos sibi reservavit patrandos ad majorem sui gloriam, et hominum utilitatem. *Vide S. Thom. De Potent. Q. VI. art. 1. ad 6.* Dubitare igitur, utrum Deus miracula patrare possit, hominis est insani, ut *Rossius*, ipseque *Baelius* fatentur, atque hac in re *Spinozistas* irrident.

*¶. Inst.* Naturae leges vel ipsa Dei voluntas sunt, vel ejus voluntate Dei necessario connexae. Atqui nihil

contra voluntatē suam operari potest Deus. Non potest igitur patrare miracula.

*n. Dist. maj.* Sunt connexae cum voluntate Dei generali, cui non repugnat exceptio in nonnullis peculiaribus causis, quas ipsa Dei voluntas ab aeterno constituit, *conc.* Secus, *neg.* Una igitur, et simplex Dei voluntas et generales naturae leges, et peculiares exceptiones ab aeterno decrevit, atque ideo miracula contra Dei voluntatem non sunt, ut inepte adversarii garriunt.

*Obje.* H. Miraculum est opus rarum supra naturae vires. Atqui nemo novit omnes etiam occultas naturae vires. Ergo nemo scire potest, utrum opus aliquod verum sit miraculum, ac proinde frustra ad probandam revelationem adhibetur.

*n. Dist. min.* Et tamen omnes compertas habent ex experientia constantissima quasdam naturae leges, et vires, quae sufficiunt ad miraculum agnoscendum, *conc.* Secus, *neg.* Igitur ad miraculum agnoscendum necesse non est omnes occultas naturae vires habere perspectas, sed satis est ex longa, et constanti experientia cognovisse aliquas. Sic *ex gr.* ex constanti experientia scimus, hominem vere mortuum reviviscere non posse; (iis enim, qui falso mortui putantur, ut sunt laqueo, vel aquis praefocati, vel epilepsia correpti, humana arte succurri potest). Si enim essent aliquae in natura vires, quae id efficere valerent, id aliquando effecissent.

Atque hac ratione omnes Rousseji argutiae, et cavillationes facile solvuntur.

*Inst.* Homines, aut saltem angeli mali multa patrare possunt mira praeter constantissimas naturae leges. Sic Magi Pharaonis *Exod. VII. et VIII.* Simon Magus *Act. VIII.* Apollonius Thyanaeus teste *Philosttrato*, et *Jerôcle*, Haeretici apud Augustinum *Lib. de Unit. Eccl. cap. 16.* Gentiles apud eundem *Lib. X. de Civ. Dei cap. 16.* Sic etiam Vespasianus, testibus *Suetonio*, et *Tacito*, caecum sputo curavit, et Antichristus multa creditur prodigia patraturus, ut inducantur in errorem, si fieri potest, etiam electi. Ergo non sufficit, aliquid esse praeter constantes na-

turæ leges, ut judicetur miraculum, hoc est opus ipsius Dei.

*¶ Dist. ant.* Semper tamen aliqua patet ratio, qua istae prestigiae a veris miraculis dignosci queant, *conc.* Nulla patet, *neg.* Nam 1°. daemones, qui, ut dicemus suo loco; utendo naturalibus causis, quarum exquisitam habent notitiam, multa mira patrare possunt, nihil valent, nisi ex Dei permissione. Non est autem putandum, infinitam Dei bonitatem, et sapientiam ita ista permittere, ut nulla hominibus ratio suppetat cavendi errorem, scilicet vel ex fine evidenter pravo, vel saltem inutili, ac proinde sapientia Dei indigno, vel ex alia circumstantia, ex qua pateat, opus non a Deo, sed a naturalibus causis per daemones adhibitis esse profectum. Et talia sunt Magorum Pharaonis, Simonis Magi, et Antichristi prodigia. 2°. Hominum veteratorum fraudes sicut humana industria concinnari, sic humana diligentia detegi possunt. Ceterum quae de Haereticorum, Gentilium, et Apollonii Thyanaei praestigiis narrantur ab auctoribus minus probatae fidei non coarctis, et causae suae servientibus, sicut gratis asseri videntur, ita et gratis negari possunt. In Vespasiano vero nimis aperta fuit fraus adulantium aulicorum, ut principem illum recens a militibus electum, necdum satis in imperio firmatum, augustiorem redderent apud vulgus.

*Inst. 2.* Potest Deus in peccati vindictam spargere poenalem caecitatem super illicitas hominum cupiditates, et ita permittere daemonum prodigia, ut nulla pateat ratio ea discernendi a veris miraculis. Ergo.

*¶ Neg. ant.* Si enim id Deus faceret, sibi ipse auferret modum, quo hominibus voluntatem suam certo posset patefacere; semper enim homines dubitare possent, ne forte in peccati vindictam Deus vim, et potestatem demonibus permisisset maxima patrandi prodigia.

*Objic. III.* Non eadem est inter ipsos religionis reyclatae defensores miraculi definitio. *Clarkius* enim, miraculum esse ait operationem cujuscunque Entis intel-

intelligentis, homine superioris, consueto naturae ordini contrariam. Abbas de Houeville effectum rarum, et stupendum ex incognita, sed naturali causarum naturalium harmonia, et temperatione: alii aliter definiunt. Ergo.

*R. Neg. cons.* Illas enim definitiones merito rejicimus; ad confirmandam enim Dei revelationem non sufficit, nisi opus, quod ab ipso Deo patrari solum potest.

*Objic. IV.* Cum profano Auctore *Cogitationum Philosophicarum* (a). Tutius est fidere iudicio rationis, quam sensibus, qui saepe nos fallunt. Satius est igitur in Religionis negotio incedere via demonstrationis, quam miraculorum.

*R. 1. Dist. ant.* In iis rebus, ad quae ratio sufficit, *conc.* in certis, *neg.* Porro ad ipsam religionem naturalem recte constituendam sola ratio non sufficit, ut *Cap. 11.* demonstravimus, multo minus ad religionem revelatam, praesertim si mysteria contineat.

*R. 2. Neg. cons.* Qui enim miraculis nititur, etiam iudicio rationis, et demonstratione utitur. Sicut enim ex effectibus, nempe ex creatoris demonstramus, esse creatorem Deum, ita etiam ex operibus divinis demonstramus, ipsum Deum locutum esse; unde Auctoris istius non minus despicienda est stupiditas, et insania, quam detestanda impietas.

## CAPUT VII.

*Demonstratur religionem Christianam veris confirmatam esse prophetiis, et miraculis.*

*Ado.* JAM videamus; utrum Religio Christiana sit firmetur signis, quibus diximus *Cap. superiori* confirmandam esse divinam revelationem. Sed sicut Geometrae nonnulla praestituunt *postulata*, seu nonnulla ponunt ab omnibus concedenda; ita etiam nos

(a) *Pensées Philosophiques*

nos ea, quae sequuntur, ponimus concedenda ab omnibus, qui Sceptici, hoc est fatui non sunt.

I. Quaestio haec: *utrum ad confirmandam hanc religionem miracula, et prophetiae editae sint*, historica est, seu, ut ajunt, *quaestio facti*, non juris; ac proinde solvi debet testibus, et monumentis, de quorum fide insanum sit dubitare.

II. Potest aliqua historia eadem ferme certitudine teneri, qua mathematicae theses, licet objectum, et probationes diversa sint, et ideo prima dicatur, *certitudo moralis*, altera *mathematica*. Sed ne ad inutilem dilabamur quaestionem de aequalitate utriusque certitudinis, sufficit hic statuere, quod possit aliqua historia tantam habere apud homines certitudinem, quae mentem omnino quietam, ac securam reddat, ita ut insani hominis sit de illa dubitare. Sic certe scimus fuisse *Alexandrum, Caesarem, etc.*

III. Libri Novi Testamenti, quibus continentur historicae religionis Christianae primordia, et quos hic nondum assumimus, ut divinos, genuini sunt, hoc est scripti eo tempore, et ab iis auctoribus, quorum nomina praeseferunt: nempe ab Apostolis, primisque religionis Christianae Fundatoribus. Si enim non dubitamus, quin genuini sint libri *Ciceronis, Caesaris, Livii*, quia omnibus saeculis iis auctoribus attributi sunt, ridemusque *Harduinum* contraria effutientem; multo minus dubitare possumus, quia genuini sint libri Novi Testamenti. 1°. Enim omnibus saeculis laudati sunt ut genuini, idque non solum a catholicis, ut *Clemente Romano. Epist. 1. et 2. Ignatio. Epist. ad Ephes. ad Smyrn. et ad Polycarp. Polycarpo, Papia, Justino, Clemente Alexandrino*, aliisque, quorum testimonia vide apud *Valsecchium*, et *Bergerum* (a), verum etiam ab haereticis, qui ex ipsis Libris argumenta ad suam haeresim stabilendam miscere detorquebant, ut observant *Irenaeus*, auditor *Polycarpi* discipuli S. Joannis Lib. III. contr. haeres. Cap. 2. n. 7. imo et a Pa-

ga-

---

(a) Valsecchi *La Religione Vincitrice Tom. II.* Bergier *La certitude des preuves du Christianisme.*

ganis, ut *Celsus* apud *Origenem*, et *Juliano* Apostata apud *Cyrillum Alex.* 2°. Quod non accedit aliis Scriptoribus; religiose servati sunt ab universa Ecclesia; hoc est a societate per universum orbem diffusa; quae libros illos semper venerata est, ut divinos; eorumque autographa in Ecclesiis Apostolicis diu servata sunt, ut testatur *Tertullianus Lib. de Praescript.* Hinc libri illi nec omnino de integro suppositi, nec in rebus ad religionem pertinentibus corrupti esse potuerunt. Statim enim ab uno homine, vel una Ecclesia concinnata fraus a ceteris agnita, atque rejecta esset; esto in quibusdam levioribus variantes lectiones inciderint, propter tot myriades exemplarium; quidquid enim humanis manibus teritur, humanam infirmitatem experiri debet, ut patet ex profanorum scriptorum variantibus lectionibus longe pluribus; licet in minori copia exemplarium; quam varietatem non necesse erat, Deum per miraculum impedire, cum ad summam religionis non pertineret.

*Dices.* Primis Ecclesiae saeculis nonnulli apocrypha Evangelia, et Scripta Apostolorum nomine concinnarunt, ut videre est apud Jo. Alb. Fabricium in *Codice Pseudepigrapho*, cujus eruditione, tamquam dorvis pavonum plumis ornatus *Freret* inserit, potuisse etiam Libros Novi Testamenti, tamquam genuina Apostolorum opera, falso venditare.

*¶ Neg. cons.* Nam illa ipsa religiosa cura, quae Ecclesia servabat genuina Apostolorum opera, demonstrabat esse supposititia quae non erant eadem traditionis serie probata. Unde ex historia scriptorum apocryphorum magis elucet veritas eorum, quae genuina erant; hinc enim patet Ecclesiam non caeca credulitate suscepisse ut Apostolicos omnes libros, qui Apostolis tribuebantur, sed eos tantum, quos ab iis conscriptos esse perpetua traditione constabat. Adde his, quod ipsa apocrypha Evangelia nostris consentiebant quoad substantiam (ut ita dicam) gestorum Christi, ejusque miraculorum, licet narrativa adjungerent vel fabulosa, vel narrata ab Apostolis, quorum nomina praeferebant, non tamen scripta

in nostris Evangelis, ut videre est in paucis illis Apocryphis, quae supersunt apud *Fabricium*. Hinc si hodie apocrypha illa superessent, majori numero testimonium firmaretur veritas Evangelicae historiae. His itaque positis ad rem ipsam adgrediamur.

## §. I.

## P R O P O S I T I O.

*Christiana religio veris confirmata est prophetiis.*

*Prob.* Prophetiae, quae Christianam religionem probant, partim editae sunt ante Christi adventum, quas tamen Gentiles suspicari non possunt cum Porphyrio apud Hieronymum. *Prooem. in Daniel.* a Christianis confictas, cum ante Christi adventum servatae fuerint, et modo servantur religiosissime a Judaeis Christianae religionis hostibus, ut observat Augustinus in *Psalm. LVIII.* partim ab ipso Christo, ejusque discipulis. Adeo autem luculentae sunt prophetiae, quae Christum praecesserunt, ut S. Justinus in *Dialogo cum Tryphone* fateatur, se hoc uno argumento ex philosopho Gentili factum esse Christianum, et Origenes *Lib. I. contra Cels.* asserat, hoc esse argumentum omnium validissimum, unde *Huetius* ex solis ferme prophetiis, quae Christum praecesserunt, Demonstrationem Evangelicam concinnavit.

Porro prophetias ante Christum editas in Libro VI. de Incarnatione preferemus contra Judaeos, ne eadem iterum cogamur repetere. Sufficit hic unam, aut alteram commemorare. I. *Daniel. Cap. IX.* praedicat, post annos 483., ex hujus Judaeis facta fuisset potestas aedificandae Hierusalem, occidendum esse Christum, et post ejus mortem Urbem Hierusalem, et templum ( quae nondum erant tempore Danielis aedificata ) funditus evertenda, et abolenda sacrificia. Haec autem, quae nemo tot ante saeculis suspicari potuisset, adamussim completa nemo non videt. II. *David in Psalmo XXI., et in Psalmo LXXXV. et Isaias Cap. II., et Cap. XLIX. et LXI.* praedicunt,

abq.



abolendam esse idololatriam, et omnes gentes adoraturas esse Deum Israël. Hoc autem quia vel cogitare potuisset, cum Idololatria longe, lateque per universum esset orbem statuta; Israelitarum vero et gens, et religio omnibus Gentibus odio esset? Et tamen ex quo Christiana religio prædicari coepit, idololatria paulatim concidit, donec tandem extincta est. III. *Malachias Cap. I.* vaticinatus est, Judæos a Deo rejiciendos, Gentiles vero in Ecclesiam adscribendos, quod et factum conspicimus.

Jam ad ipsas Christi prophetias veniamus. I. Christus *Matth. XX. 17.* et seq. omnes passionis, et mortis suae circumstantias minutissime prædixit. Ascendens *Jesus Jerosolymam*, assumpsit duodecim discipulos secreto, et ait illis: ecce ascendimus *Jerosolymam*, et *Filius hominis tradetur principibus sacerdotum*, et scribis, et condemnabunt eum morte, et tradent eum gentibus ad illudendum, et flagellandum, et crucifigendum, et tertia die resurget. addit etiam *Matth. XXVI.* omnes alias circumstantias loci, diei, horae, discipuli a quo tradendus erat etc. Hæc autem omnia Christus nonnisi divinitus prævidere poterat. Nam populus universus tanto eum prosequabatur amore, ut potius temperandus fuerit ejus ardor, ne eum Regem constitueret. Et licet dicere velimus, Christum per timuisse invidiam Sacerdotum, non tamen præscire potuit, se ab illis quidem damnum morte, sed tamen a Gentilibus flagellandum, illudendum, et crucifigendum. Nam si Sacerdotum perfidia usque ad necem Christi exarsisset; propius erat, ut eum lapidibus appeterent, quod et alias facere conati erant, quam ut apud Judicem Gentilem eorum invidiæ non participem accusarent, apud quem nullius criminis reum peragere potuissent.

Neque dicas, post Christi passionem *Matthæum* hanc prophetiam commentum esse; nam præter consensum aliorum Evangelistarum, si *Matthæus* fingere voluisset, non utique addidisset prophetiæ illa verba et tertia die resurget, nam si ista prædictio resurrectionis fuisset impleta, jam opus non erat

erat praedictionem mortis fingere; sin. minus, et tunc falsitas unius praedictionis etiam aliis verbis, et factis ejus fidem abstulisset. Ceterum objectiones contra veritatem Evangelistarum solvemus inferius.

II. Idem Christus *Matth. XXIV.*, et *Marci XIII.*, et *Luc. XIX.*, et *XXI.* cum omnia apud Judaeos essent tranquilla, praedicit Urbem Hierosolymorum paulo post, idest vivente adhuc generatione illa, everendam, templum diruendum, ita ut non remaneret lapis super lapidem, Judaeos magna ex parte interuersione delendos, reliquos captivos abduccendos, idque tam clare, tamque minute, ut si conferas Christi verba cum eventu, quem *Josephus Historicus* memoriae prodidit, putes Christum historiam potius descripsisse, quam prophetasse.

III. Praeterea praedicit Christus, Judaeos rejciendos, Gentiles vero ad cultum veri Dei adsciscendos; imo Evangelium longe, lateque per universum orbem praedicandum, atque credendum; ita ut ex ovibus, hoc est hominibus omnium gentium fieret unus ovile, et unus pastor, hoc est una Ecclesia sub uno Pastore collecta, ut in variis Evangelii locis videre est. Hoc autem, quod naturaliter fieri omnino non poterat, ut infra ostendemus, videmus peractum, imo ostendemus peractum paulo post Christi mortem.

IV. Praetermittimus innumeras alias Christi prophetias, ut de proditioue Judae, de negatione Petri etc. et manifestationes secretorum humani cordis, quae, non minus quam prophetiae, opus divinum sunt.

Addi possent etiam prophetiae discipulorum Christi, qui post ejus mortem Christianam religionem propagarunt. Nam 1. *Lucas Act. XI. 17.* refert prophetiam Agabi de fame universo orbi imminente, quae et accidit Claudio imperante, et *Act. XIII. 1.* donum prophetiae in multis discipulis Antiochenae Ecclesiae eluxisse scribit, et eundem aliis in locis, alias refert discipulorum Christi prophetias, quod utique si falsum fuisset, non esset ausus scribere ventibus iis, a quibus falsi revinci poterat. Paulus

vers in Epistola I. ad Cor. Cap. XII. inter cetera Dei dona, quibus nascenti Ecclesia illustrabatur, prophetiam recenset, et Cap. XIII. praescribit modum, quo prophetia, aliisque donis uterentur, *ut omnia honeste, et secundum ordinem fierent*. Quomodo autem potuisset aliquis, nisi omnino effrons, et fatuus Corinthiis praecipere modum, quo prophetia uterentur, nisi manifeste hoc Dei donum apud illos fuisset? Denique insignis prophetia est Joannis Apocalypsis, in qua licet nonnulla sint adhuc in fine saeculorum implenda, tamen quae de Romani Imperii, et idololatriae ruina clare praedicta, atque impleta sunt, etiam illis, quae implenda remanent, fidem adstruunt. Vide Bossuet, et D. de la Chetardie in Comment. Atque haec de prophetiis: nunc ad aliam partem veniamus, nempe ad miracula.

S. II.

PROPOSITIO.

*Certissimum est, Christum innumera patrasse miracula, et quod omnium est maximum, post mortem, resurrexisse, et in caelos ascendisse.*

*Prob. I. de omnibus generatim Christi miraculis.* Novi Testamenti Scriptores unanimi consensu referunt, Christum Dominum mortuos suscitasse multos, nam licet tres tantum commemorent Evangelistae; et inter eos Lazarum a sepulcro quatrinduo post mortem excitatum, tamen alios etiam praetermisisse eruitur ex Cap. XI. Matth., et Joan. Cap. XXI. Praeterea caecos, surdos, claudos, paralyticos, leprosos vel uno vocis imperio curasse, tempestates sedasse, imo et per maris undas nudis pedibus ambulasse, aquas in vinum vertisse, paucis panibus multa hominum millia saturasse, superantibus etiam pluribus fragmentorum cophinis; tandem praedixisse, se triduo post mortem resurrecturum, et revera resurrexisse, et rediitum cum Apostolis conversatum, et

col.

collocatum esse, tandemque in caelos, videntibus omnibus discipulis, ascendisse.

Hæc si vera sunt, quis, nisi amens dubitaverit, vera fuisse miracula? Atqui ea certissima sunt. Nam illa historia certissima est, quæ refertur unanimi consensu a pluribus Scriptoribus coævis, viris probis, qui, facta suis oculis, conspexerunt, quique nec falli, nec fallere poterant, aut volebant, imo miraculis, et sanguine suo rem confirmarunt præsertim si ejus historiae, adhuc remanent manifesta omnibus monumenta, nec ab ipsis inimicis negetur, sed admittatur ut vera. Atqui talis est historia miraculorum, et resurrectionis Christi. Nam 1.<sup>o</sup> Scriptores, qui eam describunt unanimi consensu, multi sunt, *Matthæus*, *Marcus*, *Lucas*, *Joannes*, *Paulus*, *Jacobus*, *Petrus*. 2.<sup>o</sup> Omnes coævi, qui res gestas vel suis oculis conspexerunt, ut *Matthæus*, *Joannes*, *Petrus*, *Judas*, *Jacobus*, vel a multis, qui conspexerant, audiverunt. 3.<sup>o</sup> Viri probi, quibus nemo adhuc objicere ausus est calliditatem, dolum, aut simulationem, à qua ipsa eorum vivendi, et scribendi ratio, ipsaque religio, quam prædicabant, demonstrat eos fuisse valde alienos. 4.<sup>o</sup> Falli non poterant; res enim, quas describunt, sensibus subjectæ erant, in quibus deceptio non poterat habere locum. 5.<sup>o</sup> Multo minus fallere alios poterant; narrant enim facta publica, omnium oculis exposita, designant tempus, locum, nomina adstantium, ita ut facillime potuissent falsitatis redargui, maxime ab inimicis. 6.<sup>o</sup> Eam historiam san uine suo confirmarunt, imo et miraculis, de quibus infra dicemus, quæ in re historia Evangelica omnes alias historias, de quibus minime dubitamus, antecellit; quando enim testes narrationem suam sanguine confirmant, non potest major optari, aut fingi certitudo. 7.<sup>o</sup> Adhuc remanent manifesta ejus historiae monumenta, ipsa scilicet Christi Ecclesia, quæ nequaquam in Christum tam sublimia, et ardua, cupiditalique contraria præcipientem credidisset, nisi manifesta ejus signa vidisset, quorum signorum memoriam quotannis celebrat. 8.<sup>o</sup> Denique ipsi Christianæ religionis inimici historiam miraculorum Christi

sti nunquam negare ausi sunt; sed ea tantum infelici conatu explicare tentarunt. *Celsus* enim apud *Origenem Lib. 1. Jerocles* apud *Euseb. cont. Jerocl. Julianus* apostata, et *Porphyrius* apud *Cyrillum Libi VI. cont. Jul.* ipsique *Judaei Thalmudistae* Christi prodigia non inficiantur, sed ea magiae tribuunt; qua in re miranda est eorum insulsitas. Vide *Bullet* in Historia Christianismi ex auctoribus judaeis, et Gentilibus.

*Prob. II.* Speciatim de Christi resurrectione, quae maximum miraculum est. Illud factum certissimum est, -cujus testes nec falli potuerunt, nec fallere alios voluerunt; nec potuerunt. Atqui talis est Christi resurrectio. Ergo.

Tres sunt minoris partes. I. Testes falli non potuerunt; fuerunt enim 1.<sup>o</sup> testes plurimi, et ut ait *Apostolus, 1. Cor. XV. 4. plusquam quingenti.* 2.<sup>o</sup> increduli; qui tamquam deliramentum existimabant testimonium eorum, qui primi Christum resurrexisse nuntiaverant, *Luc. XXIV. 11.* nec prius crediderunt, quam palpaverint, viderint, audiverint, ipsa scilicet plurium sensuum evidentia victi: 3.<sup>o</sup> non semel, aut iterum, nec seorsim singuli, sed omnes simul multoties per dies quadraginta Christum secum conversantem, comedentem viderunt, et contrectarunt, colloquentem audiverunt. Falli ergo non potuerunt.

II. Nec fallere voluerunt. Non solum enim homines erant rudes, simplices, probi, religionemque praedicabant omnis mendacii inimici, verum etiam si ipsi certo scivissent, Christum non resurrexisse, si eut praedixerat ad suam divinitatem probandam, jam certo congovissent, illum fuisse impostorem mendacissimum. Ergo, si ante mortem illum, a quo tam magna expectabant, prae timore deseruerunt ut *Petrus* etiam cum juramento negaverit; quanto magis post mortem, detecta fraude, cum jam nihil ab eo expectare poterant, et e contrario ab adversariis innumera mala, ipsaq. mors immineret; a fugiendo tam inaudito mendacio abstinuissent? Inter flagella, tormenta, odia, irrisiones, denique in ipso acerbac mortis apparatu, quidnam sibi utilitatis ex tam insi-

gni,

qui, et incredibili impostura polliceri potuissent? Ergo.

III. Denique nec fallere potuerunt. Nam nullo negotio fraus detegi poterat: extrahendo scilicet ex sepulchro Christi cadaver, illudque omnium oculis exponendo, jam fraus, et mendacium patuisset. Et tamen cum fremerent primores civitatis videntes subita et stupenda incrementa nascentis Ecclesiae; coercere tentarunt, ne Christi praedicarent resurrectionem; at numquam Christi cadaver invenire potuerunt, quod facillimum, et certissimum fuisset mendacii argumentum; praesertim cum ipsi sepulchrum custodibus munerint, ne quis fraudi esset locus. Dicere autem Apostolos meticulosos, infirmos, egenos, qui Christum vivum turpiter deseruerant, aut vi propulsa milites sepulchri custodes, aut corripuisse muneribus, aut ipsis dormientibus sepulchrum nemine sentiente, aperuisse, et cadaver abstulisse, tam putida fabella est, ut eam refutare ineptissimum sit. Ergo fallere non potuerunt; Vide *D. Ditton in Religionem Christianam demonstrata per Christi Resurrectionem* (a) et *Daguetum De Christi sepultura*.

#### *Solvuntur objectiones.*

*Objic. I.* Miracula Christi solo discipulorum ejus testimonio firmanur. Ergo dubia sunt.

*¶ Transeat ant.* Gentiles enim, et Judaei, ut supra diximus, ea inficiari numquam ausi sunt, et *neg. cons.* Si enim Romanas, Graecasque historias credimus licet a paucis ejusdem gentis auctoribus, (b), patriae gloriae cupidissimis, non coaevis conscriptas; multo magis de Evangelica historia certi esse debemus,

---

(a) *La Religion prouvée par la Resurrection de J. C. par Ditton.*

(b) *Sed Graeci, inquit Lud. Vives lib. II. De verit. fide. scripserunt Graeco, soli Romani sua prisca illa, quis ea de causa res illos vocat in controversiam?*

mae, quae refertur a multis historicis, concavis, probis, humanae gloriae contemptoribus, qui in factis, quae narrant, coram omnibus, etiam inimicis patrata, nec falli, nec fallere potuerunt; imo et in testimonii sui confirmationem sanguinem fortiter effuderunt: qui veritatis characteres in nulla historia, praeterquam Evangelica, inveniuntur, et tamen increduli potius Pythagorae, Apollonii, Vespasiani fabulosa miracula credunt, quam certissima J. Christi. Qua quidem, ut observat *Card. Gerdil*. (a) nulla major rationis, et cordis potest esse perversio.

*Objic. II.* Si vera fuissent Christi miracula, Judaei omnes in Christum credidissent. Atqui plurimi non crediderunt. Ergo.

*¶. Dist. maj.* Si ut par erat attendere voluissent, *conc.* Si invidia, aut praepudiciis, et cupiditatibus obcaecati attendere noluissent, *neg.* Judaei itaque partim odio, atque invidia excaecati, ut Pharisei, et Sacerdotes, partim etiam praepudiciis, et cupiditatibus addicti erant. Quippe Messiam expectabant, ut potentissimum Regem; qui temporalia ipsis commoda procuraret: ideoque non attendebant, uti par erat, Christi miraculis, cum praesertim viderent, illum aliquando curare iustos Sabato, quod ipsi falso putabant esse illicitum. Maluerunt itaque per summam stultitiam ejus prodigia, quae negare non poterant, tribuere Satanae, cum e contrario illa non solum superarent omnes creatas vires, verum etiam ad destruendum Satanae imperium tenderent. Porro unus Judaeus in Christum credens magis probat veritatem miraculorum ejus, quam mille increduli. Isti enim ad permanendum in veteri religione non indigent novis argumentis, at ille vetera praepudicia numquam retractabit, nisi rei evidentia victus, quod patet praesertim in conversione S. Pauli Apostoli (b).

Et

(a) *Gerdil* *Introduzione allo studio della Religione* Lib. II.

(b) *Vid. La religion, prouvée par la conversion de S. Paul par Hisseton.*

Et tamen ante Christi mortem tot fuerunt qui in eum credebant, ut potuerint dicere Pharisei: *Ecce mundus totus post Eum abiit Joan. XII. 19.* post resurrectionem vero tot millia Judaeorum; etiam Sacerdotum, crediderunt in Christum, ut principio ex solis ferme Judaeis constaret Ecclesia. Cur autem non sufficiat videre miraculum, ut quis credat, dicemus in Libro VII. ubi de Gratia disputabimus.

*Inst.* Apostoli, et alii, qui in Christum a principio crediderunt, homines erant rudiores. Ergo non poterant judicare, utrum miracula Christi naturalibus causis tribui possent, hoc enim iudicium hominum est doctiorum, qui tamen in Christum non credebant; quod argumento est, eos non agnovisse Christi prodigia, ut vera miracula.

*Resp.* Transeat aut. quod negari posset de multis, qui in Christum crediderunt, qualis erat Nicodemus *Joan. III.* Princeps Judaeorum, Magister in Israel, qui ingenue fassus est: Rabbi, scimus, quia a Deo venisti magister, nemo enim potest haec signa facere quae tu facis, nisi fuerit Deus cum eo: sed in quosmodi homines metu continebatur, ne se palam Christo adjungerent. Ceterum *neg. cons.* Non enim requiritur profundior doctrina ad dijudicandum. utrum eadaver quatrduanum possit uno vocis imperio ad vitam naturaliter revocari. Idem dicas de ceteris Christi miraculis, quae fuerunt supra notissimas, et constantissimas naturae leges, quas nemo vel imperitissimus ignorat. Ex eo autem, quod plures docti, et principes in incredulitate manserunt, non sequitur, eos melius judicasse de miraculis Christi, sed majori superbia fuisse tumidos, et cupiditate praepeditos. Quod patuit tum in dialogo illo, quem describit Joannes *Cap. IX.* inter caecum a Christo illuminatum, et Phariseos; tum in concilio Sacerdotum. *Joan. XI.* in quo cum illi disputarent, quid facimus, quia hic homo multa signa facit? etc., statutum est; *expedit, ut moriatur.*

*Inst. 2.* Scimus, Christianos nonnullos multa falsa narrasse miracula, vel ex falso, et iusipienti zelo religionis, vel etiam ex simplicitate, et imperitia.

*Resp.* Ergo.



Ergo idem Scriptoribus historiae Evangelicae contigeret potuit.

*¶. Nego cons.* Ex eo enim, quod historia aliqua fabulosa sit, non sequitur, rejiciendas esse ut falsas omnes historias, sed illas tantum, quae falsitatis characteres praesecerunt; ejusmodi non est historia Evangelica, quae numero, gravitate, et certitudine testimoniorum omnes alias historias vincit, ut supra diximus; ita ut certius sit, Christum innumera, veraque patrasse miracula, quam Caesarem extitisse.

*Obje. III.* contra Christi resurrectionem, quae si falsa fuisset, nutaret veritas omnium factorum, atque dictorum Christi, qui se resurrecturum praedixit. Illud factum censi debet saltem dubium, quod pauci affirmant, sed plures negant. Sed resurrectionem Christi affirmabant ejus discipuli, qui paucissimi erant, si comparentur cum reliquis Judaeis, qui negabant. Ergo.

*¶. Dist. maj.* Si illi, qui negant, nullis nitantur testibus, qui asserant, se vidisse contrarium, *neg.* Si nitantur contrariis testibus, *subdist.* Si testes negantes aequalis sint probitatis, gravitatis, etc. *conc.* Secus, *neg.* Itaque Judaei quamplurimi negarunt Christi resurrectionem, non quia nitebantur ullis testibus, qui assererent, se contrarium vidisse, scilicet Christi cadaver adhuc in sepulchro, vel alibi jacens; sed quia credere volebant veritatem tot firmatam testibus spectatissimae probitatis, qui non solum testabantur, se vidisse, et manibus contrectasse Christum redivivum, cum eo collocutos esse, comedisse etc. verum etiam testimonium suum, ex quo nihil terrenae felicitatis sperare poterant, sanguine confirmabant, quo argumento nihil potest fingi validius ad factum aliquod probandum.

*Obje. IV.* Possunt phantasmata sensibus hominum ita illudere, ut videre, et audire sibi videantur quod revera nihil est. Multa hujus rei exempla refert *Muratorius* in aureo libello de *vi phantasiae*. Ergo poterunt Discipulis phantasmata illudere, ut Christum redivivum se videre, et audire crederent.

*¶. Dist. ant.* Si sint plures homines simul collecti,

et eodem tempore, et pluribus simul sensibus, scilicet visu, auditu, tactu rem percipiant, et quidem pluribus diebus, *neg.* aliter dubitare possemus etiam, utrum Sol luceat. Si sit aliquis homo seorsum, et uno, et altero sensu rem apprehendat, et sic etiam *subdist.* Si sensus sit perfecte sanus, et sensatio clara, vivida, distincta, *neg.* Secus, *conc.*

*Inst.* Christus post mortem non semper Apostolis erat conspicuus, sed modo apparebat, modo evanescebat ab oculis eorum, ut contigit discipulis Eminentia petentibus *Luc. XXIV. 31.* imo in cubiculum clausis januis ingredi videbatur, *Jo. XX. 19. 26.* Atqui ista vero corpori non conveniunt. Erat igitur phantasma.

*R. Dist. min.* Si habetur ratio tantum virium naturae, *conc.* Si habeatur ratio omnipotentiae divinae, et peculiarium proprietatum, quibus corpus gloriosum ornatum est, *neg.* Itaque Christum redivivum verum habuisse corpus, illud ipsum, scilicet, quod cruci fuerat affixum, patet ex eo; quod non solum conspiciebatur oculis, verum etiam attrangebatur manibus, loquebatur, manducabat, et reliquias discipulis tradebat. *Luc. XXIV. 43.* Quod autem a conspectu discipulorum se aliquando subducebat: (id enim significat *evanescere ab oculis eorum*) id omnipotentiae divinae tribuendum est, et agilitati corporis gloriosi.

*Inst. 2.* Fuerunt vel a primo Ecclesiae saeculo haeretici, qui sectam profitebantur nostris Evangelii contrariam, ut Simoniani, Cerinthiani, Ebionitae etc. Ergo illi historiam Evangelicam non agnoscebant, ut veram.

*R. Dist. ant.* Profitebantur sectam Evangelii contrariam quoad dogmata, *conc.* Quoad historiam miraculorum Christi, *neg.* Simili ratione *Dist. cons.* Non agnoscebant ut veram historiam Evangelicam quoad aliqua dogmata, quae asserebant inserta Evangelii, *conc.* quoad substantiam gestorum, et miraculorum Christi, *neg.* Itaque haeretici illi exorti post Apostolos, ut ipsis exprobrat *Tertullianus*, non negabant, Evangelii historiam veram esse, et ab Apostolis scriptam,

ptam, sed quia in Evangelio quaedam loca erant adco ipsis adversa, ut non possent ea in alienos sensus detorquere; affirmabant contra fidem omnium codicum, qui toto orbe sparsi erant, loca illa fuisse Evangeliiis superaddita post Apostolos, imo et nonnulli ex quatuor Evangeliiis aliqua integra rejiciebant, aliqua suo ingenio vitata retinebant: qua in re suam probebant impudentiam. Nobis ergo satis est, veritatem miraculorum Christi ab ipsis haereticis fuisse agnitam quamvis unum Evangelii librum retinuissent. Quod enim spectat ad eorum prava dogmata, alia quaestio est. Vide hoc argumentum fuisse pertractatum apud *Bergerum* (a).

*Inst. 3.* Refert Joannes *Cap. XX, 17.* Christum prohibuisse Magdalenam, ne eum tangeret, *Noli, inquit, me tangere*, Ergo spiritus erat.

*R. Neg. cons.* Eo enim consilio prohibuit Christus Magdalenam, cum tangere, ne longas ibi moras necteret, sed cito volaret ad discipulos, eisque resurrectionem ejus nunciaret. *Noli, inquit, me tangere; nondum enim ascendi ad Patrem meum, sed vade ad fratres meos etc.*

*Objic. V.* Si Christus vere resurrexisset, ostendisset se Synagogae, ceterisque Judaeis, quibus publice suam resurrectionem praedixerat, et coram quibus publice mortuus erat. Atqui non fecit, sed tantum discipulis suis apparuit. Ergo.

*R. Neg. maj.* Cum enim Christus tot testes suae resurrectionis adhibuisset, qui eam postea coram Judaeis et Gentilibus, miraculis, et sanguine confirmarunt, necesse non erat; ut Judaeis, praesertim tanto beneficio ob infandam ipsius Christi caedem indignis, sese ostenderet; si enim nihil credi deberet, nisi quod suis quisque oculis viderit, actum esset de morali certitudine; debuisset enim Christus sistere, sese etiam Gentilibus, imo et singulis hominibus, etiam

(a) La certitude des preuves du Christianisme, ou Réfutation de l'Examen Critique des Apologistes de la Religion Chrétienne.

etiam sequentium saeculorum, quod est absurdissimum. Quibus ergo, et quando oportuerit apparere Christum redivivum, disposuit ipse pro sua infinita sapientia, non pro ineptis hominum judiciis. Ceterum non solis discipulis apparuit Christus, sed etiam Paulo inimico omnium furentissimo, quem repente in Apostolum convertit, ut infra dicemus. Vide *D. Ditton* in libro supra citato. Porro veritas resurrectionis Christi magis patebit ex §. sequenti, quo probabimus, discipulos Christi ad eam confirmandam innumera edidisse miracula.

## §. III.

## P R O P O S I T I O.

*Discipuli Christi, qui post eum Religionem Christianam praedicarunt, et propagarunt, innumera ediderunt miracula.*

**Prob.** Lucas in *Actis Apostolorum* refert, discipulos Christi, die decima postquam Christum in caelos ascendentem viderant, cum antea metu pavidum se continuissent, repente Spiritu S. plenos exiisse, resurrectionem Christi praedicasse; variis linguis, quas numquam antea didicerant, locutos esse, infirmos uno vocis imperio; imo et sola corporis umbra curasse, mortuos suscitasse, et quod magis stupendum, est, contulisse virtutem miracula patrandi iis, quibus baptizatis manum imponebant: quae omnia uno verbo complexus est *Marcus Cap. XVI. 20.* dicens: *Illi autem profecti praedicaverunt ubique, Domino coöperante, et sermonem confirmante sequentibus signis.* Haec si vera sunt, quis negaverit, discipulos Christi miracula patrasse? Atqui sunt certissima.

1. Etenim facta illa erant sensibus subjecta, et publica, ita ut nec discipuli in illis decipi, nec alios decipere potuissent, praesertim inimicos impugnandae eorum doctrinae cupidissimos, a quibus facillime mendacii redargui potuissent.

2. *Marcus Cap. XVI.* refert, Christum promisisse, eos,

eos, qui in ipsum credituri essent, miracula patraturos: *Signa autem eos, qui crediderint, haec sequentur etc. v. 17.* Atqui, si Christi discipuli miracula ista non edidissent, stultissime hanc praedictionem Christi retulissent, cujus falsitas universam doctrinam ejus labefactasset.

3. Apostolus Paulus *II. Cor. XII. 12.* ut probet missionis suae divinitatem, in memoriam revocat Corinthiis miracula, quae apud ipsos operatus erat: *Signa Apostolatus mei facta sunt super vos in omni patientia, in signis, et prodigiis, et virtutibus, imo in Epist. I. Cap. XII., XIII., et XIV.* docet ipsos Corinthios ornatos esse donis varia prodigia patrandi, iisque modum praescribit, quo hujusmodi donis uterentur, ne perturbaretur ordo Ecclesiae. Quis autem, non dicam perfrictae frontis, sed omnino amens ista scribere ausus esset, si fuissent falsa? Ergo etc.

§. IV.

PROPOSITIO

*Post mortem discipulorum Christi, usque ad nostram aetatem non defuerunt in Ecclesia Christi miracula; licet, stabilita jam Ecclesia, non tam frequentia; quia non tam necessaria.*

*Prob. Irenaeus Saec. II. probat adversus haereticos, Ecclesiam Catholicam esse veram, haereticorum autem falsam, praeter alia argumenta, etiam ex eo, quod in Ecclesia catholica frequentia essent miracula, nulla vero in societate haereticorum. In fraternitate, inquit Lib. II. Cap. 56, et 57. saepissime reversus est spiritus mortuo, et donatus est homo orationibus sanctorum. . . Alii daemones excludunt: alii autem et praescientiam habent futurorum: alii laborantes aliqua infirmitate per manus impositionem curant, et sanos restitunt. Jam etiam; ut diximus; et mortui resurrexerunt, et perseveraverunt nobiscum annis multis. Quid autem? Non est numerum dicere gratiarum, quas per universum mundum Ecclesia a Deo accipiens,*  
in

in nomine Jesu Christi crucifixi sub Pontio Pilato, in opitulationem Gentium perficit. De haereticis vero subdit: haeretici non possunt caecis donare visum . . . neque omnes daemones effugare, praeter eos, qui ab ipsis immittuntur. Insuper est iste locus, quem laudat etiam Eusebius Lib. V. Hist. cap. 7., et magnam vim habet. Quomodo enim Iraeneus facta ista tam publica, ut frequentes mortuorum resurrectiones, obijcere ausus esset haereticis si falsa fuissent?

Praeterea Tertullianus Saec. III. *Apologet. XXIII.* hac sponsione provocat Gentiles: *Edatur hic aliquis sub tribunalibus vestris, quem daemone agi constet. Jussus a quolibet Christiano Spiritus ille, iam se daemonem confitebitur de vero, quam alibi Deum de falso . . . .* *Ista ipsa virgo caelestis pluviarum pollicitatrix, iste ipse Esculapius medicinarum demonstrator, . . . nisi se daemones esse confessi fuerint, Christiano mentiri non audentes, ibidem illius Christiani procacissimi sanguinem fundite. Quid isto opere manifestius? Quid hac probatione fidelius? Vide etiam librum ad Scapulam. Similia habet Cyprianus ad Demetrianum. Quis autem tanta confidentia Gentiles provocasset; si haec non fuissent certissima? Igitur tertio saeculo non desunt miracula, quamvis non tam frequentia, quia minus necessaria. IV. vero saeculo, longe, lateque propagata Christiana religione, prostrata idololatria, non fuere amplius miracula necessaria; quae enim prioribus saeculis edita erant, et tot testibus confirmata, omnibus saeculis sufficiebant. Nihilominus non omnino cessarunt, ut patet ex historia Ecclesiastica Eusebii, Socratis, etc. ex scriptis SS. Patrum, ut S. Augustini, Lib. XXII. *De Civ. Dei* Cap. 8. de Reliquiis S. Stephani. Denique nullum est saeculum, quo non floruerint viri sanctitate, et miraculis illustres. Legant increduli egregium opus Benedicti XIV. *de Canonizatione Sanctorum*: perspicient profecto tam rigide, et accurate perpendi in Ecclesia catholica veritatem miraculorum, quae per viros Sanctos eduntur, ut ne Scepticus quidem severius examen postulare auderet. Ergo etc. Ceterum veritatem miraculorum, quae Apostoli, eorumque discipuli patrarunt:*

ma-

magis probat ipsa Christianae Religionis propagatio, quae si nullis miraculis facta est; ipsa maximum est miraculum.

§. V.

PROPOSITIO.

*Christianae religionis propagatio maximum miraculum est, praesertim si nullis miraculis facta est.*

*Prob.* Certum est, religionem Christianam ab Apostolis praedicatam, incredibili celeritate longe, lateque fuisse per orbem propagatam. Testatur hoc non solum Paulus, qui ad Romanos Cap. I. et ad Colossenses I. 6. scribit, fidem jam in universo Orbe praedicari, et fructificare, et crescere, verum etiam ex ethnicis 1.º Seneca Ethnicus Scriptor apud Augustinum Lib. VI. de Civ. Dei Cap. 11. haec scribens: *Usque eo sceleratissimae gentis Christianae consuetudo convaluit, ut per omnes jam terras recepta sit: victi a victoribus leges dederunt.* 2.º Plinius junior Asiae Proconsul Lib. I. Ep. 97. *Non civitates, inquit, tantum, sed vicos etiam, atque agros, Christianae religionis contagio pervagata est: prope jam desolata templa, et solemnia dñi intermissa.* 3.º Ipse Tacitus Lib. V. Annal. c. 44. scribit, sub Nerone ingentem multitudinem Christianorum Romae deprehensam. Haec ad I. Saeculum pertinent, hoc est ad ipsa religionis Christianae initia. 4.º Tertullianus II. Saeculo Apologet. Cap. XXXVII. *Hesterni, inquit, sumus, et vestra omnia implevimus, urbes, insulas, castella, municipia, conciliabula, castra ipsa, tribus, decurias, Palatium, Senatum, Forum.* Frémunt Imperatores, totisque Romani Imperii viribus Christianos opprimere conantur, eosque partim more pecudum jugulant, partim exquisitissimis tormentis, et cruciatibus absumunt. Sed sanguis martyrum semen erat Christianorum; ita ut magis in dies cresceret eorum numerus, donec toto fere Orbe ad fidem converso, Principes Christo nomen dederunt, et crucem, quam probro habue-

rant,

rant, adorarunt, et honoris loco in diademate gestarunt; sicque quarto ineunte saeculo per totum orbem Christiana religio statuta est. Atqui hoc maximum miraculum est. Ergo etc.

*Prob. min.* Miraculum est opus rarum supra naturae vires; atqui tanta, tamque celeris religionis Christianae propagatio talis est. Quod enim sit opus rarum, certissimum est; non enim consuetum est, ut homines religionem, in qua nati, atque innutriti sunt; sine ulla causa deserant, ut novam priori contrariam amplectantur. Quod autem sit supra naturae vires, probatur. Tunc effectum aliquod est supra naturae vires, quando ipsum per se est difficillimum, instrumenta vero assumuntur ineptissima: ut si quis ad movendum montem unum digitum adhibeat. Atqui utrumque hic habemus.

I. Opus ipsum per se difficillimum, imo impossibile erat duplici ex capite, *h. e.* tum ob veterem religionem, quae destruenda erat; tum ob novam stabilendam. 1°. Ad veterem religionem abolendam persuadendum erat Judaeis, legem Mosaicam tot stupendis confirmatam prodigiis, quamque ipsi putabant, ex Dei promissione secundum litteram male intellecta, in aeternum esse duraturam, jam esse abolitam in morte Christi, quem ipsi tamquam impium occiderunt. Gentilibus vero persuadendum erat Jovem, aliosque deos, quos universum fere genus humanum a tot saeculis venerabatur, et quorum etiam falsa miracula, et prophetiae circumferebantur, abjiciendos, et conculcandos. Et tamen ex ea religione, quam populi cum lacte hauserant, et quae carnis cupiditatibus omnino favebat, putabant pendere salutem Reipublicae, ita ut ipsi Philosophi eam servandam edicerent, et Principes eam totis imperii viribus tuerentur. Quapropter ad destruendam idololatricam, destruenda erant praepudicia tot saeculis firmata, domandae carnis cupiditates, et superanda Romanorum potentia, quam nulla gens eo usque superaverat. Porro quam difficile, imo impossibile fuerit Gentilibus haec persuadere, expertus est *Socrates*, qui licet, ut vilissimus hypocrita, religionem popu-



Uoleret, et colendam doceret, tamen, quia aliqua de vanitate deorum dixerat, ad ebriam ebibendam damnatus est. Quam vero impossibile fuerit persuaderi Judaeis, videre possunt ipsi increduli. Judaei enim adhuc vivunt per omnes regiones dispersi. Tant ergo, experiantur, utrum possint unum eorum e sententia dimovere, licet hodie non sint, ut tunc erant, florentes opibus, sed extorres, sine ullo externo religionis apparatu, et manifeste videant impleta in ipsis vaticinia Prophetarum, et ipsius Christi.

2.<sup>o</sup> Multo magis difficile erat opus propter novam religionem stabilendam. Persuadendum enim erat Judaeis, atque Gentilibus, Deum esse unum in tribus Personis: secundam vero Personam, nempe Filium incarnatum esse, et natum ex Virgine, ipsumque esse, quem Judaei tamquam impium, et blasphemum morte damnaverant, et Romani crucifixerant, supplicio scilicet omnium ignominiosissimo. Persuadenda erant etiam cetera religionis Christianae mysteria rationi humanae impervia; et quod non minus difficile erat, statuenda erat lex cunctis cupiditatibus inimica, et ex vita laboribus, jejuniis, cruciatibus carnis aspera, nihil expectandum mercedis praeter odia, persecutiones, et mortem: plenam vero felicitatem servatam esse in resurrectione mortuorum, cujus resurrectionis ipsum nomen risum movebat infidelibus. Quis igitur haec tam incredibilia persuasisset? Ergo opus erat ipsum per se difficillimum, imo et impossibile; etsi omnes Philosophi, Oratores, et Principes saeculi conjunctis viribus illud adgressi essent.

II. At contra ad opus hoc tam impossibile instrumenta adhibita sunt, quae videbantur omnium ineptissima. Nam 1.<sup>o</sup> Christus ipse non solum erat e gente Judaeorum, qui omnibus aliis Gentibus odio erant, verum etiam ignobilis, *fabri filius*, ab ipsis concivibus suis odio habitus, et morte damnatus. 2.<sup>o</sup> Apostoli, quos ipse legit tanto operi perficiendo, homines erant illiterati, rudes, piscatores, nullis muniti opibus, imo omnium rerum egeni. Et tamen Christus confidentissime praedicat, eam religio-

nem

nem suam per omnem terram propagaturos, uti revera propagarunt, eamque Philosophis et Principibus persuaserunt, et in ea etiam regna ad quae Romani pervenire non potuerant, Christi nomen, et religionem invexerunt. Ergo propagatio religionis Christianae opus fuit ipsum per se impossibile, et ad illud perficiendum instrumenta per se ineptissima erant. Aliunde opus fuit insuetum. Ergo maximum fuit miraculum, praesertim si ad illud perficiendum nulla patrata fuissent miracula. Unde egregie, h. c. pro more suo scribit Augustinus Lib. XXII. de Civ. Dei C. 5. *Si miracula facta esse non credunt, hoc nobis unum grande miraculum sufficit, quod terrarum orbis sine ullis miraculis credidit (a).*

#### Refutantur Objectiones.

*Objio.* 1. Mahumetana religio summa celeritate per magnam Asiae, atque Africae partem, propagata est, imo et tractu temporis in Thraciam, et Macedoniam, et Epirum, et Peloponnesum, vicinasque insulas vecta. Idem accidit in Lutheranae et Calvinianae sectae propagatione. Ergo celeris Christianae religionis propagatio miraculum non fuit.

*¶. Dist. ant.* Diverso modo, *conc.* Eodem, *neg.* Propagata enim est, vi, et armis; unde in ea loca, quae Mahumetanorum arma subigere non potuerunt, Mahumetana religio pervenire non potuit. Praeterea cupiditatis carnis laet illa religio. At contra accidit in Christiana religione, quae cupiditatibus inimica, praedicans etiam mysteria, quae humanam rationem longe superant, contra vim, et arma, nullis humanis adminiculis per totum orbem diffusa est (b). Idem dicas de Lutheranae, et Calvinianae sectae propagatione, quam viri principes libenter amplectebantur, et tuebantur, ut ditarentur Ecclesiasticorum spo-

(a) Vide P. Lamy *L'incroyable amené à la religion.*

(b) Vide Nat. Alexandrum in *Hist. Eccl. Saec. VII. Dissertat. VI.* aliosque auctores, quos infra citabimus contra Mahumetanos.

spoliis: ceteri vero, ut liberati a votorum, et aliarum legum observatione liberius viverent.

*Inst.* Etiam religio Christiana Edictis, vel saltem exemplo Christianorum Principum maximum debet incrementum. Notae sunt Constantini leges contra idololatriam Ergo etc. Ita ratiocinatur *Freret. Exam- crit.*

*R. Neg. ant.* Non enim alia de causa id asserunt increduli, nisi quia gratis illis constant mendacia. Vidimus, *Plinium* juniorem annis circiter ducentis ante Constantinum asserere, *templa deorum esse desolata*, propter religionem Christianam longe, lateque propagatam. Ante Constantinum per annos quasi trecentos Principes totis Imperii viribus pro Idololatria certantes, sanguine Christianorum universum Orbem resperserunt; et tamen eo magis crevit haec Religio, quo major effundebatur Christiani sanguinis copia, ut observat non solum *Tertullianus* in *Apolog.* verum etiam ipse *Libanius* ethnicus *Orati: funebri pro Juliano*: Itaque quando Imperatores ad Christum conversi sunt (atque non aliorum Imperatorum lege, sed sponte sua) Religio jam fuerat stabilita, etiam ultra fines Romani imperii apud barbaros. Ipse Christianorum Principum leges (quae tamen non saeviebant in Idololatrias, ut illi in Christianos saevierant) demonstrant, jam exiguum remansisse numerum ethnicorum; alioquin non ausi essent Imperatores eos legibus coercere, et ita ad seditionem provocare. Qui quidem exiguus numerus ipse per se evanisset brevi tempore, sicut revera evanuit, quamvis Julianus Apostata post Constantinum omnia conatus esset ad idololatriam restituendam. Vide *Bergerum Confut. exam. Critic. Freret.*

*Obje. II.* Tempore Apostolorum jam Orbis erat litteris excultus. Potuit ergo facile agnoscere Idololatriae vanitatem, et Christianam amplecti religionem.

*R. Neg. cons. 1º.* Enim aliud est agnoscere Idololatriae vanitatem, aliud amplecti Religionem voluntatibus inimicam, et misteris doctentem, quae prima fronte rationi contraria videbantur. 2º. Litterati ethnici magis obstabant, quam proderant, augen-  
dae

dae Religioni, non solum quia propter superbiam difficillime subijciebantur humilitati crucis, quae *Gentibus* erat *stultitia*, verum etiam quia totis ingenii sui viribus et voce, et scriptis Religionem oppugnarunt. Unde conversio hujusmodi hominum, quibus non poterat illudi falsis miraculis, ingens est veritatis argumentum; non enim credidissent, nisi eorum doctrinam, et superbiam evidentia miraculorum fregisset. 3.<sup>o</sup> Talis hominum, atque ingeniorum cultura non impediit, quominus Imperatores totis viribus Religionem Christianam oppugarent, totumque orbem sanguine martyrum respercerent. 4.<sup>o</sup> Multo cultior literis erat Graecia tempore *Platonis*, *Aristotelis*, *Demosthenis*, nec tamen Idololatriam ejaravit. 5.<sup>o</sup> Denique qui erant inter Ethnicos litterati docebant, sequendam esse et colendam religionem populi, qui quanto rudior, tanto est veteris religionis tenacior.

*Obje.* III. Principio Religioni Christianae nomen dedit tantum ignobile vulgus, rudis, et indocta plebs. Ergo mira non est tanta religionis propagatio.

*Ans.* *Transseat. ant. Neg. cons.* Imo populus ignobilis quanto rudior, tanto tenacior est veteris Religionis, in qua a teneris fuit enutritus, et cujus falsitatem deprehendere non valet; unde mirabilior est ejus conversio, praesertim si vetus Religio carnales populi voluptates, et desideria foveat. Dixi autem *transseat antecedens*; quia falsissimum est. Christo enim ante ejus mortem credidit *Nicodemus Princeps Judaeorum* Joh. III. 1. *Joseph ab Arimataea nobilis Decurio* Marc. XV 43. *Jairus Princeps Synagogae* Luc. VIII. 41. Multi denique ex principibus Joan. XII. 42. Post mortem vero Paulus erat utique omnium Hebraeorum sui temporis doctissimus: qui tamen ad fidem conversus est, dum iret Damascum ad Christianos insectandos (quod stupendum prodigium est) *Multa quoque turba Sacerdotum obediabat fidei* Act. VI. 7. Primi Diaconi viri erant *pleni sapientia*, inter quos utique *Stephanus* erat in lege doctissimus. Praeterea *Sergius Paulus* Act. XIII. 12. *Dionysius Areopagita* Act. XVII. 34. *Crispus princeps Synagogae* Act. XVIII. 5. et *Apollo* vix eloquentissimus, et in Scripturis

nis versatus *Act. XVIII. 24.* Berocæ vero Primores ad fidem conversi, Scripturas evolvebant attente, ut veritatem agnoscerent eorum, quæ a Paulo dicta erant, *Act. XVII. 11.* Quod certe facere non potuisset illitterata plebecula. Ephesi vero viri immuni, litteris exculi, ad fidem conversi sunt, et contulerunt libros suos, quibus antea studuerant, et combusserunt coram omnibus, et computatis pretiis illorum, invenerunt, pecuniam denariorum quinquaginta millium *Act. XIX. 19.* Principes etiam Asiae inter Pauli amicos commemorantur *Act. XIX. 31.* Imo et in ipsa Imperatorum domo erant fideles *Philip. IV. 22.* Quid si aliorum Apostolorum gesta, et omnium primorum fidelium nomina haberemus? Scribit quidem Paulus *1. Cor. I. 26.* Videte vocationem vestram, fratres, quia non multi sapientes secundum carnem, non multi potentes, non multi nobiles, sed id referendum ad iugentem fidelium multitudinem, inter quos semper indocti, et ignobiles plures numero sunt, sed non dixit, nullos esse sapientes, nullos nobiles. In hoc igitur Sapientia Dei mirabilior est; fuerunt enim inter primos Christianos viri nobilitate, et scientia illustres; ne quis putaret falsis miraculis deceptum fuisse vulgus; sed tamen viri illi nobiles, et sapientes magno in numero non fuerunt, ne forte sapientiae, et potentiae humanae tribui posset Religionis propagatio.

*Inst.* Saltem pauperes illici potuerunt eleemosynis divitum: divites vero amore novitatis. Ergo.

*n. Neg. ant.* Neque enim eleemosynarum cupido, nec novarum rerum studium persuadere possunt hominibus, ut veterem religionem abjiciant, novamque amplectantur cum fortunarum omnium, ipsiusque vitae praesentissimo periculo.

## §. VI.

## PROPOSITIO

*Ipsa Christianae Religionis diuturnitas,  
et stabilitas miraculum est.*

*Prob.* Praedixit Christus, Religionem suam non solum propagandam per omnes gentes, verum etiam usque ad finem mundi duraturam. Hoc videmus ad hanc usque diem impletum. Licet enim ingens Christianorum numerus a fide defecerit in Asia, Africa, ipsaque Europa; non omnino tamen ibi veri fideles defecerunt; imo eum magna aliqua Ecclesiae pars defecit, statim in alias regiones religio invecta est, Manet enim adhuc in Ecclesia vivificus ille ardor dilatandae Religionis qui a principio Apostolos incitavit. Atqui haec Religionis Christianae diuturnitas naturalibus causis tribui non potest. Ergo miraculum est.

*Prob. min.* 1.<sup>o</sup> Ea est conditio rerum humanarum, ut paulatim, etiam nemine impellente corruant, ac pereant, licet validissimae sint. Sic Assyriorum, Medorum, Graecorum, et Romanorum imperia, quae nulla humana vi atteri posse videbantur, evanuerunt. Ergo si Christiana Religio non fuisset divinitus servata, jamdiu periisset. 2.<sup>o</sup> Ad eam abolendam omnia adhibita sunt instrumenta. Principes enim Ethenici per plura saecula eam ubique locorum insectati sunt: Christianos, quotquot deprehendere potuerunt, morte atrocissima necarunt. Et tamen tunc Ecclesia magis floruit, et crevit. Huic persecutioni successit quidem pax sub Constantino, sed amarissima. Schismatici enim, et Haeritici Ariani, Eutychiani, Inconomachi, denique Novatores bellum atrox Ecclesiae intulerunt; praecipue Principum potentia freti, qui cunctis Imperii viribus haereses statuere conabantur. Cum vero legimus incursiones barbarorum, qui Romanum imperium in Occidente primum, deinde in Oriente occuparunt, interroga-

re subit, ubinam gentium tunc esset, aut esse posset Ecclesia Christi? Denique malorum Christianorum pravi mores longe, lateque pervagati, incredulorum libelli, et sophismata extinguere paulatim Religionem debuissent. Et tamen Ecclesia contra ista omnia jam per octodecim saecula dimicat, novasque vires exerit, in novas dilatatur regiones, et ubique in suis firmissimis membris eminet. Hoc autem ex nulla oriri potest naturali caussa. Ergo.

*Objecta refutantur.*

*Objic. I.* Etiam religio Mahumetana a tredecim circiter saeculis perdurat. Ergo etc,

*¶ Dist. ant.* Vi, et armis, et ignorantia populo-  
rum, quibus religionem illam examinare vetitum est,  
carnalibus denique voluptatibus, quas fovet, *conc.*  
Virtute sua, *neg.* At contra Religio Christiana, licet  
humanis cupiditatibus inimica nihil promittat fidelibus,  
nisi spiritualia praemia, et quidem in altera vita, licet  
omnibus artificiis, et viribus impugnata, non modo non  
oessit, verum etiam crevit.

*Objic. II.* Religio Judaica diutius duravit, et durat,  
quam Christiana, quia pluribus saeculis ante Christum  
fundata est. Ergo.

*¶ Neg. cons.* Religio enim Judaica ante Christum  
vera erat, et a Deo instituta, atque recta, ut usque  
ad Christum staret. Sed praedixit Deus multos Judaeo-  
rum fore incredulos, ideoque per omnem terram dis-  
pergendos; ita tamen ut a ceteris Gentibus distincti  
in fine saeculorum convertantur, et interim inviti in-  
serviant ad probandam veritatem tum prophetiae, tum  
librorum propheticorum, quos increduli suspicari po-  
tuisent a Christianis confictos. Itaque diuturnitas Judae-  
cae Religionis ante Christum, et Judaicae Gentis post  
Christum firmat potius, quam labefactat argumentum  
nostrum.

## §. VII.

*Constantia martyrum evidenter demonstrat veritatem  
miraculorum Christianae Religionis;*

*Ado. I. Martyr* Graece, Latine testis dicitur, Testes autem adhibentur ad facti alicujus veritatem probandam, ad *speculativa* vero dogmata confirmanda nulli esse possunt, nec adhiberi testes. Hinc illi, qui occisi sunt propterea quod a sua opinione aut dogmate recedere noluerunt, quales fuerunt Anabaptistae, alique haeretici, martyres, seu testes dici non poterant. Quid enim se vidisse, aut audisse testabantur? Erant ergo testes opinionis, et pertinaciae suae.

II. At contra Christiana Religio veros martyres habet innumerabiles; hoc est homines innumeros, qui usque ad sanguinem, et mortem, inter exquisitissimam, et atrocissimam tormenta testati sunt, se vidisse vel ipsius Christi miracula, et resurrectionem, quales erant Apostoli, primique discipuli, quorum ea vox erat: *Non possumus nos quae vidimus, et audivimus, non loqui*; vel miracula Apostolorum, aliorumque discipulorum, quae tribus prioribus saeculis, ut supra diximus, frequentia erant. Christiani enim non nascebantur, sed fiebant, ut loquitur Tertullianus *Apól. Cap. XVIII.*; h. e. evidentia miraculorum convertebantur, ideoque ii, qui pro Religione sanguinem fundebant, facto ipso testabantur, se certo scire veritatem miraculorum, quibus ad fidem amplectendam permoti fuerant. Etsi vero nonnulli martyres propriis oculis signa illa non vidissent, non propterea tamen martyrum nomen illis est negandum; poterant enim certo scire facta illa, licet ea propriis oculis non adspexissent; sicut nos certo scimus, vixisse Caesarem, quem non vidimus. Nunc hoc martyrum testimonium quanti sit roboris videamus.



PROPOSITIO I.

*Martyrum testimonium ineluctabile argumentum est veritatis miraculorum Rel. Christianae.*

*Prob.* Quando factum aliquod testantur duo, vel tres homines inter tormenta, tantam parit certitudinem hoc testimonium, ut nulla major in rebus humanis expectari possit. Videmus enim, ubique terrarum iudices propter tale testimonium reos damnare, ut certo convictos; licet testes illi ex odio, similitate, aut utilitate alia permoveri potuerint. Ergo testimonium non duorum, aut trium, sed multorum millium hominum, ex omni aetate, sexu, conditione, qui nulla utilitate appaente, inter tormenta crudelissima mortui sunt, argumentum est ineluctabile veritatis miraculorum. Quocumque se increduli vertant, cavillationes, et sophismata effutiant; scopulum certe hunc numquam vitabunt; quando enim multi factum aliquod, in quo falli non poterant, quia oculis, aliisque sensibus erat obvium, testantur in ipso tormentorum, et mortis apparatu; res ad eum certitudinis gradum venit, qua major fingi non potest.

*Solvuntur objectiones.*

*Obje. I.* Henricus Dodwellus *Dissert. XI. inter Cyprianicas* contendit, non tantum esse numerum martyrum, quantus passim fertur. Ergo.

*R. 1. Dist. ant.* Et in eo egregie falsus est, *conco.* Et vere id asseruit homo haereticus, qui hoc decus catholicae Ecclesiae invadebat, *neg.* Itaque immensum fuisse martyrum numerum, sive in Romano Imperio, sive extra Imperium sub barbaris Principibus, demonstrat *Ruinartus Praef. ad acta Martyr. Sincer.* et unusquisque colligere potest ex sola *Eusebii, Lactantii, Tertulliani*, aliorumque veterum lectione. Ceterum etsi darcimus vanissimam illam *Dodwelli hypo-*

E

the-

thesim; certe numerus martyrum, quem ille concedit, plusquam satis esset ad rem nostram.

*Objic. II.* Martyres non torquebantur, ut faterentur veritatem, aut falsitatem miraculorum; sed quia accusati fuerant, ut Christiani, vel ut homines criminosi, et Reipublicae inimici. Ergo eorum testimonium non probat veritatem factorum.

*Transeat ant.* quod manifeste falsum est in Apostolis; qui ob id ipsum flagris, carcēribus, et morte afficiebantur, ut praedicarent Resurrectionem Christi, ut ex *Actis Apost.* patet. *Neg. cons.* Cum enim martyres tormenta vitare potuissent, si uno verbo Religionem Christi eorassent; idem erat mori pro religione illa, ac pro tuenda veritate signorum, quibus permoti eam amplexi fuerant, et constanter retinebant.

Atque hinc evidenter ostendit *Tertullianus*, Christianos nullius criminis peractos esse, reos. In aliis enim judiciis tormenta adhibentur, ut reus fateatur, non ut neget, se crimen admisisse. At contra Christiani torquebantur, ut se Christianos esse negarent. Imo Trajanus edixit, ut Christiani non inquirerentur, sed accusati supplicio afficerentur. *O. sententiam necessitate confusam* inquit *Tertullianus Apolog. Cap. 2.* negat inquirendos, ut innocentes, et mandat puniendos, ut nocentes.

## PROPOSITIO II.

*Ipsa per se martyrum Christianorum fortitudo, atque constantia, inspectis omnibus circumstantiis, non humanum, sed divinum opus fuit.*

*Prob.* Tres sunt praecipuae in Christianis martyribus circumstantiae. 1<sup>o</sup>. Numerus immensus omnis aetatis, omnis sexus, omnis conditionis, scilicet senes, adolescentes, pueri; mulieres, puellae, docti, indoctique, nobiles; et ignobiles. In sola enim Saporis Regis Persarum persecutione, quae contigit post pacem Ecclesiae datam a Constantino sexdecim millia martyrum numerat *Sozomenus Lib. II. Hist. Cap. 14.*

Cap. 14. quorum servata erant nomina, præter eos, quorum nomina perierant. Quot ergo centena milia Christianorum caesa esse oportuit in Imperio Romano per tria ferme saecula sub Imperatoribus, et magistratibus crudelissimis? 2°. Varia, et acerbissima tormenta, quibus excruciabantur jussu magistratum; qui gloriae sibi ducebant fore, si martyrum constantiam expugnassent. Alii enim feris obiciebantur, alii admotis faeibus, vel prunis subjectis, vel ignitis ferri laminis in membris singulis paulatim lento igne torquebantur. Aliis in equuleo suspensis omnis ossium, et viscerum compages solvebatur; et ungulis ferreis totum corpus excarnificabatur, ut nullus adhuc plagis superesset locus, tuncque acetum, et sal superfundebatur; et quis omnia enumeret tormenta, quae ingeniosa crudelitas excogitavit? *V. Mamach. Antiqu. Christ.* 3°. Animus pacatus, et tranquillus, quo et ante tyrannos stabant impavidi, et inter ipsa tormenta, quasi omnis sensus expertes essent, durabant immobiles.

Atqui haec tria non humanae virtuti tribui possunt, sed divinae. Nam 1°. si rationem habeamus multitudinis martyrum, et variae conditionis, utique si qua virtus in uno valuisset, non valuisset in alio, propter aetatem, sexum, conditionem imbecilliori. 2°. Si inspiciamus varia, eaque atrocissima, et longa tormenta, experiri possunt ipsi increduli, utrum humanae virtuti tribui possint. Prodeant enim ipsi in publicum, et ut probent, nullius roboris esse argumentum a martyrum constantia petatum, admoveant saltem flammae extremum digitum, et videant, si per unum horae quadrantem in eo cruciatu durare possint. Quid dicent igitur de membris singulis lento igne ustulatis? quid de laceratione totius corporis? quid de ossium fractura, et luxatione? quid de aliis tormentis fortasse majoribus, quibus martyres diu torquebantur, donec animam efflarent? 3°. Denique animus ante truci tyranni vultum impavidus, et inter tormenta longam mortem inferentia pacatus, imo et lætus, humanae virtutis

non est; hæc enim omnia animùm naturaliter concutiant, et perturbant.

*Dilauntur objecta.*

*Objic. I.* Suos unaquæque Religio habuit martyres. Habuerunt enim Donatistæ, Priscillianistæ, Montanistæ, Manichæi, Hussitæ, Anabaptistæ, Calviniani; denique ipsi Athei martyrem suum jactant *Cæsarem Vaninum*, qui Tolosæ combustus est. Ergo.

*R. Dist. ant.* Habuit martyres veros, *neg.* Falsos, *subdist.* non iisdem ornatos characteribus, et circumstantiis, quibus martyres Christiani, *conc.* Iisdem, *neg.* Veri itaque martyres, ut supra diximus, sunt qui testantur factum aliquod sensibus obvium, quod vel ipsi viderunt, vel aliunde certo scire potuerunt. Hujusmodi testes sola habuit Christiana Religio, ut observat *Ab. de Houteville (a)*. Reliqui vero alterius cujuscumque Religionis homines nullum omnino testari poterant se vidisse, aut audivisse factum, propter quod Religionem illam amplexi erant. Erant ergo martyres opinionis, et pertinaciæ suæ. Præterea non fuerunt iis characteribus ornati, quibus Christiani martyres. Fuerunt pauci, hoc est unus, aut alter; non fuerunt longis tentati cruciatibus, sed cita morte interempti: denique non fuerunt ejusdem probitatis, nec animum habuerunt in tormentis adeo pacatum, et sui compotem, ut martyres Christiani. De *Cæsare Vanino* ex: *gr.* constat, illum omnia tentasse, etiam hypocrisim, ut mortem vitaret. Cum tamen frustra omnia expertus esset, morte damnatus, vultu truci, animo perturbato, furis agitatatus, ad supplicium tractus est. *V. Bart. Cramond. Hist. Galliae Lib. III.*

*Inst.* Nota est *Augustini* sententia *Serm. 1. in Ps. XXXIV. n. 13.* quæ et in proloquium transit: *martyrem facit non poena, sed causa.* Ergo potius ex veritate.

---

(1) *Vérité de la Religion Chrétienne prouvée par les faits.* Vide etiam Bonnet: *Palingenetic Philosophie. Recherches Certitude des preuves etc.*

ritate Religionis probari debent veri martyres, quam ex martyribus veritas Religionis.

¶ 1°. *Neg. cons.* Laudata enim *Augustini* sententia confirmat quod paulo ante diximus, non sufficere sanguinis effusionem, ipsamque mortem, ut quis martyr vere censeatur, sed praeterea requiri, ut mortem oppetat in testimonium factorum, seu miraculorum, quibus probatur veritas Religionis. Si ergo aliquis in alia secta occidatur, quae hujusmodi miraculis non probatur, is non vere martyr est.

¶ 2°. *Dist. ant.* Si loquamur, de uno, aut altero martyre, quales erant falsi martyres haereticorum, quos refutat *Augustinus, conc.* Si loquamur de universis martyribus, qui pro religione Christiana sanguinem fuderunt, *neg.* Stabilita enim veritate Religionis, non solum tot millium martyrum testimonio, verum etiam tot aliis sine ulla dubitatione firmissimis argumentis; si quem videamus pro alia religione sanguinem fundere, eum certissimo praedicio falsum martyrem judicabimus.

*Obje. II.* Martyres reddere potuit ad perferenda supplicia promptiores vel stupiditas, vel inanis gloriae cupido, vel denique fanaticus quidam furor. Ergo.

¶ *Neg. ant.* 1°. Stupiditas martyribus nostris obijci non potest. Numquid enim stupidi homines erant *Justinus, Irenaeus, Cyprianus*; ad altiora ascendamus, *Stephanus, Paulus, Petrus* † Denique utcumque stultos fingas homines, ii nec mortis horrorem, nec vitae conservandae desiderium possunt exuere.

2°. Nec inanis gloriae cupido. Gentilibus enim Christianorum nomen probro erat. Christianis autem non semper nota erant nomina, nec semper servabatur memoria eorum, qui pro Christo mortem oppetierant. Demum quinam post mortem gloriolae hujus sensus superesse poterat, qui martyres allicere posset ad mortem appetendam?

3°. Nec fanaticus furor. Impavidus enim ille animus, pacatus, atque inter ipsa tormenta tranquillus, fanaticorum hominum non est. Adde, furorem hunc, licet in uno, aut altero homine, vel in pluribus quidem

dem; sed brevi tempore, et in eadem regione esse possit; non tamen universum orbem pervadere posse, totque homines invadere diversae aetatis, sexus, conditionis, et tandiu perdurare. Uno verbo; aliud est scribere, martyrium esse facile, aliud est martyrium pati.

## §. VIII.

## P R O P O S I T I O.

*Ipsa doctrinae Christianae puritas, sanctitas Auctoris, ejusque discipulorum, humanae virtutis opus non est.*

*Prob. 1. pars.* Humanum non est in nullo errare. Ipsi enim Philosophi *Plato, Aristoteles, Zeno*, (ut omittamus *Epicurum*) ipsique legesatores *Lycurgus*, et Romani in gravissimos errores lapsi sunt, ut supra advertimus *Cap. 3. prop. 1.* Quanto magis igitur si aliqui homines rudes, et illitterati cathedram ascendant, docturi totum genus humanum, monstrosa, et absurda errorum portenta fundere necesse est? Atqui tamen Christus, qui numquam litteras didicerat, ejusque discipuli rudes, illitterati piscatores, doctrinam docuerunt, in qua ab XVIII. saeculis ejus inimici nullum deprehendere potuerunt errorem, licet eam subtilissime examinaverint. Neque vero illa lucem odit, aut timet, ut Mahumetana, aliave religio, sed quo magis, renatis litteris, est ad examen revocata, eo magis ejus est perspecta, ac demonstrata veritas, et sanctitas. Nam si spectes Christianae religionis ethicam, quae officia hominis erga Deum, erga seipsum, erga proximum, erga rempublicam statuit; adeo certa illa est, justa, et omnibus numeris absoluta, ut ipsi ejus hostes fateri coacti sint, eam ad perficiendum hominem, et civem adprime idoneam esse. Si vero spectes *theoretica* dogmata; certe quae rationem naturalem non excedunt, ea evidenter vera sunt; quae rationem excedunt, ut mysteria, numquam adhuc demonstrari potuerunt falsa: imo

*Tract. de Verit. Relig. Chr.*

imo ipsa eorum sublimitas ostendit, ea non esse ab hominibus excogitata, et inventa. Homines enim, si suo cerebro aliqua dogmata eudere voluissent, aptasset se potius humano ingenio, et rationi, ut ea facilius auditoribus persuaderent. Ligo.

*Prob. 2. pars.* Christi sanctitas ex tota vitae ejus serie elicit, quae non minus supra humanam virtutem fuit, quam ipsa miracula, ut fatetur ipse. Ronssojus in *Emilio*. Quam quidem sanctitatem nemo diu affectare, et simulare potest, praesertim coram inimicis. At cum ipse Christus inimicos suos confidenter provocaverit: *Quis ex vobis arguet me de peccato?* *Joan. VIII. 46.* nemo hiscere ausus est; et in tribunatibus coram Judaeorum principibus, et ipso ethnico judice Pilato sola ejus sanctitas, ipso tacente, calumnias omnes dispulit, nec ullus unquam vel levisimam maculam hucusque ipsi potuit adspargere. Id confirmari etiam posset celeberrimo *Josephi* Judaei testimonio *Lib. XVIII. Antig. Cap. 4.* Fuit, inquit, hoc tempore *Jesus vir sapiens, si tamen virum illum oportet dicere; erat enim mirabilium operum effector, magister hominum, qui vera libenter amplectuntur, et plurimos ex Judaeis, plurimos etiam ex gentibus ad se pertraxit.* Cumque a primoribus gentis suae ad crucem damnatus esset, ab eo diligendo non abstinerunt qui primum dilexerant eum. Post tertium diem rediivus ipsis apparuit, cum divini Vates haec, et alia plurima admiranda praedixissent. Citant hunc locum non solum *Isidorus Pelusiota Lib. IV. epist. 225.* *Sozomenus Lib. I. Hist. cap. 1.* *Hegesippus Lib. II. de Excidio Jud. cap. 12.* *Nicephorus, Zonaras, alique;* verum etiam *Hieronymus Lib. de Script. Eccl.* *Eusebius Lib. IV. Demonstr. Evang.* viri utique emunctae naris, quos credibile non est aut vitiatos habuisse codices, aut fraudem non advertisse; nec deest in vetustioribus Latinis, aut Graecis codicibus. Unde credibile est, ab ipsis Judaeis, fuisse abrasum e nonnullis exemplaribus, in quae forte inciderunt *Justinus, Clemens Alexandrinus, alique;* qui ejus loci non meminere. Nec verisimile est, *Josephum*, qui in *Gen. 12. 13.* historia recenset alia multo minora ex gr. de

de Jo: Baptista, de Jacobo fratre Domini, siluisse multo graviora de Christo, praesertim cum ejus aetate Christianorum nomen longe, lateque esset etiam apud Gentiles pervagatum. Falsum autem est quod dicunt nonnulli, cum locum, aut stilum habere diversum, aut solum orationis interrumpere, quia contrarium legenti patet; aut Josephum, utique alienum a religionis Christiana, non potuisse ista scribere de Christo; quia ipsi Judaei ea dissimulare, et negare non poterant. *Hubertus Gifanius*, et *Lucas Osiander* primi de veritate hujus loci dubitarunt, quos secuti sunt *Salmasius*, *Blondellus*, et alii. Etsi autem facile esset eos refellere; tamen quia nobis necessarium non est hoc *Josephi* testimonium; consuli possunt *Huetius*, *Nat. Alexander*, *Bellarminus*, *Sixtus Senensis*, *Laur. Berti*, et qui omnium eruditissime scripsit *Carolus Daubuzius*.

Denique addi potest etiam sanctitas discipulorum Christi, et miranda morum conversio, quae in orbe tunc corruptissimo, et infandis vitiis immerso, facta est per praedicationem Evangelii, quam morum reformationem Philosophi nunquam efficere potuerunt non solum in populo, sed nec in seipsis. Sed jam ad alia progrediendum est (a).

CA-

---

(a) Demonstrationem veritatis Christianae Religionis videre potes inter veteres apud *Clementem Alex.*, *Athenagoram*, *Justinum*, *Origenem* *cont. Celsum*, *Eusebium in Praep. et Dem. Evang.*, *Chrysostomum Hom.* quod Christus sit Deus, *Augustinum variis lib.*, *Teodoretum de Graec. affect.*, *S. Thomam* *cont. Gent.* Inter recentiores *Grotium*, *Huetium*, *Paschalem*, *Hoskium*, *Clarkium*, *D. de Houtteville*, *D. Le Francois*, *Addisonum*, *Valsechium*, *Bergerum*, *Ab. Vadiis*, *Gerdil*, etc. quorum tamen nonnulli caute legendi sunt. *Duguet* *Traite des principes de la foi*, *Chretien Lecland* *Nouvelle de monstration Evangelique* *Gilb. Burnes* *Defense de la religion*, alique apud *Pabricium* in *Syllabo Auctorum de veris. Relig.* Vide etiam opus egregium navissime editum: *La Religione dimostrata, e difesa da Mons. Alessandro Tassoni*.



CAPUT VIII.

*Consecutaria præcedentis Capitis, ac præsertim de veritate, ac divinitate librorum Sacrae Scripturae.*

PROPOSITIO I.

*Christiana Religio divinitus revelata, et instituta est.*

*Prob.* Religio prophetiis, et miraculis confirmata nonnisi a Deo institui potuit. Talis est Christiana Religio, ut Cap. superiori ostendimus. Ergo.

PROPOSITIO II.

*Dogmata Religionis Christianae etiam ea, quorum causas, rationes, modumquæ ignoramus, vera sunt.*

*Prob.* Quae a Deo sunt revelata, ea licet ratione assequi non possimus, vera sunt, ut supra ostendimus. At dogmata religionis Christianae a Deo revelata sunt, quia idem est revelatam esse Religionem, ac revelata esse ejus dogmata. Sunt igitur vera, licet ratione assequi non possimus eorum rationes.

PROPOSITIO III.

*Sacrae Scripturae libri tum veteris, tum novi Testamenti divinitus inspirati sunt.*

*Prob.* Dogmata enim Christianae religionis vera sunt, ut paulo ante ostendimus. At Christiana Religio docet, libros utriusque Testamenti divinitus inspiratos esse; licet enim nonnulli, qui Christiano nomine gloriantur, aliquot libros non admittant in canonem librorum aut veteris, aut novi Testamenti; omnes tamen Christiani uno ore docent, libros, qui in eo canone sunt, divinitus esse inspiratos. Ergo etc.

etc. Quinam autem libri in canone Scripturarum recenseri debeant, sequenti Libro dicemus. Sed contra hanc prop. multi increduli obijciunt, quae solvenda sunt.

*Solvuntur objectiones.*

*Objic. I.* Non potuerunt divina inspiratione scribi quae falsa sunt. Sed in Scripturi tum veteris, tum novi foederis nonnulla falsa sunt. Nam Mundi chronologia in Pentateucho descripta multo recentior est ea, quam Scriptores vetustissimi tradunt: ex. gr. *Manetho* in Historia Aegyptiorum varias enumerat populi illius *Dynastias*, seu principatus, qui conficiunt annos 53535. *Berosus* ait, Chaldaeos habere Astronomicas observationes annorum 480000: denique annales Sinensium testantur, Gentem illam longe vetustissimam, et diluvio antiquiorem habuisse originem. Ergo.

¶ *Neg. min.* 1°. ratione generali, quia quaecumque chronologia contraria est libris, quos demonstravimus veros, et divinitus inspiratos, falsa est. 2°. quia Scriptores illi, qui in Gentis suae adulationem tantam finxerunt antiquitatem, longe posteriores sunt Moyse; ipsa autem ratio dietat, ut in rerum historiis praefereamus auctores vetustiores, et viciniore rebus, quas enarrant. 3°. quia Scriptores isti, quorum chronologia Mosaicae contraria est, innumeris scatent fabulis, quas increduli libenter deglutiunt. 4°. quia Dynastiae Aegyptiorum, si verae sunt, non fuerunt unius, et ejusdem Regni, sed series quaedam Regulorum, qui eodem tempore variis Aegypti regionibus imperitarunt, ut observant eruditi. 5°. quia *Berosus* recentissimus scriptor. manifesti mendacii convincitur ex eo quod *Callisthenes* rogante *Aristotele* Babylonicas observationes diligenter inspexit, quae non excedebant annos 1093. 6°. Sinensium Annales incertissimos esse, imo, et fabulis repletos ostendunt *P. Du Halde* in Historia, et *D. Fouquet* in Chronologia Sinensium, uterque multis annis apud Sinenses commemorati, quos vide.

*Objic.*

*Obfic. II.* Narrat Moyses, ex uno homine Adam in universam terram disseminatum esse genus humanum. Id verò falsum videtur 1.<sup>o</sup> quia Americæ regiones, in quas a postuis regionibus commicare non potuerunt homines, utpote longo maris intervallo se-junctas, saeculo XV. inventae sunt populosissimae, 2.<sup>o</sup> quia tam varius color hominum, ut advertit *Vol-terrius*, videtur ostendere, non omnes ab uno ortos esse. Ergo.

*¶ Neg. min.* America enim vel adhaeret, vel po-tuit nostrae telluri olim adhaerere versus Septemtrio-nalem plagam, indeque postmodum terrae motibus, aliisque temporum vicissitudinibus separari. Ceterum, etsi semper interjecto mari separata fuerit, potuerunt naves vi tempestatum jactatae eo deferri: sicut Lusitani in Brasiliam vi ventorum saeculo XV. dejecti sunt. Imo potuerunt homines sponte eo navigare. Cer-te *Plato* mentionem facit vastissimæ Insulae in mari occidentuo trans fretum Gaditanum, quam Insulam nonnulli putant ad Americam pertinuisse. Quod addit *Volterrius*, ex vario hominum colore colligi, non ab uno homine propagatum genus humanum, valde ridiculum est; nam ferventiores solis radii, clima, ci-bi, aliaque colorem hominum immutant, ut constat experientia Saracenorum, et Lusitanorum, qui in A-frica sedes fixerunt.

*Objic. III.* Historia diluvij videtur fabulosa; 1.<sup>o</sup> quia non potuit tanta esse aquarum copia, ut quin-decim cubitis superaret praecelsos montes; 2.<sup>o</sup> quia non potuerunt omnia animalia, cibique ipsis per an-num necessarii in arca contineri; 3.<sup>o</sup> quia nova ani-malium genera in America reperta sunt, quae non sunt in nostra tellure, ac proinde non potuerunt hinc illuc perire, praesertim cum mari interjecto prohi-berentur: ideoque falsum videtur, ex animalibus in arca servatis, orta esse cuncta animalia, quae hodie terram occupant. Ergo.

*¶ Neg. ant.* Etenim 1.<sup>o</sup> aquae diluvij partim e caelo deciderunt, partim e terrae visceribus prosi-luerunt. *Rupti sunt fontes abyssi magnae, et cataractae caeli apertae sunt Gen. VII. 11.* Quis autem mensus

est

est aquas, quae continentur in terrae visceribus adeo profundis, ut terrae ipsius semidiamiter 4000. miliaria exaequet, quae profunditas immenso intervallo superat montium altitudinem, quae vix duorum, vel trium est miliarium? quis supputare potuit, quanta aquarum copia e caelo possit decidere quadraginta diebus, et quadraginta noctibus? Certe diluvii vestigia in ipsis montibus deprehenduntur, in quibus marinae conchae, et pisces effodiuntur in lapides conereti.

2.<sup>o</sup> Demonstrant hodie eruditi post *D. Pelletier in Dissert. de Arca*, geometricè supputatis arcae dimensionibus, quas describit Moyses, longe maiorem inveniri capacitatem, quam quae sat esset ad cunctas animalium species continendas, atque escas iis alendis necessarias, cum praesertim pauciores sint primariae animalium species, ex quibus deinde aliae a primis degeneres ortae sunt. Idem evidenter ostendunt *Joan. Buteo Anglus lib. de Arca*, Calmet in *Comment. ad Gen. VI. et in Diction.* Sed rationibus his subducendis non videtur opus esse. Si enim Pentateuchi auctor fabulam concinnare voluisset, cum posset utique maiorem fingere Arcae molem, si fuisset necessaria; profecto si talem descripsit, qualis in *Genesi* legitur, manifestum est, eam fuisse, aptam iis continendis, quae in Arca servari oportebat.

5.<sup>o</sup> Multa efficere potuerunt, ut nonnullae animalium species in nostra tellure perierint, ex. gr. adversae tempestates, aut clima ipsis inimicum, quae tamen species in America, quo potuerunt penetrare eodem modo, quo supra diximus penetrare potuisse homines, non perierunt.

*Objec. IV.* Post diluvium ait Moyses, sic Deum Noë allocutum *Arcum meum ponam in nubibus, ut sit signum foederis inter me, et inter terram. Gen. II. 11.* quasi tum primum arcus inter nubes apparere coeperit. Atqui hoc falsum videtur; arcus enim ille ex varia radiorum solarium refractione necessario semper oriri debuit, Ergo

¶ *Neg. maj. quoad secundam partem;* verba enim illa *arcum meum ponam in nubibus etc.* non significant, tum

tum primum apparere incepisse arcum; sed *phaenomenon* illud tunc a Deo constitutum fuisse *signum foederis*, praesertim cum textus Hebraicus, cui consonat etiam Samaritanus, imo et versio Syriaca, et Arabica ita habeant *arcum meum posui in nubibus*.

*Objic. V.* Narrat Moyses, quinta plaga, qua Deus percussit Aegyptios, *mortua esse omnia animantia Aegyptiorum Exod. IX. 6.* et tamen septima plaga scribit, *perisse in omni terra Aegypti cuncta, quae fuerunt in agris ab homine usque ad jumentum, Ibid. v. 25.* imò addit, Pharaonem insecutum esse Israelitas cum equitatu. Atqui haec pugnantia sunt; si enim animantia omnia perierunt quinta plaga, nulla remansissent jumenta interimenda per septimam, et multo magis Pharaon destitutus fuisset equis, quibus Israelitas insequeretur.

*¶ Neg. min.* Quod enim ait Moyses, quinta plaga perisse omnia animantia, intelligendum est de omnibus animantium generibus, non de singulis omnium generum, quod in Scripturis non est inductum; unde remanserunt adhuc jumenta, quae sub septima plaga perierunt. Sed nec septima plaga scribit Moyses, omnia jumenta, sed ea tantum, quae fuerunt in agris, interiisse propter ingruentem grandinis vim. *Sed qui timuit verbum Domini de servis Pharaonis, fecit confugere jumenta in domos Exod. IX. 20.*

*Objic. VI.* Plura habent sacri scriptores, quae sacriori physicae non congruunt; *ex. gr.* caelos esse solidos; lunam esse stellis majorem, et alia ejusdem generis, quae utique falsa sunt. Ergo.

*¶ Neg. ant.* Verba enim divinitus inspirata nulli possunt veritati esse contraria; licet aliquando ad captum hominum accommodata, intelligenda tamen sint aliquo sensu, qui veritati non adversetur. Lunam quidem Scriptura appellat *luminare magnum*, tum quia revera talis apparet oculis, tum maxime quia si spectetur non ratione molis, sed ratione luminis, ex quo dicitur *luminare*, magis lucet ipsa lumine alieno, quam omnes simul stellae lumine proprio, ideoque revera nobis est *luminare majus*. Caelum vero esse solidum, Scriptura non asserit. Quod enim  
Cae-

Caelum vocat firmamentum, id secundum Hebraicam vocem extensionem significat, ut omnes norunt, quod vero *Job. XXXVIII.* 18. ait *Eliu*, coelos solidissimos, quasi ex aere fusos, id refert Scriptura ab illo dictum: non probat; imo *Cap. XXXVIII.* 2. ait de illo Deus: *Quis est iste involvens sententias sermonibus imperitis?*

*Objic. VII.* Liber *Ecclesiastes* videtur ab homine Epicureo compositus, qui unum esse ait interitum hominum, et jumentorum, ideoque fruendum bonis vitae hujus. Praeterea *Canticum Canticorum* carmen videtur amatorium. Ergo.

*¶ Neg. ant.* Verba enim *Ecclesiastes* ex ore, et sententia impiorum, et errantium hominum prolata esse patet ex libri ipsius scopo, et conclusione. Postquam enim docuit, vana esse omnia bona vitae hujus, quae homines adeo sollicitos habent, sic ait: *Finem loquendi pariter omnes audiamus. Deum time, et mandata ejus observa; hoc est enim omnis homo, et cuncta, quae fiunt, adducet Deus in judicium pro omni errato, sive bonum, sive malum.* Canticum vero canticorum, non carnali, sed spiritali sensu intelligendum esse Religio Christiana semper docuit, idest non inhaerendum litterae, quae occidit, sed spiritui, qui vivificat.

Multa alia aequae frivola de Scripturis veteris Testamenti congerunt increduli, quae sicut a nostris Interpretibus desumserunt, ita a nostris jamdiu explicata fuerant; quae omnia hic proponere non sinit nostri instituti brevitatis. Vide *Calmet*, *Estium*, et praecipue eruditum opus *D. Goeneti* de hoc argumento (a). Veniamus ergo ad Novum Testamentum.

*Objic. VIII.* *Matthaeus Lucas* contrarius est in des-

scri-

---

(a) *Lectures de quelques Juifs Persans et Allemands par l'Abbé Guenet. Item Réponses. Critiques à plusieurs difficultés proposées par les nouveaux incrédules sur divers endroits des livres saints par M. Bolland.* Vide etiam nostram *Exercitationem De veritate divinarum scripturarum*; ubi multas adversariorum cavillationes dissolvimus.

scribenda Christi genealogia. Nam *Matthaeus* ait *Cap. I.* *Joseph* fuisse filium *Jacob*, quem deducit a *David* per *Salomonem* vigintiseptem generationibus; *Lucas* vero eundem *Joseph* fuisse dicit filium *Heli*, quem deducit a *David* per *Nathan* generationibus quadraginta duabus. Ergo.

*¶ Neg. ant.* Ad confirm. duplex est Patrum responsio. Prima est; *Matthaeum* descripsisse progenitores *Joseph*, *Lucam* vero *Mariae*, ait enim *Lucas*. Ipse *Jesus* erat incipiens quasi annorum triginta, ut putabatur filius *Joseph*, qui fuit *Heli*, h. e. putabatur quidem filius *Joseph*, sed erat filius, h. e. nepos *Eli*, qui idem est, ac *Joachim* pater *Mariae* Virginis; nam *Eliavim*, *Eli*, et *Joachim* nomina sunt unius, ejusdemque hominis; ut patet ex *Lib. IV. Regum Cap. XXIII.* quia ab *Eliachim* per apocopen vel priorum, vel posteriorum syllabarum sit *Eli*, et *Joachim*. Ex hac responsione evanescit objectio; nam quod plures in *Lucâ*; quam in *Matthaeo* generationes notentur, nihil refert; cum possint utique in una familia eodem tempore plures esse generationes, quam in alia.

Verum altera responsio communior est apud Patres, traditurque a *Julio Africano*; qui cum ab ipsis *Josephi* cognatis se accepisse scribit, nimirum *Joseph* dici potuisse filium *Jacob*, et *Heli*, quia cum *Heli* sine liberis defunctus esset, *Jacob* ejus frater uterinus, ex praescripto legis, ejus viduam duxit uxorem, ita ut *Joseph* fuerit filius naturalis *Jacobi*, et legalis *Heli*. Ceterum haec, quae ob antiquitatem nobis obscura sunt, erant tunc omnibus nota, quia familiarum genealogiae diligenter servabantur.

*Objic. IX.* *Matthaeus Cap. I.* ait, Christum esse filium *David*; et tamen describit genealogiam *Joseph*, et addit, Christum non fuisse filium *Joseph*, sed *Mariae* Virginis, quae erat ex tribu *Levi*, cum *Cap. I. Lucae* dicatur cognata *Elisabeth*, quae erat de filiabus *Aaron*. Ergo contraria loquitur.

*¶ Neg. cons.* Nam nisi dicere velimus, *Matthaeum* fuisse omnino stupidum, fateri debemus, notum tunc omnibus fuisse, *Joseph* conjugem accepisse ex eadem familia, scilicet *Mariam* Virginem, quae per lineam matrem cognata erat *Elisabeth*.

*Objic. X.* Idem *Matthaeus Cap. II.* refert, nato Domino *Herodem* crudelissima puerorum strage *Bethlehem*, ejusque fines cruentasse; *Lucas Cap. II.* ante Domini nativitatem *Augustum* edixisse totius orbis Romani descriptionem, et addit, hanc descriptionem primam factam esse a *Praeside Syriae Cyrino*. At haec videntur non solum falsa ob silentium *Josephi* de caede puerorum, et Romanorum Historicorum de descriptione totius Romani Orbis, quos latere non poterant facta tam publica, tamque memorabilia; verum etiam videntur sibi contraria. Nam *Cyrinus*, seu *Quirinus* *Syriam* provinciam suscepit decennio post *Herodis* mortem, ac proinde si *Christus* natus est sub *Herode*, descriptio tunc a *Cyrino* fieri non potuit; si vero *Christus* natus est tempore hujus descriptionis, jam *Herodes* obierat, atque ideo falsa est caedes puerorum jussu *Herodis* facta, jam nato *Christo*.

*¶ Neg. min.* Silentium enim tum *Joseph* de caede puerorum; tum *Suetonii*, et *Taciti* de censa *Augusti*, argumentum est negativum, quod nihil valet contra affirmantem, sive positivam historiam *Matthari*, et *Lucae* imo et *Josephi Lib. XVIII. Antiq. Cap. I.* qui in factis adeo publicis, et memorabilibus nec falli, nec mentiri poterant. Historia autem *Dionis*, qui fusius de *Augusto* scripserat, intercidit ab anno 748 V. C., usque ad annum 758, intra quod decennium contigit illa descriptio juxta *Lucam*, quae adeo certa est, ut *Justinus*, et *Tertullianus* Gentiles, et haereticos provocent ad Acta publica, quae tunc adhuc extabant, illamque descriptionem testabantur; et *Julianus* apostata eam confirmet apud *Cyrillum Alex. Lib. VI.*

*Cyrinus* autem, antequam *Proconsul Syriae* Provinciam obtineret, id munus suscepit extraordinarium, recensendi, et describendi *Palaestinam*, et quia unus tanto oneri non sufficiebat, socios habere debuit, cum *Tertullianus* censum in *Judaea* actum scribat per *Sensum Saturninum*. Hoc pacto difficultas evanescit (a).

*Objic.*

---

(a) Vide *Benedictum XIV.* in erudito opere *De Festis J. Christi, et Mariae*



*Objic. XI.* Joannes Evangelium ita concludit: *Sunt autem et alia multa, quae fecit Jesus, quae si scribantur per singula, nec ipsum arbitror mundum capere posse eos, qui scribendi sunt, libros.* Atqui haec immoderata hyperbole Spiritui Sancto tribui non potest. Ergo.

*Res.* Nomine mundi Joannes intelligere potuit homines, praesertim mundanos, quo sensu nomen illud saepe usurpat in Evangelio, et in Epistolis: verbum autem *capere* usurpatur ibi pro *intelligere*. Sensus ergo esse potest, mundanos homines *concepere, intelligere, imaginari* non posse, quot scribendi essent libri, si omnia Christi acta singillatim exponerentur, atque hic, si aliqua hyperbole est, est utique modestissima. Sed si per mundum intelligas totum terrarum orbem (non insueta est hominibus haec hyperbole ad significandam rerum multitudinem aptissima; ad hominum autem captum Scriptura accommodata est.

Praetermittimus alias incredulorum miseras cavillationes, praesertim de Evangelistarum consensu, cum omnes jam a nostris Interpretibus occupatae, et exuffatae sint. Vide Augustinum *de Consensu Evangelistarum*, aliosque (a).

### Corollarium.

Quotiescumque igitur in Scripturis aliquid occurrit, quod veritati non videatur congruere, quamvis nequeamus enodare difficultatem; certissime tamen tenendum est, vel codices incuria amanuensium esse mendosos, vel nos sensum non esse assecutos, quod sapienter monet Augustinus *Lib. II. cont. Faust. Cap. 5.*

F

PRO-

---

(a) Omnes apparentes scripturarum *antilogias* accurate collegit *Tirinus*. Vide de veritate divinarum scripturarum *Exercitationem*, quam seorsim edidimus, ne institutae brevitatís excederemus limites.

## PROPOSITIO IV.

*Omnes aliae religiones , a Christiana diversae ,  
falsae sunt.*

*Prob.* Omnes aliae religiones vel in uno , vel in pluribus contrariae sunt Religioni Christianae , alioquin non essent ab ea diversae . Atqui quod contrarium est veritati a Deo revelatae , falsum est , nec a Deo revelari potuit . Ergo .

*Objic.* *Roussojus.* Ut possis falsas dicere omnes alias religiones , peragrarè deberes omnem terram , ediscere linguam omnium populorum , legere in proprio idiomate libros sacros omnium religionum , examinare non solum dogmata , quae continent , verum etiam miracula , quae jactant . Atqui hoc hominum vires longe superat . Ergo nemo scire potest , utrum alia sit vera Religio .

*¶ Neg. maj.* Mirum enim est , homines , philosophorum nomine tumidos , adeo ineptire . Quando veritas detecta est , nullo alio opus est examine . Quidquid veritati jam demonstratae opponitur , falsum est .

*Inst.* Theologi Christiani testantur , fidem esse aeternum mentis liberum , non necessarium . Ergo non est evidenter demonstrata veritas Religionis Christianae .

*¶ Neg. cons.* Potest enim mens , vel praejudiciis occupata , vel cupiditatibus dedita , vel ipsa obscuritate rerum revelatarum impedita ; nolle attendere demonstrationi ; vel etsi attendat , tamen potest nolle elicere actum fidei . Atque hinc patet , merito a Catholicis omnibus cum indignatione rejectas illas propositiones : *Religio Christiana non est evidenter vera* . . . . . *hinc infer , evidens non esse* 1°. quod existat nunc in terris aliqua vera religio 2°. quod omnium , quae in terra sunt , verosimillima sit Christiana 3°. quod Apostolis manifesta fuerit Christi divinitas 4°. quod afflante Deo fusa sint prophetarum oracula etc . ( *Inter damnatas a Clero Gallieano anno 1700.* ) .

CA-

C A P U T IX.

*Sola Ecclesia Romano-Catholica veram Christi Religionem profitetur.*

*Adv. I.* **M**ultae sectae tum in Oriente, tum in Occidente Christianam Religionem se profiteri gloriantur; una tamen debet esse vera, nam contraria simul vera esse non possunt.

II. Quamvis sequenti Libro, Catholicam Ecclesiam veram profiteri Christi Religionem, ostendamus contra haereticos ex Scripturis, quas ipsi agnoscunt ut divinas, hic tamen operae pretium est, idipsum ostendere ratione naturali contra incredulos, qui falso obijciunt, Religionem Christianam non esse unam, sed in varias sectas divisam.

P R O P O S I T I O.

*Sola Ecclesia Catholico-Romana veram profitetur Religionem Christianam.*

*Prob. I.* Sola Ecclesia Romano-catholica est illa, quam Christus, et Apostoli fundarunt. Nam sola habet pastores, qui legitima ordinatione, sibi invicem perpetuo succedentes, pertingunt usque ad Apostolos, ac proinde usque ad Christum. Reliquae vero sectae ubi ad primum pervenerint auctorem suum, ex. gr. Lutherum, Calvinum, Nestorium, non possunt ulterius progredi, atque ideo earum pastores non sunt successores Apostolorum. Atqui Christus promisit, Ecclesiam, quam ipse fundavit, nunquam defecturam esse a Religione, quam ipse docuit. *Ecce ego vobiscum sum omnibus diebus usque ad consummationem saeculi* Math. XXVIII. 20. *Ego rogabo Patrem, et alium Paraclitum dabit vobis, ut maneat vobiscum in aeternum, Spiritum veritatis.* Joan. XIV. 16. Ergo cum Christi promissiones verae sint, quia religio Christiana docet, ipsum a Deo missum nec falli, aut fallere potuisse, fit hinc, nunquam defecisse Eccle-

siam Romano-Catholicam a vera Christi religione. Aliunde vero aliae sectae profitentur Religionem catholicam contrariam; ergo sola Ecclesia Catholico-Romana proficitur veram Christi Religionem.

II. Ecclesia Catholica antiquior est omnibus aliis sectis, quia omnes sectae a catholica secessionem fecerunt. Igitur antequam sectae illae orirentur, vel Ecclesia Catholica profitebatur veram Christi religionem, vel non. Si primum dicās; ergo sectae illae a vera Christi Religione defecerunt, quae in sola Catholica remansit. Sin' alterum; ergo cum sectae ortae sunt, jam defecerat in terris Christi Religio, ac proinde Christi promissiones non fuerunt verae, nec ipse Christus a Deo missus est. Unde manifestum est, vel solam Catholicam Ecclesiam profiteri Religionem Christi, vel ipsam Christi Religionem falsam esse. Atqui posterius dici nequit, ut fuisse hucusque demonstravimus, et fatentur sectarii. Ergo.

III. Omnes sectae ideo a Catholica Ecclesia recesserunt, quia putarunt, illam errare in Scripturis interpretandis. Atqui interpretatio nova, quam ipsae protulerunt, non est a Deo revelata; non enim Deus revelavit, interpretationem *Lutheri ex. gr.* esse veram, quia si id revelasset, miraculis confirmasset, ut supra docuimus. Ergo sectae illae, quae fundatae sunt in illa interpretatione, non innituntur revelatione divina; sicut innititur Catholica Ecclesia miraculis, et prophetiis toto orbe a Christo instituta, et fundata. Ergo vel nulla existit in terris Christiana religio, vel haec est in sola Catholica: Atqui prius dici non potest, quia unum ex dogmatibus Christianae religionis, quam probavimus esse veram, est hoc, nempe Christi religionem numquam in terris extinctum iri.

IV. Omnes sectarii fatentur, imo evidens est, Ecclesiam Catholicam primis saeculis, quibus per Apostolos est fundata, veram Christi religionem continuisse. Atqui non potest notari tempus, quo Religionem illam ejuraverit, et docere incoeperit ea, quae nunc docet. Ergo revera, numquam a Christi reli-

gione defecit. Neque enim mutatio tam insignis fieri potuisset toto orbe, nemine contradicente, imo nec sentiente.

Responsiones, atque objectiones sectoriorum tum secundo Libro, tum sequentibus refutabimus.

## CAPUT X.

### *Indifferentismus in Religionis negotio absurdissimus est.*

*Ado.* **I**ndifferentistae post Baelium, Roussojum, Volterium, Argensium, aliosque miseros auctores Litterarum Sinensium, Peruvianarum, etc. docent, quaecumque religionem bonam esse, Deoque gratam, atque homini sufficere ad salutem. Hoc autem eorum dogma dicitur *tolerantia religiosa*.

II. At Christiana religio contrarium docet. *Non est in alio aliquo salus; neque enim aliud nomen (praeter Jesum Christum) est hominibus sub caelo datum, in quo oporteat, nos saluos fieri, Act. IV. 12. Qui crediderit, et baptizatus fuerit, saluus erit, qui vero non crediderit, condemnabitur, Marc. XVI. 16. Qui credit in eum non judicatur, qui autem non credit, jam judicatus est, quia non credit in nomine Unigeniti Filii Dei, Joan. III. 18.* Hoc Christianae Religionis dogma dicitur *intollerantia religiosa*.

III. Differt *tolerantia religiosa* a *tolerantia civili*, quae est silentium magistratuum non impediendum in politica societate contrarias religiones.

## PROPOSITIO

*Absurdissimus est indifferentismus, seu  
religiosa tolerantia.*

*Prob. I.* Si Deus religionem aliquam revelavit, tamquam solam sibi gratam, et homini necessariam, absurdissimum est asserere contrarium. Atqui Deus revelavit, ut supra *Cap. VII.* ostendimus, religio-

nem Christianam; cuius dogma est, non esse in alia ulla religione salutem. Ergo iisdem argumentis quibus Christiana religio statuitur, absurdissimus demonstratur *indifferentismus*.

II. Deo, qui est ipsa summa veritas, placere non potest, nisi veritas; falsa autem sicut Deo placere non possunt, ita non possunt esse apta, et idonea, quibus homines Deo placeant, et salvi fiant. Atqui veritas una est; una igitur religio Deo grata esse potest; atque ideo si Religio Christiana vera est, sola Deo placere potest.

Hinc sequitur, *intolerantiam religiosam* esse solius verae Religionis characterem.

### Soluntur Objecta.

*Obiic. I.* Illud dogma rejiciendum est, quod immunitatem quandam, sive crudelitatem Deo tribuit, atqui talis est *intolerantia religiosa*; si enim extra Christianam Religionem salus esse nulla potest; jam tot centena hominum millia, quibus Religio haec praedicata non fuit, in aeternum perierunt, et peribunt. Ergo.

*Neg. min.* Deus enim neminem damnat ob ignorantiam *invincibilem* Christianae Religionis sed ob peccata: quod non crudelitatis, sed iustitiae est. Si quis autem Religionem hanc *invincibiliter* ignoraret, sed servaret cum Dei auxilio omnia praecepta legis naturalis, quam nemo invincibiliter ignorare potest; Deus ei non deesset, sed revelaret aliqua ratione ipsi notam veram Religionem, sicut revelavit Cornelio Centurioni, ut legimus in *Actis Apostolorum*.

*Inst.* Si nemo extra Christianam Religionem salvus esse posset, divina revelatio multiplicasset impedimenta salutis; imposuisset enim novum iugum suscipiendi hanc Religionem revelatam. Atqui hoc absurdum est. Ergo.

*Neg. seq. maj.* Revelatio enim pluribus rationibus, quae supra expositae sunt *Cap. III.*, erat homini necessaria ad salutem; unde debitum illud revelatam Religionem suscipiendi est in hominis utilitatem,

tatem, ut scilicet salutem consequatur. Si qui sunt autem, quibus haec revelatio annuntiata non est, ii in eodem statu sunt; in quo erant ante revelationem. Sed si nihil contra legem naturalem peccaverint, Deus iis non deerit, ut supra diximus.

*Objic. II.* Deus cor intuetur. Si ergo homo corde sincero Deum colat, parum refert quoniam externo cultu ipsum honoret.

*¶ Neg. cons. 1.º.* Quia externus cultus oritur ab interna opinione, quam de divinis attributis habemus; ita ut si externus cultus pravus sit, pravas esse oporteat opiniones de Dei proprietatibus, quae opinionones Deo placere non possunt. 2.º. Quia ex interno cordis affectu oritur, quod quis nolit illa de Deo credere, illumque cultum Deo exhibere, quem ipse revelavit, quae quidem perversa voluntas Deo displicet. 3.º. quia absurdissimum est, Deum, qui est ipsa summa, et una, et sancta veritas, delectari tam variis, et monstrosis, imo et flagitiosis ritibus, qui a variis religionibus sanciti sunt.

*Objic. III.* Filius hominis Christiani laudabilis est, si sequitur absque ullo examine Religionem patris: Ergo filius Mahumetani bene etiam faciet, si patris Religionem sequatur. Idem dicas de pueris in alia quaecumque Religione natis. Ergo.

*¶ Neg. cons. et parit.* Nam filius Mahumetani potest natura duce, ac magistra cognoscere, in patria religione, nonnulla praecipi, aut permitti legi naturali contraria (a), idem dicás de pueris in alia religione natis.

*Inst.* Magna est educationis, et praedudiciorum vis. Ergo puer Mahumetanus cognoscere non potest quae in illa religione contraria sunt rationi.

*¶ Neg. cons.* Nam ab actu ad posse valet conclusio, ut habet commune Philosophorum effatum. Si pueri Judaeorum, et Gentilium cognoverunt initio nascentis

tis

---

(a) Vide Höørbeckium, et Andream Relandum contra Mahumetanos, Grozium De veritate Rel. Christ. Natalem Alexandrum Hist. Eccl. Saec. VII. Forbesium Lib. IV. Instruct. Theol. Marracium Refutatio Alkoran.

tis Ecclesiae falsitatem patriae religionis, et veritatem Christianae, eamque amplexi sunt; poterunt etiam, Deo auxiliante, idem facere pueri Mahumetani, aut alterius religionis. Interim fateamur, maguo esse impedimento educationem, et praejudicia; ideoque gratias agimus Deo, qui nos in vera Religione nasci, ac nutrirī voluit.

*Inst. 2.* Credibile non est, Deum voluisse, ut universum ferme humanum genus periret ante Christum, et post Christum major hominum pars, quae Religionem non sequitur Christianam. Ergo.

*¶. Neg. ant.* Postquam enim demonstravimus, Religionem Christianam solam veram esse, non solum credibile, sed etiam certum est, omnes, qui extra hanc Religionem vivunt, salutem consequi non posse. At cur eos Deus damnat? Propter peccata. Cur non illuminat? Quia rursus propter peccata non merentur hanc gratiam. Cur alios acque peccatores ad veram Religionem adduxit? Quia infinita est misericordia ejus. Cur eadem misericordia usus non est erga ceteros? Quia non solum misericors, sed etiam justus est. Cur erga hos potius, quam erga illos misericordia usus est? Id vero nostrum non est judicare, *quis enim consiliarius ejus fuit?* Sufficiat nobis scire, Religionem nostram certissime a Deo revelatam esse, ac proinde extra eam neminem salvum fieri, Deumque justissimum neminem damnare posse innoxium.

*Obje. IV.* Haec doctrina videtur Reipublicae noxia. Hoc enim semel statuto, neminem extra Ecclesiam salvum esse posse, Christiani concives suos ab avita Religione retrahere conabuntur. Hinc dissidia, et seditiones, quae publicam pacem perturbant, unde ipse Christus hoc praevidens dixit: *Non veni pacem mittere, sed gladium* Matth. X. 34. Ergo melius statuisse videntur philosophi veteres, et ipse Cicero, et Epictetus, cives religionem patriam colere debere, etsi falsam: quos etiam secutus est *Antonius Genuensis Lib. de Officiis* in prima editione, quod tamen in altera retractavit.

*¶. Neg. ant.* Cum enim haec Religio doceat, diligere



ligendos esse omnes homines, etiam inimicos, et incredulos; et obediendum Magistratibus in omnibus, quae non sunt contra Deum; nulla religio aptior est vel ad pacem servandam, vel ad publicum bonum promovendum; quod enim alii faciunt metu poenarum, quas aliquando facile est evadere, id Christiani facere debent lege religionis, et ob timorem Dei, quem nullus aut fallere, aut effugere potest. Quod ergo Christiani, quantum in ipsis est, studeant concives suos, imo omnes populos instruere in veritate, atque ab errore perniciosissimo retrahere; id suadet amor veritatis, et proximi: tamen cum non arma, sed suasiones adhibeant, et quidem opportuno tempore; si dissidia oriantur, culpa est eorum, qui errorem suum vi, et armis defendere, et tantum proximi bonum impedire volunt. Sed numquid bonum erit malum, quia mali, ut bonum impediatur, mala faciunt? Hanc igitur malitiam hominum Christus praevidit, cum ait: *Non veni pacem mittere*. Turpiter ergo errarunt veteres Philosophi *indifferentistae*, et cum iis *Genuensis*, licet laudandus sit, quod errorem suum utcumque correxerit in altera Editione laudati operis.

*Inst.* Varia sunt terrae climata, et varia in iis ingenia, et mores populorum. Formae etiam civitatum variae sunt, cum aliae Monarchico, aliae Aristocratico, aliae Democratico regimine utantur. At *Montesquius* in *Spiritu Legum* docet, varias religiones variis terrae Climatibus, et Rebuspublicis facilius aptari. Ergo.

*H. Dist. min.* Egregie falsus est Auctor ille, *consecus*, *neg.* Unus est ubique Deus, una est humana natura, et veritas una. Ergo nihil absurdius dici poterat, quam quod dixit *Montesquius*. Imo ipsa experientia compertum est, Christianam Religionem in variis illis terrae Regionibus, et vario earum regimine variis temporibus floruisse, Deo per gratiam suam quaecumque obstacula superante.

*Inst. 2.* Quot Christiani, praesertim Magistratus, usi sunt gladio, ut heterodoxos cogere ad amplectendam religionem suam! Atqui id non fecissent,

si tolerantiam religiosam admisissent; Ergo. Hic indifferentistae longam historiam texunt malorum, quae ipsi dicunt ab intolerantia religiosa orta esse.

¶ Religio Christiana docet, 1°. Neminem cogendam ad ipsam suscipiendam; 2°. Subditos non debere adversus suos Principes rebellare praetextu Religionis. Si qui secus fecerint, ipsi viderint facti sui rationem. Certè saeculo II. exeunte, licet Christiani totum jam orbem impleverint, et multo plures numero essent, quam Gentiles, ut ait *Tertullianus*; nihil tamen fecerunt, quod Reip. pacem turbare posset, ne ut ab injustissima quidem, et cruentissima infidelium persecutione se defenderent.

### Scholium.

Diximus, neminem extra Christianam religionem salvum fieri posse, solam autem Catholicam Ecclesiam vere Christianam Religionem profiteri, ideoque neminem extra Catholicam Ecclesiam salutem consequi. Sed advertendum est. haereticorum filios, vel qui ab haereticis baptizati sunt infantes, non censi extra Catholicam Ecclesiam, donec adulti voluntarie profitentur haeresim, cujus falsitatem possunt agnoscere; ideoque non tantus est eorum, qui pereunt, numerus, quantus in *tertia Objectione* ponitur.

### Libri Conclusio.

Quod ergo in *Dissertatione Prodroma* diximus, principia Theologiae esse a Deo revelata, id jam demonstravimus. Sed quoniam Catholicae religionis hostes, licet Christiano nomine glorientur, non consentiunt de locis, ubi divina revelatio continetur, contendentibus nonnullis, eam in sola Scriptura sacra contineri, cujus varios libros pro lubito rejiciunt; hinc ex ipsis Scripturae libris, quos agnoscunt, revincendus est eorum error, et veri fontes aperiendi, sive loci, unde Theologica argumenta deduci debeant, quod sequenti Libro praestabimus.

### Finis Libri I.

## L I B E R H.

S. E. U

## TRACTATUS DE LOCIS THEOLOGICIS.

Praefatio.

Quoniam oportet, Theologum ita annecti cum, qui secundum doctrinam est, fidelem sermonem, et potens sit exhortari in doctrina sana, et eos, qui contradicunt, arguere vaniloquos, et seductores; nosse eum imprimis necesse est tum sedes, unde promat principia disciplinae, tum qua via, et ratione ex iis debeat et sua confirmare, et refutare contraria. Quod nos hoc libro explicare quanta maxima possumus brevitate, ac perspicuitate institimus.

## CAPUT I.

*Locorum Theologicorum definitio, et divisio. Errores in hoc Libro refutandi.*

I. Loci Theologici dicuntur, more Rethorum, et Philosophorum, sedes ac veluti promptuaria, unde Theologus argumenta depromit.

II. Diximus autem *Dissert. Prodr. Cap. I.* Theologiam ex principiis a Deo revelatis argumentari, non rejecta tamen ratione naturali, dummodo revelationi famuletur. Loci ergo Theologici duplicis sunt generis, *interni*, et *externi*. Interni sunt, qui ipsam Dei revelationem vel certo, vel probabiliter continent, ideoque rursus dividuntur in *necessarios*, et *non necesarios*. *Necessarii* sunt, ex quibus certa habetur revelatio, ut Scriptura divina, Traditio, et Ecclesiae definitio: non *necessarii* vero, ex quibus probabi-

babilis tantum revelatio, vel revelationis consecraria eruntur, ut Provincialia Concilia, aliquot seorsim Patres, consensus Theologorum. Denique loci externi suppeditant principia naturali ratione cognita, ut, est ipsa communis omnibus ratio, Philosophorum placita, Historia.

III. Sunt ergo loci Theologici decem, 1°. Scriptura: 2°. Traditio, de qua tamen nos primo loco, disseremus, tum quia ipsa tempore Scripturam antecessit, tum quia ex traditione discernendi sunt Scripturae Libri Genuini ab Apocryphis: 3°. Sanctorum Patrum auctoritas, quae reducitur ad traditionem, ad quam probandam adhibetur, ideoque expendetur a nobis eodem loco, quo de Traditione tractabimus: 4°. Ecclesia: 5°. Concilia: 6°. Summorum Pontificum decreta: 7°. Theologorum consensus: 8°. Ratio naturalis: 9°. Philosophia: 10°. Historia.

IV. In definiendo autem quinam sint loci, unde principia divinitus revelata certo depromantur, errarunt Haeretici. Novatores enim post *Lutherum*, et *Calvinum* (a) docent 1°. Solam Scripturam continere verbum Dei. 2°. Nonnullos Scripturae libros, quos Ecclesia Catholica recipit, non esse divinos. 3°. Ipsam Scripturam in rebus ad salutem necessariis esse claram, atque omnibus perspicuam. 4°. Si qua tamen controversia oriatur de sensu Scripturae, unumquemque privatim Spiritu Sancto interius illustrari, ut de ea certo possit judicare. Hinc inferunt 1°. non esse agnoscendam, sed rejiciendam Traditionem; tum quia quidquid est ad salutem necessarium, continetur in Scriptura; tum quia ipsa Traditio, ut ipsi contendunt, fallax est. 2°. rejiciendam esse Ecclesiae auctoritatem; quia dicunt, Ecclesiam non esse semper *visibilem*, nec talem, ut non possit aliquando

(1) *Lutherus in Ep. 1. ad Gal. Calvinus Lib. IV. Instit. Cap. 8. §. 7. et Cap. X. §. 18. et in Annot. Conc. Trid. Sess. IV. Bientius Pro eg. cont. Pet. a Soto. Kerm. titus Exam. Conc. Trid. Sess. IV. Hamelmannus cont. Tradit. etc.*

do falli, aut omnino deficere, seu non esse *indefectibilem*, nec *infallibilem*: quibus vocabulis jamdiu in Schola receptis, compendii gratia, deinceps utemur.

V. Rectus igitur ordo postulat, ut ex ipsis Scripturarum libris, quos haeretici cum catholicis ut divinos agnoscunt, demonstramus contra eos 1°. Non solam Scripturam continere verbum Dei, sed etiam Traditionem: cujus testes sunt libri SS. Patrum, Conciliorum definitiones, et Pontificum decreta: eamque continere aliqua ad salutem necessaria, nec esse fallacem: 2°. Statuta auctoritate Traditionis, ex duplici isto capite Scripturae scilicet, et Traditionis ostendamus, veros esse, et divinos eos Libros Scripturarum, quos recipit Ecclesia catholica: 3°. Ipsam Scripturam non in omnibus esse claram: 4°. Si qua oriatur controversia de sensu Scripturarum, non esse quemque privatum judicem certum, et falli nescium: 5°. Judicem controversiarum esse ipsam Ecclesiam, quam demonstrabimus visibilem, indefectibilem, infallibilem. Quae cum praestiterimus, etiam de iis locis agemus, quae suppeditant argumenta Rationi congruentia.

## C A P. II.

### *De traditione.*

#### §. I.

#### *Traditionis definitio, atque divisio.*

I. **T**raditio apud Patres, et Theologos est doctrina ad fidem, mores, aut disciplinam pertinens in Ecclesia conservata, et ad nos usque transmissa, quae in Libris Canonicis scripta non est, quo sensu Irenaeus *Lib. III. Cap. 2.* ait, haereticos *neque Scripturis, neque Traditioni consentire*: licet scripta sit in libris SS. Patrum, et actis Conciliorum.

II. Triplex est traditio, *Divina, Apostolica, et Ecclesiastica*. *Divina* est ipsum Dei Verbum per Apostolos tamquam divinae Revelationis praecones viva voce

voce praedicatum. Apostolica est Institutio, seu disciplina ab Apostolis tanquam Ecclesiae pastoribus viva voce statuta, ut ex. gr. jejuniis quadragesimalibus. Ecclesiastica est disciplina a successoribus Apostolorum instituta, usque fidelium confirmata, et ad nos usque transmissa, ut ex. gr. vigiliae, aliaque Ecclesiastica statuta, et consuetudines.

III. Ab his longe distant eae, quae dicuntur traditiones hominum divinae legi contrariae, vel superstitiosae, et inutiles, quas reprehendit Christus Matth. XV. 3. dicens: *Quare vos transgredimini mandatum Dei propter traditionem vestram?*

## S. II.

*Existit Traditio divina, eaque agnoscenda est ut locus Theologicus, seu regula fidei et morum continens etiam multa ad salutem necessaria, quae non habentur in Scripturis.*

Lutherani igitur, Calvinistae, Zuingliani negant, nullam esse divinam Traditionem, ac proinde docent, nullum desumi posse ex traditione argumentum ad dogmata Fidei, et Morum confirmanda, quae omnia docent in solis Scripturis contineri. Qui quidem error pluribus Haereticis vetustioribus communis fuit, ut Wicleffo, ex Th. Waldensi Lib. 11. c. 19. Arianis ex Epiphanio Haer. LXIX., et LXXIII., Donatistis ex Augustino Lib. de Unit. Eccl. Cap. 19. Valentinianis, et Marcionitis ex Tertulliano de Praescript. et Irenaeo Lib. III. c. 2. aliisque. Imo videtur perpetuus hic fuisse Haereticorum mos, rejecta Traditione, qua omnes confodiuntur errores, ad Scripturas provocare. Contrarium docent Catholici.

PROPOSITIO

*Divina existit Traditio, eaque agnoscenda est tamquam necessaria Regula Fidei, et Morum.*

*Est dogma fidei.*

*Prob.* Ab Adamo usque adhuc triplicem Religionis statum nobis ostendit Scriptura, nempe Legis Naturae, Legis Mosaicae, et Legis Evangelicae. Atqui in triplici illo statu agnoscenda est divina Traditio etc. Ergo.

*Prob. min. I.* De Statu Legis Naturae nulla potest esse controversia, cum nulla tunc fuerit Sacra Scriptura, et tamen fuerint justi: *justus autem ex fide vivit Rom. I. 17.* sine qua impossibile est placere Deo *Heb. XI. 6.* Ergo erant tunc veri fideles, qui fidem ex auditu, sive ex Traditione habebant. Idem dicas de iis, qui extra Judaicam gentem pie vixerunt, etiam post scriptam legem Mosaicam. Ergo vera Religio per annos plusquam bis mille sola Traditione stetit.

II. Sub lege Mosaica, licet scripta, fuisse etiam divinas Traditiones necessarias, patet, 1.<sup>o</sup> Quia nonnulla erant scitu necessaria ad salutem, quae in Scripturis non continebantur, *ex gr.* quoniam libri Scripturarum vere essent divini; quodnam esset remedium ad delendum originale peccatum non solum in foeminis, verum etiam in masculis ante octavum diem etc. quae nonnisi ex Traditione cognoscebantur: 2.<sup>o</sup> Quia in ipsis Scripturis veteris Testamenti mentio fit traditionis, ut Psalmo LXXVII. *Quanta mandavit patribus nostris nota facere ea filiis suis, ut cognoscat generatio altera, filii, qui nascentur, et exurgent, et narrabunt ea filiis suis, ut ponant in Deo spem suam: 3.<sup>o</sup> Quia cum de sensu Scripturarum aliqua oriebatur quaestio, nonnisi ex Traditione dirimi poterat.*

III. In lege Evangelica Traditionem divinam existere, et necessariam esse probatur, 1.<sup>o</sup> ex Apostolo II. *Thessal. II. 14.* *State inquit, et tenete traditiones, quas didicistis sive per sermonem, sive per epistolam nostram: quae verba adeo clare traditionis existem-*

sentiam, et necessitatem ostendunt, ut scripserit *Chrysostomus Hom. IV. in Epist. ad Thessal.* Hinc patet, quod non omnia per epistolam tradiderunt Apostoli, sed multa etiam sine litteris. Eadem vero fide digna sunt tam illa, quam ista. Itaque traditionem quoque Ecclesiae fide dignam putamus: traditio est, nihil quaeras amplius (a). Idem etiam Paulus in *Epist. II. ad Tim. II. 2* Quae audisti, inquit, a me per multos testes, haec commenda fidelibus hominibus, qui idonei erunt et alios docere. Nihil clarius pro doctrina non scripta, quam idem Apostolus tum in *I. ad Tim. VI.* tum in *II. Tim. cap. I.* appellat Depositum fideliter custodiendum, et ita in aliis Epistolis hortatur fideles, ut permancant in doctrina, quam ab ipso audierunt. Vide *Estium in Comment.*

2.<sup>o</sup> Multa ad fidem, et mores pertinentia, etiam ab adversariis credita, non continentur in Scripturis. Nam quoniam Scripturarum libri divini sint, qui vero apocryphi, imo et libros, quos habemus, esse genuinos, et non vitiatos, non nisi ex Traditione sciri potest, unde videmus, veteres hac una via genuinos Scripturarum libros a spuriis discrevisse. Vide *Euseb. Lib. VI. Hist. Cap. 10., et seq.* Quod enim nonnulli novatores post *Calvinum Lib. I. Inst. cap. 7. §. 1.* jactant, Spiritum Sanctum interius docere praedestinos, quoniam libri sint divini, id non modo falsum est, sed etiam viam aperit unicuique rejiciendi pro lubito libros sacros, sicut *Lutherus* Epistolam *Jacobi* rejicit, quam *Calvinus* admittit. Unde *Brentius in Proleg.* et *Kemnitius in Examine Conc. Trid.* evidentia victi ingenuae fatentur, hanc traditionem, qua libros sacros discernimus, solam esse admittendam; cur ergo asserunt, solam Scripturam continere verbum Dei? Cur aliae traditiones divinae pariter servari non potuerunt? Praeterea credunt ipsimet adversarii contra Donatistas, valere baptismum

---

(a) Cui concinit *Basilii Lib. de Spir. S. ep. 27.* *Oecumenius*, et *Theophilactus in h. l.* *Damascenus Lib. 4. de fide* *Cap. 17.* *Concilium VIII. generale act. ult. Can. 1.*



nam ab haereticis collatum contra Anabaptistas valere baptismum parvulorum: contra *Helvidium*, Mariam semper Virginem fuisse; aliaque, quae in Scripturis non sunt.

3.<sup>o</sup> Certum est, non omnia, quae *Christus* dixit, scripta esse; nam *Joannes* multa refert, quae non scripserant tres priores Evangelistae, et addit *Cap. XX. 30., et XXI. 25.* multa se praetermisisse; scripsisse vero, quae sufficiebant, ut credatur, *quia Jesus est Christus filius Dei*. Id concedunt adversarii, sed gratis asserunt ea, quae praetermissa sunt, non fuisse ad salutem necessaria; quod falsum esse patet tum ex eo quod *Christus* nihil inutile praedicaverit, tum ex *Lucae* testimonio *Act. I. 3.* qui docet, *Christum* post resurrectionem per dies quadraginta cum Apostolis collocutum esse de Regno Dei; hoc est de rebus ad informandam Ecclesiae Fidem pertinentibus, et tamen quatenam tunc *Christus* dixerit, silet.

4.<sup>o</sup> Certum etiam est, *Christum* non omnia per se Apostolis revelasse; inquit enim apud *Joan. Cap. XVI. 12.* *Adhuc multa habeo vobis dicere*; utique necessaria, sed non potestis portare modo; cum autem venerit ille Spiritus veritatis, docebit vos omnem veritatem. Itaque Spiritus S. reliqua revelavit; atque ideo ad cognoscendam omnem necessariam veritatem scire debemus omnia, quae Apostoli Spiritu S. edocti praedicarunt. At haec ubinam scripta sunt in Libris Sacris? Non in Actis Apostolorum, ut legenti patet. Neque in eorum Epistolis, quae scriptae sunt non ad integrum Religionis systema exponendum, sed ob particulares quasdam causas. Accedit quod ingenuè fatetur *Brennius in Prolegom.* Negari non debet, nec potest, quin tam *Christus* multa dixerit, et fecerit, quam Apostoli multa tradiderint, et instituerint, quae non sunt ab ipsis litteris comprehensa. Ergo nisi dicere velimus, Apostolos inutilia praedicasse, concedant necesse est, ea quae voce praedicarunt, neque litteris consignarunt, perpetua Religione servanda Ecclesiae tradidisse.

5.<sup>o</sup> Doctrina *Christi* per Apostolos praedicata diutius antequam aliquid ipsi Apostoli scriberent; immo

testatur Irenaeus *Lib. III. Cap. 4.* apud nonnullas barbaras Nationes Christianam Religionem sine literis etiam suo tempore viguisse. Ex quo patet, Traditionem priorem fuisse, quam Scripturam, a qua non fuit abrogata Traditio; cum praesertim *Christus* Religionem suam instituerit non in tabulis, sed in corde scribendam; ut praedixerat *Ieremias* *Cap. XXXI. 33.*

6°. Si nulla esset divina Traditio, interminabiles essent controversiae de sensu Scripturarum, ut patet ex ipsorum adversariorum experientia, qui tria jam saecula inter se digladiantur de sensu verborum, quibus Eucharistiam *Christus* instituit, neque adhuc ullis conditionibus inter se pacem inire potuerunt.

7°. Patres trium priorum saeculorum, quos adversarii fatentur a vera fide non descivisse, constanter Traditionis divinae existentiam, et necessitatem asserunt, ut *Irenaeus Tertullianus, Origenes*, etc. (a) imo passim affirmant potius ex Traditione, quam ex Scriptura revincendos Haereticos, ut fuse *Tertullianus Libro de Praescriptionibus*. *Basilii* vero ex communi sententia totius Ecclesiae ait *Lib. de Spiritu S. Cap. 27. Dogmata, quae in Ecclesia servantur, et praedicantur, partim ex conscripta doctrina habentur, partim ex Apostolorum traditione in mysterio ad nos delata recepimus. Quae utraque eandem ad pietatem vim habent. Ergo patet, necessariam esse, et existere divinam Traditionem, tamquam regulam fidei, et morum, meritoque Conc. Tridentinum id ut fidei dogma definisset Sess. IV. his verbis: Traditiones ipsas tum ad fidem, tum ad mores, pertinentes, tamquam vel ore tenus a Christo, vel a Spiritu Sancto dictatas, et continua successione in Ecclesia catholica conservatas, pari pietatis affectu, ac reverentia suscipit, ac veneratur. Praeiverat Con-*

---

(a) *Irenaeus. Lib. III. Cap. 2., et seq. Tertullianus Lib. I. cont. Marcion. Lib. de Praescrip. et al. Origenes in Cap. VI. Epist. ad Rom. et Rom. V. in Num. Cyprianus Epist. LXXIII. ad Caeclib. et alib.*

Concilium Nicaenum. II. Act. VI. et VII. et Concilium VIII. Generale Act. VIII. et Act. ult. Can. 1. De traditione fuse tractarunt. Card. Hosius cont. Prolegom. Brentii. Petrus a Soto in Defens. adv. Brent. Part. II. Melchior Canus Lib. III. de Loc. Bellarminus Lib. IV. de Verb. Dei. Lindanus in Paenopia, aliq. (a).

Solvantur objectiones.

*Objic. 1.* Traditio aliquid Scripturae superaddit. Atqui prohibemur aliquid Scripturis addere. Nam Deuter. IV. 2. dicitur: *Non addetis ad verbum, quod ego praecepit vobis, nec auferetis ex eo. Et Apoc. XXII. 18. Si quis apposuerit ad haec, apponet Deus super illum plagas. Ergo.*

*¶ Dist. maj.* Traditio aliquid addit Scripturae contrarium, *neg.* non contrarium, sed potius aptum ad Scripturam defendendam, et intelligendam, transeat; nam potius Scriptura superaddita est Traditioni, quae et ipsa continebat verbum Dei, antequam Scriptura ulla ederetur. *Dist. et min.* Prohibemur aliquid addere Scripturae contrarium, quales erant traditione Pharisaeorum, quos Christus reprehendit Matth. XV. 3. dicens: *irritum fecistis mandatum Dei propter traditiones vestras, conc.* non contrarium, *subdist.* Si a nobis ipsis confictum sit, *conc.* Si ab ipso Deo revelatum, et nobis traditum, *neg.* Traditio igitur non ab homine superadditur Scripturis, sed ab ipso Deo proficiscitur, et ideo Scripturae contraria non est. Prohibemur quidem de nostro aliquid addere Scripturis, quod earum sensum evertat, vel ut a Deo revelatum venditetur, sed si additio quaecumque vetita fuisset laudatis locis, illicitum fuisset alios libros sacros scribere post Deuteronomium, et Apocalypsin.

G 2

Inst.

---

(1) Inter Veteres legendi Tertullianus *De praescriptis*, et Liricensis *Commonitorium*; inter Recentiores lectu digna sunt quae habent Wailenburg *De methodo prob. fidei* Petrus Petrus de la foi Tom. VI. Bossuet Tom. III. Op. post.

*Inst.* Prohibemur addere non solum contra, sed etiam praeter Scripturam. Apostolus enim *Galat. I. 8.* ait; *Licet nos, aut Angelus de caelo evangelizet vobis, praeterquam quod evangelizavimus vobis, anathema sit*; quem locum sic exponit Augustinus *Lib. III. contr. lit. Petil. c. 6.* *Si quis annuntiaverit, praeter quam quod in Scripturis legalibus, et Evangelicis accepistis, anathema sit.* Et Basilius *Serm. De Fidei confes.* generaliter ait. *Infidelitatis argumentum erit, et signum superbiae, certissimum, si quis eorum quae scripta sunt, aliquid velut rejicere, aut eorum, quae non scripta, introducere.* Ergo.

¶ *Neg. ant. 1°.* Enim Apostolus non ait: praeterquam quod scripsimus, sed praeterquam quod evangelizavimus, et *v. 9.* praeter id quod accepistis. Evangelizaverat autem non solum scripto, sed praecipue verbo. *2°.* Vocem praeter usurpat pro contra; dixerat enim *v. 6.* miror, quod sic tam cito transferimini in aliud Evangelium. Eodem sensu usus erat ea voce *Rom. ult. 17.* *Rogo autem vos, fratres, ut observetis eos, qui dissensiones, et offendicula praeter doctrinam, quam vos didicistis, faciunt.* Simili sensu semetipsam explicat Augustinus *Tract. LXXXIX. in Joan.* Non ait plusquam accepistis, sed praeterquam quod accepistis; nam si illa dicret, sibi ipsi praejudicaret; qui cupiebat venire ad Thessalonicenses, ut suppleret quae illorum fidei defuerunt, sed qui supplet, quod minus erat addit, non quod inerat tollit: qui autem praetegreditur regulam fidei, non accedit in via, sed recedit de via. Idem responsum esto ad Basilii sententiam.

*Objic. II.* Idem Apostolus *II. Tim. III. 16.* ait: *Omnis Scriptura divinitus inspirata utilis est ad docendum, ad arguendum, ad corripiendum, ad erudiendum in justitia, ut perfectus sit homo Dei, ad omne opus bonum instructus.* Ergo sola Scriptura sufficit, nec necessaria est traditio.

¶ *Neg. cons. 1°.* Enim argumentum probat nimis. Apostolus enim loquitur de Scripturis, quas dicit, *Timotheum ab infantia didicisse h. e. de veteri Testamento*, unde sequeretur, sufficere vetus Testamentum, imo omnem quaecumque librum veteris Testamen-

men-

menti. 2°. Non dicit: *omnis Scriptura sufficit*, sed *utilis est*, ad hominem perficiendum, quod nos concedimus. 3°. Cum ipsa nobis Scriptura traditionem, et Ecclesiam demonstret, posset etiam aliquo sensu vere affirmari, ipsam sufficere Scripturam, quia quod in illa deest, ab ea ad quam Scriptura nos mittit, traditione, atque Ecclesia suppletur.

*Objic. III.* Multis scripturarum locis traditiones damnantur. Sic *Matth. XV. 3.* ait *Christus: Irritum fecistis mandatum Dei propter traditionem vestram.* Et *Apostolus Colos. II. 8.* *Videte, ne quis vos decipiat per philosophiam, et inanem fallaciam secundum traditionem hominum.* Quibus similia in aliis scripturae locis habentur. Ergo.

¶ *Dist. ant.* Damnantur traditiones humanae ad labefactandum Dei verbum excogitatae, quales erant traditiones Rabbiorum, quas legere est in eorum *Talmud*, et traditiones Gentilium philosophorum, *conc.* Traditiones divinae, *neg.* Responsio patet ex ipso Scripturarum contextu, et ex communi Patrum interpretatione, ut *Irenaei Lib. IV. Cap. 25.* *Epiphani Haeres. Ptolomaei: Hieronymi in Cap. VIII. Is. et in Cap. III. ad Tit. et Epist. ad Algas.*

*Objic. III.* Patres docent, solas sufficere Scripturas. Nam *Irenaeus Lib. III. Cap. 1.* ait: *Quod tunc praedicaverunt Apostoli, postea per Dei voluntatem in Scripturis nobis tradiderunt, si non omnia omnino, saltem quae necessaria erant, et sufficiebant; Cyrillus etiam Alexandrinus Lib. XII. in Joan. cap. ult.* ait: *Non omnia, quae Deus fecit, scripta sunt, sed quae scribentes tam ad mores, quam ad dogmata putarunt sufficere.* Cui concinit *Augustinus Tract. XLIX. in Joan.* dicens: *Electa sunt, quae scriberentur, quae saluti credentium sufficere videbantur.* Ergo etc. Novatores licet parvi faciant. Patrum auctoritatem, avide tamen ex ipsis arripiunt, quod sibi favere falso credunt.

¶ *Dist. ant.* Sufficere mediate, *b. e.* media adhibita traditione, quam ipsa Scriptura commendat, *conc.* Sufficere immediate, *subdist.* Ad praecipua dogmata, quae necessario ab omnibus explicite credenda sunt,

ut

ut est Dei existentia, Providentia, Trinitas, Incarnatio, *conc.*, Ad omnia, *neg.* Irenaeus non ait, *omne quod praedicaverunt, scripserunt*, sed scripserunt idem quod praedicaverunt; quod verum est, licet non omnia scripserint. Cyrillus, et Augustinus asserunt, scripta esse, quae sufficerent. 1<sup>o</sup>. quia cum ipsa Scriptura nos doceat, *divinas tenere traditiones*, jam aliquo sensu dici potest, Scripturas sufficere. 2<sup>o</sup>. Quia ad ea quae omnibus necessario scienda, et credenda sunt; aliquo pacto Scripturae sufficiunt; licet etiam in ipsis explicandis, et vindicandis a falsis haeticorum interpretamentis, saepe Traditio necessaria sit.

*Objic. IV.* Saepe Patres ad solas Scripturas provocant Haeticos. Sic Tertullianus *cont. Hermog. Cap. 22. Adoro Scripturae plenitudinem; quia Deus mihi et factorem manifestat, et facta. Athanasius Orat. cont. Gent. n. 1. Sufficiunt per se sacrae, et divinitus inspiratae Scripturae ad veritatis indicationem: Et Epist. 1. ad Serapion. n. 19. Sufficiunt quae in illis reperies documenta. Ergo.*

*Dist. ant.* In iis quae clare in Scripturis posita sunt; qualia erant, quae tunc contra haeticos asserebant, *conc.* in omnibus, *neg.* Tertullianus enim contra Hermogenem agebat de sola creatione, quae aperte in Scripturis continetur. Athanasius in *orat. contra gentes* duo probat, nempe idola non esse Deos, et Christum esse verum Deum, verumque hominem, ad quae probanda Scripturae sufficiunt. In Epistola vero ad Serapionem docet, satis esse Scripturas ad relegendas Arianorum blasphemias.

*Inst.* Patres docent, omnia credenda in Scripturis contineri; imo nonnulla rejiciunt tamquam falsa, vel ob id solum, quod in Scripturis non continentur. Sic Chrysostomus *Hom. I. in Epist. ad Tit.* Omnia, inquit, *Evangelium continet et praesentia, et futura, honorem, pietatem, fidem.* Similia alibi docet *Homil. ACIII. in Psal. Homil. XIII. in Epist. II. ad Cor. et in Cap. XXII. Matth.* Augustinus *Lib. II. de doct. Christ. cap. 9. In his, quae aperte posita sunt in Scripturis, inveniuntur illa omnia, quae continent fidem, moresque vivendi.*

*Idem*

Idem saepe alibi repetit *Lib. II. de peccat. merit. Cap. ult. Lib. III. cont. lit. Petil. Cap. 6. Lib. de bono viduit. et al.* Et Hieronymus in *Cap. 1. Epist. ad Tit. Sine Scripturarum auctoritate garrulitas non habet fidem. Et in Cap. XXIII. Matthaei. Hoc quia de Scripturis auctoritatem non habet, eadem facilitate contemnitur, qua probatur: quod et ante scripserat Origenes Homil. I. in Jerem. Necesse nobis est Scripturas sanctas in testimonium vocare. Sensus quippe nostri, et narrationes sine his testibus non habent fidem. Ergo,*

1. *Dist. ant.* Docent, omnia in Scripturis contineri vel immediate, vel mediate, conc. omnia immediate, subdist. Quae omnibus scitu necessaria sunt necessitate medii transeat: Omnia omnino, neg. Et ita aperte docet Augustinus *Lib. I. cont. Crescon. c. 33. Scripturae a nobis veritas tenetur, quando facimus quod universae Ecclesiae placet, etsi nihil de earum scriptum legamus* 2.º Chrysostomus nomine Evangelii non solum intelligit Scripturam, sed universam Ecclesiae doctrinam, quae partim Scriptura, partim traditione continetur, in aliis vero locis, quibus aut sufficere Scripturam docet, aut quod non scriptum est rejicit, loquitur de singularibus, quae tractabat, argumentis, rejicitque traditiones hominum ingenio excogitatas. 3.º Hieronymus in *Cap. 1. Epist. ad Tit.* loquitur de haereticis, qui Scripturam usurpare audent, sine qua eorum garrulitas non haberet fidem. Et in *Cap. XXIII. Matth.* loquitur non de traditionibus, sed de singulari quadam sententia ex apocrypho libro deprompta, nec divina traditione suffulta, qua quidam asserebant, Zachariam filium Barachiae, quem Christus *Matth. XXII.* dicit occisum inter templum, et altare, fuisse patrem Joannis Baptistae; sicut etiam in *Lib. contra Helvidium*, qui falso asserebat, B. Virginem post mortem S. Joseph alteri nupsisse, scribit sicut haec quae scripta sunt non negamus, sic ea, quae non sunt scripta, renuimus. 4.º Origenes per illa verba: *sensus nostri, et narrationes*, manifeste loquitur de privatis auctorum opinionibus, non de traditione divina.

Insl.

*Inst. Hieronymus* generatim omnia rejicit, quas scripta non sunt: *ea* inquit, *quae non sunt scripta*, *restituimus*, et quidem ea sola ratione, quia scripta non sunt, quid de *Scripturis* auctoritatem non habent. Ergo,

*R. Dist. ant.* In subjecta materia, quam tractabat, in qua nulla erat divina traditio, *conc. secus, neg.*

*Objic. V. Cyprianus Epist. LXXIV. ad Pompejum* haec habet de traditione, quam *Stephanus* ipsi objiciebat de haereticis non rebaptizandis: *Unde est ista traditio? Ea facienda esse, quae scripta sunt, Deus testatur. . . . Si ergo aut in Evangelio praecipitur, aut in Apostolorum Epistolis, et Actibus continetur. . . . observetur haec divina, et sancta traditio.* Ergo aperte rejicit traditionem.

*\* Transeat, cons.* Cyprianus enim in eo errabat, improbens baptismum ab haereticis datum, quod ipsi adversarii ex traditione validum esse credunt. Dixi transeat, quia Cyprianus non omnem respuebat traditionem, sed illam tantum, quae tunc ipsi objiciebatur, falso putans, eam esse non divinam, sed humanam, et verbo Dei contrariam. Ceterum cum traditiones in universum non respuisse patet ex *Epistola LXIII. Admonitos nos scias*, inquit, *ut in calice offerendo Dominica traditio servetur, ut calix mixtus vino offeratur.*

*Objic. VI.* Fidei dogmata committi non debuerunt custodiæ infidae, et fallaci. Atqui talis est traditio; quod enim de ore in os transit, vel malitia, vel imperitia hominum facile mutatur, et deperditur. Unde Poëtae famam pingunt tot variatam coloribus. Irgo etc. Hinc *Augustinus Tract. II. in Epist. Joan.* ait, *Deum contra insidiosos errores firmamentum ponere voluisse in Scripturis.*

*\* Dist. min.* Fallax est traditio, si spectetur seorsim a providentia Dei, qui Ecclesiam fundavit, et regit, sine qua providentia ipsae Scripturae facile depravari, et deperdi possent, *conc. Secus, neg.* Si ergo Deus in Ecclesia sua per annos plusquam bis mille in statu Legis Naturae veram fidem servavit per solam traditionem, sine ullis Scripturis; quanto magis in Lege Evangelica, in qua promisit, fore ut  
num.



numquam portae inferi adversus Ecclesiam praevalcant; et in qua traditioni addidit etiam firmamentum Scripturarum contra insidiosos quosdam errores, eos scilicet, qui contra praecipua fidei dogmata spargi poterant, de quibus loquitur *loc. cit. Augustinus*? Praeterea cum Dei providentia omnia suaviter disponat, ne traditiones interirent, adjumenta etiam suppeditavit, scilicet Scripta SS. Patrum, Acta Conciliorum, Festorum annuas celebrationes, Pastorum diligentiam etc.

*Objic.* VII. Sacrae litterae Deo inspirante conscriptae sunt, ut essent nobis fidei, et morum regula, ut saepe docet Augustinus *Lib. XIX. De Civ. Cap. 18. et al.* At opera Dei perfecta sunt. Ergo Scriptura est perfecta fidei, et morum regula, ut traditione non sit opus.

*¶ Dist. ant.* Sacrae litterae scriptae sunt, ut essent Fidei, et morum regula *partialis conc.* Unica, et *totalis, neg.* Una est ergo Regula Fidei, et morum, Verbum Dei, quod continetur partim in Scriptura, partim in Traditione, quarum unaquaeque in suo genere perfecta est.

*Inst.* Scriptura *totalis*, et unica regula est, ad quam Patres asserunt exigendas esse, tamquam ad Lydium lapidem, omnes Ecclesiasticorum Scriptorum sententias, quamque ideo Chrysostomus *Hom. XIII. in II. ad Cor.* appellat *exactissimam trutinam, gnomonem, et regulam.* Sic Augustinus *Epist. LXXXII. al. XIX. ad Hieron.* Ego inquit, fateor charitati tuae, solis eis Scripturarum libris, qui jam Canonici vocantur, didici hunc timorem, honoremque deferre, ut nullum eorum auctorem scribendo aliquid errasse, firmissime credam... Alios autem ita lego; ut quantalibet sanctitate, doctrinaque praepolleant, non ideo verum putem quia ipsi ita senserunt, sed quia mihi vel per illos auctores Canonicos, vel probabili ratione, quae a veto non abhorreat, persuadere potuerunt. Hieronymus quam fuerit acer Scriptorum Ecclesiasticorum, quos nunc ut Patres laudamus, censor, ex ejus Libro de Scriptoribus Ecclesiasticis, aliisque operibus patet. Denique ut alios praetermittamus, S. Thomas *I. P. Q. I. art.*

*I. art. 8. ad 2.* hæc habet. *Sacra doctrina utitur auctoritate canonicae Scripturae propriae, et ex necessitate argumentando, auctoritatibus vero aliorum Doctorum Ecclesiae, quasi argumentando ex propriis, sed probabiliter. Innuitur enim fides nostra revelationi Apostolis, et Prophetis factae, qui canonicos Libros scripserunt.* Ergo si ad Scripturam, tamquam ad Regulam, comparanda est ipsa Patrum doctrina, restat, ut Scriptura unica, et totalis regula sit.

*¶. Dist. ant.* Patres docent, ad Scripturas, tamquam ad Regulam, exigenda esse quorumlibet Scriptorum opera, si seorsim singuli inspiciantur, *conc.* Singulos enim seorsim falli potuisse, concedimus. Si omnes simul in eandem conspirent sententiam, eamque tradant ut divinitus revelatam, *neg.*

*Inst.* Traditionis praetextus erroris occasio est. Sic Papias regnum Christi millenarium post resurrectionem futurum finxit quasi ex Traditione, et ita multos in errorem induxit. Sic Catholici quidquid defendere non valent, traditione Apostolica inniti jactant, ut observat Calvinus *Lib. IV. Instit. Cap. 10.* Ergo.

*¶. 1º.* Si hoc valeret argumentum, etiam Scriptura rejicienda esset, quia etiam illa abusi sunt haeretici, partim apocryphas Scripturas venditando pro veris, partim veras Scripturas ad suos sensus detorquendo. Sed quia non desunt rationes Scripturas, et traditiones veras a falsis dignoscendi;

*¶. 2º. Dist. ant.* Et nulla ratio suppetit, qua delegatur error, *neg.* et multis rationibus cognosci potest, et caveri error, *conc.* Sic omnibus SS. Patrum operibus inspectis patuit, non esse ex traditione divina fictitium mille annorum regnum, sed ex male intellectis verbis *Apocal. XX. 46. et regnabunt cum Christo mille annis.* Quod autem catholici omnia sine detectu traditione inniti jactent, mendacium haereticorum est. Quatenam ergo ratio sit, et quatenam regulae, quibus verae a falsis traditionibus dignoscantur, videamus.

§. III.

*Regulae, quibus Traditio Divina ab Apostolica, Ecclesiastica, et humana discernitur.*

*Adv.* I. Traditio Divina, Apostolica, et Ecclesiastica facile ab humana discernuntur. Traditiones enim humanae nullum habent in scriptis Sanctorum, aut in Ecclesiae canonibus fundamentum, et plerumque superstitiosae sunt, et Scripturis contrariae.

II. Facile etiam Traditiones Divinae, et Apostolicae ab Ecclesiastica discernuntur. Haec enim non semper, nec ubique in Ecclesia viguit: illae vero semper in Ecclesia universa servatae sunt. Unde *Augustinus Lib. IV. cont. Donat. Cap. 24. Quod universa, inquit, tenet Ecclesia, nec conciliis institutum, sed semper retentum est, nonnisi auctoritate Apostolica traditum rectissime creditur.*

III. Difficultas ergo solum remanet de Divinis Traditionibus discernendis ab iis, quae Apostolicae sunt: nam utraeque semper, et ubique viguerunt, et Patres aliquando Traditionem Divinam vocant Apostolicam, et vicissim. Sic *Augustinus Lib. X. de Genes. ad lit. c. 25.* dicit, pavorum baptismum esse traditionem Apostolicam, cum tamen divina Traditio sit. E contrario *S. Leo Serm. IV. de Quadrage.* jejunium quadragesimale divinam traditionem appellat, cum Apostolica sit traditio.

IV. Testes traditionis sunt SS. Patres, et statuta veterum Conciliorum. Patrum autem nomine intelligimus eos tantum, quos Ecclesiae consensus eo nomine donavit, eo quod doctrinae fidei, et morum defensores, et doctores antiquitas fuerint; ideoque filios quodammodo Christo genuerint. Addunt nonnulli, ut eo nomine proprie aliqui Scriptores appellentur, oportere, ut fuerint viri sanctitate illustres, et qui a fide vel nunquam defecerint, vel saltem in ea mortui sint. Ait enim *Limensis*, eorum Quintaxat Majorum consulendas esse sententias qui in fide, et communione catholica sancto, sapienter, constanter

*viventes, docentes, et permanentes vel mori in Christo fideliter, vel occidi pro Christo feliciter meruerunt.* Ex quo sequitur, proprie inter Patres recensendum non esse *Tertullianum*; qui postquam strenue contra Gentiles, Judaeos, et Haereticos pro fide catholica decertavit, tandem Montanistarum coeno adhaesit; nec scripta *Origenis*, quia vel ab ipso, vel ab Haereticis varia errorum labe aspersa sunt. Laudantur tamen opera *Tertulliani*, vel quae ante haeresim scripsit, vel in iis, quae ad Montani dogmata non pertinent, sicut et *Origenis Scripta*, ubi ille ceteris consonat, vel non ex sua, sed ex universae Ecclesiae sententia loquitur. Idem de *Eusebio* Caesariensi dicas, qui nonnullis Arianismi suspectus est, aliisque nonnisi improprie Patres appellantur. S. *Bernardus* saec. XII. ultimus Patrum habetur, nam SS. *Thoma*, et *Bonaventura* Doctores saepius, quam Patres appellantur; eo quod Theologiam alia methodo docuerint, quam a Patribus eo usque tradita erat. *Sylvius* tamen, eos etiam Patrum nomine donandos contendit. *Opusc. V. Lib. VI. Q. I. art. 1.*

## PROPOSITIO

*Sunt Regulae, quibus Divina Traditio ab Apostolica dignoscatur.*

*Prob.* Enumerando, et probando regulas ipsas. I. *Regula.* Unanimis consensus omnium Patrum, qui ab initio Ecclesiae per omnium saeculorum successiones dogma aliquod, licet non expressum in scripturis tenuerunt, ejusque contrarium ut haereticum refutarunt, certissimum est divinae traditionis argumentum. Talia sunt dogmata de perpetua Deiparae Virginitate, de materia, et forma omnium Sacramentorum, saltem in genere etc.

II. *Reg.* Quando hic consensus non est unanimis, tunc ante Ecclesiae definitionem non parit quidem certitudinem fidei, tamen praebet Divinae Traditionis argumentum majus, aut minus pro majori, aut minori numero, et gravitate Patrum, qui dog-

ma illud docent; imo etiam certum, si consensus ille sit moraliter unanimis, cum scilicet paucissimi contradicunt. At post Ecclesiae definitionem, argumentum est Divinae Traditionis certissimum.

III. Reg. Quando Patres omnes aliquid servandum docent pertinens ad Ecclesiae disciplinam, quod non excedat potestatem a Christo Apostolis concessam, potest Apostolica censi traditio, nisi forte constanter doceant, divinam esse traditionem ab ipso Christo institutam, nec usquam eam tribuant Apostolis.

Regula autem 1. probatur ex Apostolo *I. Cor. XII. 28.* ubi ait *Quosdam quidem posuit Deus in Ecclesia, primum Apostolos, secundo Prophetas, tertio doctores, Ephes. IV. 11 Et ipse dedit quosdam Apostolos . . . alios autem Pastores, et doctores, ut jam non simus parvuli fluctuantes, et circumferamur omni vento doctrinae* Ergo si Pastores omnes, et doctores Ecclesiae errassent in aliquo dogmate tradendo, quasi illud divinitus revelatum esset, infirmum fidei praesidium in Ecclesia posuisset Deus; quod absurdum est; imo ipsa Ecclesia in Fide errare posset, cum nonnisi a suis Doctoribus eam audiendo hauriat; quod quidem etiam absurdum esse infra probabimus, ubi de Ecclesia dicemus. Hinc Vincentius Lirinensis *Commonit. Cap. 4.* *Quidquid, inquit, non unus, aut duo tantum, sed omnes pariter uno, eodemque consensu aperte, frequenter, perseveranter tenuisse, scripsisse, docuisse cognoverit, id sibi quoque intelligat absque ulla dubitatione credendum.* Idem repetit *Cap. 39.* ad 42 et inculcat exemplo Ephesini Concilii, cui placuit nihil aliud posteris credendum decernere, nisi quod sacra-  
**ta SIBI CONSENTIENS SS. Patrum tenuisset antiquitas.** Nec solum Ephesini Concilii, sed omnium Conciliorum eadem mens fuit, unde merito Tridentinum *Sess. IV.* vetat, ne quis ipsam *S. Scripturam contra unanimem SS. Patrum consensum interpretari audeat*, certo credens, unanimem hunc consensum falsum esse non posse.

Regula vero 2. probatur ex eo, quod Ecclesiae doctores seorsim singuli errare possunt; unde Augustinus *Epist. CXLVIII. al. CXI.* Neque vero, ait, quo-

quorumlibet disputationes velut Scripturas Canonicas habere debemus ut nobis non liceat, salva honorificentia, quae illis debetur hominibus, aliquid in eorum scriptis improbare, atque respicere, si forte invenerimus, quod aliter sentiunt, quam veritas habeat, divino adiutorio vel ab aliis, intellecta, vel a nobis. Ceterum quoniam facti alicujus extrinseca probabilitas ex numero, et gravitate testimonii aestimari debet, hinc pro majori, vel minori numero, et gravitate Patrum divinae traditionis testimonii, major, vel minor erit rei probabilitas, imo et moralis certitudo, si consensus sit moraliter unanimitas. Cui si accedat definitio Ecclesiae, quam suo loco probabimus infallibilem, certitudinem Fidei habebimus.

Ceterum quoniam Patres ceteris graviores habendi sint, merito quaeritur. Et quidem 1°. qui in Sanctorum numerum ab Ecclesia relati sunt, ceteris paribus, sine dubio alios gravitate vincunt. Hinc maior S. Justini, et Irenaei, quam Clementis Alexandrini auctoritas, quem Benedictus XIV. Praef. in Martyrol. ostendit, namquam ab Ecclesia universa Sanctorum catalogo adscriptum. 2°. Qui ex professo haeresim aliquam suo tempore exortam impugnaverunt, sunt ceteris in eo dogmate praefereendi; sicut in rebus ad Verbi Divinitatem pertinentibus Athanasius: ad Incarnationem Cyrillus Alex.; ad Gratiam, et Praedestinationem Augustinus inter omnes eminent. 3°. Qui post exortas haereses floruerunt, gravioris sunt auctoritatis, quam ii qui praecesserunt. Hinc Hieronymus ait: Patres qui ante Arium scripserunt, innocenter quaedam, et minus caute locutos Lib. II. Apolog. cont. Ruffin. quod et saepe Augustinus observat de iis, qui ante Pelagium floruerunt. 4°. Si qui loquuntur ex Ecclesiae sensu, seu rem ita ab Ecclesia credi affirmant, praefereendi iis, qui, tamquam suas, proponunt opiniones. Imo si quis doceat aliquid ab universa Ecclesia praedicari, nec contrarium affirmetur ab aliis, erit ejus testimonium certissimum, licet nondum dogma fidei. Hinc Augustinus Lib. I. cont. Julian. Cap. 5. Juliano unum opponit Nazianzenum, et alibi Lib. III. Cap. 17. unum

*Cyprianum*. 5. Quos Ecclesia semper tamquam viros scientia, et pietate praeccellentes venerata est, majorem sibi auctoritatem vindicant, ut *Augustinus* tot Pontificum, et Conciliorum encomiis laudatus, *Gregorius M. Leo M.* aliq.

Tertia vero Regula ex ipsa ejus expositione rectae rationi videtur consentanea.

*Solvuntur objecta.*

*Objic. I. con. I. Rog.* Singuli Patres errare possunt, quia homines sunt, et revera multa eorum errata collegerunt *Rivetius Tract. de Auctorit. PP.* *Dallaëus De Usu Patr.* *Barbayracus Traité de la Moral des Peres: Clericus, Basnagius, aliq.* Ergo et omnes.

*¶ Neg. cons.* Singuli enim Patres non constituunt consensum universae Ecclesiae, sicut constituunt omnes simul sumpti. Dei autem promissiones non singulis seorsim hominibus, sed universae Ecclesiae factae sunt, ut infra dicemus. Licet ergo singuli errare potuerint, non omnes. Advertendum tamen est, multa, quae ab haereticis obijciuntur singulis seorsum Patribus, meras esse calumnias, vel eorum opiniones ad philosophiam, aut historiam pertinentes, in quibus non contendimus, majorem eorum esse auctoritatem, quam rationem, cui innituntur, concedimusq. eos falli potuisse. Vide *Muratorium Lib. De Ingenior. moderat.* *P. Baltum, Bossuetum, Natalem Alex. (a)*

*Inst.* Omnium simul Patrum consensus humanarum testimoniam est. Ergo est errori obnoxium: *omnis enim homo mendax.*

*¶ Dist. ant.* Est testimonium humanum divina auctoritate, atque praesidio fultum, *conc.* humanum simpliciter, *neg.* Sic *Omnis* quidem homo seorsim mendax.

---

(a) Baltus *Defense des S. Peres* Natalis Alexander. *Diss. serv. XVI. In Hist. Eccl. Saec. II.* Bossuet *Defense de la Tradition.*

## §. I.

*Sacrae Scripturae notio, et definitio.*

*Adv.* I. Demonstravimus superiori libro, Scripturam sacram divinitus inspiratam esse. At *Cappellus*, et alii post *Erasium Annót. ad Cap. II. et XXVII. Matth.* tenent, non esse inspiratam in omnibus, et singulis partibus, quod et nonnulli veteres affirmaverant, ut *Anomoei*, aliiquē apud *Epiphanium*, *Hieronymum*, et *Augustinum* (a). Imo *Grotius* nullam in libris Historicis S. Scripturae inspirationem agnoscent.

II. Inter Catholicos nonnulli docent, non solum sententias, verum etiam verba divinitus inspirata esse. Ita tenent *Estius in Cap. 3. 11. ad Tim. Academia Lovaniensis*; et *Duacensis*, alique graves Theologi. Alii post *Bellarminum Lib. I. de Verbo Dei Cap. XV.* censent, exceptis mysteriis Fidei, quae rationem humanam superant, et in quibus verborum mutatio errori obnoxia esset, in reliquis sensum tantummodo divinitus inspiratum esse; verba vero permissa esse delectui Sacri Scriptoris.

III. Divina inspiratio tria comprehendere potest, 1°. Revelationem veritatis ignotae, 2°. Incitationem, seu divinum quendam impulsu ad scribendum, salva scriptoris libertate, addito tamen praesenti Dei auxilio, seu, ut ajunt, *assistentia*, ne in scribendo erretur, 3°. Simplex Dei auxilium, seu *adassistentiam*. Fatendum autem est, non omnes Scripturae partes fuisse divina revelatione patefactas; nonnulla enim S. Scriptores vel suis oculis viderant, ut *Moyse* plagas *Aegyptiorum*, vel a testibus fide dignis acceperant, ut *Lucas* Historiam Evangelicam *Luc. I. 2.* Fatendum etiam, non sufficere simplicem in scribendo *adassistentiam*, alias canones Conciliorum,

II

qui

(a) *Epiphanius Haeres. LXXVI. Hieron. in Cap. I. Mich. Augustinus Lib. II. cont. Adversar. Leg. et Proph. Cap. 2.*



nostra, si divinarum Scripturarum vacillet auctoritas (a).

Diximas autem saltem quoad sensum, quod sufficit, ut Scriptura divinitus dictata et inspirata dicatur in singulis ejus membris; sicut si quis Epistolam amanuensi dictet quoad sensum, utique Epistolae auctor est, et dicitur, licet scribenti permittat verborum delectum. Imo quamvis Estii, atque Academiae Lovaniensis, et Duaccensis sententia gravibus nitatur momentis, verisimilior tamen videtur sententia Bellarmini, 1°. quia auctor libri II. Machab. cap. II. v. 27. testatur, se multo labore opus illud confecisse, et Cap. ult. veniam petit, si minus digne scripserit, quod absurdum esset, si Spiritus S. ipsa verba dictasset: 2°. quia huic sententiae favent Dionysius Alex. apud Euseb. Lib. VII. Hist. cap. 15. Arnobius Lib. 1. contra Gent. Hieronymus Epist. ad Algasiam, Augustinus Lib. II. de Cons. Evang. Cap. 28. n. 67.

Corollarium.

Nihil igitur est in Scriptura sacra, quod verum non sit, non solum in dogmatibus, sed etiam in historia, et chronologia. Omnia enim divinitus inspirata sunt saltem quoad sensum. Deus autem verax est Rom. III. Non est quasi homo ut mentiatur Num. XXIII. 19. Unde Augustinus Epist. LXXXII. al. XIX. illis libris. . . didici hunc timorem, honoremque deferre, ut nullum eorum auctorem scribendo errasse aliquid firmissime credam, ac si aliquid in eis offendero libris, quod videatur contrarium veritati, quod quidem solum in Chronologia, aliisque levioribus accidere solet, nihil aliud, quam vel mendosum esse codicem, vel interpretem non assecutum esse quod dictum est, vel me minime intellexisse, non ambigam, quod repetit Lib. II. contra Faust. cap. 5.

H 2

Sol-

(a) Idem docent Basilus Hom. X. in Hexam Chrysostomus Hom. 1. ad Popul. Hieronymus in Cap. III. ad Ephes.

## Solvuntur objectiones.

Objectiones incredulorum contra Scripturam universam partim refutavimus *Lib. I.* partim apud interpretes nostros, refutatas reperies. Nunc videamus quae praecipue moveri solent contra nonnullas Scripturae partes.

*Obje. I.* Sacri Scriptores videntur aliquando memoria lapsi. Sic *Matthaeus Cap. XXVII. 9.* citat *Jeremiam* pro *Zacharia*. *Marcus Cap. I. 2.* citat *Isaiam* pro *Malachia*, et *Cap. II. 25.*, et 26. refert, *Christum* *Judaeis* dixisse: Numquam legistis quid fecerit *David*, quando esuriit ipse, et qui cum eo erant? quomodo in troivit in domum Dei sub *Abiathar* Principe Sacerdotum; et panes propositionis manducavit? cum tamen id acciderit sub *Achimelech*, ut patet ex *I. Reg. 21.* Item *cap. XV. 25.* ait: erat autem hora tertia, et crucifixerunt eum, cum *Joannes Cap. XIX. 14.* scribat id contigisse hora quasi sexta. *Lucas* etiam *Act. VII.* referens concionem *S. Stephani*, nonnulla scribit contra historiae veritatem, ut cum ait *v. 16.* *Translati sunt in Sichem, et positi sunt in sepulcro, quod emit Abraham pretio argenti a filiis Hemor filii Sichem*, cum constet ex *Gen. Cap. XXIII.* *Abraham* emisit agrum ab *Hebron* *Hetheo* filio *Seor*, *Jacobum* vero *Gen. XXXIII.* a filiis *Hemor* patris *Sichem* alium emisit agrum non pretio argenti, sed centum agnis. His adde locutiones quasdam dubias, ut quasi mensibus *tribus Luc. I. 56.*, quasi annorum triginta *Luc. III. 23.* Atqui hujusmodi memoriae lapsus Spiritui *S.* tribui non possunt. Ergo non in omnibus suis partibus Scriptura a Spiritu *S.* dictata est.

*℞. Neg. ant.* et ad singula resp. 1°. Verosimilius est, *Matthaeum* nomen *Prophetæ* non posuisse, sicut etiam aliis in locis facere consuevit. Testatur enim *Augustinus Lib. III. de Cons. Evang. cap. 7. n. 29.* in nonnullis latinis Codicibus ista tantum verba legi: tunc adimpletum est quod dictum est per prophetam, cui lectioni consonant plura exemplaria *Graeca*, *Latina*, *Syriaca*, *Arabica*, quae citantur a *Millio* et

*Janenio*, deinde vero, scriptorem aliquem addidisse ad marginem *Jeremiae* nomen, quo d postea in textum culpa amanuensium translatum est. Addit *Augustinus*, fieri potuisse, ut *Spiritus S.* ideo voluerit hic *Jeremiam* pro *Zacharia* poni, ut ostenderet, eundem fuisse *Spiritum*, quo omnes *Prophe tae* loquebantur; ita ut quod *Jeremiae* est, sit etiam *Zachariae*, et vicissim.

Ad 2m. *Marcus* duorum *Prophetarum* oracula simul jungit *Ecce ego mitto Angelum meum ante faciem tuam, qui prae parabit viam ante te. Vox clamantis in deserto; parate viam Domini*, quorum primum est *Malachiae*, alterum *Isaiae*; unde non est falsa citatio; unum enim *Profetam* laudavit, alterum siluit. Laudavit vero *Isaiam*, non solum quia erat illustrior, et clarius *Joannem Baptistam* designabat, verum etiam, quia textus *Malachiae* quoad sensum idem sonat, ac textus *Isaiae*.

Ad 3m. Vel *Achimelech* vocabatur etiam *Abiathar*, vel uterque *Sacerdotio*ungebatur, sicut legimus *Sadoe*, et *Abiathar* sub *Davide* summos sacerdotes fuisse *I. Paralip. XV. 11.* vel sub *Abiathar* idem est ac tempore *Abiathar*, qui postea fuit summus Sacerdos.

Ad 4m. Idem est hora *tertia*, et hora quasi *sexta*, si rationem habeas consuetudinis *Hebraeorum*, qui integrum diem in duodecim partiebantur horas, easque iterum in quatuor partes dividebant, quarum quaelibet tribus horis constabat. Itaque prima hora, seu prima diei pars extendebatur usque ad tertiam: secunda pars, quae dicebatur *tertia*, quia a tertia hora incipiebat, ducebatur usque ad sextam. Itaque hora *tertia* desinente erat hora quasi *sexta*. Vide *Eened. XIV. de Festis*.

Ad 5m. *Melchior Canus Lib. II. de Locis cap. ult.* respondet, *Stephanum* memoria lapsum esse, non *Lucam*, qui noluit mutare ipsa verba, quae *Stephanus* in concione protulerat, imo mentitus esset, si mutasset. Alii vero dicunt, *Seor* patrem *Hebron*, a quo *Abraham* emit sepulcrum, vocatum fuisse etiam *Hebron*, ejusque patrem fuisse *Sichem*, non illum qui tempore *Jacobi* vivebat, sed alium antiquiorem; adeo

adeo ut potuerit dicere *Stephanus Abraham emissæ agrum* a filiis Hemor, filii Sichem. Nec obstat, quod ex Genesi non constet, Seor appellatum etiam Hemor, et filium fuisse Sichem; Constat enim ex verbis S. Stephani, in quo loquebatur idem Spiritus, qui in Moyse.

Ad 6m. particula *quasi* non dubitantis est, sed certo asserentis rem circa illud tempus contigisse, quod Spiritus S. noluit præcise designare, ut esset etiam in hoc silentio necessarium nobis documentum, ne in rebus ad salutem minime necessariis effraei curiositati serviamus.

*Objic. II.* Nonnulla sunt in Scripturis, quæ Spiritus S. majestatem non decent, ex. gr. quod *Tobia* redeunte præcurrens *canis blandimento caudæ gauderet Tob. XI. 9.* et quod scribit *Paulus II. Tim. IV. 13. penulam, quam reliqui Troade, veniens affer tecum, et libros, maxime autem membranas.* Ergo.

¶ *Neg. ant.* Quod enim a Deo est, inutile esse non potest, licet ignoremus, quo consilio a Deo sit factum. Hæc generalis responsio sufficit. Ceterum quod dicitur 1.º de cane Tobiae pertinet ad historiae integritatem, et nativam simplicitatem, quæ rem gestam sub oculos lectoris ponit; unde *Homerus* idem scribit de cane *Ulyssis* in *Ithacam* redeuntis. 2.º Quod objicitur de *Pauli* penula (quam nonnulli pallium, alii volumen quoddam putant, *V. Estium in Com.*) et de libris, et membranis, valde utile habet documentum, ut Evangelici ministri, exemplo tanti Apostoli, videant debere se humanas infirmitates humanis etiam adjumentis, quando opus est, sublevare; lectioni, et scriptioni dare operam.

*Objic. III.* Idem *Paulus I. Cor. VII. 12.* aperte dicit: *Ceteris ego dico, non Dominus.* Et *II. Cor. XI. 17.* *Quod loquor non secundum Deum loquor, . . . . . In quo quis audet, in insipientia dico, audeo et ego.* Ergo quaedam scribebat, quæ non erant divinitus inspirata.

¶ *Neg. cons.* Verbis enim illis: *Ego dico non Dominus*, ostendere voluit *Paulus*, se non Dei præceptum dare, sed consilium. Ad consilium autem istud

istud dandum movebatur a Spiritu Sancto. Quod autem scribit, non secundum Deum, et in insipientia se locutum, non aliud sibi voluit, nisi se in laudibus suis proferendis imitatum esse morem insipientium, licet ad id necessitate coactus, et Deo inspirante motus fuerit ad coercendam Pseudoapostolorum petulantiam.

*Objic.* IV. Sacri Scriptores divina inspiratione opus non habebant ad ea scribenda; quae vel ipsi viderant, ut Joannes Cap. XIX. 35. de se ipso testatur: *Qui vidit testimonium perhibuit*, vel audiverant, ut testatur Lucas de se ipso Cap. I. Imò Hieronymus de Marco ait: *juxta quod Petrum referentem audiverat, rogatus Romae a fratribus breve scripsit Evangelium; quod cum Petrus audisset, probavit, et Ecclesiae legendum sua auctoritate dedit*, quae verba indicant 1°. Evangelium Marci non fuisse divinitus inspiratum, alias Petri approbatione non indigisset: 2°. Librum aliquem humano ingenio elaboratum posse evadere Sacram Scripturam, si Spiritus S. illum approbet. Ergo.

¶ *Neg. ant.* In rebus enim historicis, quae ipsi viderant, Sacri Scriptores opus habebant inspiratione divina, tum ne memoria falleret; tum ne ad inutilia scribenda dilaberentur; ideoque illa non hominum sed Dei verba sunt. Quod vero Petrus Marci Evangelium probaverit, non indicat, Evangelium illud non fuisse divinitus inspiratum; sed Petrum auctoritate sua, ac sententia declarasse, librum illum Deo inspirante scriptum esse; unde multo minus sequitur, librum humanum posse censeri Sacram Scripturam ex divina approbatione; quae propositio damnata est ab Academia Lovaniensi, et Duacensi.

Reliquas objectiones, ex apparentibus quibusdam antilogiis desumptas, apud interpretes nostros reperies. (a).

*Objic.*

---

(a) Vide etiam *Exercitationem nostram De veritate divinarum Scripturaram.*

*Objie. V.* contra 3m. partem. Singula *Scripturae* verba videntur inspirata *Matth. V. 18. jota unum, aut unus apex non praeteribit a lege. Ergo.*

*R. Arg. cons.* Verba enim illa *jota unum, aut unus apex* commodè intelligi possunt de singulis *Scripturarum* sententiis quoad sensum implendis.

*Objie. VI.* Chrysostomus *Hom. XVIII. in Gen.* docet, nihil temere, vel fortuito loqui *Scripturam*, sed vel syllabam, et apiculum reconditum habere thesaurum. *Augustinus, Bernardus*, alique *Patres* passim docent, divino consilio factum esse; ut unam vocem prae alia *Sacri Scriptores* usurpaverint, ut cum *Ioannes Cap. XIX.* scribit, *unus militum lancea latus ejus aperuit; non dixit sauciavit, aut vulneravit. Ergo etc.*

*R. Neg. cons.* In rebus sublimioribus fatemur, non solum res, sed et singula verba fuisse inspirata. In reliquis vero, licet verborum delectus sacris *Scriptoribus* permissus sit, tamen quia peculiari modo *Spiritus S.* aderat, ne aut falsa, aut inutilia scriberent, nullum in sacris *Libris* verbum est otiosum. Ceterum fatemur, adversam sententiam gravibus etiam niti rationibus, et auctoritatibus; nostram, ut verisimiliorem tantum defendimus.

## §. II.

### De Canone Scripturarum.

*Adv. I.* Canon duo significat, regulam, et catalogum, unde libri *Scripturarum* dicuntur canonici, quia sunt regula *Fidei*, et quia recensentur in catalogo librorum divinatorum. Qui autem extra hunc catalogum sunt, dicuntur *apocryphi*, seu ignoti, quia ut divini non agnoscentur, licet fortasse tales sint.

II Dividuntur autem libri Canonici in *Protocanonicos* et *Deuterocanonicos*. Priores sunt, qui semper ab universa *Ecclesia* agniti sunt ut canonici: posteriores vero, de quibus primo a nonnullis dubitabatur, deinde vero relati sunt in canonem. Omnes perro *Scripturarum* libri. sive prius, sive posterius

in

in canonem relati, dividuntur in Historicos, Legales, Sapientiales, et Propheticos; sed nonnulli, ut Pentateuchus, et Evangelia sunt simul historici, et legales.

III. Triplex est Scripturarum Canon, Catholicorum; Judaeorum, et Haereticorum. Catholici LXII. Libros in canone habent, scilicet XLV. Veteris Testamenti, et XXVII. novi, Veteris Testamenti libri sunt *Pentateuchus*, qui libros complectitur quinque, *Genesim*, *Exodum*, *Leviticum*, *Numeros*, et *Deuteronomium*; liber *Josue*, *Judicum*, *Ruth*, quatuor Regum, duo *Paralipomenon*, duo *Esdrae*, quorum secundus dicitur etiam Liber *Nehemiae*, *Tobias*, *Judith*, *Esther*, *Job*, *Psalmi* CL., *Proverbia*, *Ecclesiastes*, *Canticum*, *Sapientia*, *Ecclesiasticus*, quatuor Prophetiae dicti majores, quia fusius scripserunt, *Isaias*, *Jeremias* cum *Baruch*, *Ezechiel*, *Daniel*, duodecim minores *Oseas*, *Joel*, *Amos*, *Abdias*, *Jonas*, *Michaeas*, *Nahum*, *Habacuc*, *Sophonias*, *Aggaeus*, *Zacharias*, *Malachias*, et duo *Machabaeorum*. Novi autem Testamenti libri sunt quatuor Evangelia, Acta Apostolorum, Epistolae Pauli Apostoli quatuordecim, Epistolae Petri duae, Joannis tres, Jacobi una, Judae una, et *Apocalypsis*.

IV. Judaei solum recipiunt Vetus Testamentum, exceptis *Tobia*, *Judith*, *Baruch*, *Sapientia*, *Ecclesiastico*, *Libris Machabaeorum*, et nonnullis partibus *Danielis*, et *Esther*, quos libros non habent in Canone, quem Esdras, ut vulgo existimant Patres (a), et Theologi, composuit, probavitque Synagoga, licet eos magni faciant, ut testatur *Josephus Lib. I. cont. Apionem*, et *Hieronymus Praefat. in Lib. Tobiae et Judith*. De *Esdrae* Canone Vide *Natalem Alex. Dissert. IV. in VI. Mundi Aetate*, *Calmet*, aliosque, (b). Dividunt autem

Ju-

(a) *Irenaeus Lib. III. Cap. 25. Tertullianus Lib. de cultu fem. Cap. 3. Athanasius in Synopsi: Chrysostomus Hom. VIII. in Ep. ad Hebr. etc.*

(b) Adhuc etiam *Rich. Simonium Hist. Crit. V. T. Lib. I. Cap. 8. Henricum Masium Dissert. de Libris Canoniciis*, qui tamen caute legendi sunt.

*Judaei* Scripturae libros in Legem, Prophetas, et *Hagiographos*, seu libros Sanctos quidem, sed non legales, nec propheticos.

V. Varii Haeretici varios rejecerunt Scripturae libros, prout eos suis erroribus videbant adversos. Ita *ex. gr.* Manichaei totum Vetus testamentum tamquam a malo Deo dictatum respuebant, ex novo autem detrahebant quidquid iis placebat, unde *Tertullianus Lib. de praescript.* docet, potius ex traditione revincendos Haereticos, quam ex Scripturis, quas vel non recipiunt, vel pro lubito mutilant. Vide *Bellarminum Lib. I. de Verbo Dei Cap. 5. et 6.* qui omnes recenset haereticos, qui varios Scripturarum libros, aut eorum partes respuebant; et *Bartholomaeum Germonium de veteribus haereticis Ecclesiasticorum codicum corruptoribus Lib. I. part. 1.* Lutherani ex Veteri Testamento eos libros rejiciunt, quos *Judaei* non habent in Canone: ex novo vero rejiciunt Epistolam Pauli ad Hebraeos, nec non Epistolam Jacobi, *Judae*, secundam Petri, secundam, et tertiam *Joannis*, et *Apocalypsin*. *Calvinus*, ejusque aetate circa libros veteris testamenti cum *Luthero* consentiunt; recipiunt tamen libros novi testamenti, quos *Lutherus* rejicit, ut patet ex *Calvini* Institutione breviori Cap. 8. §. 216, et ex Confessione fidei a Calvinistis oblata in comitiis Poissiacensibus, Cap. 3.

## PROPOSITIO

*Verus, est, et legitimus canon Scripturarum, quem Ecclesia Catholica probat. Est dogma fidei.*

*Prob. ex Traditione*, neque enim aliunde *Judaei*, aut Haeretici probare possunt, librum aliquem esse divinum, et canonicum. I. *Innocentius I.* in Epist. III. ad *Exuperium* Tholosanum anno 400. Concilium Carthaginense III. anno 410. *Augustinus Lib. II. de Doct. Christ. Cap. 8.* *Gelasius* Papa decreto edito in Concilio Romano anno 494. Canonem Scripturarum exponunt qualem Catholici habent, nisi quod



librum Baruch, qui scriba Jeremiae fuit, nonnulli, ut *Augustinus loc. cit.* in ipso Jeremia comprehendunt.

II. Patres, qui ante annum 400. floruerunt, licet Canonem Scripturarum non describant; laudant tamen ut canonicos omnes libros, qui sunt in canone Catholicorum, et ab Judaeis, vel Haereticis rejiciuntur. Eorum testimonia vide apud *Bellarminum Lib. I. de Verb. Dei Cap. VII., et seq. et Sylviu Opusc. V.*

III. Ruffinus orimini vertit Hieronymo, quod libros deutero-canonicos, praesertim *Judith*, in Canonem non receperit, a qua objectionem Hieronymus se purgat *Lib. II. cont. Ruff. cap. 9.* Ergo constans erat tunc apud catholicos horum librorum auctoritas; licet nonnullae ecclesiae de iis, salva fide, et pace, dubitarent ante definitionem Concilii generalis.

VI. Eugenius IV. in decreto pro Armenis ad calcem Concilii Florentini eundem edidit Scripturarum Canonem.

V. Denique Concilium Tridentinum rem aperte declaravit *Sess. IV.* ubi postquam Canonem Scripturarum juxta Catholicos exposuit, sic definit: *Si quis autem libros ipsos integros cum omnibus suis partibus, prout in Ecclesia Catholica legi consueverunt, et in veteri vulgata latina editione habentur non susceperit . . . anathema sit.* Quibus verbis non solum libros ipsos, sed etiam nonnullas eorum partes, de quibus antea à quibusdam dubitabatur, declaravit canonicas, quales sunt ex gr. septem postrema capita *Libri Esther*, historia *Susannae* apud *Danielem*, *Marci* cap. ultimum, *Lucae* historia de sudore *Christi* sanguineo, *Joannis* historia de muliere adultera, et insignis locus ejusdem *Joannis* *Epist. I. Cap. 5. v. 7.* *Tres sunt qui testimonium dant in Caelo;* Omnes enim hae partes in *Vulgata Latina* editione habentur; et in *Ecclesia legi consueverunt.* Hinc rejicienda est ut temeraria sententia *Sixti Senensis Lib. 1. Biblioth. Sanct.* Concilium scilicet intelligendum esse de partibus veris, non de spuris, quod si verum esset, omnium Scripturae partium mutaret auctoritas.

Scho-

## Scholium.

Ne quem fallat iudicium Melchioris Cani, qui asserit, non esse hæreticum, qui Libros deuterocanonicos Veteris Testamenti non suspiceret ut divinos, sciat Theologum illum ante absolutum Concilium Tridentinum obiisse, anno scilicet MDLX. nec interfuisse sessioni IV. Vid. *Vindicias Librorum deuterocanonicorum*, quæ insertæ sunt supplemento Historiæ Natalis Alex. et Calmet in præfationibus.

## Objectiones diluuntur.

Objectiones partim fiunt generatim contra omnes libros deuterocanonicos, partim contra singulos. Hic generales tantum diluemus, singulares vero, quia excedunt institutæ brevitatis limites, apud Bellarminum, et Silvium, legi possunt, nosque eas peculiari Exercitatione dissolvimus.

*Objic. 1.* Libri veteris Testamenti, qui divini non fuerunt in Synagoga, non possunt tales esse in Ecclesia. At libri deuterocanonici Veteris legis divini non fuerunt in Synagoga. Ergo.

*¶. Neg. min.* licet enim Synagoga eos libros nondum in Canonem receperit, non tamen rejecit ut spuriis. Aliud ergo est, esse librum aliquem divinum, aliud Canonicum, licet omnis liber canonicus divinus sit. Divinus est liber, qui Deo inspirante scriptus est: canonicus, qui in canonem ab Ecclesia est relatus. Erant ergo libri illi divini, sed nondum in canone recensiti.

*Inst.* Libri, qui in canonem relati non sunt a Synagoga, non possunt in canonem referri ab Ecclesia, quæ utique canonem suum a Synagoga accepit; Judæis enim credita sunt eloquia Dei Rom. III. 2. Ergo.

*¶. Neg. ant.* Si enim loquamur de libris post compositum ab Esdra canonem conscriptis, ut sunt libri Machabæorum, et Ecclesiastici, Sapientiæ, et in multorum sententia etiam liber Judith, patet non minus

minus potuisse Ecclesiam agnoscere ut divinos, et canonicos libros illos, qui post *Esdras* scripti sunt, quam potuit Synagoga tempore *Esdrae* canonicos agnoscere libros antiquiores, qui licet ante *Esdras* non essent in canonem relati, non ideo tamen divini non erant. Si vero loquamur de libris ante compositum ab *Esdra* canonem, vel ante clausum canonem, quod contigit in nonnullorum sententia circa finem imperii Medorum, ut est liber *Tobiae*, et in nonnullorum sententia etiam liber *Judith*, respondendum est, *Esdras* non rejecisse eos ut spurios, sed non retulisse in canonem, quia Chaldaica lingua scripti erant, non Hebraica, qua consueque Sacri-Scriptores usi erant. Hoc autem non obstitit, quominus eos postea Ecclesia in canone recenseret.

Ecclesia quidem canonem *T. Vet.* a Synagoga recepit, sed in agnoscendis divinis libris eodem spiritu regitur, quo Synagoga regebatur. Atque haec responsio valet etiam pro iis partibus *Danielis*, et *Estheris*, quas Hebraei in canone non habent.

*Objic.* II. Nonnulli ex antiquis Ecclesiae Doctoribus dubitarunt de libris deuterocanonicis tum veteris, tum novi Testamenti. Ita *Hieronymus* in *Prologo Galeato*, et *Hieronymo* antiquior *Melito* Sardensis ap. *Euseb. Hist. Lib. IV. Cap. 26.* expunxit e Canone libros *Baruch*, *Sapientiae*, *Ecclesiastici*, *Tobiae*, ambos *Machabaeorum*: ita etiam alii alios deuterocanonicos. Ergo non constabat traditio de eorum divinitate.

*Neg. cons.* Traditio enim praecipue ex Ecclesiarum Apostolicarum, seu quae ab Apostolis erant fundatae, testimonio probanda est; quod non satis attenderunt singulares illi Doctores, aut etiam minores Ecclesiae, et falli potuerunt in re nondum clare definita. Eorum autem peculiaris opinio communem Ecclesiae traditionem non labefactat.

## §. III.

*De Auctoribus Librorum Veteris, Novique Testamenti:*

*Ado.* Cum primus Scripturae auctor sit ipse Deus, quaerimus hic quorum ministerio ad varios Scripturarum libros exarandos usus sit. Cum autem Deus quocumque homine, quando ei placuerit, aeque uti possit ad opera quaeque egregia perpetranda, quippe qui infirma mundi eligit, et contemptibilia, ut confundat fortia; licet multorum, ignoretur Scriptor Librorum, non inde tamen nutat Scripturarum veritas. Sed quia ad revincendam incredulorum pervicaciam juvat ostendere, quosdam Libros historicos scriptos esse ab auctoribus, qui rebus, quas narrant, interfuerant, easque scripsere, viventibus iis, coram quibus acciderant; propheticos vero ante rerum eventum: ideo de singulis Scripturarum Libris agemus breviter, ut quid de eorum auctoribus certum sit, quid incertum, tirones perspectum habeant.

*De Pentateucho.*

*Ado.* Omnes igitur contendunt nervos increduli (a) ut suadeant, Moysen non esse Pentateuchi auctorem, ne concedere cogantur miracula, quae in exitu filiorum Israel ex Aegypto patrata sunt; imo nec defuerunt, qui effutirent, Moysen personam esse fictitiam, quae nunquam extitit. Quos quidem nemo melius, et copiosius confutavit Huetio in *Demonst. Evan. Prop. IV. et seq.*

PRO-

---

(a) Hobbesius in *Leviathane*: Ps. Pereyra *Tract. Prae. d. amit.* Spinosa *Tract. Theol. Polit.* Tholandus *Orig. Judaic.* quibus accedunt Simonius *Hist. Crit. V. T. Clericus Respons. et Observat. in Hist. Simon.* Volserius passim et.

## PROPOSITIO

*Auctor Pentateuchi est ipse Moyses, licet nonnulla post ejus mortem addita verosimilius videantur.*

*Prob. 1. pars. I.* Non alia ratione certi sumus, librum aliquem a certo auctore scriptum, nisi quia illum ei tribuit constans omnium saeculorum traditio; sic enim scimus *Platonis, Aristotelis, Ciceronis* Libros, ipsorum opera esse genuina. Omnium autem saeculorum traditio *Hebraeorum, Christianorum, Ethnorum*, Pentateuchum *Moyse* constantissime tribuit. De *Hebraeis* enim et *Christianis* comperta res est. Ex *Ethnicis* habemus testimonia *Nicolai Damasceni, Strabonis, Appionis Grammatici, Manethonis Aegyptii*, aliorumque, quos longa serie *Daniel Huetius* collegit. Ergo.

*Prob. II.* Auctor Pentateuchi refert, ipsum *Moysem* scripsisse universos sermones Domini. *Exod. XXIV. 4. Scripsit autem Moyses universos sermones Domini... Assumensque volumen foederis legis, audiente populo, etc. Ec Exod. XXXIV. 27. Dixitque Dominus ad Moysem, scribe tibi verba haec, quibus et tecum, et eum Israel pepigi faedus. Deuter XXXI. 9. Scripsit itaque Moyses legem hanc, et tradidit Sacerdotibus filiis Levi.* Atqui volumen illud a *Moyse* scriptum ipsissimum est Pentateuchus; tum quia servatum fuisset sine dubio volumen illud a *Moyse* scriptum, et a Pentateucho diversum; tum quia Pentateuchus, excepta *Genesi*, quae est necessaria introductio ad intelligendam historiam latae legis, nihil aliud continet, nisi sermones, et legem Domini, interjectis tantummodo narrationibus eorum, quorum occasione Deus locutus est. Atque ideo si *Moyse* universos scripsit sermones Domini, Pentateuchum totum conscripsit. Ergo etc.

*Prob. III.* Si impostor aliquis a *Moyse* diversus Pentateuchum scripsisset, id factum esset vel ipso vivente *Moyse*, vel post ejus obitum. Sed neutrum fieri potuit. Non primum; facile enim detecta fraus  
a Le-

a Legislatore ipso mendacii inimico non fuisset impunita. Nec alterum fieri potuit; cum enim in Pentateucho referantur facta multis Israelitarum familiis probrosa, et scribantur leges toti populo gravissimae; fieri non potuit, ut vel omnis populus in imposturam conspiraret; vel a paucis composita fraus a reliquo populo non detegeretur. Ergo. etc.

*Prob. 2. pars.* Sunt nonnulla in Pentateucho, quae post *Moysis* mortem accidisse constat, ut 1<sup>o</sup>. ipsa *Moysis* mors, et sepultura *Deuter. ult.* 2<sup>o</sup>. mutatio nominis Regionum, ut cum dicitur *Genes. XIV.* *Abraham* persecutus reges, qui *Lothum* captivum duxerant, usque *Dan*, cum constet, urbem illam non nisi post mortem *Moysis* ita appellatam ex tribu *Dan*, cum antea vocaretur *Lais*, *Judic. XVIII.* 29. Tale est etiam quod dicitur *Deuter. III.* 11. de lecto ferreo *Og* Regis *Basan*. Atqui licet potuerit ista *Moses* propheticè scribere, sicut opinantur *Josephus Lib. IV. Antiq. Judaic.* et *Philo Lib. De vita Moysis*, verosimilius tamen est, post ejus mortem fuisse adjecta; non enim sine causa miracula multiplicanda sunt. Ergo etc.

### Objectiones.

*Objic. I.* *Moses* Jordanem non trajecit; mortuus est enim in monte *Nebo* antequam Jordanem Israelitae transirent; *Deuter. ult.* Atqui auctor *Pentateuchi* scripsit trans Jordanem. Sic enim de *Moyse* loquitur *Deuter. I.* Haec sunt verba, quae locutus est *Moses* ad omnem *Israel* trans Jordanem. Ergo etc.

*R. Neg. min.* 1<sup>o</sup>. quia vox Hebraica בעבר *beheber* quam vulgata vertit *trans*, ambigua est, utrumque significans et *trans*, et *citra*, ut *Vatablus*, *Buxtorfius*, aliique observant: 2<sup>o</sup>. quia *Moses* scribens posteris, qui traicaturi erant Jordanem, sapientissime notavit locum, ubi tunc agebat, esse respectu posterorum trans Jordanem. 3<sup>o</sup>. Denique potuerunt haec verba adjecta esse post mortem *Moysis*, ut putat *Calmet*.

*Inst. 1<sup>o</sup>.* Auctor *Pentateuchi* semper de *Moyse* loqui-

tur ut de alia persona; dixit *Moses*, respondit *Moses*, vocavit Dominus *Mosen* etc. Ergo non ipse *Moses* ea scripsit.

¶. *Neg. cons.* Nam et profani historici saepe de se ipsi in tertia persona loquuntur, ut *Caesar* in *Commentariis*, *Josephus* in *Libris de Bello Judaico*; et ipsi Sacri Scriptores Idem faciunt, ut *Matthaeus*, *Matt.* IX. 9. et *Joannes*, *Joan.* XIII. 23. nec ullus ipsis umquam abjudicavit libros, qui eorum nominibus inscribuntur.

*Inst.* 2°. In *Genesi* legitur, *Abraham* ex *Harân* profectum esse in *Chanaan*: subditque auctor: *Chananaeus autem tunc erat in terra*, ac proinde cum haec scripta sunt, expulsi jam e suis sedibus erant *Chananaei*. Atqui hoc factum est post mortem *Mosis*. Ergo.

¶. 1°. *Neg. maj.* quoad alteram partem; verba enim illa *Chananaeus autem tunc erat in terra*, sensum illum nativum, ac simplicem habere possunt: jam tunc *Chananaei* in terra illa erant, cum *Abraham* eo perrexit; ac proinde non significant, jam esse inde depulsos, cum haec scripta sunt.

¶. 2°. Potuisse vel *Mosen* prophetico spiritu, vel alium sacrum Scriptorem post ejus mortem ista addere verbis *Mosaicis*.

*Inst.* 3°. Asserere aliquid post mortem *Mosis* *Pentateucho* adjectum, puerilis evasio est. Cum enim constet, esse ibi nonnulla, quae non sunt a *Moyse* scripta, nec unquam probari possit, ea fuisse aliena manu addita, solidius concludunt adversarii, totum librum non esse *Mosis*. Ergo.

¶. *Neg. ant.* Cum enim luce claritas sit a *Moyse* scriptum esse *Pentateuchum*, evidenter concluditur, nonnulla vel a *Moyse* prophetice scripta, vel ab aliis addita.

*Inst.* 4°. Scribit auctor *Pentateuchi Exod. XVI. 35.* *Filii Israel comederunt Man quadraginta annis. . . . hoc cibo aliti sunt, usquequo tangerent fines terrae Chanaan.* Sed *Moses* jam obierat, cum *Israelitae* *Chananeos* fines attigerunt. Ergo etc.

¶. *Neg. cons.* Cum enim *Moses* per annos illos  
I  
qua-

quadraginta populi ductor fuerit, videritque eum manna manducasse, et sciret Deo revelante *Num. XVI. 33.* non amplius quadraginta annis duraturam peregrinationem in deserto, quidni scribere potuit, per annos quadraginta Israelitas manna comedissee, donec fines attingerent terrae Chanaan, in qua utpote feracissima, eo cibo ipsis amplius opus non erat?

Ioanes *Volterrii* objectiones ( ut puta quod nondum fuerint aetate *Moysis* inventae alphabeti litterae, quod nondum scriberetur, nisi in marmore, aut plumbo, aliaque ejusdem generis somnia ) praetermittimus; praestat enim ad ea, quae majoris momenti sunt, properare, quam in miseri hujus, et impii scurrae cavillationibus dissolvendis immorari (a).

### Corollaria.

I. Hinc sequitur, Pentateuchum esse omnium librorum, qui extant, antiquissimum. *Moyses* enim *Pentateuchi* auctor, non solum Graecis Historicis *Herodoto*, *Thucidide*, ac Poetis *Lino*, *Orpheo*, vetustior est, verum etiam Aegyptiis, et Assyriis *Beroso*, *Manethone*, *Sanchuniathone*: quippe, fatente *Appione* apud *Josephum*, *Lib. I. cont. Appion.* *Moyses* coaevus fuit *Inacho* Argivo, qui Scriptores omnes Graecos, ac Barbaros longe antecessit. Sed utrum ante *Moysen* alii fuerint libri, qui perierint, exploratum non est. Nam liber bellorum Domini, qui laudatur *Num. XXI. 14.* non est certe vetustior *Pentateucho*; potuit enim liber ille ab ipso *Moysse* esse scriptus, potuit et versus ille post mortem *Moysis* esse adjectus. Quidquid sit, non videtur verisimile, ipsum *Moysen* fuisse litterarum inventorem, cum *Act. VII. 22.* dicatur excultus omni sapientia Aegyptiorum, a quibus verisimile est alphabeticas litteras accepisse, nisi dicere malimus, Abrahamum, ejusque nepotes eas accepisse a Chaldaeis,

ex

---

(a) V. Lettres de quelques Juifs a M. de Volsaire.



ex quibus orti, vel a Phoeniciis, apud quos diu peregrinati sunt. Vide D. Calmet. *Dissert. de mater. et form. vet. libr.*

II. Cum recta ratio postulet, ut in historia major sit illorum auctoritas, qui viciniore fuerunt rebus, quas memoriae prodiderunt, sequitur, Mosaicam historiam profanas omnes historias auctoritate vincere, quamvis non esset Deo inspirante conscripta: ut mira sit eorum cecitas, qui ex fabulosis narratiunculis scriptorum Aegyptiorum, Chaldaeorum, Sinensium multis saeculis *Moyse* posteriorum, Mosaicæ historiae tenebras offundere conantur.

III. Quamvis autem referat *Moyse* res vetustissimas virorum antediluvianorum; potuit tamen praeter revelationem eas ediscere ex traditione, quae propter virorum illorum longissimam vitam tempore *Moyse* recens erat. Avus enim *Moyse* Caath cum *Jacobo* ingressus est in Aegyptum. *Jacob* autem natus est superstitute adhuc *Abraham*, qui cum *Sem* filio *Noe* diu vixit. *Sem* autem cum *Mathusala*, qui diutius cum ipso *Adamo* conversatus est. Vide *Duguet Comment. in Genes.*

IV. Denique hinc sequitur, miracula, quae in *Pentateucho* patrata referuntur in exitu Israelitarum ex Aegypto, esse certissima, ut in dubium revocari sine scepticismo non possint. Scripta sunt enim ab ipso *Moyse*, viventibus illis, coram quibus facta referuntur.

De Libro Josue.

Librum *Josue* *Bellarminus Lib. De Scriptor. Eccles. Sixtus Senensis Lib. 1. Biblioth. alique scriptum*, censent ab ipso *Josue* *Moyse* successore, tum quia *Jos. ult.* dicitur: *Scriptis quoque Josue ultima verba haec in volumine Legis Domini*, tum quia *Eccl. XLVI.* dicitur *Josue* successor *Moyse* in Prophetis, Graece in prophetiis, nempe in scribendis divino spiritu libris sacris. Id si verum est, dicendum, ea quae ibi leguntur de morte *Josue* *Cap. ult.* vel de iis rebus, quae post ejus mortem acciderunt, adjecta esse ab alio sacro Scriptore. Ceterum *Andraeus Masius* totum

librum Esdrae attribuit, Natalis Alex. rectius incerto auctori.

*De Libris Judicum, Ruth, Regum, et Paralipomenon.*

Horum Librorum auctor incertus est. Sunt, qui putant, Librum *Judicum*, *Ruth*, primum *Regum* scriptos a *Samuele*; secundum a *Nathan*, et *Gad* prophetis; tertium et quartum *Regum*, ut et duos *Paralipomenon* ab Esdra.

*De duobus Libris Esdrae.*

Priorem *Esdrae* librum, ipsum *Esdram* scripsisse putant *Driedo*, *Sixtus Senensis*, *Bellarminus*, alique, posteriorem vero *Nehemiam* scripsisse satis patet tum ex Libri initio, quod sic habet: *Verba Nehemiae filii Helchiae*, tum quia ibi saepe *Nehemias* de se in prima persona loquitur. Dicuntur autem primus, et secundus *Esdrae*, quia apud Hebraeos in unum volumen connexi tribuuntur primo Scriptori.

*De Libris Tobiae, Hesther, Judith, et Job.*

Librum *Tobiae* ipsum *Tobiam* scripsisse verisimile est ex Cap. XII. ubi juxta versionem LXX. habetur: *Scribite omnia, quae consummata sunt in libro*, ab alio tamen scriptore adjecta creduntur, quae habentur in fine Cap. XIV.

Liber *Judith* fortasse a *Ioachim* tunc summo Pontifice scriptus est: at Librum *Esther* a *Mardocheo* compositum valde est verisimile ex iis, quae ibi leguntur Cap. IX. *Scriptis autem Mardocheus omnia: et Cap. XII. Mardocheus rei memoriam litteris mandavit.*

Librum *Job* nonnulli volunt a *Moyse* scriptum, ut patientiae exemplum proponeret Israelitis: alii ab ipso *Job*, sed fortasse a *Jobo* lingua Arabica composita historia, postea a *Moyse* digesta est.

## De Libro Psalmorum.

Psalmos nonnulli volunt partim a  *Davide*  compositos, partim ab iis, quorum nomina praefertunt, ut  *Asaph* ,  *Iditun* ,  *Ethan* , filiis  *Core*  etc.; alii vero omnes a  *Davide*  scriptos, datos autem cantoribus illis  *Asaph* ,  *Idithum*  etc. ut eos musicis notis distinguerent, et canerent. Haec posterior sententia placuit  *Augustino Lib. XVII. De Civ. Cap. 14. Chrysostomo; Theodoro*  et aliisque (a), tum quia  *Christus Luc. XX.*  Librum Psalmorum  *Davidi*  videtur tribuere, tum quia in novo Testamento semper Psalmi sub nomine  *Davidis*  laudantur (b): favet etiam huic opinioni Tridentinum, quod Psalterium omne  *Davidicum*  appellat. Sed non desunt priori sententiae gravissimi auctores  *Hilarius* ,  *Hieronymus* , aliique (c), imo rationes fortasse validiores, ita ut verosimilior illa videatur. Non solum enim Psalmorum tituli eos variis tribuunt auctoribus, sed et argumenta sunt de rebus, quas multo post  *Davidem*  accidisse constat. Tribuitur aliquando in Scripturis Psalterium  *Davidi* , utpote praecipuo Psalmorum auctori, sicut Epistolarum collectio tribuitur  *Ciceroni* ,  *Augustino* ,  *Hieronymo* , quamvis aliorum etiam Epistolas habeat.

## De Proverbiis, Ecclesiaste, Cantico Canticorum, et Sapientia.

*Proverbia, Ecclesiasten, Canticum Canticorum Salomonis*  esse, Patres omnes sine ulla controversia affirmant,

(a)  *Chrysostomus in Psal. 1. Theodoretus Praef. in Psal. Ambrosius Praef. in Ps. Euthymius Praef. in Psal. Philastrius Haeres. LXXIX. Cassiodorus Prol. in Psal.*

(b)  *Matth. XXII. 42. Marc. XII. 36. et al.*

(c)  *Hilarius Praef. in Psal. et in Psal. 131. Hieronymus Epist. ad Sophron. 134. Eusebius Caesar. Praef. in Psal. et alib. Auctor Synopsi inter Opp. Athanasii, aliiq.*

mant, ut *Hieronymus Praef. in Lib. Salom. Augustinus Lib. II. De Doct. Christi. Cap. 8.*, et alii, consentiuntque Hebraei, imo patet ex ipsis Libris. Controversia tantum est de Cap. tricesimo Proverborum, eo quod initio ejus Capituli, ubi in vulgata habemus: *Verba congregantis*: in Hebraeo legitur *Verba Agur*. Sed verisimilius est nomen *Agur* ibi esse appellativum, quod *congregantem* significat, recteque congruit *Salomoni*, qui et *Ecclesiastes* dicitur.

*Sapientiae* vero Liber, licet quoad sententias *Salomonis* sit, ut docent *Tertullianus, Hieronymus, Eusebius*, aliique (a), cum non alteri aptari possint ea verba *Cap. IX. Tu elegisti me regem populo tuo, et judicem filiorum tuorum, et filiarum, et dixisti, me aedificare templum in monte sancto tuo*; tamen cum nec in Hebraeo habeatur, et Graecam redoleat eloquentiam, ex sententiis *Salomonis* a quodam Jadaeo Graece perito compositum putatur, vel a *Philone* quodam ante *Christi* adventum ut nonnulli putant, vel ab incerto auctore, ut rectius alii docent.

Denique *Ecclesiastici* auctor est *Jesius filius Sirach* Hierosolymitanus, ut ex *Cap. penultimo* constat; idque ante *Machabaeorum* aetatem, annis ante *Christum* circiter ducentis. Vocatur aliquando liber *Salomonis* tum propter quandam eloqui similitudinem, tum propter insertas aliquas *Salomonis* sententias, ut *Augustinus* observat *Lib. XVII. De Civ. Cap. 20.*

### De Prophetis.

Quatuor Prophetas, qui Majores dicuntur, et duodecim Minores auctores esse librorum, qui illis inscribuntur, constans Patrum, et Theologorum sententia est; omnibus enim saeculis Libri illi ipsis tributi sunt.

De

---

(a) *Hieronymus Ep. XLI. ad Paulin. Tertullianus Lib. de Praeser pt. Cyprianus Lib. de mortalitate, et al. Eusebius Lib. VI. Cap. 22.*

## De Libris Machabaeorum.

Prior Machabaeorum liber probabili ratione scriptus creditur ab *Hircano* summo Pontifice, qui et Propheeta dicitur a *Josepho Lib. XIII. Antiq. Cap. 17.* Ejus sententiae est *Bellarminus Lib. de Script. Eccles.* Posterior vero ex quinque Libris *Jasonis* Cyrenaci collectus est ab incerto auctore.

Ceterum quae hic strictissime sumus prosecuti de Libris Veteris Testamenti, ea uberrime, et eruditissime pertractata invenies apud *D. Calmet* in Praefationibus. Jam de novi Testamenti Libris breviter dicendum est.

## De quatuor Evangeliiis, Actibus Apostolorum, et Epistolis Pauli, Petri, et Joannis.

Quin quatuor *Evangelia* ab iis scripta sint, quorum inscribuntur nominibus, dubitare apertae demeritiae est, ut alibi observavimus. *Acta* vero Apostolorum a *Luca* esse composita, tum ex verbis, quae initio Libri habentur, tum ex perpetua traditione constat. Denique *Epistolas Pauli* tredecim, primam *Petri*, et primam *Joannis* ab ipsis esse scriptas, omnium Patrum consensus ostendit. Sed de *Epistola ad Hebraeos*, *secunda Petri*, *secunda*, et *tertia Joannis*, sicut et de *Epistolis Jacobi* et *Judae*, a quibusdam mota est controversia.

## De Epistola ad Hebraeos.

Duae sunt de *Epistola ad Hebraeos* distinctae quaestiones 1°. utrum sit canonica: 2°. utrum genuinum *Pauli* opus. Prius negarunt olim *Marcionitae* ap. *Hieron. Praef. in Epist. ad Tit.* *Arius* ap. *Theodoret. Praef. in Epist. ad Heb.* *Lutherus*, ejusque assaeclae. Posterius in dubium revocarunt nonnulli veteres, praesertim Latini, teste *Hieronymo Lib. de Vir. Illust. et Eusebio Lib. III. Hist. Cap. 3.* quam dubita-

tio-

tionem jam olim excussam renovare conati sunt *Calvinus*, *Erasmus*, et Cardinalis *Cajetanus*.

Quoniam autem ostendimus supra, hanc Epistolam, ut et ceteros libros deutero-canonicos, vere esse divi-  
nam, non est hic prior quaestio iterum agitanda. Quod  
autem ea sit Apostoli *Pauli*, non *Barnabae*, non *Lu-  
cae*, non *Clementis* Romani, ut varii suspicati sunt  
auctores, inde evincitur, quod vetustissimi Patres eam  
laudent, ut *Pauli* opus. Ita *Clementis* Romanus apud  
*Euseb. Lib. III. Cap. 38.* *Gelasius* I. in Concilio Ro-  
mano, Concilium Laodicaenum *Can. 59.* Carthaginen-  
se III. *Can. 47.* Omnes denique Graeci Patres, imo  
et Latini, quatuor tantum exceptis *Tertulliano*, *Cy-  
priano*, *Lactantio*, *Arnobio*, qui hanc Epistolam non  
videntur agnovisse. Ceterum tanta est Ecclesiae univer-  
sae consensus in agnoscenda hac *Pauli* Epistola, ut  
*Philastrius* inter haereticos recenseat eos, qui illam  
*Paulo* abjudicant. Nos quidem ab hac censura absti-  
nemus, sed cum Concilio Tridentino, et universa Ec-  
clesia eam epistolam, ut divinum, et genuinum agno-  
scimus *Pauli* opus.

Duo obijciunt adversarii, nempe quod non sit in  
principio *Pauli* nomen, et salutatio, quam ceteris  
Epistolis praemisit, et quod stilus sit ornatior. Sed  
primum factum est, vel quia *Pauli* nomen Hebraeis erat  
invisum, vel alia de causa, quam ignoramus; poste-  
rius vero vel quia *Paulus* Epistolam Hebraice scripsit,  
ideoque utpote in nativa lingua ornatius, ut putat *Eu-  
sebius* Lib. III. Cap. 38. vel quia quoad sensum a  
*Paulo* dictata, ab alio quoad delectum verborum or-  
natius scripta est, ut putat *Origenes* ap. *Euseb. Lib.  
VI. Hist. Cap. 18.* Quidquid ejus rei sit, non est  
insuetum, ut idem auctor variis in libris, pro vario  
argumento, vario etiam utatur stilo. Quae autem ob-  
ijciunt ex nonnullis hujus Epistolae sententiis, potius  
ad oppugnandam ejus divinitatem pertinent, ideoque  
nos praetermittimus. Ea apud *Bellarminum*, et *Syl-  
vestrum* refutata reperies.

*De Epistolis Jacobi, Judae, secunda Petri,  
secunda et tertia Joannis.*

De his etiam Epistolis quosdam dubitasse, auctor est *Hieronymus*, et *Eusebius*. *Lutherus*, *Kemnitius*, *Magdeburgenses Jacobi*, et *Judae* Epistolas aperte rejiciunt; de reliquis dubitant. *Erasmus Jacobi* Epistolam non redolere Apostolicam gravitatem affirmat; secundam, et tertiam *Joannis* negat esse Apostolicas: de secunda *Petri* dubitat. *Cajetanus* de omnibus dubitat.

Verum has Epistolas horum esse Apostolorum, iisdem argumentis probatur, quibus paulo ante usus sumus, omnium nempe Patrum, et Conciliorum consensione (a), paucissimis exceptis auctoribus, quorum dubitatio universae Ecclesiae consensum concutere, aut subvertere non poterit.

*De Apocalypsi.*

Et hunc postremum Scripturae Librum *Joanni* Apostolo adjudicare, atque e Canone expungere ausi sunt primo haeretici nonnulli, ut *Marcionitae* apud *Tertullian.* *Lib. IV. cont. Marcion.* Alogi, et *Theodotiani* apud *Epiphani.* *Haeres. LI. et LIV.* Denique *Lutherani*, exceptis *Magdeburgensibus Cent. I. Lib. II. Cap. 4.* Deinde etiam nonnulli veteres Catholici; aut enim *Hieronymus Epist. ad Dardanum*, ita paucos Graecorum dubitare de *Apocalypsi*, ut pauci Latinorum de Epistola ad Hebraeos. *Erasmus* variis rationibus suadere conatur, Librum hunc non esse *Joannis* Apostoli *Annotat. in Apocalyps.*

Sed praeter omnium Latinorum Patrum consensum, etiam Graeci *Apocalypsim*, ut divinum *Joannis*

(a) Concil. Laodic. Carthag. III. Florentin. et Trident. Innocent. I. *Epist. ad Exuper.* *Gelasius I.* *Origenes Hom. VII. in Jes.* *Epiphanius Haeres. LXXVI.* *Athanas. in y. Apoc.* *Hieron. Epist. ad Paulin.* *Augustin. Lib. II. de Pecc. Cap. 8.* et alii innumeri.

nis Apostoli opus agnoscunt (a), nec recta ratio patitur, ut duorum aut trium Græcorum dubitatio, qui etiam a coævis scriptoribus refutati sunt, communi, et perpetuæ traditioni praevaleat.

Objectiones vero *Erasmii*, nempe quod sæpe in Apocalypsi *Joannes* seipse nominat dicens, *Ego Joannes*, quod in Evangelio præ modestia numquam fecit: et quod in nonnullis codicibus *Apocalypsis* inscribitur *Joanni* Theologo, nullius momenti sunt. Potuit enim seipse nominare, cum in Patmos exularet, ne quis eum librum genuinum esse Apostoli opus dubitaret: potuit etiam ab antiquis vocari Theologus, quia de divinitate Verbi, et Trinitate sublimius scripserat.

## §. IV.

*De Libris Scripturarum Apocryphis.*

*Αποκρυφον* sive *Apocryphum* occultum aliquid significat, unde solet apocryphus appellari liber, qui non ejus est auctoris, cui tribuitur, sed alterius ignoti. Apud veteres Patres apocryphi dicuntur libri, qui vel continent doctrinam catholicae adversam, aut suspectam: quo sensu *Gelasius I.* in Concilio Romano apocryphos appellat libros *Clementis Alexandrini*, *Origenis* etc. vel qui in Canonem Scripturarum non sunt ab Ecclesia recepti. Hoc igitur potestremo sensu multi recensentur apocryphi tum veteris, tum novi Testamenti libri a *Gelasio I.*, *Athanasio*, vel alio auctore in *Synopsi*, et *Innocentio I.* in Epistola ad *Exuperium*. Eorum maxima pars perit; sed supersunt ex veteri Testamento Liber tertius, et quartus *Esdrae*: tertius, et quartus *Machabæorum*: Oratio *Manasse*: Ap-

(b) Inter Latinos Tertullianus *Lib. IV. cont. Marcion.* Ambrosius in *Psalm. XL.* Augustinus *Tract. XXXVI. in Joan.* Innocentius I. *Epist. ad Exuper.* Hieronymus, qui in *Epist. ad Dardan.* omnium Latinorum hanc esse consensum docet Inter Græcos Justinus *Dial. cum Tryph. Irenæus Lib. V. in fin.* Origenes *Hom. VII. in Jos.* Athanasius in *Synopsi* Epiphanius, Chrysostomus, Deulaeensis. Adde Concilia, Ancyranum, Carthaginense III. Romanum sub Gelasio, Toletan. IV. can. 16. Trithemium *Ser. IV.*



pendix ad Librum *Job*, Psalmus *CLI*. Oratio *Salomonis*, quae in veteribus Bibliorum editionibus in fine libri *Ecclesiastici* reperitur.

Dubitat autem a nonnullis, utrum apocryphus est Prologus *Ecclesiastici*, et Praefatio *Threnis Jeremiae* praefixa.

Ex novi autem Testamenti libris apocryphi sunt *Evangelia secundum Thomam, Mathiam, Bartholomaeum, Petrum, Nicodemum, Andream, Paulum, Barnabam, Jacobum, secundum Hebraeos*, aliaeque omnia *Evangelia*, quorum mentio apud veteres occurrit, praeter quatuor, quae in Canone habentur: *Epistola Jesu Christi ad Abgarum*. Vide de Apocryphis libris Novi Testamenti *Fabricium*.

Gravis porro est inter Theologos quaestio, utrum libri aliqui non apocryphi, sed vere divini, invidia hominum, vel injuria hostium Religionis perierint. *Belarminus* quidem *Lib. IV. de Verbo Dei cap. 4.* *Serapius in Proleg. cap. 8.* *Estius in Lib. II. Paralip. cap. 33.* alique post *Chrysostomum Homil. IX. in Matth. et Homil. VII. in 1. ad Cor.* id affirmant, eo quod in Scriptura nonnulli laudantur libri, quos verisimile est, fuisse sacros; ac divinos, ut *Liber Beliorum Domini Num. XXI. 16. Visio Ado Videntis, Nathan Prophetae, et Ahiae Silonitis II. Paralip. IX. 29. Liber Semeiae Prophetae II. Paralip. XII. 15.* Tot libri *Salomonis*, quorum mentio fit *III. Reg. IV. 32. Liber sermonum dierum Regum Juda, et Israel Liber Enoch etc.* Sed cum Sacri Scriptores aliquando laudent etiam sententias ex libris, qui certissime sacri non sunt, ut *Act. XVII. ex Arato, ad Tit. I. ex Epimenide*, non est adeo evidens, libros alios, qui in Scripturis laudantur, fuisse divinos. Ceterum si providentia Dei libros illos dictavit, ac postmodum intercidere permisit, putandum est, eos non ad perpetuum, sed temporarium Ecclesiae usum fuisse divinitus inspiratos. Etiam ex libris novi Testamenti periisse putant aliam *Pauli Epistolam ad Corinthios*, cujus videtur meminisse *I. Cor. V. 9.* his verbis: *Scripsi vobis in Epistola, ne commisceamini fornicariis*; sed posset responderi, *Epistolam illam non*

esse aliam prius missam, sed illam ipsam, in qua Paulus paulo ante Corinthios reprehenderat, quod incestuosum ab Ecclesia non ejecerant. Quapropter in ambiguo res esse videtur.

## §. V.

*De idiomate textus originalis Sacrae Scripturae.*

*Ad. I.* Libri veteris Testamenti Protocanonici lingua Hebraica conscripti sunt, licet Chaldaicis characteribus ab *Esdra* (ut vulgo creditur) post captivitatem Babylonicam fuerint expressi, cum Hebraici characteres, quales sunt hodie in textu Samaritano, jam exleverint, qua de re vide eruditam D. Calmet *Dissertationem: An Esdras charact. mutav.* Ex Deuterocanonici vero *Tobias*, et *Judith*, et nonnullae partes *Danielis*, et *Esdrae* scriptae sunt Chaldaice; *Sapientia*, et secundus *Machabaeorum* Graece. Primus vero *Machabaeorum*, et *Ecclesiasticus* Hebraice, licet hodie supersit tantum Graeca versio.

*II.* Novi Testamenti textus originalis Graecus est, excepto Evangelio *Matthaei*, et, juxta nonnullos, Epistola ad Hebraeos Hebraice, seu potius Syriace scriptis: Ita *Hieronymus Praefat. in Evang.* et *Eusebius Lib. VI. Hist. cap. 11.* Disputatur autem, utrum originalis Scripturae textus sit hodie incorruptus. *Calvinus* enim, *Kemnitius*, alique contendunt, hodiernum Hebraicum *Vet. Test.* textum esse ubique purissimum. Contra vero *Melchior. Canus Lib. II. de loc. cap. 13.* alique, pluribus in locis malitia Judaeorum volunt esse corruptum: quod et sensit ipse *Morinus Lib. I. Exercit. Cap. 4.* Nos mediam sequimur sententiam, quae est *Driedonis Lib. II. de Eccl. Dogm. cap. 1.*

PROPOSITIO I.

*Textus Hebraicus Vet. Test. incorruptus est quoad substantiam, licet non careat mendis levioribus partim negligentia Librarium, partim ignorantia Rabbiorum.*

*Prob. 1. pars. 1°. Si Scripturas Hebraei corrumperent, id vel ante, vel post Christi adventum fecissent. At neutrum fingi potest: Non primum: nam Christus, et Apostoli numquam grande hoc scelus Judaeis objecerunt; imo ipse Christus Joan. V. 39. eos ad scrutandas mittit Scripturas: Scrutamini Scripturas: nec unquam monuit, ut caverent a corruptis textibus. Non alterum, fieri enim non potuit, ut Judaei depravarent codices omnes ubique terrarum dispersos non solum apud Judaeos, sed etiam apud Christianos. Ita ferè argumentantur Hieronymus in Cap. VI. Isaiae, Augustinus Lib. XV. de Civ. Cap. 13.*

*2° Si Judaei Scripturae textum, quem incredibili religione coluerunt semper, et colunt, voluissent corrumpere, maxime id fecissent iis in locis, quae Christianae Religioni favent. At id non fecerunt; saepe enim magis Christianis favet Hebraicus textus, quam Graeca, aut Latina versio. Ergo.*

*3°. Denique incredibile est, providentiam Dei id permisisse, quae ideo Judaeos per totum orbem dispersos servat, ut ex sacris Codicibus, quos ipsi circumferunt, probemus, contra incredulos, non esse a nobis conficta vaticinia Prophetarum, ut observat Augustinus Lib. XVIII. de Civ. c. 46.*

*Prob. 2. pars. 1°. ex ipsis variantibus lectionibus, quae in textu originali occurrunt, 2°. ex similitudine quarundam litterarum Hebraicarum, quae facile secum invicem commutari possunt, ut norunt eruditi, 3°. ex punctis vocalibus, quae Rabbinii adjecerunt; mutatio enim punctorum vocis sensum immutat. Haec tamen leviora sunt, nec textus integritatem labefaciunt.*

*Objici.*

*Objic. cont. I. part. Justinus in Dialogo cum Triph. Judaeis objicit, eos quaedam capita e. Scripturis abstulisse. Idemque docet Origenes Homil. XII. in Hierem. Adde, etiam, si libet, Chrysostomum Homil. V. in Matth. et Hieronymum variis in locis. Ergo.*

*W. Neg. cons. Justinus enim, et Origenes aperte loquuntur de versione LXX., nec de omnibus ejus exemplaribus, cum Judaei falso depravare non potuerint exemplaria Christianorum. Chrysostomus vero, et Hieronymus de versione Aquilae, Symmachi, et Theodotionis verba faciunt; nemo autem de ipso Hebraico textu. Imo ipse Hieronymus in Praefat. Comment. in Isaiam ridet eos, qui Hebraicos fontes putant esse corruptos. Vide Duguet. Dissert. XIII.*

## PROPOSITIO II.

*Graecus Novi Testamenti textus incorruptus est quoad substantiam, licet mendis levioribus non careat.*

*Prob. 1. pars. 1°. Si textus ille quoad substantiam corruptus esset, jam Ecclesia Graeca, quae eo utitur, veras non haberet Scripturas, quod absurdum est: 2°. Fieri non poterat, ut corruptio, omnia prorsus exemplaria per orientalem Ecclesiam diffusa pervaderet, nec ullus id adverteret. Certe cum haeretici aliquid in eo textu mutare conati sunt, cito est detecta fraus, ut testatur de Marcionitis Tertullianus Lib. V. cont. Marcion. Cap. 13. et Epiphanius Haer. XLII. de Arianis Ambrosius Lib. III. de Spir. S. Cap. 11. 3°. Latina versio recte cum Graeco textu quoad substantiam consonat. Ergo etc.*

*Prob. 2. pars. 1°. Quia fieri non poterat, ut codex tot millibus Librariorum manibus exscriptus, humanam non pateretur infirmitatem, praesertim si attendas Graecorum Manuscriptorum litteras, et notas compendiaras, in quibus facile mendum potest irreperire. 2°. quia revera sunt nonnulla in hodierno Graeco textu, quae aliter se habebant in veteri, ut ex. gr. Rom. XII. καιρω δαλευντες, cum olim habere-*

beretur κυριω δελεοντες, sicut veteres Graeci Patres *Origenes*, *Chrysostomus*, *Theophylactus* legerunt, et probat *Hieronymus* in *Epist. ad Marcellam*: unde vulgata nostra recte habet *Domino* *servientes*.

### *Corollaria.*

Ex his cruuntur regulae, secundum quas textu originali uti possumus. I. Quando in nostra vulgata videtur esse librariorum error, ad textum originalem confugiendum est.

II. Quando lectio variat, praeferenda, quae textui originali est congruentior.

III. Cum verba ambiguum habent sensum, ex textu originali explicanda sunt.

IV. Cum vis, sive potestas, et proprietas vocabulorum quaeritur, ex originali textu repetenda est.

Ex quibus vides, quantum praebeat Theologo adiumentum linguarum originalium peritia.

## §. VI.

### *De Sacrae Scripturae versionibus*

*Adv.* I. Praecipuae Scripturarum versiones sunt Graeca, Syriaca, Arabica, Chaldaica, Latina.

II. Graeca versio multiplex est. 1. vetustissima nonnullorum veteris Testamenti librorum ante *Alexandri M.* tempora, cujus meminit *Clemens Alexandrinus Lib. I. Strom.* 2. celebrior Septuaginta Interpretum, qui (ut veteres omnes tradidere Patres) rogante *Ptolemaeo Philadelpho Aegypti Rege*, ab *Eleazaro Summo Iudaeorum Pontifice* missi sunt *Alexandriam*; ibique non solum *Pentateuchum*, ut ex *Iosepho* in *Proem. Antiquit.* aliisque veteribus apud *Hieronymum* in *Quaest. Hebraic. et al.* opinatur *Scaliger*, aliique recentiores Critici; sed totum vetus Testamentum ex Hebraeo in Graecum transtulerunt. Scribunt autem *Justinus*, *Irenaeus*, aliique, eos interpretes in cellulis septuaginta duabus inclusos, singulos versionem suam adornasse; deinde vero colla-

tas omnium versiones tam mire consensisse, quasi uno dictante conscriptae essent. Ex quo inferunt, eos divino Spiritu fuisse illustratos, ac motos. Sed probabilius est, eos in unam Basilicam convenientes secum contulisse, ut ait *Hieronymus Praefat. in Pentateuchum*, id probans testimonio *Aristeae* (a), qui negotio interfuit, et *Josephi Lib. XII. Antiq. Cap. 2. (b) 3. Aquilae* Judaei sub *Adriano* circa annum Christi CXXX. 4. *Symmachi* Samaritani, qui ex Judaeo Christianus in haeresim Ebionitarum incidit, scripsitque imperante *Commodo*. 5. *Theodotionis*, primum haeretici Marcionitae, deinde Judaei sub *Antonino Caracalla*, cujus versionis supersunt duo postrema capita libri *Danielis*, et pars etiam Cap. tertii, quae, quia decrant in aliis versionibus, ex *Theodotione* sumpta sunt. 6. *Hiericuntina*. 7. *Nicopolitana*, quarum prior in urbe *Hierico*, altera *Nicopoli* reperiata est. 8. *Luciani* Presbyteri, et martyris 9. ipsius *Origenis*, qui versionem LXX. ita emendavit, additis quibusdam ex *Theodotione*, ut nova versio videretur; 10. denique *Hesychii*, qui eandem versionem LXX iterum emendavit.

III. Syriaca, et Arabica versio in Ecclesiis Syrorum, atque Arabum fuit in usu. Chaldaica vero, non versio, sed paraphrasis est a tribus Rabbiniis saec. V. exarata, et licet aliquando utilis sit ad sensum intelligendum, et revincendos Judaeos; non semper tamen sententiam textus originalis tenet, nec a Rabbiorum fabulis est immunis.

## IV.

(a) Libellus, qui sub nomine *Aristeae* circumfertur, multis est refertus fabulis, et supposititiis habetur a Criticis.

(b) Recentiores quidam Critici non solum cellularum circumstantiam, sed totam historiam versionis LXX contra consensum veterum auctoritatem vel negant, vel revocant in dubium. Eorum varia opinamenta vide apud *Galmet Dissert. De vers. LXX.* et *Natalem Alex. Dissert. VIII. in VI. Mundi act.* Vide etiam *Prideaux Historie des Juifs Tom. III. Monfauconium Praefat. in Hexapl.*

IV. Inter innumeras Latinas versiones duae fuerunt celeberrimae, Italica, quae ante *Hieronymi* aetatem in usu Ecclesiae Latinae fuit, ideoque tunc vulgata dicebatur, quamque *Augustinus Lib. II de Doct. Christ. cap. 15.* ceteris antepōnit, licet non ex Hebraeo, sed ex Graeco textu translata esset (a), et *Vulgata* nostra, quae ab ipso *Hieronymo* adornata est ex textu originali, excepto Novo Testamento, quod tantum corripuit, ut ipse testatur *Lib. de Scriptor. Eccles.* necnon Libris quibusdam *Deuterocanonicis* Veteris Testamenti, quos in latinum non transtulit, nempe Libris Sapientiae, Ecclesiastici, Machabaeorum, Baruch cum Epistola Hieremiae, et Psalmis, quorum Hieronymiana versio recepta non est in *Vulgata*, quia fideles in Psalmis canendis jam veteri, et communi versioni assueverant, quam ex *Origenis*, et *Luciani* Graeca interpretatione translata, ipse *Hieronymus* emendavit; ut testatur *Epist. ad Suniam*, et *Fretell.* Haec hodie utimur in Latina Ecclesia.

V. *Origenes* primum edidit Biblia Tetrapla ex quatuor versionibus in quatuor columnas dispositis, scilicet *LXX*, *Aquila*, *Symmach*, et *Theodotionis*. Deinde addidit columnas duas, quae exhibebant Hebraicum textum Hebraicis, et Graecis characteribus descriptum; unde dicta sunt Hexapla. Tandem, adjectis etiam duabus columnis, quae versionem Hieronymianam, et Nicopolitanam exhibebant, Biblia dedit Octapla. Hoc opus immensi laboris, et apud veteres celeberrimum, temporis injuria pessime publico intercidit (b). Recentiores varia ediderunt Biblia

K

Poa

(a) Supersunt veteris Italicae versionis fragmenta a Patriarchis citata, quae summo studio collegit *Flaminius Nobilius*, digressitque in ordinem, ut Italicae versionem restitueret. Supersunt etiam ex veteri Psalterio Romano Introitus Missarum, Offertoria, et Invitatorium ad Matutinum, quae Ecclesia nunquam perdidit.

(b) Vide *Huesium* in *Origentanis Lib. HI. Cap. 27.* Quae autem supersunt tantae jacturae fragmenta summo labore, ac studio post *Flaminium Nobilium*, et *Jesum* Dr.

Polyglotta; inter quae copiosissima sunt Polyglotta  
*Briani Waltonis.*

VI. *Authentica* dicitur versio, quae ab Ecclesia probata est, nullumque continet errorem in rebus Fidei, et morum, esto in nonnullis levioribus emendari possit, idque exemplo Jurisconsultorum, qui authenticam dicunt Scripturam, quae in publicis judiciis fidem facit. Quaeritur ergo, quatenus ex tot versionibus authentica dici possit.

## PROPOSITIO I.

*Versio LXX. fuit olim, et est modo authentica. Est contra Bellarminum Lib. II. De Verbo Dei Cap. 6.*

*Prob. 1. pars.* Apostoli, Patres, et universa Ecclesia Graeca per quinque priora saecula ea versione usa est tum in fidelibus edecendis, tum in revincendis haereticis vel in privatis Scriptis, vel in Conciliis. Ergo tunc versio illa authentica fuit. Hinc *Augustinus Lib. II. de doct. Christ. cap. 15. Septuaginta Interpretum quod ad vetus Testamentum attinet, excellit auctoritas.*

*Prob. 2. pars. 1°. Fieri non potuit, ut versio illa, quae per quinque saecula in universa Ecclesia obtinuit, et cujus tot millia extabant exemplaria, in rebus gravibus ita corrumperetur, ut nemo errorem agnosceret, et corrigeret. 2°. Ecclesia Graeca non solum schismatica, verum etiam catholica eadem Versione hodie utitur, nec umquam Latini Graecis obicerunt, quod authenticas Scripturas non haberent. 3°. *Sixtus V.* Versionem LXX, editam Romae anno 1582. ex vetusto Codice Bibliot. Vaticanae, auctoritate sua probavit, vetuitque, ne quis in posterum auderet eam immutare. Ergo.*

*Objic. cont. 1. part. Hieronymus saepe carpit LXX.*  
 In-

---

*Drusium collegit Menisfaucius, ediditque Parisiis anno MDCCXIV,*



Interpretes. Docet enim, eos 1°. quaedam testimonia omisisse, ut illa; *Ex Aegypto vocavi filium meum. Quoniam Nazaraeus vocabitur. Videbunt in quem transfixerunt etc.*; 2°. quaedam aliter transtulisse, sicut ea, quae favent mysterio SS. Trinitatis, ut *arcanum fidei non vulgarent*; 3°. nonnulla adlidisse; 4°. in aliis extenuasse sensum, et subvertisse fortissima testimonia contra Judaeos. Ergo.

¶ *Dist. ant.* in rebus levioribus, *conc.* in rebus gravioribus Fidei, et morum, *neg.* Quae enim a LXX. interpretibus mutata, aut addita, aut omissa notat Hieronymus, non ita corrupta esse docet, ut aliquid contineant fidei, et bonis moribus contrarium, licet utilius putet, ea corrigi juxta Hebraeos fontes.

*Objic. cont. 2. part. Hieronymus Praefat. in Lib. Paralip.* ait: Si LXX. Interpretum pura, et ut ab eis in Graecum versa est, editio permaneret, superflue me, Chromati Episcoporum Sanctissime, atque doctissime, impelleres, ut Hebraea tibi volumina latino sermone transferrem. His adde, quod Justinus in Dialogo cum Tryph. alique Patres passim queruntur, Judaeos versionem hanc corrupisse. Ergo si a tempore Hieronymi ea versio erat corrupta, a fortiori hodie post tot saecula.

¶ *Dist. cons.* Erat corrupta, et est modo in rebus levioribus, quae fidem, et mores non tangunt, *conc.* Sequi, *neg.* Numquam dixit Hieronymus, Ecclesiam universam ad suam usque aetatem usam esse Scripturam in rebus fidei, et morum vitiatam. Nec Justinus, alive Patres asserunt, Judaeos exemplaria omnia violasse, quod tentare non poterant in his Codicibus, qui in Ecclesia catholica religiose servabantur.

*Objic. II. Philo, et Aristaeas* docent, mirificam fuisse inter textum Hebraicum, et versionem LXX consonantiam. At haec versio, qualis nunc est, ab Hebræo valde discrepat, quod non solum observat Hieronymus in *Epist. ad Suniam*, et alibi passim, sed etiam cuilibet legenti patet. Ergo.

¶ *Dist. min.* In levioribus, *conc.* in gravioribus, *neg.* Ita etiam Vulgata nostra authentica est, licet nonnulli in ea sint naevi.

*Syriaca, et Arabica versio utilis est ad quorundam locorum sensum melius explicandum.*

*Prob.* Cum enim eae versiones in usu Ecclesiae Syrorum, atque Arabum fuerint, juvat scire quomodo quaedam loca explicaverint, cum praesertim de Syriaca haec habeat *Basilius Homil. II. in Hexameron*: Syrorum vox significantior, et evidentior, et ob affinitatem, quam habet cum Hebraica lingua, sententias Scripturarum propius attingit. Ea usi sunt S. Ephrem, alique Ecclesiae Doctores Syri. Ergo etc.

## PROPOSITIO III.

*Vulgata latina versio authentica est.*

Concilium Tridentinum id definiuit celebri decreto Sessionis IV. *Sacrosancta Synodus considerans, non parum utilitatis accedere posse Ecclesiae Dei, si ex omnibus Latinis editionibus, quae circumferuntur sacrorum librorum, quaeenam pro authentica habenda sit, innotescat, statuit, et declarat, ut haec ipsa vetus, et vulgata editio, quae longo tot saeculorum usu in ipsa Ecclesia probata est, in publicis lectionibus, disputationibus, praedicationibus, et expositionibus pro authentica habeatur, et ut nemo illam rejicere quovis praetextu audeat, vel praesumat.*

*Probatur I.* Versio authentica non eo sensu dicitur a Tridentino, quod praeferenda sit Hebraicis, Graecisque fontibus, ut falso calumniatur *Calvinus in Antidoto Sess. IV.* sed quod nihil habeat fidei, bonisque moribus adversum, et in rebus praecipuis a primario Scripturae sensu non discrepet, licet in levioribus emendari possit. Ita sensum Tridentini explicant *Andreas Vega*, qui Concilio interfuit *Lib. XV. Cap. 9.* *Bellarminus Lib. II. de Verb. Dei cap. 10, et 11.* *Sixtus Senensis Lib. VIII. Biblioth.* Atqui talis est versio Vulgata latina. Universa enim occidentalis Ecclesia per tot saecula hac una versione usa fuerat.

foerat. Siquidem ab aetate *Hieronymi* statim receperat novi Testamenti editionem, quam ille correxerat jussu Damasi: vetus vero Testamentum jam a septimo saeculo secundum hanc vulgatam versionem, quae ipsius *Hieronymi* est, in tota Ecclesia occidentali legi coepit. Si ergo haec versio authentica non esset, jam Ecclesia catholica per tot saecula veris caruisset Scripturis, et in rebus fidei, et morum errorem pro veritate recepisset. At id absurdum esse patet tum ex iis, quae libro superiore diximus, tum ex iis, quae infra dicturi sumus de Ecclesiae infallibilitate. Ergo.

*Prob. II.* Sicut agnoscendus est iudex aliquis supremus, qui libros scripturarum gentinos secernat a spuriis, ceterasque fidei controversias finiat; ita pariter idem iudex debet genuinam, et authenticam Scripturarum versionem definiere. Utrumque enim paris momenti est. At Ecclesiam esse supremum illum iudicem ostendemus inferius. Ergo.

*Prob. III.* Nemo unquam tantam jactare poterit Hebraicae linguae peritiam, quantam habuit *Hieronymus*, qui sub quinque Hebraeis Praeceptoribus eam didicit, et codices Hebraeos habuit meliores. Jure ergo ejus interpretatio ceteris antelata est. Licet enim nonnulli principio, vetustatis amantiores, *Hieronymo* obloquerentur, tamen paulatim versionis ejus perspicuitatem, et fidelitatem mirati, eam summo consensu omnes receperunt, quia haec nova translatio inquit Gregorius *M. Lib. XX. Moral. Cap. 24 ex Hebraeo nobis, Arabicoque eloquio cuncta verius transtulisse, perhibetur.* Atqui vulgata nostra ipsissima est *Hieronymi* versio, exceptis paucis, quae supra dicta sunt, ut patet non solum ex praefationibus unicuique Libro praefixis, verum etiam ex eo quod quidquid in Commentariis *Hieronymus* scribit, aliquo modo ex Hebraeo transferendum vel supplendum, ita habetur in vulgata; nec ullus fugi potest alius ejus auctor, praeter *Hieronymum*. Ergo ex ipsa auctoris eruditione Vulgata nostra versio merito palmam ceteris praeripuit. Quod et confirmatur ex eo, quod per duo amplius saecula novatores, contra eam ver-

sionem disputantes, nullum adhuc invenire potuerunt naevum, quo in rebus gravioribus ab originali textu discordet, imo ipsi Protestantes, in hac parte ceteris aequiores, Vulgatae excellentiam fateri tandem coacti sunt, ut *Grotius*, *Casaubonus*, *Ludovicus de Dieu*, *Fagius*, et ipse *Beza* linguarum orientalium periti. Ergo etc. (a).

### Solvuntur Objectiones.

*Obje.* Declarare Versionem vulgatam authenticam est retundere diligentiam studiosorum, ne textum originale unquam consulant. Hoc autem perniciosum est. Sicut enim *Hieronymus* utile esse credidit post veteres versiones Latinas novam ex textu Hebraico adornare; ita etiam utile erit, et licebit Recentioribus adornare novas; *Hieronymus* enim non erat in interpretando falli nescius, sive infallibilis, ut ei obijcit ipse *Augustinus* *Epist. LXXI. al. X.* Unde etiam, inquit, nobis videtur, te quoque in nonnullis falli potuisse. Ergo.

¶ *1. Neg. maj.* Numquam enim Tridentini Patres vulgatam versionem textui originali praetulcrunt, aut Hebraicos, Graecosque fontes prohibuerunt attingere, ut docent illi ipsi, qui Concilio interfuerunt, *Salmero Prolog. 3.* *Vega Lib. XV. Cap. 9.* quique post Tridentinum scripserunt *Pallavicinus*, *Bellarminus* etc. Imo etiam post Tridentinum locum habent regulae, quas §. II. in corollaris tradidimus, ut patet ex Catholicorum Interpretum consensione, qui, Ecclesia probante, ac laudante saepe ad Hebraicos, Graecosque fontes confugiunt in Scripturis interpretandis.

¶ *2. Neg. min.* Inutile enim, imo et noxium esset novas quotidie versiones prodire; inter quas unusquisque fluctuaret incertus. *Hieronymus* quidem falli  
ali-

---

(a) Vide quae pro Vulgata copiose scribunt *Andreas Vega Lib. XV. in Conc. Trid. Cap. 9.* *Driedo Lib. II. de Eccles. dogm. Cap. 1.* *Coccus* *Apolog. pro Conc. Trid. p. 1.* *Lindanus*, *Sixtus Senensis*, *Melchior Canus*, *Bellarminus* etc.

aliquando potuit; sed Ecclesia declarando ejus versionem authenticam, declaravit etiam, eum actu non fuisse deceptum in rebus gravioribus.

*Inst. 1<sup>a</sup>.* Posito Tridentini decreto, nemo potest vulgatam editionem rejicere, cum contra liceat rejicere textum Hebraicum ubi mendosus est. Ergo Concilium versionem textui originali praeferendam decrevit.

*¶. Dist. ant. quoad 1<sup>m</sup>. part.* Nemo potest Vulgatam rejicere universam, *conc.* In nonnullis partibus, in quibus mendosa est, *neg.* Ipsi enim Pontifices Sixtus V. et Clemens VIII. Vulgatae emendandae operam navarunt, testatique sunt qui ei operi insudarunt, ac non pauca emendanda reliquisse.

*Inst. 2<sup>a</sup>.* Si in una particula concedatur esse mendosa versio, in omnibus ejus nata auctoritas; de singulis enim ejus sententiis dubitari poterit. Ergo etc.

*¶. Neg. ant.* Non enim de universis Platonis, Ciceronis, Livii, operibus dubitamus, licet plurima in ipsis mendosa esse constet; non enim leviter, ac temere, sed gravissimis rationibus emendatio fieri debet; quae rationes ubi desunt, rejici textus non potest, sive Hebraicus, sive Vulgatus.

#### PROPOSITIO IV.

*Merito Concilium Tridentinum proscripsit versiones Scripturae ab haereticis editas lingua vernacula: imo etiam merito prohibuit, ne versiones catholicorum vernaculae passim, et sine discrimine legantur ab omnibus.*

*Prob. 1. pars.* Haeretici eo consilio multas Scripturae versiones lingua vernacula adornaverant, ut erroris sui veneno fideles facilius inficerent. Merito ergo Ecclesia eas proscripsit.

*Prob. 2. pars.* verbis regulae IV. Indidis editi jussu Concilii Tridentini, quae regula aequitate sua se probat: *Cum experimento manifestum sit, si Sacra Biblia vulgari lingua passim sine discrimine permittantur, plus inde ob hominum temeritatem, detrimenti, quam*

utilitatis oriri; hac in parte iudicio Episcopi, aut Inquisitoris stetur; ut cum consilio Parochi, aut confessorii, Bibliorum a catholicis auctoribus versorum lectionem in vulgari lingua eis concedere possint, quos intellexerint ex huiusmodi lectione non damnum, sed fidem, atque pietatis argumentum capere posse. Nimirum cum nonnullis ob infirmitatem, imperitiam, aliasve causas offundicula esse possint quaedam historiae, vel sententiae Scripturarum, statuit Ecclesia, ut ii Scripturas vulgari lingua legant, qui non damnum, sed utilitatem inde possint percipere. Quod autem sequitur in ea regula: *quam facultatem in scriptis habent.* Qui autem absque ea facultate ea legere, vel habere praesumpserit, nisi prius Bibliis Ordinario redditis, peccatorum absolutionem percipere non possit, id non ubique usu receptum est: alicubi etiam in consuetudinem abiit.

Ceterum Sacra Concilii Congregatio die 13. Junii anno 1757. declaravit, idq. etiam confirmavit Benedictus XIV. non comprehendendi ea regula versiones a catholicis factas, notisque illustratas ex Patrum Commentariis, et ab Ecclesia probatas, qualis est versio Italica Martini, quae omnium optima videtur.

### *Objecta diluuntur.*

*Obje. I.* Libri Scripturarum a Sacris auctoribus scripti sunt lingua, quae erat vulgaris apud eos populos, quibus credita sunt eloquia Dei. Deinde vero cum aliae Nationes ad Ecclesiam venerunt, sacra Biblia in earum linguam translata sunt ex. gr. in Graecam, Latinam, Syriacam, Arabicam etc. Ergo.

*¶. Dist. ant.* In aedificationem, transeat. In destructionem, neg. Hoc est, licet in lingua vulgari scripti sint, vel translati Libri sacri, semper tamen ipsa naturali lege cautum est, ut si qui ex alicujus libri sacri lectione detrimentum capere possent, ab ea abstererent; nec aliud praecepit Ecclesia Romana. Dixi transeat, quia non omnino verum est, Sacram Scripturam cito in vernaculam linguam ejus-

sumque Nationis fuisse translata. Nam post captivitatem Babylonicam, licet Judaci Hebraicam linguam obliiti Chaldaice, vel Syriace loquerentur, tamen Hebraicus textus religiose retentus est: Paulus ad Romanos scripsit Graece: et licet viventibus adhuc Apostolis per universum orbem fundatae sint Ecclesiae, non ideo tamen cito in vulgarem cujusque Gentis linguam translate sunt Scripturae.

*Objic. II.* Chrysostomus *Homil. IX. epist. ad Coloss.* Audite, inquit, obsecro saeculares omnes; comparate vobis Biblia, animae pharmaca. Si nihil aliud vultis, vel Novum Testamentum acquirite. Imo ipse Christus *Joan. V. 39.* Judaeis ait: Scrutamini Scripturas. Ergo Scripturae ab omnibus etiam saecularibus, et mulieribus passim legendae sunt, ac proinde vulgari lingua.

*R. Neg. cons.* Chrysostomus enim, aliique Patres, qui generatim hortantur fideles, ut legant Scripturas, intelligendi commode sunt de iis, qui nullum inde detrimentum ob suam ipsorum infirmitatem possunt accipere. Verba autem Christi *scrutamini Scripturas* ad rem nostram non faciunt; nam vel intelliguntur modo indicandi, ut putat *Cyrillus*, vel modo imperandi, ut *Chrysostomus*, et *Augustinus*: manifestum est, ea dirigi ad viros in lege cruditos; Scriptura enim translata non erat in linguam Judaeorum vernaculam, quae utique erat Syriaca; atque idcirco legisperiti utebantur vel ipso originali rextu Hebraico, vel ad summum Graeco ex versione LXX.

*Objic. III.* Saltem negari non debet, in Sacrificio Missae, in administratione Sacramentorum, et publicis precibus Scripturam legendam esse lingua vulgari. Apostolus enim *I. Cor. XIV. 16.* hortatur fideles, qui dono linguarum praecellebant, ne convenientes in Ecclesiam uterentur lingua auditoribus ignota, alioquin *qui supplet*, inquit, locum idiotae, quomodo dicet amen super tuam benedictionem, quoniam quid dicas nescit? Male ergo Concilium Tridentinum *Sess. XXII. de Ref. cap. 8. et can. 9.* cavit, ne Missa vulgari lingua celebraretur,

*R. Neg. ant.* Periculum enim erroris, quod ex pri-

privata Scripturarum lectione timeri poterat idiotis, et infirmis, multo magis imminet ex publica lectione Scripturae vulgari idiomate in publicis Ecclesiae precibus, et sacrificiis; in quibus illud etiam incommodum accedit, quod si in tot linguas transferenda esset liturgia, quot sunt Christianae gentes, vitari non posset in tot versionibus aliqua mutatio sensus, quae semper maxime momenti esset in re tam gravi. Apostolus autem de Scriptura, aut divinis Officiis non loquitur, ut legenti patet; sed si per vim trahere velis ejus verba ad rem praesentem, observandum est, Apostolum ibidem permittere, ut quis in Ecclesia ignotis linguis loquatur, si sit qui interpretetur. *Sive lingua quis loquitur, secundum duos, aut ut multum tres, et per partes, et unus interpretetur.* Concilium autem Trid. licet vetet divina officia vulgari lingua celebrari, monet tamen pastores, ut interpretentur, et explicent populo vulgari lingua quae ad eorum instructionem faciunt. Quod si negligunt, ipsorum culpa est. V. Bellarm. Lib. II. de Verb. Dei Cap. 15. etc.

*Inst.* absurdum est, ut qui Deum orat, nesciat quid dicat. Atqui multi ad divina officia recitanda obligantur, ut Religiosae mulieres, qui latine nesciunt. Unde Apostolus *loc. cit. v. 14. si orem; inquit, lingua, scilicet ignota, spiritus meus orat; mens autem mea sine fructu est.* Ergo.

*¶ Dist. ant.* Si non habeat mentem ad Deum elevatam, cumque laudare, et orare non intendat per verba, quae profert in sensu matris Ecclesiae, cujus gerit personam qui divina officia persolvit *conc.* De talibus enim dicit Dominus *Isaiae XXIX. 13. Populus hic labiis suis glorificat me, cor autem ejus longe est a me.* Secus, nego: alioquin multi etiam latine docti abstinere deberent a recitandis Psalmis, in quibus multa obscura sunt nec passim ab omnibus intelliguntur; et eadem inhaeret obscuritas, licet in vulgarem linguam transferrentur. Iudaei etiam sacrificia, et caeremonias legales abjicere debuissent, quorum sensum ignorabant. Ceterum cum sint versiones psalmorum ab Ecclesia probatae, potest quis



privatim eas legere, ut in publicis precibus, quantum fieri potest, quod dicit intelligat. Apostolus quidem ait, eum, qui preces non intelligit, habere mentem vacuum peculiari illo fructu, qui percipitur ex sensu verborum; sed non illo, qui fluit ex elevatione mentis ad Deum, quae praecipua pars orationis est; imo fieri potest, ut qui majori intentione ad Deum elevatus est, majorem hinc percipiat fructum, licet verba non capiat, quam qui verba intelligens, minus est ad Deum intentus. Vide, S. Thomam, et Estium in Commentariis. Vide etiam de toto hoc argumento Bellarminum Lib. II. de Verbo Dei Cap. 25. et 16. (a).

## §. VII.

### De multiplici Scripturae sensu.

*Adv. I.* Sensus Scripturae generatim triplex est, *Naturalis*, *mysticus*, et *accomodatitius*. Litteralis est, quem verba sive proprie, sive metaphorice intellecta *quædam* immediate exprimunt. Mysticus vero, seu spiritualis, quem significant ipsae res per verba expressae. Sic quod legitur in Genesi, *Abraham* duos habuisse filios, unum de ancilla, alterum de libera, ad litteram quidem significat, hominem illum revera duos illos filios genuisse; at Apostolus per duos filios intelligit duo Testamenta, Vetus, et Novum, illud in servitutem, hoc in libertatem filios generans. *Ad Galat. IV.*

II.

---

(a) Vide etiam omnino *Bibliothecam Sacram D. Calmet*, quae praemissa est ejus *Dictionario Historico S. Scripturae*, in qua de variis editionibus, et versionibus Scripturarum eruditissime, et copiosissime disserit. *Jacobus Le Long* editit *Bibliothecam Sacram*, sive Syllabum omnium Scripturae Sacrae editionum, ac versionum. *Richardus Simon* in *Hist. Crit. Textus N. T. Cap. 29.* varios recenset manuscriptos Codices novi Testamenti, qui hucusque servati sunt. Idem prestat in *Hist. Crit. Vet. Test. Joannes Millius* in *Prolegomenis N. T.* variantes lectiones, summo studio collegit, et de statu ipsius textus fusc agit.

II. *Mysticus* autem sensus triplex est, *Tropologicus*, qui pertinet ad mores informandos, *allegoricus*, qui est de rebus in Ecclesia militante credendis, *anagogicus* de sperandis in patria. Unde illud.

*Littera gesta docet, quid credas allegoria;  
Moralis quid agas, quo tendas anagogia.*

Sic ergo vox illa *Jerusalem* ad litteram designat urbem Judaeorum metropolim, *allegorice* Ecclesiam, *tropologice* animam hominis, *anagogice* caelestem beatitudinem patriam.

III. *Accommodatitius* sensus est, quem nec verba, nec res per verba significatae, indicant, sed per quamdam similitudinem ad aliud significandum aptatur. Sic quod *Eccl. XLIV.* dicitur de *Abraham*; non est inventus similis illi; Ecclesia Sanctis pontificibus applicat. Imo etiam ipsa scriptura aliquando sensu accommodatitio utitur ut ex gr. *Joannes* in Apocalypsi *Cap. XI.* aptat *Enoch* et *Eliae* quae dicuntur *Zach. IV.* de *Jesu*, et *Zorobabele*; hi sunt duae olivae. Duo autem hac in re cavenda sunt: 1°. ne putemus, Scripturam sensu accommodatitio uti, cum citat Prophetias veteris Testamenti tanquam impletas in novo, qua in re deceptus est *Grotius* in *Cap. VII Matt. v. 22.* merito notatus ab *Huetio*, et *Bossueto*; 2°. ne Scripturae verba aptentur ad res falsas, vel etiam profanas, aut scurriles, quod severe vetat Concilium Tridentinum *Sess. IV.* Sancta enim sancte tractanda sunt, nec nisi ad pietatem, et religionem fovendam usurpari debent.

IV. Licet non semper Scriptura sub una sententia plures sensus habeat, nam ut observat *Augustinus Quaest. II. in Genes.* quibusdam in locis solus sensus literalis quaerendus est; negari tamen non potest, quin saepe sub eadem sententia praeter sensum litteralem mysticus etiam lateat. Hinc *Chrysostomus Homil. XXXVII. in Genesim.* In una, inquit, dictione plurima saepe multitudo sensuum invenitur; divina enim sunt eloquia, non humana. Idque non solum millies jasiuant Patres, verum etiam ipsa Scriptura, ut pa-

patet ex Apostolo citato loco Epistolae ad Galatas. Imo aliquando ejusdem sententiae duplex est sensus, uterque *litteralis*. Sic quod de agno Paschali dicitur *Exod. XII. 46. Os non comminuetis ex eo, Joannes Cap. XIX. 36.* ad litteram explicat de Christo. Ceterum nullus est Scripturae locus, qui nullum omnino habeat sensum *litteralem*, qui sensus, ut advertit Calmet *Præfat. in Lib. V. Test.* est aliorum sensuum basis, et fundamentum; meritoque *Cajetanus* reprehenditur, qui contra omnium Patrum sententiam apud *Petavium Lib. II. De opif. Cap. 8.* putat, formationem *Hevae, Gen. 11. 21.* intelligendam esse in sensu *allegorico*, excluso *litterali*. His ergo explicatis, dicimus.

# PROPOSITIO.

*Ex solo Scripturarum, sensu litterali argumenta Theologica duci possunt, non ex mystico: nisi forte sensus mysticus Scripturae, aut Traditionis auctoritate nitatur.*

*Prob. 1. pars.* Sensus mysticus, qui Scriptura, aut Traditione non nititur, est sensus ab homine excogitatus; sed theologus non ab humanae sapientiae inventis, sed a sola divina revelatione argumentari debet: Ergo. Hinc *Hieronymus in Cap. XIII. Matth.* Numquam parabolae, et dubia aenigmatum intelligentia potest ad auctoritatem dogmatum proficere. Et *Augustinus Epist. XCIII. al XLVIII. c. 8.* Quis autem non impudentissime nitatur aliquid in allegoria positum pro se interpretari, nisi habeat et manifesta testimonia, quorum lumine illustrentur obscura.

*Prob. 2. pars.* Cum Scriptura, aut traditio locum aliquem mystico sensu interpretantur, tunc non ex hominum excogitationibus, sed ex ipsa revelatione firmissimum habemus argumentum, sensum illum a Spiritu Sancto fuisse significatum. Ita ex verbis illis *Deuter. XXV. non alligabis os bovi trituranti, recte concludimus, deberi stipendia ministris Evangelicis,*

licis, quia Apostolus I. Cor. IX. 9. verba illa in hoc sensu mystico exponit.

### §. VIII.

*Sensus Scripturae non est ubique clarus, etiam in rebus ad salutem necessariis.*

*Ado. I.* Inter varios Scripturae sensus eruendus est verus, ut argumenta inde peti possint. *Lutherus* autem in Praefatione Assertionis articulorum a *Leone X.* damnatorum, *Brentius*, *Kemnitius*, alique passim Protestantes contendunt, Scripturae sensum esse ubique clarissimum, nec ullo interprete, aut iudice indigere. Sed aliquando idem *Lutherus* experientia victus fatetur, Praefatione in *Psalmos*, esse impudentissimae temeritatis eum, qui audeat profiteri, unum Scripturae librum a se in omnibus partibus intellectum. Nec abnuunt alii Novatores, aliqua esse Scripturae loca obscura. Quod cum priori assertionem tribus modis conciliant: 1°. Scripturam esse ubique claram fidelibus, sed alicubi obscuram infidelibus: 2°. Scripturam esse claram, quia loca quaedam obscura per alia loca clariora explicantur: 3°. Esse ubique claram in rebus ad salutem necessariis, licet in aliis aliquando sit obscurior, ut in descriptione Templi apud *Ezechielem*, in Prophetia *Apocalypsis* etc. Contra hos catholici sentiunt.

### PROPOSITIO I.

*Scripturae sensus est alicubi obscurus.*

*Prob. I.* ex ipsa Scriptura. *Petrus Epist. II. Cap. 3.* de Epistolis *Pauli* ait. In quibus sunt quaedam difficultates intellectu, quae indocti, et instabiles depravant, sicut et ceteras Scripturas. *Christus Luc. XXIV.* Apostolis Scripturas interpretabatur, quod fuisset inutile, si ubique clarae essent. *Eunuchus Act. VII.* interrogatus a *Philippo*, num intelligeret Scripturam, quam legebat, respondit: quomodo possum, si non aliquis

quis ostenderit mihi? Hinc David Deum orat, ut ei legis sensum aperiat: *Da mihi intellectum, et scrutabor legem tuam. Revela oculos meos, et considerabo mirabilia de lege tua etc. Ps. CXVIII.*

*Prob. II. ex Patribus, inter quos Gregorius Homil. XXII. in Ezechiel. Multa sunt, inquit, in Scripturis aperta, ut pascant parvulos, quaedam obscura, ut exerceant fortes. Et Augustinus Lib. LXXXIII. Quæst. Deus noster sic ad salutem animarum divinos libros Spiritu Sancto moderatus est, ut non solum manifestis pascere, sed etiam obscuris exercere nos vellet. Et in Lib. II. de doctr. Chris. cap. 6. docet, id divino consilio factum ad elidendam hominis superbiam. Adde Irenæum Lib. II. cap. 47. Origenem Lib. VII. contra Cels. Chrysostomum Homil. XL. in Joan. Ambrosium Epist. XLIV. ad Constantium, Hieronymum præf. in Comment. Epist. ad Ephes. et Epist. ad Paulin. et Algas. quosque. In his autem Scripturæ, et Patrum locis non solum dicitur, Scripturam esse obscuram hominibus infidelibus, et superbis, sed etiam fidelibus, et sanctis. Ergo.*

*Prob. III. ratione. Tanta est in Scripturis rerum sublimitas, absentia factorum, quæ narrantur, troporum, et figurarum multitudo, varietas sensuum, quos una, eademq. littera habere potest, etc. ut necessario quaedam nobis obscura esse debeant. Denique si Scriptura ubique clara est, cur ipsi Protestantes tot in eam edidere commentaria? cur inter ipsos tot agitantur lites de sensu multorum Scripturæ textuum, quas lites hucusque post annos fere trecentos componere non potuerunt? Ergo.*

## PROPOSITIO II.

*Scriptura etiam in rebus ad salutem necessariis obscura est nonnullis in locis, quæ per alia loca clariora explicari non possunt.*

*Prob. I. Quibusdam exemplis. 1°. Necessarium est ad salutem scire, quo sensu dixerit Christus Matth. V. 22. Omnis qui dimiserit uxorem suam, excepta fornicatione-*

nicationis causa, facit eam moechari, et qui dimissam duxerit, moechatur; inde enim Græci errant, putantes in causa adulterii matrimonium dissolvi. Si autem iis opponas; textum hunc explicari per alium Marci X. 11. in quo Christus absolute pronuntiat: *Quicumque dimiserit uxorem suam, et aliam duxerit, adulterium committit super eam*, reponent, potius locum Marci explicari per locum Matthæi; quod enim apud Marcum sine exceptione dicitur, apud Matthæum ostenditur intelligendum, excepta causa adulterii. Ergo locus hic obscurus de re maximi momenti per ipsam Scripturam explicari non potest. 2°. Obscurus est etiam locus Apostoli Ephes. V. 32. *Sacramentum hoc magnum est, ego autem dico in Christo, et in Ecclesia*. Obscurum enim est, nec ex aliis Scripturæ locis constat, utrum Apostolus magnum Sacramentum appellerit unionem Christi cum Ecclesia, an ipsum matrimonium, quod hujus unionis signum est; et tamen necessarium est ad salutem scire, utrum matrimonium dici possit magnum sacramentum. 3°. Quomodo per ipsam Scripturam explicabis quod ait idem Apostolus I. Cor. VII. 14. *Sanctificatus est vir infidelis per mulierem fidem, et sanctificata est mulier infidelis per virum fidem, alioquin filii vestri immundi essent, nunc autem sancti sunt?* Si enim Calvinistæ ex hoc loco contendunt, filios mulieris fidelis esse sanctos sine baptismo, sequeretur hinc etiam, virum infidem per mulierem fidem sine baptismo sanctificari; Apostolus enim de patre æque ac de filiis pronuntiat, eos esse sanctos per mulierem fidem. Mitto alia Scripturæ loca.

*Prob. II. ad hominem* eodem argumento, quo supra usi sumus. Si Scriptura in necessariis clara est, cur apud ipsos Protestantes de rebus maxime necessariis ex. gra. de numero Sacramentorum, de presentia reali Corporis Christi in Eucharistia, de justificatione etc. tam graves controversiæ sunt, quas lucusque per solam definire non valuerunt Scripturam, cum tamen omnes contendunt in his rebus Scripturam esse clarissimam? Ergo.

Objectiones diluuntur.

*Objic. I.* Ipsa Scriptura claram se esse docet, quod saltem de rebus necessariis intelligendum est. *Deuteron. XXX. 11.* Mandatum hoc, quod ego prae-  
cipio tibi hodie, non supra te est, neque procul posi-  
tum, nec in caelo situm, ut possis dicere; quis no-  
strum valet ad Caelum ascendere, ut deferat illud ad  
nos, et audiamus, et opere compleamus? Et *Psal. XVIII.* Praeceptum Domini lucidum illuminans oculo-  
s: et *Psal. CXVIII.* Lucerna pedibus meis verbum  
tuum, et lumen semitis meis Et *Proverb. VI. 23.*  
Mandatum lucerna est, et lex lux: quibus concinit  
*Petrus II. cap. I. 19.* Habemus firmitorem propheti-  
cum sermonem, cui benefacitis attendentes, tamquam  
lucernae lucenti in caliginoso loco. Ergo.

*■. Dist. ant.* Ipsa Scriptura docet, se esse claram  
in multis, conc. in omnibus, subdist. vel *αμεσως*,  
immediate, vel mediate, sive ope legitimi interpre-  
tis, conc. immediate semper, neg. Itaque fatemur,  
Scripturam multis in locis esse clarissimam, ut sapien-  
ter advertit, et probat *Bossuetus* in sua *Defensione*  
*Traditionis*, qualia sunt generalia praecepta decalogi,  
de quibus sermo est *Deuter XXX.*, et *Psal. XVIII.*  
et *CXVIII.* et *Prov. VI.* dicunturque etiam, non es-  
se supra nos quia divinae gratiae auxilio servari pos-  
sunt, ut post alios Patres (a) exponit *Augustinus*  
*Lib. de Perf. just.* Item prophetiae de Christo, de  
quibus loquitur *S. Petrus*. Sed id non obstat, quin  
sint etiam obscura quaedam, de quibus sermo est in  
eodem *Deuteron. Cap. XVIII. 8.* et in eodem *Psal. CXVIII.*  
et in eadem Epistola Petri locis supra lau-  
datis. Praeterea etiam in locis obscuris Scripturae  
dici possunt lux, lucerna, etc. non quia per se om-  
nibus clarae sunt, sed quia cum toti Ecclesiae, ut  
dice mus suo loco, earum sensus revelatus sit; qui-  
cumque fidelis ope legitimi hujus interpretis eas le-

L

ge-

(a) *Tertullian. Lib. IV. cont. Marcion.* *Origenes, Ambrosius, Chrysostomus etc. in Cap. 20. Epist. ad Rom.*

gerit, et intellexerit, lumen habebit lucidissimum, quo dirigatur ad vitam.

*Inst.* Si quae obscuritas apparet aliquibus Scripturae locis, ea oritur ex legentium infidelitate. Ait enim Apostolus II. Cor. IV. 3. *Quod si opertum est Evangelium nostrum, in iis, qui percunt, est opertum, in quibus Deus hujus saeculi excaecavit mentes infidelium.* Ergo ipsa per se Scriptura clara est in omnibus, sicut lumen solis clarissimum est, licet iis, qui oculos claudunt, non luceat.

*¶ Neg. ant.* Nomine enim *Evangelii* non intelligit Apostolus Sacram Scripturam, sed ipsam Christianam religionem, quae saepe *Evangelium* in novo Testamento dicitur, quod quidem non est opertum umbrarum, et figurarum velaminibus, ut Testamentum vetus. Si cui igitur non lucet veritas Christianae religionis post tot miracula, prophetias, aliaque *credibilitatis motiva*, id ex cordis sui duntie, et caecitate proficiscitur.

*Inst.* 2<sup>o</sup>. *Apoc. V. 8.* dicitur Agnus aperuisse librum, et solvisse signacula ejus. Ergo si quae erat antea in Scripturis obscuritas, evanuit.

*¶ Neg. cons.* Non enim eo sensu dicitur Agnus aperuisse librum, quod omnes Scripturarum sententias explicaverit, sed quia in ejus morte impleta sunt omnia vaticinia, quae sub umbris, et figuris obscure sacrificium Christi praesignificabant.

*Objic. II.* Chrysostomus Homil. III. de Lazaro ait, Philosophos locutos esse obscure: Apostoli vero, inquit, et Prophetae omnia contra fecerunt, manifesta, claraque, quae prodiderunt, exposuerunt nobis, veluti communis orbis doctores, ut per se quisque discere possit ea, quae dicuntur ex sola lectione. Idem repetit Homil. III. in II. ad Thessalon. et alibi Augustinus Lib. II. de doct. Christ. c. 9. In iis, quae aperte posita sunt in Scripturis, inveniuntur ea omnia, quae continent fidem, moresque vivendi; fidem scilicet, spem, et charitatem. Et Lib. II. de peccator. merit. docet, modum, quo traducitur peccatum originale ideo non esse in Scripturis clare expressum, quia ad salutem necessaria non erat ista notitia. *Hinc divinorum elo-*  
*quio-*



quorum clarissima auctoritas esset; si homo illud sine dispendio promissae salutis ignorare non posset. Et *Cyrillus Lib. VII. cont. Jul.* docet, ideo Scripturas simplici stilo fuisse compositas, ut cuiusvis perspectae forent. Ergo ex Patribus, saltem in rebus ad salutem necessariis, Scriptura clara est.

¶ *Neg. cons.* Ad 1m. *Chrysostomus* disputans contra eos, qui cum possent ex lectione Scripturae proficere, propter socordiam id negligebant, exaggerantes Scripturae obscuritatem, oratoris more eorum excutit torporem, amplificando Scripturae claritatem. Quae amplificatio falsa non est; potest enim aliquo sensu Scriptura dici clara, 1°. Quia plurimam habet clarissimam, ex quibus legentes proficiscere possunt; quod ad argumentum *Chrysostomi* sufficiebat: 2°. Quia clare docet quid sit agendum in locis obscuris, scilicet audiendam Ecclesiam; 3°. Quia fideles a Pastoribus edocti facile intelligunt ea ipsa loca, quorum sensus esset illis alioquin impervius. Ceterum *Chrysostomus* agnoscit in multis Scripturae obscuritatem non solum *Homil. XL. in Joan.*, verum etiam in hac ipsa *Homil. III. de Lazaro*. Ait enim ante verba in objectione posita: Quid igitur, si non intelligamus ea, quae continentur in libris? Maxime quidem, etiamsi non intelligas illic recondita, tamen ex ipsa lectione multa nascitur sanctimonia. Et infra: Sume librum in manum, lege historiam omnem, et quae nota sunt, memoria teneas, et quae obscura sunt, parumque manifesta, frequenter percurrere. Quod si non poteris assiduitate lectionis invenire quod dicitur, accede ad sapientiolem, vade ad doctorem.

Ad 2m. Agnoscit ibi *Augustinus*, esse loca in Scripturis obscura. Docet tamen, in iis, quae clare sunt posita, inveniri ea omnia, quae necessaria sunt, tum quia inveniuntur clara, et aperta generalia praecepta fidei, spei, et charitatis, tum quia in iis, quae clare posita sunt, invenitur confugiendum ad Ecclesiam in locis obscuris. Unde distingui potest: inveniuntur omnia quae necessaria sunt, quoad generalia praecepta fidei, et morum, conc. quoad omnia omnino necessaria, subdist. vel immediate,

vel *mediate*, ope scilicet legitimi interpretis, *consequenter immediate* semper *neg.* Pari ratione explicari potest *Cyrillus*.

*Ad 3m.* Agit *Augustinus* de quaestione obscurissima, quomodo scilicet peccatum originale traducatur, Cum ergo de ea re sileat omnino traditio, et Ecclesia, recte docet *Augustinus*, eam in Scripturis fuisse clarissime reperiendam, si esset scitu necessaria ad salutem. Addi potest, *Augustinum* nomine divinorum eloquiorum non solas intelligere Scripturas, sed quidquid a Deo revelatum ab Ecclesia proponitur.

*Objic. III.* Merito reprehenditur in homine sermonis obscuritas. Ergo multo minus tribuenda est Deo in Scripturis ad homines loquenti de rebus ad salutem necessariis.

*¶ Neg. cons. et parit.* Homo enim hominem alloquitur obscure, vel quia non potest, vel quia non vult melius animi sui sensa patefacere, quorum primum infirmitatis, alterum superbiae, vel calliditatis est. At Deus hominem alloquitur, non solum ut doceat, verum etiam ut a peccato sanet: cum ergo omnis peccati radix superbia sit, ita eloquia sua temperavit, ut claris depelleret ignorantiam, obscuris foveret humilitatem. Ceterum omnia clare aperuit Ecclesiae, quam quisque humiliter audiens, ita intelligit obscura, ut non effleratur in superbiam. Videtur *Augustinum Lib. II. de Doct. Christ. c. 6.*, et *Praefationem D. de Sacy. in Librum Eceli. Art. 1.*

#### Corollarium.

Cum ergo Scriptura multis in locis obscura sit, quae non possunt per alia loca clariora explicari, sequitur, quaerendum esse interpretem, qui sit a Scriptura distinctus, ut possit obscura sine erroris periculo explicare. Qui, autem explicare potest textus obscuros, a fortiori interpretari poterit claros, quos haeretici, malive catholici falsis interpretationibus obnubilare moliantur; non enim natae sunt haereses aliquando, inquit *Augustinus*, nisi, cum Scripturae

*rae bonae intelliguntur non bene, Tract. X. in Joan.* Confugiendum ergo est ad Traditionem, quam Capite superiori diximus esse alteram fidei regulam. Hinc *Vincentius Lirinensis Commonitor. Cap. XXXVIII.* Si, inquit, divinis eloquiis, sententiis, promissionibus et diabolis, et discipuli ejus utuntur . . . quid facient catholici omnes, et matris Ecclesiae filii? Quonam modo in Scripturis sanctis veritatem a falsitate discernent? Hoc scilicet facere magnopere curabunt, quod in principio commentarii istius sanctos, et doctos viros nobis tradidisse scripsimus, ut divinum Canonem secundum universalis Ecclesiae Traditiones, et juxta catholici dogmatis regulas interpretentur. Quam regulam a catholica Ecclesia omnibus saeculis servatam sanxit Concilium Tridentinum Sess. IV. Sed cum contingat aliquando, ipsam traditionem in aliquibus obscuram esse, profecto qui est legitimus Scripturarum interpres, erit et interpres traditionis, cum utramque sit verbum Dei. Hinc cum omnes controversiae fidei, et morum vel ex Scripturae, vel ex traditionis sensu oriri, et definiri possint; patet, legitimum, et infallibilem interpretem Scripturae, et Traditionis esse infallibilem judicem controversiarum omnium fidei, et morum. Quis sit ergo iste iudex inquirendum est.

§. IX.

*Privatus cujusque Spiritus non est legitimus, et infallibilis interpres Scripturae, et Traditionis.*

*Adv. I.* Jam aggredimur arcem Haereticorum omnium. Quicumque enim a rectae fidei regula aberraverunt, ii semetipsos constituerunt iudices veri sensus Scripturarum, et omnium controversiarum fidei.

*II.* At Lutherani, et Calvinistae hoc commune haereticorum omnium principium, novo quodam molimine veluti basim totius sui systematis posuerunt. Docent enim, quemlibet fidelem, praesertim praedestinatum, interius edoceri immediate a Spiritu S. ut de quacunque fidei controversia, judicet. Hinc quod-

quodcumque Ecclesiae iudicium superbe rejiciunt. *Ad unumquemque hominem privatum*, inquit *Brentius in Prolegom. cont. Petrum Soto, pertinet de doctrina religionis judicare; et vera a falsis internoscere*. Similia docent *Lutherus in Praefat. Assertion. artic. Calvinus Lib. IV. Instit. Cap. IX. §. 8. etc. Kemnitius in Exam. IV. Sess. Conc. Trid.* Hic igitur capitalis error, unde tot haeresum monstra prodierunt, radicitus extirpandus est.

### PROPOSITIO.

*Privatus cujusque Spiritus non est legitimus, et infallibilis interpres, et judex Scripturae, et Traditionis. Dogma fidei est.*

*Prob. I.* Fictitium esse privatum Spiritum, ipsa Scriptura clare docet; quae in controversiis fidei, et morum privatos non ad Spiritum privatum, seu ad revelationem immediate ipsis factam a Spiritu Sancto, sed ad alium externum, et visibilem iudicem mittit. *Deuteron. XVII. 8. Si difficile, et ambiguum apud te iudicium esse perspexeris inter causam, et causam.....surge, et ascende ad locum quem elegerit Dominus, veniesque ad Sacerdotes Levitici generis, et ad iudicem, qui fuerit illo tempore, quacresque ab eis, qui indicabunt tibi iudicii veritatem etc.* Et *Malach. II. 7. Labia sacerdotis custodient scientiam, et requirunt legem ex ore ejus.* *Aggaei II. 12. Interroga Sacerdotes legem.* Et *Ephes. IV. 11. et seq. Ipse dedit quosdam quidem Apostolos, quosdam autem Prophetas, alios vero Evangelistas, alios autem Pastores, et doctores ad consummationem sanctorum; in opus ministerii, in aedificationem corporis Christi, ut jam non simus parvuli fluctuantes, et circumferamur omni vento doctrinae.* Haec verba clarissime Spiritum privatum e medio tollunt, ut patet; si enim Spiritus S. cuilibet privato immediate veritates fidei revelaret, periculum non erat nullum, ne fideles omni vento doctrinae circumferrentur, ita ut dari iis debuerint Pastores, et Doctores. Adde quod ait Apostolus *II. Cor. XI. 14. Ipse*

*satanas transfiguratur se in angelum lucis; ita ut facile decipiatur qui suo ipsius spiritu ducitur; atque ideo tam multa scribit ad Corinthios, ut caveant a pseudoapostolis, quod esset inutile, si Corinthii a Spiritu sancto privatim edocti veram doctrinam a falsa internoscere. Praeterea ipse Paulus, tam claris a Spiritu Sancto revelationibus instructus, venit Ierosolymam, et cum aliis Apostolis contulit Evangelium; quod praedicabat in gentibus, ne forte, inquit, in vacuum currerem, aut eucurrissem. Galat. II. 2. Ergo etc.*

*Prob. II. Longum esset, et inutile adferre testimonia Patrum (a), cum habeamus hac in re traditionem clarissimam. Nam per saecula octodecim numquam controversiae fidei, et morum privato cujusque spiritui permissae, et dimissae sunt. Ipsimet Apostoli controversiam de legalibus non cujusque privati arbitrio reliquerunt, sed solemniter in Concilio Ierosolymitano definierunt, quod omnibus saeculis imitata est Ecclesia in Conciliis. Ergo.*

*Prob. III. ratione. Si quisque privatus constituatur controversiarum fidei iudex, nulla erit inter Christianos pax, nulla societas. Sociniani, Anabaptistae, Lutherani, Calviniani contendunt, somnia cordis sui a Spiritu Sancto sibi fuisse revelata. Quis ergo credat, Christum Ecclesiae dedisse talem controversiarum iudicem, qui controversias non solum non finiat, verum etiam suscitaret, et inflammet, reddatque inexplicabiles, atque aeternas? Hujus rationis vim vel ipsi Protestantes sentiunt. Jam enim tot annos inter se digladiantur de sensu eorum verborum: Hoc est corpus meum. Unusquisque jactat, Spiritum Sanctum*

---

(a) V. Irenaeum Lib. III. Cap. 3. Athanasium Epist. ad Solitar. Tertullianum loco Lib. de Praescript. Cyprianum Epist. III. Ambrosium Epist. XXXII. ad Valentinian. Hieronymum Epist. ad Damas. Augustinum Lib. I. cont. Crescon. Cap. 32. Innocentium I. Epist. ad Conc. Carthage. Leon. M. Ep. LXXXV. ad Episc. Vlen. Gelasium ad Episc. Dardan. Gregorium M. Lib. IV. Epist. 52. etc.

ctum sibi revelasse ejus loci sensum, et tamen hucusque inter ipsos convenire non potuit. Ergo.

*Diluuntur Objectiones.*

*Objic. I. Isaiae LIV. 13. dicit Deus: Ponam universos filios tuos doctos a Domino. Jerem XXXI. 33. Dabo legem meam in visceribus eorum, et in corde eorum scribebam eam. Et I. Joan. II. 27. Unctio ejus docet vos de omnibus. Ergo Deus docet interius fideles, saltem praedestinos.*

*¶. Dist. cons. Docet interius mediate, h. e. per ministerium Pastorum, conc. Immediate, Subdist. Si nomine doctrinae intelligas gratiam, qua interius corda movet ad audiendam, credendam, et opere implendam doctrinam Pastorum, conc. Si intelligas immediatam revelationem unicuique factam, neg. alioquin nec Christus praedicasset, nec constitueret in Ecclesia Pastores, et Doctores, ne fideles circumferrentur omni vento doctrinae. Hinc Augustinus Tract. III. in 1. Joan. Si unctio ejus docet nos de omnibus, quare nos sine causa laboramus? Ut quid tantum clamamus? Sed quaestionem illi ipsi Apostolo facio: unctionem habebant quibus loquebaris, ut quid talem Epistolam fecisti? quid illos docebas? Jam videte magnum Sacramentum, fratres; admonere possumus per strepitum vocis nostrae: si non sit intus qui docet, inanis fit strepitus noster. Et mox: neque qui plantat est aliquid, neque qui rigat, sed qui incrementum dat Deus, idest, unctio ejus docet nos de omnibus. Atque ita ipse Christus explicat locum Isaiae Joan. VI. 45.*

*Inst. Post allata verba subdit Jeremias. Non docebit ultra vir proximum suum, et vir fratrem suum, dicens cognosce Dominum, omnes enim cognoscent me a minimo eorum usque ad maximum. Ergo in novo Testamento non est opus exteriori doctrina.*

*¶. Neg. cons. alias frustra docuisset Christus et Apostoli; frustra constituti essent in Ecclesia Doctores; frustra ipsi Protestantes praedicarent, scriberent, docerent. Loquitur ergo Propheta de cognitione unius veri Dei, quae cuique fidei obvia est:*

est: non docebit vir proximum suum dicens cognosce Dominum: non vero de iudicio omnium controversiarum fidei.

*Obbie. II.* Apostolus *I. Cor. II. 15.* ait *Spiritualis iudicat omnia, et ipse a nemine iudicatur.* Ergo.

*W. Neg. cons.* Vult enim Apostolus, homines spirituales, hoc est, qui carnis desideriis non aguntur, facile percipere sublimiora religionis dogmata, et praecepta, quae homines carnales; utpote sensibus adversa, vel non capiant, vel contemnunt. Ait enim versu praecedenti: *animalis homo non percipit ea, quae sunt spiritus Dei, stultitia enim est illi, et non potest intelligere, quia spiritualiter examinatur, seu, ut alii codices habent, examinantur, hoc est, quia ea, quae sunt spiritus Dei, spiritualiter, scilicet per magisterium, sive gratiam ipsius Spiritus S. percipienda, et dijudicanda sunt: eundemque fere sensum habet prior lectio examinatur.* Mox subdit: *spiritualis autem iudicat omnia, hoc est percipit non solum sensibilia, ut homo animalis, verum etiam spiritualia, quae hominis carnalis captum superant. Verum ergo ἀναίρετον, quod vulgata vertit iudicare, non significat apud Apostolum definire controversias, sed percipere, cognoscere, dijudicare, ut patet ex antithesi instituta inter hominem animale, et spirituale, et eodem sensu usurpatur saepe a Gracis, quorum loca vide apud H. Stephanum in Thesaurō, Budaeum, et alios.*

*Inst.* Subdit Apostolus: *et ipse a nemine iudicatur.* Atqui hoc posteriori membro verbum iudicandi de vero iudicio intelligitur; ita ut sensus sit, hominem spirituale nullius iudicio, et auctoritati esse subiectum. Ergo idem significat in priori.

*W. Neg. min.* Si enim id verum esset, magna oriretur ordinis perturbatio non solum in Ecclesia, sed etiam in Republica, falsumque esset quod ait Apostolus in eadem Epistola, in corpore Ecclesiae varia esse membra, quorum alia praesint, alia subsint. Quivis enim contendens, se esse hominem spiritalem, Pastorum, et Principum auctoritati rebellis esset. Sensus ergo est, rationem vitae hominis spiritualis

nen

non posse percipi, et dijudicari ab ullo carnali homine. Potest tamen homo spiritualis ab alio spirituali homine judicari, et reprehendi, ut *Petrus a Paulo Galat. II.*, et quilibet fidelis ab Ecclesia (quae maxime spiritualis est) ac proinde etiam ab ejus ministris, inter quos licet aliqui carnales sint, debent tamen in nomine, et Spiritu Ecclesiae regere, et judicare.

*Objic. III. Idem Apostolus I. Thessal. V. 21. Omnia inquit probate, quod bonum est tenete.* Ergo unicuique privato licet dogmata fidei examinare, suumque de eis proferre, ac sequi judicium.

*¶ Neg. cons.* Apostolus enim loquitur de prophetiis, quas nonnulli fideles, dono prophetandi praediti, proferebant. Non vult igitur, fideles dogmata fidei examinare, sed probare, utrum prophetiae illae dogmatibus fidei, quae jam noverant, convenirent. At enim v. 20. *prophetias nolite spernere: omnia autem probate, quod bonum est tenete*: Neque hanc probationem fieri vult privato uniuscujusque spiritu.

*Inst.* Unusquisque privatus suae debet saluti consulere, ac rationem de seipso reddere, nec cum excusabit alienus error. Ergo ipse per se omnia probare, et quod bonum, et verum est, tenere debet.

*¶ Neg. cons.* Audiens enim Ecclesiam, quam probabimus infallibilem, nulli erroris periculo obicitur, cum contra privatum sequens spiritum oertissime decipiatur, et erret.

*Inst. 2.* Nemo scire potest, quae vera sit Ecclesia, nisi sciat, quae sit vera doctrina. Ergo.

*¶ Neg. ant.* Ex notis enim Ecclesiae, quas exponemus inferius, cognoscitur vera Ecclesia, atque ab illa accipitur vera doctrina; ideoque non ex veritate doctrinae noscitur Ecclesia, sed ex Ecclesia doctrinae veritas.

*Objic. IV. Act. XVII. 11. Bereocenses erant quotidie scrutantes Scripturas; ut viderent, si ita se haberent quae dicebantur a Paulo.* Ergo quivis etiam laicus judicare potest ex Scripturis dogmata religionis.

*¶ Neg. cons. et parit.* Cum enim praedicatur no-



va religio, ut tunc fiebat a Paulo, licet auditoribus examinare an vera sit; hoc est an miraculis, et prophetiis constet ejus veritas. Cum igitur Paulus ex prophetiis veritatem Christianae religionis ostenderet Judaeis, quales erant Beroeenses, poterant isti, imo et debebant examinare, num id verum esset. *Qui enim cito credit, levis est corde. Ecclesi. XIX. 4.* At dispar est ratio ejus, cui jam constitit veritas, et divinitas Ecclesiae. Imprudens enim esset, imo et impius, si ipse vellet privato Spiritu examinare quod docet Ecclesia, quam ipse jam credit institutam esse divinitus.

*Corollarium.*

Cum igitur neque Scriptura, neque privatus cujusque spiritus judices sint sensus obscuri Scripturae, et traditionis, omniumque controversiarum fidei; nos cum Chatholicis omnibus asserimus, judicem hunc esse ipsam Ecclesiam. Sed, ut hoc adstruamus, edisserendum est; quid sit Ecclesia: quae notae, sive characteres, quibus vera Ecclesia discernatur a falsa; quae demum proprietates.

C A P. IV.

*De Ecclesia.*

§. I.

*Ecclesiae notio, et definitio.*

**E**tsi aliquando *Ecclesiae* nomen late accipitur pro quacumque congregatione, etiam impiorum hominum, ut in *Ps. XXV. edivi ecclesiam malignantium*; communiter tamen si recte intelligitur de collectione hominum ad Dei cultum convocatorum; ut *Matth. XVI. 18. Super hanc petram aedificabo ecclesiam meam.*

Hoc modo accepta *Ecclesia*, duplici rursus sensu potest intelligi: 1<sup>o</sup>. pro universa sanctorum collectione sub uno capite Christo, quae complectitur Eccle-  
siana

siam triumphantem, militantem, et patientem in Purgatorio, ut *Ephes. I. 22. Ipsum dedit caput supra omnem ecclesiam*; 2<sup>o</sup> pro sola Ecclesia militante. Iterum autem hoc altero sensu usurpatum Ecclesiae nomen tria significat, 1<sup>o</sup>. Pastores Ecclesiae, ut *Matth. XVIII. 17. dic Ecclesiae*: 2<sup>o</sup>. particularem aliquam ecclesiam, ut *ecclesia Choriathi, ecclesiae Asiae, Macedoniae* saepe apud Apostolum, qui et unam familiam appellat *ecclesiam*: *Rom. XVI. 5. Salutate Priscam, et Aquilam, et domesticam ecclesiam eorum*; 3<sup>o</sup>. Ecclesiam per universum terrarum orbem diffusam. Postremo hoc sensu hic accipimus nomen Ecclesiae, cujus definitio haec traditur a Bellarmino.

### PROPOSITIO.

*Ecclesia est coetus hominum viatorum unius, et ejusdem fidei Christianae professione, et eorundem sacramentorum communione adunatus, sub regimine legitimorum Pastorum, ac praecipue Rom. Pontificis Christi vicarii.*

*Probatur, et explicatur definitio.* Verba illa *coetus hominum viatorum* designant genus supremum, in quo Ecclesia cum quacumque hominum congregatione convenit. Sequentia verba *unius, et ejusdem fidei professione etc.* explicant differentiam, qua Ecclesia a quacumque infidelium, haereticorum collectione discernitur etc. Ergo recta est definitio.

*Dices.* Non solum fides sed etiam spes, et charitas ad naturam Ecclesiae pertinent. Ergo melius definitur Ecclesia. *Societas hominum viatorum, et baptizatorum sive internis vinculis fidei, spei, et charitatis, sive externis communionis catholicae, et ejusdem fidei professionis vinculis colligata etc.*

*Res. Neg. ant.* Spes enim, et charitas licet ex promissionibus Christi numquam omnino in corpore Ecclesiae extinguantur; non tamen ejus naturam constituent, nec proinde in definitione ponendae erant: 1<sup>o</sup>. quia non reperiuntur in omnibus Ecclesiae membris, ut infra docebitur; 2<sup>o</sup>. quia cum sint proprie-

prietates occultae in corde hominis, et invisibiles, si requirerentur ad constituendam Ecclesiae naturam, jam Ecclesia esset corpus natura sua invisibile, quod falsum esse, et contra naturam ipsius Ecclesiae, docebimus suo loco. Hinc pessime in Ecclesiae definitione ponuntur verba illa disjunctiva *sive internis, sive externis vinculis colligata*, quae eo spectant, ut possit aliquando esse Ecclesia nullo externo communionis signo colligata, adeoque invisibilis.

Ergo, inquit, nec ipsa fides in definitione ponenda erat; potest enim quis exterius simulare fidem, quam negat interius, atque ideo non minus fides, quam spes, et charitas occulta est.

¶ *Neg. seq. et parit.* Fides enim est natura sua visibilis per exteriorem professionem: ex accidenti autem est, quod quis eam simulet, quod nos de nemine suspicari debemus, quem videmus vivere in Ecclesiae societate, nec ulla exterius signa infidelitatis proferre: At spes, et praecipue charitas saepe occulta sunt etiam illi ipsi, qui eas habet, adeo ut quantumcumque exteriùs profiteatur, se illas habere; semper id occultum sit, nec per solam ejus affirmationem visibile.

*Inst.* Spes, et charitas constituit animam Ecclesiae, ut post *Bellarminum* fatentur omnes, qui ejus definitionem secuti sunt, idemque docuerat *Augustinus* in *Breviculo Coll.* Atqui inepte quis definiret hominem describendo ejus corpus, nulla omnino injecta mentione animae rationalis. Ergo.

¶ *Dist. ant.* Et ejusmodi locutio metaphora est, conc. *Propria, neg.* Vult igitur *Augustinus*, alique, fidem, spem, et charitatem perfecte conjungere multa Ecclesiae membra cum Christo, capite, eaque movere ad opera supernaturalia; sicut anima movet viva corporis membra ad opera naturalia; sed in eo differunt ab anima, quod haec constituat hominis naturam, illae autem minime. Non enim ait *Augustinus*, fidem, spem, et charitatem idem esse in Ecclesia, quod est anima in homine, sed quod est anima in corpore hominis. Nos igitur eandem metaphoram libenter sequemur; dicemusque, aliquos perti-

nere

nere ad corpus Ecclesiae, non ad animam; ut peccatores: alios ad animam, non ad corpus, ut nonnulli cathecumeni; alios ad animam simul et corpus, ut iusti. Sed hic corpus Ecclesiae visibile definiendum erat.

*Objic. II. cum Launoyo Lib. VIII. Epist. 13.* Potest aliquando esse Ecclesia sine Pastore, ut accidit mortuo S. Pontifice, vel tempore schismatis, cum dubitatur quisnam verus sit, et legitimus Pastor. Ergo non pertinet ad naturam, et definitionem Ecclesiae, ut sit *sub regimine Pastorum*.

*¶ Dist. ant.* Potest esse sine Pastore; sed tunc natura sua petit, ut legitimus Pastor institutur, sicut Monarchia tempore interregni, *conc.* Id non petit, *neg.* Cyprianus enim Ecclesiam sic describit *Epist. LXIX. ad Pupianum*: *Plebs sacerdoti adunata, et Pastori suo grex adhaerens.*

Ceterum nostra definitio in singulis ferme partibus a variis haeticis oppugnatur. Cum enim alii doceant, solos praedestinos esse membra Ecclesiae, ut *Joan. Wiclefus*, et *Joan. Hus* in Concilio Constantiensi *Sess. XV.* damnati, et *Calvinus Lib. IV. Instit. Cap. 1. §. 2.* alii solos homines justos, vel saltem a criminibus gravioribus immunes, ut olim Novatiani apud *Cyprianum Ep. LI. et LII.* et Donatistae apud *Augustinum Lib. de haeresib. Cap. LXIX.*, alii e contrario, perperam distinguentes inter articulos fidei *fundamentales*, et non *fundamentales*, doceant, haeticos ipsos esse membra Ecclesiae, si non errent in *fundamentalibus*, ut *Jurii* minister Calvinista; alii S. Pontificem non agnoscant, ut caput Ecclesiae, ut haeticis ferme omnes; mirum non est, si nostram definitionem omnibus huius erroribus oppositam oppugnent. Ut ergo ejus veritas constet, videamus modo quatenam sint Ecclesiae membra: Nam de Summo Pontifice, utrum sit Ecclesiae caput, suo loco disseremus inferius (a).

§. II.

---

(a) Quae nos hic brevius de Ecclesia tradimus, ea fusiùs tractarunt inter veteres quidem *Cyprianus Lib. de Unit.*

## §. II.

*De membris Ecclesiae. Et primo de haereticis et apostatis.*

*Adv.* Haereticus est qui veritatem a Deo revelatam, et a vera Ecclesia ad credendum propositam, pertinaci animo negat. Qui autem omnem omnino Christianam religionem, ejusque dogmata ejuravit, *Apostata* dicitur. Sunt autem haeretici, et apostatae vel *publici*, vel *occulti*, vel tantum *interni*. Publici sunt, quorum haeresis tot hominibus innotuit, ut cessari amplius communitati non possit. *Occulti*, qui licet haeresim vel ore protulerint, vel alio exteriori signo approbaverint, non tamen publice innotuerunt. Interni, qui haeresim, mente conceptam, nullo exteriori signo aperuerunt.

II. *Alphonsus de Castro Lib. II. de justa haeretice. punit. Cap. 24.* docet, haeticos aliquo sensu membra Ecclesiae dici posse, etsi publici sint. At *Jurius Calvinista* novam comminiscitur distinctionem inter articulos fidei *fundamentales*, et non *fundamentales*, docetque, eos, qui errant in fundamentalibus articulis, ab Ecclesia esse sejunctos, secus qui errant in non fundamentalibus. Quae sententia, etsi prima fronte mitior sententia. *Alphonsi*, longe tamen absurdior, et periculosior est, tum propter novam,  
et

---

se Ecclesiae. Augustinus in *Libro De unitate Ecclesiae*, et aliis contra Donatistas. *Optatus Milevitanus* Libri sex contra *Parmenianum*: inter recentiores vero Joannes de Turcecremata in *Summa de Ecclesia*, Melchior Canus *Lib. IV. et V. De Locis*, Joannes Ant. Delphinus Libris tribus de *Ecclesia*, Franciscus Turrianus Libris duobus de eodem argumento, Sylvius Opusculo V. Reliurminus *Lib. III. de Conciliis*, et *Eccles. Wallemburg. De veritate, et notis Ecclesiae*, Thomassinus *De Unitate de l'Eglise*, Nicolae *Prejugés légitimes. De l'unité de l'Eglise. Le preceador Reformés convaincus de Schisme*. Abbas Cordemoi *De l'infalibilité de l'Eglise*, et alii.

et haecenus inauditam distinctionem dogmatum fidei; tum quia *Alphonsus* docet quidem, haereticos esse aliquo pacto membra ecclesiae, sed omnem eis adimit spem salutis; hic vero tenet, haereticos in non fundamentalibus errantes, licet propriam sibi sectam constituent, esse tamen Ecclesiae membra, et salutem aeternam consequi, quod ad indifferentissimum pertinet, et manifesta haeresis est.

III. De internis haereticis quaestio inter catholicos est. *Sylvius* enim post alios docet, eos vere, et absolute non esse in Ecclesia, sed tantum secundum quid, h. e. apparenter. Alii cum *Bellarmino* Lib. III. De Eccl. mil. Cap. 10. contra sentiunt. His positus, dicimus.

### PROPOSITIO I.

*Haeretici, et multo magis Apostatae publici, membra Ecclesiae non sunt.*

*Prob. I. ex Scriptura.* I. Joan. II. 19. de haereticis dicitur: *Ex nobis prodierunt, sed non erant ex nobis; si enim fuissent ex nobis, permansissent utique nobiscum.* At si publici haeretici Ecclesiae membra essent, non possent dici in ea non permansisse. Et II. Joan. 10. *Si quis venit ad vos, et hanc doctrinam non affert, nec Ave ei dixeritis: quod edixerat etiam Apostolus, monens Episcopum Tit. III. 10. Haereticum hominem post unam, et secundam correptionem evita.* Atqui homo vitandus a quolibet Ecclesiae membro nullo pacto dici potest Ecclesiae pars, et membrum, cum nullam habeat cum reliquis partibus communionem. Ergo etc.

*Prob. II. ex perpetua Ecclesiae traditione, quae semper haereticos habuit ut extraneos, cosque ad rectam fidem redeuntes suo corpori rursus coaptavit, ut patet ex Can. VIII., et IX. Concilii Nicaeni: et in Officio seriae VI. Hebdomadae majoris Deum orat, ut haereticos omnes ad Ecclesiam revocet; quod clare ostendit, eos antea in unitate Ecclesiae non fuisse.* Hinc *Hieronimus* de haereticis omnibus pronun-

nunciat ( *Lib. cont. Luciferian.* ) Sicubi audieris eos, qui dicuntur Christi, non à Domino Jesu Christo, sed à quocumque alio nuncupari, utpote Marcionitas, Valentinianos, Montenses, sive Campitas, scito non Ecclesiam Christi, sed Antichristi esse Synagoga. Atqui Scriptura, et Traditio cum haeticos ab Ecclesia excludunt, nullum omnino excipiunt, nec ullam unquam articulorum fundamentalium, et non fundamentalium afferunt differentiam, omnibus saeculis usque ad Calvinistas inauditam. Ergo non solum Alphonsi de Castro, sed etiam Jurii sententia falsa est.

*Scholion.*

Quod autem de publicis haeticis diximus, id intelligendum est etiam de occultis, qui tamen exteriori aliquo signo haeresim protulerunt. Hi enim jam excommunicati sunt, atque ideo extra Ecclesiam, ut de excommunicatis dicemus; licet exterius in corpore Ecclesiae permanere videantur.

Diximus autem in *Prop. et multo magis apostatae*, quia si in Ecclesia non est qui vel unum rejicit fidei articulum, ut haeticus, multo magis qui universam religionem, et fidem ejuravit, ut apostata. Augustini, Gregorii, Ambrosii loca vide inferius *Prop. II. (a)*.

*Objectiones.*

*Objic. I.* Christus *Matth. XIII.* docet, in eodem agro esse zizania simul cum tritico. Atqui per agrum *Cyprianus Epist. LI.* intelligit Ecclesiam; per zizania vero *Hieronymus*, et *Chrysostomus*, in hunc locum scribentes, intelligunt haeticos. Ergo in eadem Ecclesia sunt haetici, et orthodoxi.

*¶. Dist. min.* Et *Cyprianus*, qui per agrum intelligit

M

ligit

---

(a) Adde *Cyprianum Epist. ad Jubajan.* Augustinum *Lib. de Unit. Eccl. Cap. 4. etc.*

ligit Ecclesiam, per zizania non intelligit haereticos, sed fideles peccatores, sicut e contrario Hieronymus; et Chrysostomus, qui per zizania intelligunt haereticos, per agrum non intelligunt Ecclesiam, sed mundum universum, conc. Secus, neg. Per agrum ergo in Christi parabola totus mundus intelligendus est, ut explicat ipse Christus Ibid. v. 38 *ager autem est mundus*. Idque observat Augustinus Quaes. XI. in Matth. Dominus agrum ipsum non Ecclesiam, sed hunc mundum interpretatus est. Cyprianus autem, qui agri significationem soli Ecclesiae aptavit, per zizania non haereticos, sed alios peccatores intellexit, ut recte advertit Augustinus Lib. II. cont. Crescon. cap. 34. At Hieronymus, Chrysostomus, alique, qui per agrum intellexerunt hunc mundum, juxta ipsius Domini explicationem, potuerunt utique zizaniorum nomen haeticis aptare.

Objc. II. Apostolus II. Tim. II. 20. *In magna, inquit, domo non solum sunt vasa aurea, et argentea, sed et lignea, et fictilia*. Atqui per magnam domum sine dubio intelligit Ecclesiam, per vasa autem lignea, et fictilia intelligit haereticos. Nam paulo ante dixerat de haeticis: *eorum sermo ut cancer serpit, ex quibus est Hymenaeus, et Philetus, qui a veritate exciderunt, et subverterunt quorundam fidem*, tum paucis interjectis subdit: *in magna autem domo etc.* Ergo.

¶ Neg. min. quoad secundam partem, et ad ejus confirmationem Dist. ant. et verba illa in magna autem domo referuntur ad ipsos haereticos Hymenaeum, et Philetum, neg. referuntur ad verba posteriora *subverterunt quorundam fidem, conc.* Sensus ergo est, ideo Hymenaeum, Philetum, aliosque haereticos subvertisse fidem quorundam, quia in magna Ecclesiae domo non solum sunt homines in fide firmi, et in charitate radicati, vasa scilicet aurea, et argentea, sed etiam infirmi in fide, et charitate, mobiles, et fragiles, vasa lignea, atque fictilia; ita ut facile circumferantur omni vento doctrinae, et ab Ecclesia abducantur. Vide S. Thomam Comment. in hunc loc.

Inst. Augustinus Lib. IV. cont. Donatist. Cap. 12.



ex Cypriani sententia per vasa lignea, et fictilia eos ipsos intelligit, quorum sermo ut cancer serpit, puta haereticos. Ait enim: et ipsos, de quibus ait Apostolus, sermo eorum ut cancer serpit, vellem intelligere foris fuisse, sed Cyprianus ipse me non sinit. Ergo putavit, ipsos haereticos non esse foris, sed intus, in magna domo, in Ecclesia.

¶ *Dist. ant.* Et Augustinus loquitur ex sua sententia, neg. Ipse enim *Lib. de Unit. Eccl. Cap. 4.* ait: quicumque de ipso capite ab scripturis sanctis dissentiunt, etiamsi in omnibus locis inveniuntur, quibus Ecclesia designata est, in Ecclesia non sunt: imo centies repetit in eodem libro, et alibi passim, haereticos esse extra Ecclesiam. Loquitur ex sententia, quam putavit esse Cypriani subdist. et per eos, quorum sermo ut cancer serpit, non intelligit formales haereticos, sed eos quorum prava doctrina nondum ab Ecclesia damnata est, conc. Formales haereticos intelligit, neg. Augustinus ergo tum alibi, tum in hoc eodem Libro saepe docet, haereticos esse extra Ecclesiam. Idipsum docuerat Cyprianus, qui ideo haereticorum baptismum improbabat, quod extra Ecclesiam esset datus; nec id ignorare poterat Augustinus. Hic autem loci ut probaret contra Donatistas, Ecclesiam constare ex justis, et peccatoribus, affert Cyprianum, cuius auctoritate Donatistae abutebantur, ostenditque, S. Martyrem omnes peccatores in Ecclesiae sinu agnovisse, etiam eos, quorum sermo ut cancer serpit; licet id conceptis verbis non dicat Cyprianus, sed putaverit ipse Augustinus erui posse ex ejus verbis. Ne igitur dicamus, tantum Doctorem tam aperte sibimetipsi, et Cypriano esse contrarium, intelligendus est de iis quorum sermo serpit quidem ut cancer, sed nondum damnatus est ab Ecclesia ut haeresis.

*Objic. III.* Haeretici habent baptismum, iis tantum exceptis, qui, errantes in fundamentalibus fidei articulis, baptismi formam immutarunt: imo iidem, si baptismum in Ecclesia susceperunt, ejus semper characterem retinent. Atqui per baptismum homo corpori Ecclesiae inseritur. Ergo.

*n. Dist. min.* Inseritur Ecclesiae corpori, a quo tamen per voluntariam haeresim recedit, *conc.* secus, *neg.* Pueri enim ante usum rationis per legitimam baptismi formam corpori Ecclesiae copulantur: at cum ad eam aetatem perveniunt, in qua sectae suae falsitatem agnoscere queunt, tunc, in ea voluntarie permanentes, ab Ecclesia recedunt, non secus ac si, qui vel adulti baptizantur in haeretica secta, vel in Ecclesia nati, et baptizati, adulta aetate haeresim profitentur. Quamdiu vero sectae suae, in qua ab infantia baptizati sunt, falsitatem *invincibiliter* ignorant: quod contingere praecipue potest in rusticis, ubi secta aliquid non docet contra naturae legem, vel contra prima religionis principia, quae nemo invincibiliter potest ignorare Christianus; in Ecclesia esse pergunt. Vide Gersonem in *Tract. De probatione circa mater. fid.* et Canum *Lib. XII. Cap. 7.* in quibus multa invenies hac de re non vulgaria.

*Inst.* Absurdum est tot homines a salute excludere, quot sunt, qui haereticas sectas profitentur, cum e contrario si omnes, qui dicuntur Christiani, licet haeretici, in sinu Ecclesiae esse dicerentur, facilius obstrueretur os incredulis, qui ex paucitate membrorum Ecclesiae divinam ejus institutionem oppugnant. Ergo.

*n. Dist. ant.* Absurdum esset, si ipsi se voluntarie a corpore Ecclesiae excluderent, *neg.* si non voluntarie excluderentur, *transept.* Deus ergo salutis domicilium, Ecclesiam scilicet catholicam, pro salute omnium hominum constituit, sed cum non debeat homines per vim salvos facere, non est absurdum, sed miserranda caccitas hominum, qui ab Ecclesia libere discedunt. Dixi tamen, *transeat* altera distinctionis pars, quia etsi non voluntarie extra Ecclesiam essent, ut accidit infidelibus *negativis*, adoranda hic essent, non reprehendenda inscrutabilia judicia Dei; nec ullum hinc praepudicium opponi posset contra veritatem Ecclesiae, quae tam patentibus signis constabita est, ut superiore libro ostendimus.

## PROPOSITIO II.

*Occulti, et interni haerēlici, et Apostatae, secundum rei veritatem absolute non sunt in Ecclesia; sunt tamen secundum quid.*

*Prob. 1. pars. Apostolus Tit. III. 11. ait, haereticum ideo esse vitandum, quia est proprio judicio condemnatus; quod et clarius Iudas in Epistola sua v. 19. docet: loquens enim de haereticis ait: Hi sunt qui segregant semetipsos. Hinc Augustinus Lib. IV. de Bapt. Cap. 16. Si quisquam, inquit, idem sentiat quod illi, et esse noverit haeresim ab unitate catholica separatam, ubi hoc docetur, et discitur, sed alicujus saecularis emolumenti causa in catholica unitate baptizari voluerit, vel in ea baptizatus hinc exire noluerit, non solum separatus habendus est, verum etiam tanto scelratius, quanto magis errori haeresis, et divisioni unitatis fallaciam simulationis adjungit. Et Lib. De Unit. Eccl. cap. 25. Cum pro ipsis operibus etiam veritati apertissimae, quae redarguitur, resistere coeperit, tunc praeciditur. Et multi tales sunt in sacramentorum communione cum Ecclesia, et tamen jam non sunt in Ecclesia. Hanc doctrinam repetit Quaest. XI. in Matth. et Lib. II. contra Litt. Petil. Cap. 108. et Lib. II. cont. Crescon. C. 21. Unde Catechismus Romanus P. 1. c. 10. q. 2. ex Augustino Ecclesiam definit populum fidelem. Idem docent Ambrosius Lib. VII. in Cap. 11. Luc. Gregorius Lib. II. Mor. c. 15. Leo M. Epist. LIII. Ergo.*

*Prob. 2. pars. Haeretici, de quibus agimus, pergunt exterius veram profiteri fidem, manere in Ecclesiae externa societate, cum reliquis fidelibus in sacramentorum participatione communicare. Ergo secundum quid, id est secundum externam formam sunt in Ecclesia.*

*Objic. Ecclesia, ut suo loco dicemus, est corpus visibile; atqui tale non esset, si occulti, et interni haeretici, et apostatae non essent ejus membra. Ergo.*

*¶ Neg. min. Sufficit enim, ut Ecclesia dicatur vi-*  
sibi-

sibilis, si visibile sit ipsum corpus, in quo ex Christi promissionibus vera fides numquam deficiet. Et licet de unoquoque membro Ecclesiae certi non simus absoluta certitudine, in eo esse veram fidem; sufficit tamen certitudo *moralis*, quae ex eo oritur, quod videamus ipsum manere in Ecclesiae societate, nec ulla infidelitatis signa exterius protulisse.

*Inst.* Episcopus interius haeresim, vel apostasiam fovens, pergit esse caput suae ecclesiae. Ergo est membrum Ecclesiae principale.

¶ *Dist. ant.* Pergit esse caput *secundum quid*, propter jurisdictionem, quam Ecclesia ipsi non adimit, *conc.* Proprie, *neg.* Vide Sylviū Opusc. V. Lib. III. Quaest. I, art. 7.

*Corollarium.*

Ergo recte posita sunt in definitione Ecclesiae verba illa: *unius fidei professione.*

### §. III.

#### *De Schismaticis.*

*Adv. I.* Schismaticus, est qui secessionem in Ecclesia faciens, ab unitate capitis, et membrorum, vel palam, vel latenter sejungitur.

II. Licet schisma natura sua ab haeresi sit diversum, plerumque tamen schismatici haeresim aliquam amplectuntur. Nam ut advertit Hieronymus in *Epist. ad Galat.* Nullum schisma est, quod non sibi aliquam haeresim confingat, ut recte ab Ecclesia recessisse videatur. Hic tamen loquimur de schismaticis, prout ab omni haeresi immunibus.

### PROPOSITIO

*Manifesti Schismatici membra Ecclesiae non sunt.*

Haec propositio probatione non indiget, cum ipsa schismatis definitio separationem a corpore Ecclesiae significet. Nihilominus probatur ex Patribus. *Hiero-*

*ny-*

nymus enim in *Cap. III. Epist. ad Tit.* inter haeresim inquit, et schisma hoc interesse arbitramur, quod haeresis perversum dogma habeat, schisma propter Episcopalem dissensionem ab Ecclesia separet. Fulgentius *Lib. de Fide ad Petrum cap. 38.* Firmissime tene, et nullatenus dubites, non solum paganos, sed etiam haereticos, et schismaticos, qui extra Ecclesiam catholicam praesentem finiunt vitam, in ignem aeternum ituros. Mitto ceteros (a) in re clarissima. Hinc Ecclesia Feria VI. Majoris Hebdomadae orat Deum pro schismaticis, ut eos ad sanctam matrem Ecclesiam Catholicam, et Apostolicam vocare dignetur. Ergo.

*Objic. I.* Schismatici baptismum habent, fidem habent, unitatem habent cum Christo capite. Ergo.

*W. Neg. ant.* quoad 3. partem. Sicut enim non potest habere Deum Patrem, qui non habet Ecclesiam matrem, ut loquitur Cyprianus, ita non possunt eum Christo habere unitatem, qui, recedentes a Pastoribus per Christum statutis, discedunt a Corpore Christi.

### Scholion.

De Schismaticis autem internis non idem dicere possumus, quod de internis haereticis antea diximus. Schismatici enim interni peccant interius non contra fidem, quae ad essentiam Ecclesiae pertinet, sed contra charitatem, quam diximus ad naturam Ecclesiae non pertinere. Cum ergo illi pergant exterius societatis vincula servare, in Ecclesia permanent.

### Corollarium.

Recte igitur in definitione Ecclesiae posita sunt ea verba: *sub regimine legitimorum Pastorum etc.*

### §. IV.

---

(a) Irenaeus *Lib. IV. Cap. 62.* Cyprianus *Epist. LXX. ad Pupian.* Chrysostomus *Hom. III. in 1. ad Corinth.* Hieronymus in *Cap. 1. Amos.* Optatus Milevit. *Lib. 1. contra Parmenian.* et alii.

## §. IV.

*De Excommunicatis.*

*Ado.* Excommunicatio duplex est, *major*, et *minor*. *Major* hominem baptizatum privat bonis Ecclesiae communibus, sacramentis, sacrificiis, suffragiis, aliisque; *minor* vero excludit tantum directe a sacramentis suscipiendis. Certum est, excommunicatione *minori* multatos extra Ecclesiam non esse. Excommunicati autem *majori* excommunicatione vel sunt *tolerati*, vel *non tolerati*, sive vitandi.

## P R O P O S I T I O

*Excommunicati majori excommunicatione, sive sint tolerati, sive vitandi, in Ecclesia non sunt.*

*Prob. I. Matth. XVIII. 17.* de talibus hominibus ait Christus. *Si ecclesiam non audierit, sit tibi sicut ethniscus, et publicanus*, h. e. ut explicat *Augustinus Serm. LXXXII. al. XVI. De verb. Dom.* noli illum deputare jam in numero fratrum tuorum. Et *Apostolus I. Cor. V. 2.* jubens excommunicari incestuosum Corinthium, *Et non magis*, inquit, *luctum habuistis, ut tollatur de medio vestri qui hoc opus fecit: hoc est de medio Ecclesiae.* Ergo.

*Prob. II. ex PP. Cyprianus Epist. LXII.* de excommunicatione loquens, ait: *Spiritali gladio superbi, et contumaces necantur, dum de Ecclesia ejiciuntur.* Et *Augustinus Lib. de Unit. Eccl. Cap. ult.* Quisque praeciditur, cum visibiliter excommunicatur. Et *Quaest. XXXIX. in Deuteron.* Hoc nunc agit in Ecclesia excommunicatio, quod agebat tunc interfectio. Denique quoties de excommunicatione Patres loquuntur, nomen *separationis, ejectionis*, aliave similia usurpant (a) At, qui ejiciuntur, praeciduntur, separantur; pel-

(a) *Eusebius Lib. V. Hist. Cap. 24.* *Epiphanius Haeresi XLII.* *Hilarius, Chrysostomus, et Theophilactus in Cap. XVIII. Matth. et alii.*

pelluntur ab Ecclesia, in ea amplius non sunt: sicut qui interficiebantur, in societate hominum, et Republica Judaeorum amplius non erant. Ergo.

*Prob. III.* Excommunicati omni spirituali commercio cum membris Ecclesiae privantur. Non ergo amplius membra sunt.

*Diluuntur objecta.*

*Objic. I.* Augustinus *Lib. post Collation. Cap. 20.* inquit: *Neque a populo Dei separamus quos vel degradando, vel excommunicando, ad humiliorem poenitendi locum redigimus.* Atqui populus Dei est Ecclesia. Ergo si excommunicati non separantur a populo Dei, non separantur ab Ecclesia.

¶ 1.<sup>o</sup> Nonnulli, ut *Lensaeus Lib. I. de Eccl. cap. 14.* et *Bellarminus lib. III. cap. 6.* suspicantur, locum *Augustini* esse mendosum, et addendam esse negationem sic: *neque enim a populo Dei non separamus.* Sed missa hac responsione.

¶ 2.<sup>o</sup> *Dist. maj.* Non separamus in perpetuum sine spe reintegrationis, *conc.* Non separamus ad tempus, scilicet donec excommunicatus resipiscat, *neg.*

¶ 3.<sup>o</sup> Attente legenti textum *Augustini* patet, eum non de majori excommunicatione loqui, sed de *degradatione*, et excommunicatione minori, quae quis ad agendam poenitentiam redactus, ab Eucharistiae communione prohibebatur.

*Objic. II.* Excommunicatus injuste, vel juste quidem, sed perfecte contritus, si ante absolutionem moriatur, utique salvus erit. Atqui nemo salutem sperare potest, nisi membrum Ecclesiae sit. Ergo.

¶ *Ad 1.* de injuste excommunicato, *Nego suppositum.* Loquimur enim hic de excommunicatione justa; cum injuste excommunicatus non privetur communibus Ecclesiae bonis, licet exterius se pro excommunicato gerere debeat, vel quia de injustitia non constat, vel quia scandalum timetur. *Ad 2.* de juste excommunicato, sed perfecte contrito, *Dist. min.* Nemo salutem sperare potest, nisi sit membrum Ecclesiae vel reipsa, vel voto, *conc.* Reipsa semper, *neg.*

*neg.* Sicut ergo catechumeno morienti sufficit ad salutem baptismi votum, ita excommunicato perfecte contrito sufficit votum absolutionis. Utrum autem sufficiat etiam, ut ille fruatur communibus Ecclesiae suffragiis, quaestio est inter Theologos.

*Objic.* III. Excommunicati tolerati ex Constitutione Martini V. quae incipit *Ad evitanda*, valide sacramenta ministrant, imo licet cum iis communicare, etiam in sacris. Ergo saltem ii membra sunt Ecclesiae.

*¶ Neg. cons.* Haec enim Constitutio non est in commodum excommunicati sancita, sed in bonum, atque utilitatem fidelium, quibus multa imminerent animarum pericula, si excommunicati tolerati iurisdictione privarentur, aut essent a fidelibus vitandi.

### *Corrollarium.*

Recte ergo in definitione posita sunt ea verba: *eorundem sacramentorum communione adunatus.*

### §. V.

#### *De non baptizatis.*

*Ado.* Qui baptismo initiati non sunt, vel infideles sunt, vel fideles. Primi in Ecclesia non sunt. *Quid enim mihi de iis, qui foris sunt, judicare?* inquit Apostolus I. Cor. V. 12. Fideles autem vel munda-  
no timore, aut amore praepediti nolunt baptizari, vel jam volunt, ideoque curant edoceri mysteria fidei, dicunturque a verbo Græco *catechumeni*. Qui ergo baptizari nolunt, extra Ecclesiam omnino sunt. De catechumenis quaeritur.



## PROPOSITIO

*Catechumeni non sunt actu membra Ecclesiae, sed tantum potentia.*

*Prob. 1. pars.* Catechumeni, utcumque ferveant charitate, non tamen ad sacramenta suscipienda cum Ecclesiae membris admittuntur, nec ad communia Ecclesiae bona jus habent ullum. Ergo membra Ecclesiae actu non sunt. Hinc *Act. II. 41.* fideles tunc dicuntur *appositi*, sive adjecti Ecclesiae corpori, cum baptismum susceperunt. *Qui receperunt sermonem ejus, baptizati sunt, et appositae sunt in illa die animae circiter tria millia.* Eadem est omnium *Patrum* (a) sententia. Concilium Florentinum *Baptismus*, inquit, *vitalis spiritualis janua est, per quam membra Christi, ac de corpore Ecclesiae actu efficimur.* Et Tridentinum *Sess. XIV. cap. 2. Ecclesia in neminem exercet judicium, qui non prius in ipsam per baptismi januam sit ingressus.* Ergo.

Secunda pars patet; cum enim catechumeni ad suscipiendum baptismum disponantur, jam sunt in potentia membra Ecclesiae.

## Objectiones.

*Objic. I.* Catechumeni cum reliquis Ecclesiae membris per fidem communicant, imo et salvi sunt, si ante baptismum in charitate decesserint. Ergo actu sunt membra Ecclesiae.

*¶ Neg. cons.* Non enim sufficit fides, ut quis membrum Ecclesiae censeatur, sed praeterea requiritur, ut in eam per baptismum, qui janua est, introeat. E contrario, ut quis salvus sit, sufficit baptis-

---

(a) Tertullianus *Lib. de praescriptis*. Nazianzenus *Orat. in S. Lavacrum*. Chrysostomus *Hom. XXIV. in Joan.* Cyrillus Alex. *Lib. XII. in Joan. cap. 50.* Augustinus *Tract. IV. in Joan.*

ptismi desiderium, quo fit, ut is, licet non ad corpus, ad animam tamen, ut ita dicam; Ecclesiae pertineat.

*Inst. 1.º* In Concilio Lateranensi sub Innoc. III. cap. 1. dicitur: *Una est fidelium universalis ecclesia, extra quam nullus omnino salvatur.* Ergo, si cathecumeni salvi esse possunt, in Ecclesia sunt.

*R. Dist. ant.* Nullus salvatur, qui sit extra Ecclesiam tum reipsa, tum voto, *conc.* Reipsa semper, *neg.* *Dist. etiam cons.* Sunt in Ecclesia per votum, *conc.* Reipsa, *neg.*

*Inst. 2.º* Ante Christum fideles incircumcisi pertinebant ad Ecclesiam; ut enim observat Augustinus *Lib. II. de peccator. merit. cap. 24.* et Auctor libri de *Vocatione gentium Lib. II. cap. 14.* fuerunt etiam aliqui ex Gentilibus fideles. Ergo etiam post Christum.

*R. Neg. cons.* Praeceptum enim circumcisionis non omnibus Gentibus erat datum, sicut praecceptum baptismi, sed solis Abrahae posteris.

*Objic. II. Augustinus Tract. IV. in Joan.* ait: *futuri erant aliqui in Ecclesia excelsioris gratiae cathecumeni.* Ergo.

*R. Dist. ant.* Futuri erant in Ecclesia improprie, h. e. in potentia, *conc.* Reipsa, *neg.* Cum enim Augustinus passim distinguat cathecumenos a Christianis, ut *Tract. XI. in Joan.* *Nesciunt*, inquit, *cathecumeni, quod accipiant Christiani*, non alia ratione explicari potest quod dicit, eos *esse in Ecclesia*, quam eo sensu, quo dicimus, esse in domo cum, qui in vestibulo est, ut statim ingrediatur.

## §. VI.

### *De praedestinatiis, et reprobis.*

*Adv.* Calvinus *Lib. IV. Instit. Cap. 1. §. 2.* post *Wiclefsum*, et *Hus*, solos praedestinos, ait, esse membra Ecclesiae; idque ex suo systemate deducit. Docet enim ipse, neminem veram habere fidem, nisi praedestinatum; cum ergo nemo sit membrum Ecclesiae

siae sine fide; hinc nemo membrum Ecclesiae est, nisi praedestinatus.

# PROPOSITIO

*Ecclesia constat ex praedestinatiis, et reprobis: imo non omnes praedestinati sunt actus membra ecclesiae. Est dogma fidei.*

*Prob. 1. pars ex parabolis, quibus in Evangelio Christus Ecclesiam adumbravit. Eam enim comparavit primo areae, in qua continetur simul triticum, et palea. Matth. III. 12. Permundabit aream suam, et congregabit triticum suum in horreum, paleas autem comburet igni inextinguibili. At per triticum manifeste intelliguntur electi, sicut per paleas reprobi. 2°. Comparavit convivio, in quo repertus est homo, in tenebras exteriores projiciendus Matth. XXII. 3°. Agro, in quo zizania cum frumento creverunt usque ad messem, tuncque demum collecta sunt in fasciculos, et in ignem projecta Matth. XIII. 4°. Sagena missae in mare, et ex omni genere piscium congreganti, quam, cum impleta esset, educentes, et secus litus sedentes, elegerunt bonos in vasa, malos autem miserunt foras Matth. XIII. 5°. Decem virginibus, quarum quinque fatuae a nuptiali convivio exclusae sunt Matth. XXV. At homo in tenebras exteriores projectus, zizania igni combusta, mali pisces foras missi, virgines fatuae domo exclusae, non utique significant praedestinos, sed reprobos. Ergo. Hinc Gregorius M. Lib. I. Homil. XII. in Evang. Regnum Dei, inquit, saepe praesentis temporis Ecclesia dicitur, in qua, quia mali cum bonis, et reprobi cum electis admixti sunt, recte similis virginibus prudentibus, et fatuis esse perhibetur.*

*Prob. 2°. ratione. Si Ecclesia solis constaret praedestinatiis, invisibilis esset. Atqui, cum natura sua esse visibilem; docemus inferius. Ergo.*

*Prob. 2. pars. Infideles, schismatici, haeretici, excommunicati membra ecclesiae non sunt, ut supra docuimus. Atqui nonnulli ex iis sunt praedestinati.*

stinati. Ergo non omnes praedestinati actu sunt in Ecclesia. Unde *Augustinus Tract. XLV. in Joan. n. 12.* utramque propositionis nostrae partem paucis verbis complectens, ait: *secundum Dei praescientiam, et praedestinationem, quam multae oves foris, quam multi lupi intus!* Denique Concilium Constantiense *Sess. XV.* contrariam doctrinam *Joannis Hus* damnavit.

### Solvuntur Objectiones.

*Objic. I.* Ecclesia ab ipso Christo comparatur ovili, ejusque membra comparantur ovibus *Joan. X. 16.* *Alias oves habeo, quae non sunt ex hoc ovili, et illas oportet me adducere, et fiet unum ovile, et unus pastor.* Atqui oves Christi sunt soli praedestinati. Ait enim Christus *Ibid. v. 27.* *Oves meae vocem meam audiunt, et ego cognosco eas, et sequuntur me, et ego vitam aeternam do eis, et non peribunt in aeternum, et non rapiet eas quisquam de manu mea.* Ergo.

*¶. Dist. min.* Oves Christi praecipuae sunt soli praedestinati, *conc.* Oves omnes absolute, *neg.* In Evangelio igitur nomine ovium aliquando fideles omnes veniunt, licet non sint praedestinati, ut cum Petro dicitur *pascere oves meas Joan. XXI. 17.* neque enim Petrus, ejusve successores praedestinos cognoscere poterant, ut eos pascere. Aliquando vero intelliguntur electi, ut in citato loco, et *Matth. XXV. 33.*

*Inst. 1.* Ex concessis, in laudato *Joannis* loco, nomine ovium veniunt praedestinati. Atqui Christus ait, ovile ex iis tantum ovibus constare. Ergo.

*¶. Neg. min.* Dicit enim Christus, se adducturum oves suas in ovile unum, sed non ait, ex iis ovibus solis constare ipsum ovile.

*Inst. 2°.* Idem est ovile Christi, et domus Christi: utrumque enim Ecclesiam significat. Atqui soli praedestinati sunt domus Christi. Ait enim Apostolus *Heb. III.* *quae domus Christi sumus nos, si fiduciam, et gloriam spei usque ad finem firmam retineamus.* Ergo.

*¶. Dist. min.* Praedestinati sunt domus Christi modo

de quodam perfectissimo, conc. modo quocumque, neg. Hortatur itaque Apostolus fideles ad perseverantiam, docens, eos frustra esse in Ecclesia, nisi in fide, et charitate perseverent, cum soli perseverantes sint perfecti illi lapides vivi, ex quibus construitur domus Dei, in aeternum duratura, Ecclesia scilicet triumphans. Vide *Estium Commentar. in h. l.*

*Objic. II. Ecclesia Cantic. IV. 12. dicitur hortus conclusus, fons signatus, puteus aquarum viventium. Atqui haec solis conveniunt praedestinatis. Augustinus enim Lib. V. de Bapt. Cap. 27. ait: numerus ergo ille justorum . . . de quibus dictum est: novit Dominus qui sunt ejus, ipse est hortus conclusus, fons signatus, etc. Ergo etc.*

¶ *Transseat maj.* Nam ut observat *Bellarminus Lib. III. de Eccl. Cap. 7.* laudatum Canticorum locum quidam de B. Virgine, quidam, etiam probabilius, de anima justi perfecta intelligunt. Sed etsi de Ecclesia tantum intelligi posset, non sequitur, eam ex solis constare praedestinatis. Nam etiam in horto concluso nascuntur vepres, aliaeque inutiles plantae per agricolam evellendae: sicut et fons signatus, et puteus aquarum viventium a sordibus identidem emundandus est. Ceterum etsi hortum conclusum omnino de solis praedestinatis velis intelligere; potest etiam hoc sensu Ecclesia sic appellari, quia solet attribui toti, quod convenit nobiliori parti, sicut solet Respublica appellari dives opum, propter illustriores ejus cives. *Augustinus* autem favet potius nobis, quam adversatur; ait enim, hortum conclusum non significare Ecclesiam universam, sed partem, solos scilicet electos. Quod autem in Ecclesia tota agnoverit etiam reprobos, patet tum ex loco supra laudato, ex tract. *XLV. in Joan.* tum ex aliis.

*Objic. III. Joannes in I. Epist. c. II. 19. ait Ex nobis prodierunt, sed non erant ex nobis; si enim fuissent ex nobis, permansissent utique nobiscum. Et Apostolus II. Tim. II. 19. Firmum, inquit, fundamentum Dei stat, habens signaculum hoc: Novit Dominus qui sunt ejus. Ergo reprobi, de quibus loquitur Apostolus, membra Ecclesiae non sunt.*

¶ *Neg.*

*¶ Neg. cons.* Illud enim *ex nobis*, non significat totam Ecclesiam, sed solos praedestiuatos. Sensus ergo est: prodierunt de medio nostri, h. e. de Ecclesia, in qua erant, sed non erant ex nobis, h. e. ex numero electorum: si enim fuissent ex eo numero, permansissent in Ecclesia nobiscum.

Adde quod advertit Augustinus *Tract. XLV. in Joan. et Lib. de dono persev. c. 8.* saepe homines in Scripturis tales dici, quales nondum sunt, sed futuri praevidentur a Deo, cui omnia praesentia sunt. Sic electi, licet adhuc idololatrae, dicuntur in Scripturis *oves, et filii Dei. Alias oves habeo Joan. X. 16. Ut filios Dei, qui erant dispersi, congregaret in unum, Joan. XI. 52.* Sic igitur reprobi possunt dici *ex nobis*, et *non ex nobis*: *filii Dei*, et *filii perditionis*, *oves*, et *haedi*: oves quidem, filii Dei, *ex nobis* secundum praesentem eorum statum: haedi vero, filii perditionis, *non ex nobis* secundum Dei praescientiam; nam *secundum Dei praescientiam, quam multae oves foris, quam multi lupi intus!*

*Objic. IV.* Ecclesia comparatur a Patribus Arcae Noe, quae fuit ejus figura. At in arca non fuerunt, nisi qui servandi erant a diluvio. Ergo in Ecclesia non sunt, nisi praedestinati.

*¶ Dist. maj.* Comparatur Arcae quoad aliqua, *conc.* Quoad omnia, *neg.* In his ergo Patres comparationem instituunt, 1<sup>o</sup>. quod sicut nemo servatus est a diluvio; nisi qui erat in arca; ita nemo servatur, nisi qui est in Ecclesia. Ita Augustinus *Lib. V. de Bapt. cont. Donatist. Cap. ult.* Hieronymus in *Epist. ad Damas.* et ante eos Cyprianus *Lib. de unit. Eccl.*; 2<sup>o</sup>. quod sicut in arca non solum munda animalia erant, sed etiam immunda, sic in Ecclesia non solum boni sunt, sed etiam mali; non solum electi, sed etiam reprobi: ita Hieronymus *Lib. cont. Luciferian. Cap. 8.* et alii.

## §. VII.

*De justis, et peccatoribus.*

*Adv.* Scribit Bellarminus *Lib. III. de Eccl. Cap. 2.* docuisse *Pelagianos*, Ecclesiam ex solis constare justis, et quidem ita perfectis, ut nullum omnino, ne veniale quidem, peccatum habeant. Sed videtur deceptus ex quodam *Augustini loco Lib. de Haeresib. Cap. 88.* in quo ait, *Pelagianos* asserere ex his hominibus immaculatis Ecclesiam Christi in hac mortalitate perfici. Sed advertendum, aliud esse, Ecclesiam perfici, aliud constare ex hominibus immaculatis. Prius docebant *Pelagiani*; quorum dogmata suo loco refutabimus: posterius nunquam videntur asseruisse. (a)

II, *Novatiani* autem, et *Donatistae* graviorum scelerum reos asserebant, non esse Ecclesiae membra, ut testantur *Cyprianus* de *Novatianis Epist. LII:* et de *Donatistis Augustinus Lib. de Haeres. Cap. 69.*

III. *Lutherani*, ut patet ex *Confessione Augustana Art. VII.* docent, ex solis justis Ecclesiam constare. Idem sentit *Calvinus Lib. IV. Instit. Cap. I. §. 2.* sed quia in ejus systemate nemo justus est, nisi sit praedestinatus, idcirco ex solis praedestinati constare Ecclesiam somniavit, quem errorem supra refutavimus.

IV. Ceterum *Lutherani*, et *Calviniani* duplicem fingunt Ecclesiam, aliam vere, proprieque dictam, eamque ex solis justis coalescere, ideoque invisibilem, solique Deo cognitam esse statuunt; aliam externam, *materialem*, visibilem, quae improprie, si ve per *Synecdochen*, ut explicat *Buddeus Lutheranus*,

N

Eccle-

(a) Videtur quidem Augustinus hanc inseniam ipsis obijcere *Serm. CLXXXI. al. XXIX. de verb. Apost.* Sed ex responsionibus *Pelagianorum*, quas ibidem refutat, videtur arguendo potius id ex illorum haeresi, tamquam absurdum consequens, inferre. Obscura, nec magni momenti res est.

*Ecclesia dicitur, in qua justi simul, et peccatores inveniuntur.*

V. Peccatores illi, qui sunt etiam haeretici, vel schismatici, infideles, excommunicati extra Ecclesiam sunt, ut supra ostendimus. De reliquis ergo hic agimus.

## PROPOSITIO.

*Ecclesia constat ex justis, et peccatoribus etiam scelestissimis, modo non sint haeretici, schismatici, infideles, aut excommunicati. Est dogma fidei.*

*Prob. I. ex omnibus iis parabolis Evangelicis, quibus supra docuimus, Ecclesiam constare ex praedestinatiis, et reprobis. Eae enim probant non solum reprobos, sed et peccatores, utcumque scelestos, esse membra Ecclesiae, ut patet.*

*Prob. II. ex constanti traditione. Cyprianus Epist. LIV. ad Maxim. Etsi videntur in Ecclesia esse sisiaia, non tamen impediri debet aut fides, aut charitas nostra, ut quoniam sisiaia esse in Ecclesia cernimus, ipsi de Ecclesia recedamus. Idem millies inculcat Augustinus in Libris contra Donatistas, tamquam constantissimam universalis Ecclesiae fidem. Et Tract. VI in Joan. Si arca, inquit, figurabat Ecclesiam, videtis utique, quia necesse est, ut in isto diluvio saeculi utrumque genus contineat Ecclesia et corvum, et columbam. Qui sunt corvi? qui sua quaerunt. Qui sunt columbae? quae, quae Christi sunt, quaerunt. . . . Nos fatemur, in Ecclesia bonos, et malos esse, sed tamquam grana, et paleas. Innumera ejusdem S. Doctoris testimonia collegit Hieronymus Torrentis in Lib. I. Confess. August. Cap. 6. §. 7. Hinc Fulgentius Lib. de Fide ad Petrum Cap. 44. Firmissime tene, et nullatenus dubites, arcam Dei esse Ecclesiam catholicam, et intra eam usque in finem saeculi frumento mixtas paleas contineri, hoc est bonos sacramentorum communionem misceri: et in omni professione sive clericorum, sive monachorum, sive laicorum bonos esse simul, et malos etc. Et Gregorius M. Homil. XI. in Evang. Nunc*



Nunc bonos, malosque communiter, quasi commixtos pisces, fidei sagena nos continet.

Denique Ecclesia est visibilis, ut suo loco dicemus. Ergo continet bonos, et malos. Cum enim iustitia, aut pravitas humani cordis videri ab hominibus non possint, si solis iustis Ecclesia constaret, jam esset invisibilis. Commentitia ergo est, et omnibus saeculis inaudita distinctio, quam Novatores obtrudunt inter Ecclesiam visibilem, et invisibilem; cum omnes Patres, imo et ipsa Scriptura, quam solum volunt esse fidei regulam, de una Ecclesia loquantur, quam dicunt esse sagenam, bonos et malos continentem.

*Solvuntur Objectiones.*

*Objic. I. Isaiae XXXV. 8. haec habentur: Non transibit per eam pollutus . . . non erit ibi leo, et mala bestia non ascendet per eam. Et clarius Cap. LII. 1. Non adjiciet ultra, ut pertranseat per te incircumcisi, et immundus. Sed haec de Ecclesia praedicuntur. Ergo etc.*

¶ *Ad 1. Isaiae locum: neg. min.* Non enim ibi sermo est de Ecclesia, sed de via, qua in Ecclesiam, seu in patriam caelestem ascenditur: ait enim: *Et erit ibi semita, et via sancta vocabitur: non transibit per eam pollutus etc.* Fatemur autem, hanc viam esse sanctam, quia ipse Christus de se ait: *Ego sum via:* per quam non ambulant peccatores, non obediunt mandatis ejus: quae mandata etiam dici possunt via sancta, qua itur ad patriam, et per quam peccatores non ambulant.

¶ *Ad 2. Verba illa ad litteram intelliguntur de Jerusalem, per quam praedicat Dominus, post captivitatem non amplius, per longum temporis spatium, transituros incircumcisos, et immundos, qui eam vastent, et evertant, sicut fecere Babylonii. Allegorice autem intelligi possunt etiam de Ecclesia, quae ab incircumcisis, et immundis oppugnabitur quidem, sed numquam delebitur juxta Domini propositionem Matth. XVI. 18. Portae inferi non praevalerunt*

*persus eam.* Itaque *Dist. min.* Praedicuntur de Ecclesia, ita ut immundi non transeant per eam, more victorum, *stantes*, et delentes, *conc.* ita ut nulus in ea sit immundus, *neg.*

*Objic. II.* Apostolus *Ephes. V. 27.* de Ecclesia ait: *Ut exhiberet sibi gloriosam Ecclesiam, non habentem maculam, aut rugam.* Ergo.

*¶. Dist. ant.* In patria caelesti, *conc.* In hoc saeculo, *subdist.* Non habentem maculam, aut rugam propter praecipua, et nobiliora ejus membra, aliasque rationes, quibus Ecclesiam dici sanctam docuimus inferius, *conc.* Propter omnia ejus membra sancta, *neg.* Itaque quod ait Apostolus *Ecclesiam gloriosam, non habentem maculam, aut rugam*, Augustinus passim de Ecclesia triumphante intelligit. Sic *Lib. de perfect. justit. Cap. 35.* Tunc, ait, plena, atque perfecta erit Ecclesia, non habens maculam, aut rugam, aut aliquid hujusmodi, quia tunc erit etiam vere gloriosa. Cum enim non tantum ait, ut exhiberet sibi Ecclesiam, non habentem maculam, aut rugam, sed addidit gloriosam, satis significavit, quando erit sine macula, aut ruga, tunc utique quando gloriosa. Idem docet Hieronymus in *Cap. XXXI. Jerem., S. Thomas 3. P. Q. VIII. art. 3. ad 2.* Potest tamen etiam in hoc saeculo Ecclesia dici sancta, sine macula, propter illustriora ejus membra.

*Objic. III.* *Rom. VIII. 9.* Qui Spiritum Christi non habet, hic non est ejus, et *I. Cor. XII. 13.* In uno spiritu omnes nos in unum corpus baptizati sumus. Sed peccatores Spiritum Christi non habent. Ergo non sunt ejus.

*¶. Dist. min.* Non habent spiritum Christi inhabitantem cum charitate, *conc.* non habent spiritum Christi conservantem eos in fide, quam nondum amiserunt, *neg.* Distinguo etiam *cons.* Non sunt ejus, ut membra perfecta, *conc.* non sunt ejus, ut membra imperfecta, et infirma, *neg.* Hinc Augustinus in *Psalm. XLVII.* Qui sacramenta habent, inquit, et bonos mores non habent, et Dei dicuntur, et non Dei; et ejus dicuntur, et alieni: ejus, propter ipsius sacramentum; alieni, propter proprium vitium.

*Inst.*

*Inst.* Peccatores membra sunt diaboli, imo et filii diaboli. Atqui non potest idem esse membrum Christi, et diaboli. *Quæ enim conventio Christi ad Belial?* inquit Apostolus II. Cor. VI. 15. Ergo nullo pacto sunt membra Christi.

*¶. Dist. min.* Non potest idem esse membrum Christi et diaboli, *sub eodem respectu, conc.* *Sub diverso respectu, neg.* Hæc enim interest inter corpus morale, et physicum, quod in physico corpore non potest unum membrum ad duo corpora, et capita pertinere. At non ita se res habet in corpore morali: potest enim civis proditor *ex gr.* qui cum hoste occulte consilia communicat, pertinere simul ad principem, cui utcumque subjectus esse pergit, et ad hostem, cui animo, et consiliis conjunctus est.

*Inst. 2.* Corpus Christi est vivum; Ergo non potest habere membra mortua, quales sunt peccatores. *Confirmatur.* Ecclesia ab Apostolo comparatur panis, qui ex multis frumenti granis conficitur; *Unus panis,* inquit, *unum corpus multi sumus* I. Cor. X. 17. At panis conficitur ex tritico, quod in scripturis justos significat, non ex paleis; quæ significant peccatores. Ergo etc.

*Neg. cons.* Nam etiam in corpore vivo sunt aliquando membra mortua, antequam præcidantur. Adde, peccatores non esse eo sensu membra mortua, ut nullum a Christo capite influxum recipiant. Retinent enim fidem, quam Christus per gratiam suam in ipsis servat. Ad confirmationem respondeo, similitudines non in omnibus urgendas esse. In hoc ergo posita est comparatio panis cum Ecclesia, quod sicut ex multis granis per aquam fit unus panis, ita ex multis hominibus per baptismum fit unum Ecclesiae corpus, ut explicant *Cyprianus Epist. LXXVI. ad Magnum*, et *Irenæus Lib. III. Cap. 29.*

*Inst. 3.º* Sicut ex *Cypriani* sententia a nobis supra §. 3. laudata non potest habere Deum Patrem, qui non habet Ecclesiam matrem, ita vicissim qui non habet Deum patrem, non potest habere Ecclesiam matrem *Lib. de unit. Eccl.* Atqui peccatores non habent Deum patrem, de quibus dicitur *Joan. VIII. 44. Vos*

*ex patre diabolo estis: et I. Joan. III. 10. In hoc sunt manifesti filii Dei, et filii diaboli: omnis qui non est justus non est ex Deo. Ergo non habent Ecclesiam matrem.*

*¶ Dist. maj.* Qui non habet Deum patrem ullo modo, ut sunt schismatici, et haeretici, de quibus loquitur *Cyprianus, conc.* Qui non habet Deum patrem perfecto illo modo, qui est per gratiam sanctificantem, *neg. Dist.* etiam *min.* Peccatores non habent Deum patrem per gratiam sanctificantem, *conc.* Non habent Deum patrem ullo modo, *neg.* Retinent enim adhuc ejus doctrinam, et fidem, et unitatem cum Ecclesia, ex quibus aliquo modo filii dici possunt.

*Objic. IV.* Ecclesia est sancta. Ergo singula ejus membra sancta sint, oportet. Hinc *Beda in Cap. XXVI. Job.* Ecclesiam vocat congregationem Sanctorum.

*¶ Neg. cons.* Ecclesia enim, ut suo loco explicabimus, dicitur Sancta ratione Christi capitis, doctrinae, Sacramentorum, et praeceptorum ejus membrorum; a nobiliori enim parte denominatio sumi potest. Quod autem ait *Beda*, Ecclesiam esse congregationem Sanctorum, eo sensu intelligendum est, quod extra Ecclesiam nemo sit sanctus; nisi saltem voto ad eam aliquo pacto pertineat, ut cathecumeni.

*Objic. V.* Chrysostomus *Homil. IV. in II. Epist. ad Tim.* docet, Apostolum per magnam domum, in qua esse dicit vasa aurea, et fictilia, non intelligere Ecclesiam, sed mundum: quia, inquit, in Ecclesia nullum vult esse vas ligneum, aut fictile. Ergo.

*¶ Dist. ant.* Nullum vult esse vas ligneum, aut fictile, quasi necessarium Ecclesiae, sicut necessaria sunt in magna domo vasa lignea, et fictilia, *conc.* Nullum omnino, *neg.* Ita seipse explicat Chrysostomus paulo post laudata verba: non itaque, inquit, inter necessarias res malitia est. Mundus autem etiam per malos ex accedenti ornatur. Quod autem S. Doctor, etiam malos esse in Ecclesia, docuerit, patet ex ejus expositione I. in *Psalm. XXXIX.* Nec ex perfectis quidem, inquit, universa constat Dei Ecclesia, sed habet eos etiam, qui otio, et socordiae se dedunt, mol-

lem.

temque, et dissolutam vitam amplectuntur, et libenter serviunt voluptatibus.

*Objic. VI.* Saepe docet *Augustinus*, impios homines, aequae ac haereticos, non esse membra Christi, sed esse extra Ecclesiam; atque inde Donatistas redarguit, eo quod haereticorum rejicerent baptismum, non respicerent verò baptismum sceleratorum hominum, cum utrique ad Ecclesiam non pertineant. Sic *Lib. II. cont. Crescon. Cap. 21.* *Etiam*, inquit, *nesciente Ecclesia, propter malam, pollutamque conscientiam damnati a Christo, jam in corpore Christi non sunt, quod est Ecclesia, quoniam non potest Christus habere membra damnata. Proinde et ipsi extra Ecclesiam baptizant.* Similia alibi repetit. (a) Ergo.

*¶ Dist. ant.* Docet, impios non esse in Ecclesia eo modo, quo Donatistae contendebant, debere aliquem esse membrum Christi, et Ecclesiae, ut *valide* baptizaret, *conc.* Non esse in Ecclesia, nec membra Christi ullo modo, *neg.* Putabant itaque Donatistae, non valere baptismum, nisi minister in Ecclesia sit vivum, ac perfectum Christi membrum, eo quod, inquebant, nemo potest alteri dare quod ipse non habet. Ex quo sequebatur, non minus haereticorum, quam impiorum rejiciendum esse baptismum. Cum ergo illi haereticorum baptismum rejicerent, impiorum vero retinerent; recte eos argumento *ad hominem* refellit *Augustinus*. Ceterum, peccatores esse in Ecclesia, tam saepe, tam luculenter contra Donatistas docuit, et ostendit, ut absurdum sit vel suspicari, eum in contraria fuisse opinione versatum. Vide *Nicolium De unit. Eccl. Lib. I. Cap. 1.*

#### Scholium.

Quamvis fidei dogma sit, peccatores esse Ecclesiae partes; quaestio tamen inter Theologos agitur, utrum proprie dici debeant Ecclesiae membra. Multae

---

(a) *Lib. De unit. Eccl. Cap. 21. Tract. VI. in Joan. 2. Lib. III. De bapt. Cap. 18, et alibi.*

tae enim sunt partes corporis, quae membra dici non possunt, ut humores, dentes, pili. *Joannes de Turrecremata, Melchior Canus, Petrus Soto*, alique docent, peccatores non vere, et proprie dici Ecclesiae membra, laudantque etiam pro hac sententia *S. Thomam*, qui ait, peccatores esse membra *aequivoce* in *III. Dist. 13. q. 2. art. 2. Quaestiunc. 2. ad 2.* Is tamen *3. P. Summae Q. VIII.* videtur id correxisse. At *Bellarminus*, alique docent, vere, et proprie dici debere peccatores membra Ecclesiae. alioquin, inquit, Pastores iniqui non essent vera Ecclesiae membra, cum tamen ipsi sint capita, h. e. membra praecipua.

## C. A. P. V.

*De notis verae Ecclesiae.*

*Adv. I.* Jam in primo libro sola ratione naturali contra incredulos demonstravimus, 1°. religionem Christianam divinitus esse institutam a Christo, et per Apostolos longe, lateque in orbe fundatam; 2°. Extra eam religionem nemini fas esse salutem sperare. Ex quibus primum est colligere, 1°. veram Christi Ecclesiam non posse esse nisi *unam*, quia veritas una est; 2°. non posse esse nisi *Sanctam*, quia Deus nonnisi sanctae religionis potest esse auctor; 3°. non posse esse nisi *Catholicam*, sive *universalem*, quia Deus eam ad omnium hominum salutem fundavit; 4°. non posse esse nisi *Apostolicam*, quia Ecclesia, non fundata ab Apostolis, non potest esse Ecclesia Christi. Hinc etiam ostendimus, *solum Ecclesiam Romanam esse veram Christi Ecclesiam.*

II. At nunc, cum traditionis, et Scripturae veritatem statuerimus, juvat novo molimine rem adgredi, et tribus veluti lucidissimis facibus Scripturae, traditionis, et rationis naturalis exquirere, quatenam sint notae, seu characteres, quibus vera Christi Ecclesia discernatur ab iis, quae falso sibi hoc nomen vindicant, ut tandem contra haereticos omnes con-

clu-

aludamus, eas notas soli Romanae Ecclesiae convenire.

III. *Nota*, seu character verae Ecclesiae debet esse 1.<sup>o</sup> notior ipsa Ecclesia, ut fatentur Haeretici; 2.<sup>o</sup> debet uni, et soli verae Ecclesiae convenire. Si unum ex his duobus desit, non potest aliquid constitui tanquam verae Ecclesiae *nota*.

IV. Quod autem revera sint quaedam notae, seu signa verae Ecclesiae, quae ab omnibus facile videri possunt, docet *Augustinus Tract. I. in Joan.* dicens: *possumus digito demonstrare Ecclesiam Christi, et sunt caeci, qui eam non vident*: et persuadet etiam recta ratio; frustra enim Deus veram fundasset Ecclesiam ad omnium hominum salutem, nisi certis notis, et characteribus eam discrevisset a falsis.

V. Quaeritur ergo, quatenam sint verae Ecclesiae notae. Protestantes, alique Novatores duas statuunt, 1.<sup>o</sup> veritatem doctrinae, 2.<sup>o</sup> rectam administrationem sacramentorum, ut constat ex Confessione *Augustanae Art. VI. Calvino Lib. IV. Instit. cap. 1. § 10.*, aliisque; quae duae ad unam reduci possunt, nempe ad solam doctrinae veritatem. Catholici e contrario docent, esse quatuor, scilicet eas ipsas, quas principio commemoravimus, nempe, ut Ecclesia sit Una, Sancta, Catholica, et Apostolica.

## PROPOSITIO

*Veritas doctrinae, et legitima Sacramentorum administratio, et usus non sunt nota verae Ecclesiae.*

*Prob. I. Nota debet esse clarior, et notior ipsa re, quam inquirimus.* At veritas doctrinae, et legitima Sacramentorum administratio, et usus non sunt notiora, et clariora ipsa Ecclesia, quae inquiritur. Unaquaeque enim secta contendit, se veram tradere doctrinam; recteque administrare Sacramenta. Et ne dicas, per Scripturam cognosci doctrinae veritatem, quae

quacvis secta profert pro dogmate suo Scripturam. Quomodo ergo inter tot dissidentes haereses cognoscant homines, praesertim rudes, et indocti, quanam sit vera doctrina, ut inde sciant, quae vera Ecclesia sit? Spiritus Sanctus, inquit novatores, revelat cuique, praesertim praedestinato, verum Scripturae sensum, ut inde noscat, eam esse veram Ecclesiam, quae sensum illum amplectitur. Sed praeterea quod nemo scit, se esse praedestinatum, ut suo loco docebimus, ideoque nemo scit, utrum ipse fallatur; quaevis novatorum societas a Spiritu Sancto se accepisse jactat sensum Scripturarum: Lutherani ex. gr. a Spiritu Sancto accepisse se putant sensum verborum, quibus Eucharistia est instituta: Zuingliani, et Calvinistae putant, se a Spiritu Sancto accepisse contrarium. Ergo veritas doctrinae non est notior ipsa Ecclesia, quae inquiritur.

*Prob. II.* Nota Ecclesiae non debet nisi soli verae Ecclesiae convenire. At sectae Schismaticorum initio schismatis veram doctrinam, et legitimam Sacramentorum administrationem, sive legitimam eorum materiam, ac formam retinere solent, et tamen vera Ecclesia non sunt. Ergo.

*Prob. III.* Scriptura, et Patres clare docent, non ex veritate doctrinae dignoscendam Ecclesiam, sed ex vera Ecclesia accipiendam esse doctrinae veritatem. Ita Apostolus *Ephes. IV. 11.* docet, divinitus constitutos esse in Ecclesia Pastores, et doctores, ut non circumferamur omni vento doctrinae. Et *Tertullianus Lib. de praescript. Cap. 21.* Quid praedicaverint, inquit, Apostoli, quid Christus illis revelarit, et hic praescribam, non aliter probari debere, nisi per easdem Ecclesias, quas ipsi Apostoli condiderunt. Similia docet *Augustinus Lib. XIII. cont. Faust. cap. 13. Irenaeus Lib. III. cap. 2.* alique.

*Prob. IV.* Si veritas doctrinae constituatur tamquam Ecclesiae nota, lata unicuique patebit via a vera Ecclesia recedendi. Quisque enim nova dogmata producens, eaque verbis Scripturarum, in alienum sensum utcumque tortis, fulciens, calumniari poterit Ecclesiam tamquam verae fidei inimicam.

Tam



Tam longe igitur abest, ut sapientissimus Ecclesiae fundator Deus hanc nobis dederit notam, qua veram Ecclesiam dignoscamus, quin potius haec aptissima esset ratio veram Ecclesiam ignorandi, et obscurandi.

*Objic. cum Molineo.* Nihil cognosci potest, nisi cognoscatur id, quod ad ejus essentiam, et definitionem pertinet. Sed veritas doctrinae pertinet ad definitionem, et naturam Ecclesiae, quam diximus esse coetum hominum viatorum, unius fidei, utique verae, professione etc. copulatum. Ergo non potest cognosci vera Ecclesia, nisi per veritatem doctrinae.

*Neg. maj.* Multa enim cognoscimus, et discernimus a ceteris, licet eorum nondum cognoscamus, imo et ignoremus essentiam. Sic lupum ab ove, aurum a luto per alias visibiles notas primo aspectu discernimus, licet eorum naturam nondum perspectam habeamus.

*Objic. II.* Scriptura est notior Ecclesia; quia per ipsam Scripturam probatur Ecclesia. Hinc *Augustinus Lib. de Unit. Eccl. cap. 3.* Nolo, inquit, hominum documentis, sed divinis oraculis Sanctam Ecclesiam demonstrari: et cap. 2. Ubi sit Ecclesia . . . puto quod potius in illius verbis eam quaerere debeamus, quae veritas est, et optime novit corpus suum. Imo pressius loquens *Chrisostomus Hom. XLIX. in Matth.* ait: Qui ergo vult cognoscere, quae sit vera Ecclesia Christi, unde cognoscat, nisi tantummodo per Scripturas? Ergo.

¶ *Dist. ant. Absolute, et simpliciter, neg. hypotetice*; nempe in hypothese qua quis agnoscat Scripturam, et nolit agnoscere Ecclesiam, *subdist. Remote*, quatenus Scriptura suppeditat notas, quibus vera Ecclesia dignoscatur, *conc. Proxime, Transeat.* Itaque *absolute* Ecclesia notior est Scriptura, tum quia exstabat ante Scripturam; tum quia ab Ecclesia discimus, qui sint genuini Scripturarum libri, quos haeretici pro lubito aut rejiciunt, aut mutilant; tum denique quia non nisi ab Ecclesia discere possumus sensum Scripturae, ubi obscurior est. Sed si quis, Scripturas admittens, Ecclesiam nolit agnoscere, tunc per Scripturam ostendemus ei Ecclesiae veritatem, quia inde discimus notas, quibus vera Ecclesia

sia

sia discernitur. Atque id sibi volunt Patres in Objectione citati: Adverte tamen, auctorem *Operis imperfecti in Matthaeum*, in quo opère est laudata *Homil. XLIX.* non esse *Chrysostomum*, cum multa habeat ex libris apocryphis, nonnulla etiam, ut ait *Tournely*, haeretica, et doctrinae *Chrysostomi* contraria.

*Objic. III.* Symbolum Apostolorum habitum est a Patribus ut tessera, qua fideles ab infidelibus distinguuntur. Ergo doctrina est nota Ecclesiae.

*¶. Dist. ant.* Symbolum est tessera, qua fideles distinguuntur ab infidelibus non Christianis, puta *Judaëis*, *Mahumetanis*, *Idololatræ*, *conc.* qua distinguuntur a sectis haereticorum, et schismaticorum, *neg.* Schismatici enim, et plures haeretici retinuerunt Symbolum, ut *Pelagiani*, *Nestoriani etc.* nec tamen erant vera Ecclesia *Christi*.

*Objic. IV.* Non potest esse vera Ecclesia Christi sine vera doctrina. Ergo veritas doctrinae est ejus nota.

*¶. Neg. cons.* Fatemur in vera Christi Ecclesia veram tradi doctrinam; hinc tamen non sequitur; veritatem doctrinae esse ipsius notam, propter rationes supra explicatas.

## §. II.

### PROPOSITIO.

*Notae Ecclesiae quatuor sunt simul sumtae, nempe ut si Una, Sancta, Catholica, et Apostolica.*

Dicimus autem has esse Ecclesiae notas *simul sumtas*; quia si quaelibet seorsim accipiatur, distinguit quidem Ecclesiam *negative*, ut ajunt, h. e. demonstrat, eam societatem, cui vel una ex his quatuor notis deest, non esse veram Ecclesiam, sed non distinguit *positive*, h. e. non certo demonstrat, societatem, cui una, aut altera ex his notis convenit, veram esse Ecclesiam, nisi omnes simul notae convenient.

*Prob. I.* Ex Simbolo Nicaeno, et Constantinopolitano.

litano Ecclesia ita describitur: *Credo . . . . . unam, Sanctam, Catholicam, et Apostolicam Ecclesiam.* Hae sunt igitur notae, quibus vera Ecclesia discernitur.

*Prob. II.* ratione initio capitis explicata. Ecclesia a Christo divinitus instituta non potest esse, nisi una, sancta, catholica, et Apostolica: et vicissim Ecclesia, quae simul est una, sancta, catholica, Apostolica non potest esse, nisi illa ipsa, quam Christus divinitus instituit. Ergo quatuor istae notae uni verae Ecclesiae a Christo fundatae conveniunt; aliunde sunt notiores ipsa Ecclesia, quam inquirimus, quia, ut dicemus inferius singillatim eas notas expendentes, sunt characteres unicuique attendenti visibiles. Ergo etc.

*Objic.* Inter catholicos non convenit, quatenam sint Ecclesiae notae. Etenim *Augustinus Lib. cont. Epist. fundam.* sex ponit notas Ecclesiae: *Hieronymus Dial. cont. Lucif.* duas. *Lirinensis in Common.* tres. *Bellarminus Lib. IV. de Eccl. cap. 3.* quindecim; alii alias.

*¶. Dist. ant.* Et tamen notae ab omnibus positae reduci possunt ad illas quatuor, *conc.* Non possunt ad eas reduci, *neg.* Hinc *Bellarminus* fatetur, quindecim notas, a se fuse explicatas, ad illas quatuor referri posse, quae communiter a recentioribus proponuntur. Nunc quoniam generatim notas verae Ecclesiae statumus, de singulis seorsim agendum est.

### §. III.

#### *De Unitate Ecclesiae.*

*Ado. I.* Tria hic explicanda sunt; 1.<sup>o</sup> veram Ecclesiam esse unam; 2.<sup>o</sup> qua in re illa unitas sit ponenda; 3.<sup>o</sup> cuinam societati congruat unitas, quae est verae Ecclesiae nota.

*II.* Veram Ecclesiam esse unam, Protestantes fatentur. Licet enim ipsi duplicem fingant Ecclesiam, ut supra docuimus, tamen nomen Ecclesiae vere, et proprie uni justorum collectioni convenire docent. Sed quaerentes, in quo posita sit illa unitas, mirifice

fice a catholicis dissentiunt. Docent enim, praesertim Calvinistae post *Jurium*; Ecclesiae unitatem positam esse in consensione circa articulos fidei fundamentales, ita ut omnes sectae haereticorum, modo in fundamentalibus illis articulis non errent, in unitate Ecclesiae reperiantur, licet implacabile inter se bellum gerant, et se mutuo execrentur, et anathemate percellant. Quo nihil dici poterat absurdius, nosque ex parte supra refutavimus, ostendentes haereticos esse extra Ecclesiam.

## PROPOSITIO I.

*Vera Christi Ecclesia est una, eaque omnes haereticorum, et schismaticorum sectas excludit, nec extra ipsam salus cuiquam speranda est.*  
*Est dogma Fidei.*

*Prob. 1a. pars. I. ex Scripturis, Ecclesia est Sponsa Christi. At Sponsa Christi una est; nam Cant. VI. 8. de ea dicitur: Una est columba mea, perfecta mea. Rursus Ecclesia est corpus Christi. At corpus Christi unum est Ephes. IV. 4. Unum corpus, et unus spiritus, sicut vocati estis in una spe vocationis vestrae. Quod et saepe repetit Apostolus, ut I. Cor. XII. 12. Sicut enim corpus unum est, et membra habet multa; omnia autem membra, cum sint multa, unum corpus sunt; ita et Christus. Etenim in uno spiritu omnes nos in unum corpus baptizati sumus. Demum Ecclesia est ovile Christi. At Christi ovile unum est Joan. X. 16: Fiet unum ovile, et unus Pastor. Ergo Ecclesia Christi una est.*

*Prob. II. ex Traditione. Cyprianus Lib. de Unit. Eccl. Episcopatus unus est, cujus a singulis in solidum pars tenetur. Ecclesia quoque una est, quae in multitudine latius incremento foecunditatis extenditur: quomodo solis multi radii, sed lumen unum: et rami arboris multi, sed robur unum etc. Et in toto eo libro idem argumentum late prosequitur, et Ecclesiam comparans Arcae Noe, tunicae Christi inconsutili, aliisque figuris, ubique ejus unitatem confirmat.*

*Tum*

Tum sub finem sic ait: *Deus unus est, et Christus unus, et Ecclesia ejus, et fides una, et plebs in solidam corporis unitatem concordiae glutino copulata.* Idem demonstrat Augustinus in libris contra Donatistas (a). Ergo etc.

III. Ratio etiam manifesta est. Deus enim unus, et veritas una, non nisi unam Ecclesiam fundare poterat. Unde Augustinus Serm. CIII. al. XXVI. de Verbis Dom. *Deus unus, Ecclesia una, non respondet uni, nisi unitas.* Ergo.

Prob. 2a. pars. I. Ex Scriptura, quae docet, homines haereticos vitandos esse: nullam cum ipsis servandam societatem; ne salutandos quidem, ut supra docuimus. At si omnes haereticorum sectae ad unum Ecclesiae corpus pertinerent; non liceret ipsis societatis officia denegare. Ergo.

Prob. II. Ex constanti Traditione. 1.<sup>o</sup> Irenaeus Lib. III. cap. 4. Ecclesiam omnibus haereticorum sectis opponit: *Apud haereticos, qui fures sunt, et latrones, quaerenda non est veritas, quae in Ecclesia facile invenitur.* At si Ecclesia sectas omnes complecteretur, inepta foret haec antithesis. 2.<sup>o</sup> Tertullianus Lib. de Praescript. cap. 4. haereses comparat Antichristo: *sunt haereses, inquit, non minus doctrinarum perversitate Ecclesiam persequentes, quam tum Antichristus persecutionum atrocitate persequetur.* 3.<sup>o</sup> Hieronymus Dial. cont. Lucifer. haereticos omnes vocat *Antichristi Synagogam.* Et ne singulos appellemus Patres, Concilium Nicaenum Can. VIII. Novatianos, ad Ecclesiam redire cupientes, per manuum impositionem recipi jubet; quod clare ostendit, eos ante ab Ecclesia fuisse sejunctos. Concilium Constantinopolitanum I. Can. 6. de haereticis omnibus sic ait: *Haereticos dicimus et qui olim ab Ecclesia ejecti sunt, et qui sunt postea a nobis anathematizati.* Et Concilium generale V. Act. V. *Si qui se haereticis adjungunt,*

(a) Add. Optatus Mil. L. I. Clemens Alex. L. III. Strom. Origenes L. I. in Job. etc.

gunt, a Sancta Dei Ecclesia anathematizantur, et damnantur. Hi Patres, haec Concilia sine ullo discrimine articulorum fundamentalium, et non fundamentalem haereticos omnes, qui dogmata ab Ecclesia definita oppugnabant; anathemate damnarunt. Ergo.

*Prob. III.* Distinctio articulorum fidei, a Jurio excogitata, non solum Scripturae, quam solam agnoscunt Protestantes ut fidei regulam, verum etiam Patribus omnium saeculorum fuit ignota. Hinc *Cyprianus Epist. LXXIII.* Neque enim, inquit, Dominus noster aliquam spem haereseos designavit, sed omnes omnino haereticos . . . adversarios suos esse ostendit . . . nec ipse ullam haeresim, aut schisma discrevit. Et *Augustinus Enchirid. cap. 6. et lib. de Haeres.* Omnes quoscumque haereticos falso, et nomine tenus, appellari docet Christianos. Ergo rejicienda est.

*Prob. IV.* Ecclesia saepe anathemate perculit haereticos, qui in articulis non fundamentalibus errabant, hoc est qui non errabant circa fidem Trinitatis, et Incarnationis, qui videntur esse fundamentales Jurii articuli; licet hucusque non clare explicaverint Protestantes, quid fundamentalium articulorum nomine intelligant. Ergo.

*Prob. 3a. pars,* quae jam *Lib. I. Cap. 10.* demonstrata est contra *Indifferentistas* sola ratione naturali; nunc autem etiam ex Scripturis, et Traditione ostenditur. *Joan. XV. 6.* Christus seipsum comparat viti, homines autem sibi adhaerentes palmitibus. Tam subjicit: *Si quis in me non manserit, mittetur foras sicut palmes, et arescet, et colligent eum, et in ignem mittent, et ardet.* At qui sunt extra Ecclesiam, non utique sunt palmites ejus vitis, quae Christus est. 2.<sup>o</sup> Ecclesia est ovile Christi, ac proinde qui extra Ecclesiam, extra ovile Christi. At si extra hoc ovile salutem consequi possent, frustra Christus semetipsum tradidisset, ut oves suas in ovile unum congregaret. 3.<sup>o</sup> Ecclesia est corpus Christi; Christus autem est *Salvator corporis ejus. Ephet. V. 23.* Ergo qui extra hoc corpus sunt, a Christo non servantur. Idem probatur ex figuris, quibus Ecclesia adumbratur. Designatur enim, ut alia praetermittamus; per Arcam Noe.

At

At extra Arcam nemo servatus est à diluvio. Ergo nec extra Ecclesiam quisquam salutem consequitur. Hinc Cyprianus Lib. de Unit. Eccl. Si potuit evadere quisquam, qui extra arcam Noë fuit, et qui extra Ecclesiam foris fuerit, evadet.

Prob. II. Ex patribus 1°. Irenaeus Lib. IV. Cap. 33. Judicaturus est, inquit, Dominus, idest damnaturus, eos omnes, qui sunt extra veritatem, idest qui sunt extra Ecclesiam. 2°. Augustinus Serm. ad pleb. coram Emerito; Salutem non potest habere homo, nisi in Ecclesia catholica. 3°. Fulgentius Lib. de fide ad Petr. cap. 39. Firmissime tene, et nullatenus dubites, quemlibet haeticum, sive schismaticum. . . si Ecclesiae Catholicae non fuerit aggregatus, quantascumque eleemosynas fecerit, etsi pro Christi nomine sanguinem fuderit, nullatenus posse salvari. Patres Concilii Carthaginensis IV. et Cytensis id dogma fidei posuerunt ut certum, sicut fuit semper a Patribus habitum. Ergo,

### Solvuntur Objectiones.

Objic. I. Apostolus I. Cor. III. 11. et seq. Fundamentum, inquit, aliud nemo potest ponere praeter id, quod positum est, quod est Christus Jesus. Si quis autem supraedificat super fundamentum hoc aurum, argentum, lapides pretiosos, ligna, foenum, stipulam . . . uniuscujusque opus, quale sit, ignis probabit. Si cujus opus manserit, quod supraedificavit, mercedem accipiet; si cujus opus arserit, detrimentum patietur; ipse autem salvus erit, sic tamen quasi per ignem. Atqui haeretici, non errantes in fundamentalibus, aedificant super fundamentum, nempe Christum, in quem credunt, ligna, foenum, stipulam. Ergo, etsi opus eorum ardeat, ipsi tamen salvi erunt, ac proinde ad Ecclesiae unitatem pertinent.

¶ Neg. min. Licet enim perdifficilis sit iste locus Apostoli; illud tamen certum est, haeticos quoscumque non supraedificare super Christum: nec per ligna, foenum, stipulam intelligi haereses. Illi enim non supraedificant super Christum, qui Christo non credunt. At tales sunt omnes haeretici, utpote qui

oppugnant aliquem articulum à Christo revelatum, et ab Ecclesia propositum. Hinc ipse Christus ait: *qui vos audit, me audit, et qui vos spernit, me spernit.* Praeterea, quomodo haereses, quae falsae sunt, dici possunt superaedificatae super Christum, qui veritas est? Licet ergo haeretici videantur credere in Christum, aliaque dogmata ab eo revelata retinere, revera tamen fidem amiserunt, et nonnisi humana persuasione tenent, quae credere videntur. *Qui autem non credit jam judicatus est.* Joan. III. 18. *condemnabitur,* Marci XVI. 16. Per figura ergo, foenum, stipulam intelligenda veniunt vel peccata venialia, ut exponit Augustinus *De fide, et Operib. cap. 16., et alibi,* et Gregorius M. *Lib. IV. Dialog. i. 34. vel doctrina, non quidem haeretica; haec enim fundamentum destruit, sed plus aequo curiosa, inutilis, vana oblectatione mentes occupans, ut explicant post S. Thomam Liranus, Cajetanus, Estius. Vide S. Thom. Commentur. in h. l.*

*Objic. II.* Vera Christi Ecclesia debet esse ubique terrarum dispersa, ut constat tum ex prophetiis, tum ex ipsa naturali ratione. Ecclesia enim, pro omnium hominum salute divinitus instituta, omnia terrarum loca occupare debet; nisi Deum facere velimus aut personatum acceptorem, aut crudelem. Atqui talis non esset Ecclesia, nisi omnes sectas sinu suo exciperet, et contineret, saltem eas, quae fundamentalia dogmata non evertunt. Ergo.

*R. Conc. maj.* sed nego rationem pro ea allatam; non enim personarum acceptor, nec crudelis, sed justus esset Deus, si vellet omnes homines in peccato suo deserere, et damnare. Quod ergo nolit omnes perdere, sed aliquos servare, misericordiae ejus est: quod autem Petrum salvet, *Neronem* deserat, pertinet hoc ad inscrutabilia judicia ejus. Igitur, *concessa majore, neg. min. 1º.* Quia licet Ecclesia sectas omnes excludat; tamen ubicumque sunt haeticorum sectae, ibidem catholici permixti sunt; ideoque si Ecclesia sectas omnes comprehenderet, esset quidem numero plenior, sed non esset diffusa latus. *2º.* Quia quicumque in omnibus sectis baptizan-



tur infantes, in verae Ecclesiae inseruntur, et in ea permanent, donec ad aetatem adultam pervenientes, voluntarie adhaerent haeresi, in qua nati sunt. 3°. Quia licet non eodem tempore, tamen successive per omnes orbis partes Ecclesia pervagata est, quod sufficit, ut nemo eam ignorare possit.

Alias objectiones supra dissolvimus, cum probavimus, haereticos esse extra Ecclesiam.

## PROPOSITIO II.

*Non solum unitas fidei, sed etiam unitas regiminis Ecclesiastici requiritur, et sufficit, ut Unitas sit nota Ecclesiae.*

*Prob.* Requirit unitatem fidei, jam in prima propositione demonstratum est.

*Prob. 2. pars.* Christus Joan. X. 16. unitatem Ecclesiae constituit in unitate pastoris; *Fiet unum ovile, et unus pastor.* Et Apostolus I. Cor. XII. 12. unitatem Ecclesiae comparat cum unitate humani corporis ex multis membris compositi. Atqui multa membra ideo unum corpus componunt, quia omnia inter se per omnem juncturam connexa, uni capiti subsunt, a quo reguntur, et moventur. Eandem regiminis unitatem in veteri Ecclesia, nempe in Synagoga constituit Deus. Ergo etc.

*Prob. II. ex Traditione.* Patres omnes in eo Ecclesiae constituunt unitatem, quod unica in ea sit *cathedra*, quo nomine doctrina simul, et regimen intelligitur. Cyprianus Lib. de Unit. Eccl. Ut unitatem manifestaret, unam cathedram constituit, et unitatis ejusdem originem ab uno incipientem sua auctoritate disposuit. 2°. Optatus Milevitanus Lib. II. cont. Parmenian. In qua una cathedra unitas ab omnibus servaretur, ne ceteri Apostoli singulas unusquisque defenderent, ut jam schismaticus, et peccator esset, qui contra singularem cathedram alteram constitueret. 3°. Hieronymus cont. Jovin. Inter duodecim unus eligitur, ut capite constituto, schismatis tollatur occasio.

*Prob. III. ratione Augustini Serm. CIII. al. XXVI.*

*De verbis Dom. Non potest, inquit, fieri, ut Ecclesia sit una, nisi isti multi, qui recte credunt, in unitatem quandam Ecclesiastici corporis coalescant. Da ergo unum, et populus est, tolle unum, et turba est, quid enim est turba, nisi multitudo turbata? Hanc vero fidelium sic cohaerentium unitatem charitas facit, quo eo ipso laeditur, et corpus laceratur, quo membra pertinaciter incipiunt vel diversa credere; vel eadem credendo, seorsim ab illo toto separata sibi conventicula constituere: illud haeresis, quae sine schismate esse non potest; hoc proprie dictum schisma facit. Ergo.*

*Prob. 3. pars. Illa unitas sufficit, in qua sunt duae conditiones, quas supra diximus requiri ad constituendam Ecclesiae notam, nempe ut sit notior re quaesita, et illi soli conveniat. Atqui, licet Ecclesiae unitas multis ex capitibus oriatur, scilicet 1°. ab unitate Christi capitis: 2°. ab unitate auctoris, nempe Dei: 3°. ab unitate finis, nempe spei aeternae salutis: 4°. ab unitate Spiritus, qui Ecclesiam vivificat, et regit: 5°. ab unitate fidei, et sacramentorum: 6°. ab unitate regiminis; sola tamen fidei, et regiminis unitas habet conditiones duas supra requisitas. Nam 1°. haec sola visibilis est, reliqua videri non possunt. 2°. Vera Christi Ecclesia hac fidei, et regiminis unitate carere non potest; et vicissim haec fidei, et regiminis unitas, si cum aliis notis conjuncta sit non potest nisi soli verae Ecclesiae convenire. Ergo sola unitas fidei, et regiminis sufficit ad adstruendam hanc Ecclesiae notam.*

#### *Corollarium.*

*Ergo Ecclesia illa interior, invisibilis, quam Protestantes, alique novatores fingunt compositam ex solis justis per varias sectas dispersis, fictitia est. Patres enim in vera Christi Ecclesia requirunt unitatem tum fidei, tum regiminis Ecclesiastici. At illa Ecclesia interior, et invisibilis neutram habet unitatem.*

## PROPOSITIO III.

*Protestantium, aliorumque Novatorum societates non habent eam unitatem, quae est verae Ecclesiae: nota: Imo ipsi manifestè schismatis convincuntur.*

*Prob.* Unitas illa duobus in rebus sita est, ut paulo ante diximus, in unitate scilicet fidei, et regiminis. Atqui Protestantium societates neutram habent. 1°. Non habent unitatem fidei, si enim omnes simul sectas accipias *Lutheranos, Calvinistas, Zwinglianos, Arminianos, Gomaristas, Presbyterianos, etc.* incredibilis est inter eos in rebus gravissimis varietas opinionum, ut patet non ex privatis eorum scriptis, in quibus fere tot sententiae sunt, quot capita, sed ex publicis fidei professionibus, quas hucusque ediderunt, quasque simul edidere fratres *Choret* Genevae anno 1612. Si vero singulas seorsim sectas sumas, tanta est dogmatum inconstantia, et varietas, ut unaquaeque secta varias variis temporibus fidei professiones composuerit, ut egregie prosequitur *Bossuet in Histor. Variat.* imo vero singuli suam fidem habere videantur, cum praecipuum dogma apud ipsos invaluerit, solam Scripturam esse fidei regulam, et privatum uniuscujusque spiritum esse ejus interpretem. Porro haec doctrinae varietas est de articulis fidei *fundamentalibus*, ut ex. gr. de *praesentia reali corporis Christi in Eucharistia*, quod dogma adeo capitale est, ut ipsi omnes hucusque vires intenderint, quo secum hac in parte convenirent, quod fieri non potuit; imo Calvinistae propter hanc fidem catholicos appellant *idololatrias*.

2°. Non habent etiam unitatem regiminis. Si enim omnes sectas simul accipias, patet, nullam inter eas esse societatem, cum se mutuo execrentur. Si vero singulas seorsim accipias, manifestum est, unamquamque sectam in varias partes pro variis regnis, et rebus publicis esse divisam; nec unam partem cum altera esse connexam, ut unum ex omnibus fiat corpus.

pus. Imo cum ipsi Protestantes doceant, religionem esse sub omnimoda Principum potestate, ut contendit *Pufendorfius Lib. de habitu relig. Christ. Buddeus Theol. Moral. P. 2. cap. 3.* aliique passim; hinc factum est, ut eorum societates, variis principibus mancipatae, varia constituerint corpora. a se mutuo sejuncta. Ergo cum Protestantium societates non habeant unitatem fidei, nec unitatem regiminis, patet, eas carere unitate illa, quae nota est verae Ecclesiae.

*Prob. 2. pars.* Illi sunt rei manifesti schismatis, qui manifesta rebellione ab unitate verae Ecclesiae recesserunt. Atqui tales sunt Protestantes ac Novatores omnes. Ipsi enim recesserunt ab Ecclesia Romana, nec alteri se Ecclesiae adjunxerunt, sed constituerunt novam. Quo posito: aut Ecclesia Romana eo tempore erat vera Ecclesia, aut aliqua altera. At Novatores a Romana Ecclesia recedentes, nullius alterius Ecclesiae communioni se adjunxerunt. Ergo manifeste sejuncti sunt ab unitate verae Ecclesiae, sive haec erat Ecclesia Romana, sive quaecumque alia.

*Prob. II.* Illi sunt manifeste schismatici, quorum Pastores manifeste in ministerium irruperunt sine ulla missione. Nam missionem necessariam esse statuit Apostolus *Heb. V. 4.* *Nemo sumit sibi honorem*, inquit, *sed qui vocatur a Deo tanquam Aaron*: idque suadet recta ratio: alioquin enim cunctis impostoribus pateret aditus: nec ipsi adversarii diffitentur. At Protestantium aliorumque Novatorum Pastores *Lutherus, Calvinus, Zwinglius etc.* sive ulla missione in sacrum ministerium irruperunt. Si enim missionem habuissent, ea vel fuisset ordinaria, vel extraordinaria. Sed neutram habuerunt. 1°. non habuere ordinariam; hanc enim vel ab Ecclesia Romana, vel ab aliqua alia Ecclesia habere debuissent. At non eam habuerunt ab Ecclesia Romana; tum quia haec illos anathemate perculit, tum quia juxta illos non erat vera Ecclesia, ac proinde non poterat dare alteri missionem, quam nec ipsa habebat. Nec habuerunt ab aliqua alia Ecclesia; quia nulli alteri Ecclesiae se ad-

jun-

junxerunt. Ergo ordinariam missionem nullo pacto habuerunt.

2°. Nec habuere missionem extraordinariam, scilicet *immediate* à Deo. Missio enim extraordinaria miraculis, et prophetiis probanda est, ut in primo Libro ostendimus. Hinc *Tertullianus*: *Nemo*, inquit, *veniens ex alterius auctoritate, ipse eam sibi ex sua affirmatione defendit. Lib. III. cont. Marcion. cap. 2.* et in libro *de Praescript.* hoc argumento omnium haereticorum ora obstruit: *Volo igitur, inquit, eorum virtutes (a) proferri. Sic enim Deus solet Apostolos facere, dare illis virtutem eadem signa edendi, quae et ipse. De praescript. cap. 30.* Atqui Protestantes, alique Novatores nulla adhuc patrare potuerunt miracula. Ergo nec ordinariam, nec extraordinariam missionem habuerunt, ac proinde manifesti schismatis rei sunt; et tantum abest, ut habeant unitatem, quae est nota verae Ecclesiae, quin potius ipsi ab unitate verae Ecclesiae discesserunt (b).

*Objic. Lutherus* legitimam praedicandi missionem ab Romana Ecclesia habuerat. Cum enim Regulares jamdiu à S. Pontificibus privilegium haberent praedicandi, etiam inconsultis Episcopis, ipse vero à Joanne Staupitio Superiore suo ad praedicandum fuisset incitatus, nihil ei ad legitimam missionem videretur defuisse. Idem de *Zwinglio* dicas, qui Pastoris munereungebatur, ideoque ei praedicandi officium negari non poterat. Ergo.

¶ *Dist. ant.* Habuerunt isti ab Ecclesia munus praedicandi doctrinam Ecclesiae Romanae, *conc.* Praedicandi secessionem ab Ecclesia, novamque instituendi societatem, nova dogmata, quae jam olim ab Ecclesia damnata erant, mores novos, novum Sacerdotium, idque etiam postquam Ecclesia omnem iis, si quam habebant, praedicandi potestatem et praeceptis, et excommunicatione ademitt, *neg.*

PRO-

(a) h. e. miracula.

(b) Vide aureum opus D. Nicole *Prejuges legitimes et Les pretendus Reformés convaincus de schisme*. Paris 1740. Perron *De la Mission*.

## PROPOSITIO IV.

*Ecclesia Romana, habet unitatem, quae est verae Ecclesiae nota.*

*Prób.* Unitas haec duo complectitur; doctrinam, et regimen. At Ecclesia Romana utramque unitatem habet. 1°. Habet doctrinae unitatem. Cum enim Ecclesiae doctrina non ex privatorum scriptis, sed ex publicis ipsius Ecclesiae definitionibus sit petenda; manifestum est, omnia Romanae Ecclesiae membra eandem doctrinam tenere; si quis enim talibus definitionibus contradicit, jam ab Ecclesia Romana est excommunicatus, et expulsus.

2°. Habet etiam unitatem regiminis. Omnes enim fideles subjecti sunt parochis (vel Episcopis, ubi parochia nulla esse potest) parochi Episcopis; hi Archiepiscopis, Archiepiscopi Patriarchis, Patriarchae Romano Pontifici. Itaque totum Romanae Ecclesiae corpus, licet longe, lateque per unversum orbem dispersum, tamen compactum, et connexum est per omnem juncturam subministrationis. Ergo cum Ecclesia Romana habeat unitatem fidei, et regiminis, habet utique unitatem illam, quae verae Ecclesiae nota est.

*Objic.* In ipsa Romana Ecclesia mira est, pro Scholarum varietate, Theologorum dissensio. Thomistae, Scotistae, Augustiniani, Molinistae, Congruistae, Eclectici, varia docent, imo aliquando unius scholae Theologi alterius scholae adversarios violatae integritatis fidei accusant ut ex. gr. Thomistae in Congregationibus de Auxiliis Molinistas tanquam Pelagianos accusabant; hi vero, ut Thomistis vicem rependerent, eos Calvinismi insimularunt. Ergo.

¶ *Dist. ant.* Est dissensio in rebus fidei, siue ab Ecclesia definitis, neg. In rebus nondum definitis, et quae, salva fide, qua Christiani sumus, disputari possunt, *subdist.* Est dissensio, sed cum debita animi praeparatione obediendi judicio Ecclesiae, quam omnes agnoscunt ut supremum judicem controversiarum,

rum; conc. secus neg. Itaque doctrina Ecclesiae non ex privatorum opinionibus, sed ex publicis Ecclesiae judiciis, ut paulo ante diximus, petenda est, quae judicia in tantam conspirant unitatem, ut nullum reperiatur alteri contrarium. Sed ante Ecclesiae definitionem licet Doctoribus varie opinari, modo tamen adversariis nullam censuram impingant, nisi forte arguendi gratia, ut faciebant Thomistae in *Congregationibus de Auxiliis* antequam *Paulus V.* id in ea causa vetaret.

At in Protestantium aliorumque Novatorum societatibus contra accidit, cum enim ibi quisque privatus sit supremus controversiarum iudex, merito iis etiam privatorum dissidia, quae ex eo principio ortum habent, objicerentur. Sed nos id non facimus, cum habeamus publicas eorum fidei professiones maxime discordes, et secum contrarias.

## PROPOSITIO V.

*Orientalium societates, a Romana Ecclesia sejunctae, unitatem non habent: imo schismaticae sunt.*

*Prob.* Eae societates vel sunt haeticorum, a Constantinopolitano Patriarcha sejunctorum, puta *Nestorianorum, Jacobitarum. etc.* vel sunt Graecorum, Patriarchae Constantinopolitano adhaerentium. At neutrae unitatem habent. Non priores; sectae enim illae jam olim ab unitate Ecclesiastica excommunicatae, et resectae sunt a Conciliis Oecumenicis ejus Ecclesiae, quam ipsi haetici ante suum schisma ut veram Ecclesiam agnoscebant.

Sed nec posteriores. Illi enim aperti schismatis revincuntur, qui discesserunt, et quidem sine causa; ab unitate ejus Ecclesiae, quam ipsi, omnibus saeculis ante schisma, ut centrum unitatis agnoverant, imo ut talem agnoscebant eo ipso tempore, quo ab ea recedebant. Atqui tales sunt illae Graecorum societates. Constat enim 1°. Graecos ante *Photium* per octo saecula agnovisse Romanam Ecclesiam ut centrum unitatis: 2°. *Photium*, qui primus fuit auctor di-

discessionis, viventem *Ignatium* Episcopum Constantinopolitanum e sede sua expulisse, ejusque locum occupasse; 3°. Eundem *Photium*, cum non potuisset a *Nicolaio I.* Romano Pontifice, quem ut centrum unitatis agnoscebat, impetrare suam in Episcopatu confirmationem, indicto conciliabulo, ab ejus communione recessisse.

Illud etiam constat, Graecos sine ulla causa secessionem fecisse a Romana Ecclesia; tum quia Patres semper schisma ut maximum malum habuerunt; unde *Augustinus Lib. II. cont. Epist. Parmen. Cap. 11. praescindendae*, inquit, *unitatis nulla est justa necessitas*; tum quia causae, quas Graeci obtendebant, erant vel res ad disciplinam pertinentes, ut *ex. gr.* quod Latini Sabato jejunarent; quod Eucharistiam in azymo conficerent etc. vel merae calumniae, ut *ex. gr.* quod aqua pro chrismate uterentur; vel res laudabiles, quas Graeci imitari potius, quam reprehendere debuissent, ut *ex. gr.* quod continentiam Sacerdotibus imponerent, quod Spiritum S. a Patre, Filioque procedere profiterentur.

Accedit, quod in tribus Oecumenicis Conciliis, nempe Constantinopolitano IV. Lugdunensi II. et Florentino, ipsimet Graeci Episcopi professi sunt, Romanam Ecclesiam esse unitatis centrum, a qua discesserant; et cum ea ter in gratiam restituti, conjunctique sunt, sed ter iterum aperte rebellaverunt. Ergo tantum abest, ut Orientalium societates, a Rom. Ecclesia disjunctae, unitatem habeant, quin potius manifesti schismatis revineantur (a).

#### Corollarium.

Ergo cum nulla alia societas, praeter Romanam Ecclesiam, habeat unitatem, quae est verae Ecclesiae nota, sequitur, nullam aliam esse posse veram

Ecc.

---

(a) Vide Le Quien *Panoplia adversus Graecos*.



Ecclesiam. Nam, ut supra diximus, nulla societas, cui deest vel una ex quatuor recensitis Ecclesiae notis, vera Ecclesia esse potest.

#### §. IV.

##### *De Sanctitate Ecclesiae.*

*Adv.* In hoc etiam articulo tria quaerimus 1°. utrum sanctitas sit nota verae Ecclesiae: 2°. in quo sita sit; 3°. qui societati conveniat.

#### PROPOSITIO I.

*Ecclesiam Christi esse sanctam, est dogma fidei, ideoque sanctitas est nota verae Ecclesiae*

*Prob.* Ephes V. 25. ait Apostolus: Christus dilexit Ecclesiam, et tradidit semetipsum pro ea, ut eam sanctificaret. Et alibi Hebr. XIII. 12. Propter quod et Jesus, ut sanctificaret per suum sanguinem populum, extra portam passus est. Et Petrus I. Epist. II. 9. Vos autem genus electum, regale Sacerdotium, gens sancta, populus acquisitionis. Imo ipse Christus Joan. XVII. 19. Pro eis, inquit, sanctifico meipsum, ut sint et ipsi sanctificati in veritate. Ergo societas, cui sanctitas non convenit, vera Christi Ecclesia esse non potest, aliunde vera sanctitas non potest esse, nisi in vera Ecclesia. Ergo.

#### PROPOSITIO II.

*Sanctitas, quae est nota Ecclesiae, non in eo sita est, ut nullam habeat maculam, nec ut omnia membra habeat sancta, sed in sanctitate professionis, et praecipuorum ejus membrorum.*

*Prob.* 1. pars. Quamdiu hanc mortalem vitam vivimus ad omnes homines, quamvis sanctos, pertinet illud Joannis I. Epist. cap. I. 8. Si dixerimus, quia pec-

*peccatum non habemus, ipsi nos seducimus, et veritas in nobis non est, ut fusc docebimus Lib. VII. ubi dicemus de Gratia. Ergo.*

*Prob. 2. pars.* Ecclesia militans complectitur bonos, et malos, sicut area frumentum, et paleas, ut supra contra Donatistas, et Protestantes, aliosque Novatores ostendimus. Ergo.

*Prob. 3. pars.* Illa sanctitas requiritur, et sufficit, quae est notior ipsa Ecclesia, et cuique visibilis, nec potest alteri, nisi verae Ecclesiae convenire, si quidem cum aliis conjuncta sit. Atqui sanctitas professionis, et praecipuorum membrorum talis est; 1°. sanctitas professionis facile ab omnibus cognosci potest: quisquis enim attendit ad societatis alicujus finem, praecepta dogmatica, et moralia, statim cognoscet, utrum professio ejus sanctitati adversetur; 2°. sanctitas plurium membrorum, licet ipsa per se conspici non possit, cum sit interior, tamen per opera ipsa in nonnullis saltem Ecclesiae membris extrinsecus se prodat; unde Christus *Matth. VII. 20 Ex fructibus, inquit, eorum cognoscetis eos.* Aliunde si vera sanctitas extra veram Ecclesiam esse posset, frustra Deus veram Ecclesiam Christi sanguine fundasset. Ergo sanctitas professionis, et praecipuorum membrorum requiritur, et sufficit ad constituendam Ecclesiae notam.

#### *Scholion.*

Licet Ecclesia sancta sit non solum ob sanctitatem professionis, et plurium ejus membrorum, verum etiam, imo et praecipue ob sanctitatem capitis Christi, et Spiritus, qui ab ipso capite in omnia membra diffunditur secundum *operationem in mensuram uniuscujusque membri*, aliis tribuens gratiam sanctificantem, aliis perseverantiae donum, omnibus fidem; tamen cum haec sanctitas, et spiritus diffusio non sit visibilis, nisi in effectibus, scilicet operibus membrorum; qui ab hoc Spiritu aguntur; ideo ad notam Ecclesiae sufficere diximus sanctitatem professionis, et plurium membrorum.

PRO-

## PROPOSITIO III.

*Neque Protestantium, aliorumque Novatorum, neque Orientalium societates a Romana Ecclesia sejunctas esse habent sanctitatem, quae est verae Ecclesiae nota.*

*Prob. I.* Illae societates manifestum schisma profitentur, ut supra docuimus. Atqui schisma maximum malum est, ut passim Patres docent. Vide *Cyprianum de Unit. Ecclesiae*, et *Augustinum* in libris contra Donatistas. Ergo eorum professio sancta non est.

*Prob. II.* de sectis Protestantium, aliorumque Novatorum speciatim. Illae societates non habent sanctitatem; quae profitentur dogmata impia, et praecepta bonis moribus adversa. At tales sunt Novatorum societates. Docent enim; Deum praedestinare homines ad malum, esse causam peccati, non minus esse opus Dei prodicionem Judae, quam conversionem Pauli, divina praecepta esse impossibilia, singula opera; etiam bona, justorum esse peccata, justitiam semel acceptam amitti non posse, non esse invocandos Sanctos, non jejunandum, non observanda vota; et quis omnia enumeret errorum portenta partim in veteribus haereticis jam damnata; partim recens ab ipsis inventa?

Ergo cum Novatorum, et Orientalium societates professionem sanctam non habeant, et ab unitate Ecclesiae discesserint; merito quidem ipsis objicimus vitia, scelera, et probra plurium membrorum suorum, praesertim fundatorum; ut *Lutheri*, *Zwinglii*, *Calvini*, quos constat, non fuisse sanctos, sed impios, et scelestos, in reprobam sensum traditos; ea enim vitia a professione ipsa mala oriuntur. Quae cum dolore commemoramus, non ut ipsis insultemus, sed ut tandem oculos aperiant. E contrario, si quae in nonnullis apparent bona opera, ea non possunt esse verae sanctitatis signa, sicut nec quaedam opera infidelium ex objecto bona. Hinc *Augustinus, Epist. CXLII. al. CLII. Quisquis, inquit, a catholica Ecclesia fue-*

*fuert separatus, quantumlibet laudabiliter se vivere existimet, hoc solo scelere, quod a Christi unitate disjunctus est, non habet vitam, sed ira Dei manet super eum.*

#### PROPOSITIO IV.

*Ecclesia Romana eam Sanctitatem habet, quae est verae Ecclesiae nota.*

*Prob. I.* Ecclesia Romana habet sanctitatem tum professionis, tum praecipuorum ejus membrorum 1.<sup>o</sup> Habet sanctitatem professionis, finis enim ejus est, ut abjectis diaboli nequitiis, et saecularibus desideriis, Deo ex toto corde serviamus, et placeamus, eique perpetua charitate conjungamur. Adjumenta vero ad hunc finem habet sanctissima, praecepta scilicet dogmatica, et moralia: dogmatica quidem, quia nihil proponit credendum, nisi quod in Scriptura, et perpetua Sanctorum Patrum traditione continetur: moralia vero, quia quidquid praecipit eo spectat, ut vitia vel minima caveamus, et virtutes omnes excolamus. Sanctum habet sacrificium, sacramenta sancta, sanctas solemnitates.

2.<sup>o</sup> Habet etiam membra sanctitate illustria: primo ejus fundatores, Apostolos scilicet, Apostolicos viros, aliosque sanctitate, miraculis, martyrio celeberrimos; ejus enim hodierni Pastores, ut infra docebimus, perpetua serie talibus viris succedunt. Post hos innumerabilem multitudinem sanctissimorum hominum in sua communione defunctorum, *Athanasios, Basilios, Gregorios, Ambrosios, Augustinos*, aliosque innumeros martyres, virgines, confessores, quos ipsi Protestantes vel inviti admirantur, nec ulla vitii alicujus calumnia labefactare queunt. Neque hi fuere tantum antiquitus, sed eorum perpetua series ad nostra usque tempora, etiam post schisma Protestantium, decurrit, ut legendo vitas, et acta sanctorum quilibet saltem ex parte potest cognoscere.

Fuerunt etiam in Ecclesia Romana novissimis temporibus viri Apostolici, qui religionem Christianam praec-

praedicatione, et sanguine in India, America, et remotissimis regionibus propagarunt. Fuerunt, innúmeri, in sanctorum numerum relati, post rigidissimum examen virtutum, et miraculorum, quae in confirmationem falsae sanctitatis fieri non possunt. Adde societates, sodalitia, congregationes tum virorum, tum mulierum, ad omnia virtutum genera excolenda, a viris sanctissimis institutas, in quibus semper homines Evangelica perfectione illustres floruerunt, et florent.

*Prob. II.* Est aliqua hodie in terris vera Ecclesia, quae habeat spiritum sanctitatis, qui nascenti Ecclesiae datus est, ut in ea maneret in aeternum. Atqui talis non est ulla societas sejuncta a Romana Ecclesia, ut in *Prop. II.* demonstravimus, sed talis est Ecclesia Romana, quae perpetua serie, ut infra docebimus, est eadem illa, cui Spiritus S. datus est. Ergo, etc.

*Solvuntur Objectiones.*

*Objic. I.* In Ecclesia Romana plures sunt mali, quam boni. Inter ipsos R. Pontifices multi numerantur pessimi, quorum longam seriem Protestantes ediderunt. Ergo potius dici deberet mala, quam sancta.

*R. Transeat ant. neg. cons..* Dixi transeat antecedens, quia cum ad Ecclesiam pertineant omnes infantes in omnibus etiam haereticorum sectis baptizati, qui utique sancti sunt; profecto si iis adjungantur etiam sancti, qui in adulta aetate sunt in Ecclesia Romana, fortasse major numerus exurget sanctorum, quam malorum. Sed licet concedatur, majorem esse malorum numerum, non sequitur, Ecclesiam dici posse malam. Denominatio enim a nobiliori parte deducitur, sicut civitas dicitur dives a multis, qui in ea locupletes sunt, licet major sit numerus egenorum, praesertim cum professio ipsa sancta sit. A qua professione si qui Pontifices recesserunt (quod de nonnullis fatemur, de aliis haereticorum calumniam esse dicimus) ipsi quidem sibi nocuerunt, aliisque pri-

privatis, at Ecclesiae sanctitatem adimere non poterant.

*Objic. II.* Ipsa Ecclesia in Conciliis Oecumenicis ingenue professsa est, se indigere reformatione, ut in Concilio Lateranensi IV. Constantiensi, Basileensi. Ergo ejus professio sancta non est.

¶ *Dist. ant.* Professsa est, se indigere reformatione in iis, quae pertinent ad dogmata fidei, et morum, *neg.* In iis, quae pertinent ad disciplinam, *subdist.* quia ipsa Ecclesia approbaverat antea disciplinam intrinsecus malam, *neg.* quia a privatis introducti fuerant abusus, quos Ecclesia corrigi exoptat; pro temporum tamen opportunitate, *conc.* Responsio patet ex ipsa distinctione.

*Objic. III.* In Ecclesia Romana multi *Casuistae* impune docent *Probabilismum*, et innumera errorum portenta contra bonos mores. *Contensonus* enim excurrens per omnia praecepta Decalogi demonstrat, nullum esse, quod non fuerit perversis nonnullorum *Casuistarum* doctrinis labefactatum. Ergo.

¶ *Neg. cons.* Doctrina enim Ecclesiae non a privatorem scriptis, sed a publicis ipsius Ecclesiae judiciis petenda est. Falsas autem *Casuistarum* doctrinas Ecclesia non probat, sed vel jam damnavit, vel pro temporum opportunitate damnatura est.

## §. V.

### *De Ecclesiae Catholicitate.*

*Adv. I.* Tria quoque in hoc articulo disputabimus. 1.<sup>o</sup> utrum *catholicitas*, ut ajunt, sit Ecclesiae nota. 2.<sup>o</sup> in quo sita sit. 3.<sup>o</sup> Cui societati conveniat.

II. *Catholicum καθολικον*. Graeci dicunt quod est *universale*. Catholica igitur Ecclesia idem est, ac Ecclesia universalis. In quo autem sita sit haec Ecclesiae universitas, dissentiunt a Catholicis novatores. Volunt enim isti, Ecclesiam ideo duntaxat dici universalem, quia non est ad unius gentis salutem instituta, ut olim Synagoga, sed ad salutem omnium hominum, ita ut omnes sanctos sinu suo comple-

plectatur, et nemo extra illam salvus esse possit. Cumq. hæc Ecclesiae proprietas non sit diversa ab Ecclesiae unitate, nec sit visibilis, nec notior ipsa Ecclesia, sequitur, apud illos catholicitatem non esse Ecclesiae notam.

III. Contra Catholici, licet concedant, Ecclesiam esse etiam eo sensu universalem, quia ad omnes gentes, ad omnia tempora, ad omnia dogmata se extendat; contendunt tamen, eo praecipue sensu Ecclesiam esse catholicam, quod cum una sit, tamen moraliter per universum orbem sit diffusa, unde Pacianus *Epist. I. ad Simpronian.* catholicum interpretatur ubique unum: atque hanc diffusionem, moraliter universalem, dicunt esse verae Ecclesiae notam.

# PROPOSITIO I.

*Veram Christi Ecclesiam esse catholicam, est dogma fidei; ideoque Catholicitas est verae Ecclesiae nota.*

*Prob. I.* In veteris Testamenti prophetiis Ecclesia Christi praedicatur eo sensu universalis. Promisit enim Deus Abrahae *Genes. XXII. 18.* *In semine tuo benedicentur omnes gentes*, quae promissio rursus Isaac, et Jacob facta est *Genes. XXVI. et XXVIII.* Hoc autem semen esse Christum docet Apostolus *Galat. III. 16.* Et Isaias *Cap. XLIX. 8.* de Christo hæc clare vaticinatur: *Et dixit Dominus: parum est, ut sis mihi servus ad suscitandas tribus Jacob, et facies Israel convertendas. Ecce dedi te in lucem gentium, ut sis salus mea usque ad extremum terrae.* Et clarius etiam Malachias *Cap. I. 11.* *Ab ortu solis usque ad occasum sacrificatur, et offertur nomini meo oblatio munda, quia magnam est nomen meum in gentibus, dicit Dominus.* Idem saepe repetitur in Psalmis, ut *Ps. II. Postula a me, et dabo tibi gentes haereditatem tuam, et possessionem tuam terminos terrae.* Ipse Christus idem praedicat *Luc. XXIV. 46.* et *Act. I. 8.* Ergo illa societas, quæ hanc universitatem, quæ praedicta est a Prophetis, per totum orbem non habet, non potest esse Ecclesia Christi. Et vicissim illa societas,

P

quæ

quae, eam habet universitatem, si quidem alias etiam tres notas habeat; non potest non esse vera Christi Ecclesia; ac proinde *Catholicitas* eo sensu explicata est nota verae Ecclesiae. Legendus est *Augustinus*, qui fuse ex Scripturis de hac re pertraciat in *Libro de Unit. Eccl. contra Donatistas*.

*Prob. II.* Patres ita constanter docent, catholicitatem, nostro sensu acceptam, esse Ecclesiae notam, ut inde probent contra haereticos, et schismaticos, eorum societates veram Christi Ecclesiam non esse. Duos commemorasse sufficiat. Optatus Milevitanus *Lib. II. cont. Parmenian.* Si apud vos, inquit, tantummodo Ecclesiam esse vultis; apud nos non erit, nec in Hispania, in Italia, in Gallia, in Graecia, nec per tot innumerabiles insulas, et ceteras provincias, ubi vos non estis. Ubi ergo proprietas catholici nominis? cum unde Ecclesia dicta sit catholica, quod sit ubique diffusa. Et *Augustinus Tract. III. in Epist. Joan. Teneamus haereditatem Christi: illi haeretici eam non tenent; non enim communicant orbi terrarum; non communicant universitati redemptae sanguine Christi*, Idem alibi repetit; et ex professo tractat *Lib. de Unit. Eccl. cap. 6. et seqq.* Ergo etc.

### *Objectiones solvuntur.*

*Obje. I.* Ecclesia in sui exordio catholica non fuit in sensu exposito; quia angustis Jerosolymorum limitibus continebatur, cum Apostoli praedicare coeperunt, et tamen erat vera Christi Ecclesia. Ergo *catholicitas* non est verae Ecclesiae nota in sensu superius explicato.

■ *Neg. cons.* Cum enim ex Prophetiis lumen Evangelii ab Jerusalem in omnes gentes diffundendum esset, quia de Sion, ait *Isaias, exibit Lex, et verbum Domini de Jerusalem*; sequitur, eam non potuisse uno actu oculi universitatem illam obtinere, sed sufficit, ut brevissimo tempore obtinuerit. Nam *Paulus* adhuc vivens scribit ad *Colossenses I. 7. Pervenit ad vos*  
ver-



*verbum veritatis Evangelii, sicut in universo orbe, te fructificat, et crescit, sicut in vobis.*

*Inst.* Nota non potest a re notata divelli. Ergo.

*¶ Dist. ant.* Si oriatur ab ipsa rei natura, *cons.* ita est unitas, Sanctitas, Apostolicitas Ecclesiae. Si oriatur a libera Dei voluntate, *neg.* Porro Deus ita voluit, Ecclesiam esse catholicam, ut a parvis initiis inciperet. Accedit, quod nota catholicitatis Ecclesiae divinitus data est, ut eam non tam a paganis, qui, nascente Ecclesia, per orbem universum diffusi erant, quam a sectis haeticorum distinguat. Porro cum Apostoli Hierosolymis praedicare coeperunt, haetici erant nulli. Cum autem haetici in aliquibus terrarum angulis prodire inceperunt, jam Ecclesia totum orbem, teste Apostolo, pervagata erat.

## PROPOSITIO II.

*Nulla Societas a Romana Ecclesia divisa  
est catholica.*

*Prob.* Eae societates vel sunt Protestantium, aliorumque Novatorum, vel Graecorum, aliorumque Orientalium. Atqui neutrae dici possunt catholicae. Non Protestantium aliorumque Novatorum. Si enim singulas eorum sectas accipias, *Anglicanos, Calvinistas, Zwinglianos, Lutheranos,* constat, eas exiguum Europae partem occupare. Si omnes simul velis accipere, licet tunc non efficiant corpus unum, ac proinde ridicule dicerentur catholicae, cum una secta alteram excludat; tamen neq. sic sumtae catholicae dici possunt. Etenim in Occidente quidem notae sunt; in Oriente toto non cognoscuntur, nisi forte ut sectae haeticorum occidentaliu.

Neque Orientalium societates catholicae dici possunt. Si enim singulas seorsim haeticorum sectas, puta *Nestorianorum, Eutychianorum etc.* accipias, manifestum est, eas angustissimis quarundam provinciarum Asianarum limitibus coërceri. Si vero sumere velis Graecos omnes schismaticos, Patriarchae Constantinopolitano subjectos; nonnisi impudenter

catholicae Ecclesiae vocabulum iis attribues. Non solum enim in Oriente ipso a Mahometanis Tyrannis in angustos redacti sunt terminos, sed etiam nullam habent in Africa, nullam in America Ecclesiam, paucas in Europa. Ergo cum neque Protestantes, neque Graeci catholicitatem habeant, sequitur, nullam societatem a Romana Ecclesia seunctam esse catholicam.

*Prob. II.* Argumento, quo utitur *Augustinus*, alii-que Patres contra haereticos sui temporis. Si peregrinus aliquis ingressus urbem, ubi haeretici cum catholicis libertate religionis utuntur, interroget haereticum, ubinam sit Ecclesia catholicorum, nemo haereticus ei Ecclesiam suam demonstrabit, nisi velit fallere. Ergo ex ipsa eorum confessione patet, Ecclesiam suam non esse catholicam.

### PROPOSITIO III.

*Ecclesia Romana catholica est.*

Nomine Romanae Ecclesiae intelligimus Ecclesias omnes, quae cum Romana communicant, quae est centrum unitatis (a).

*Prob. prop.* Illa Ecclesia est catholica, quae moraliter per totum orbem est diffusa, licet non omnes homines ejus veritatem velint agnoscere. Atqui talis semper fuit, et est modo Ecclesia Romana. Fuit quidem semper talis. Nam Patres priorum saeculorum, ut *Irenaeus*, *Tertullianus*, *Cyprianus*, *Optatus*, *Augustinus* constanter objecerunt haereticis, Ecclesiam Romanam per universum orbem esse diffusam, quod non ob-

---

(a) Quid ideo notamus, ut dissolvamus putidissimam *Beda* dei Lutherani cavillationem; qui aserit contradictionem involvere Ecclesiam Romano-catholicam; quia, inquit, Ecclesia Romana significat Ecclesiam particularem Romae fundatam, catholica vero universalem. Quo quid miserabilius excogitare poterat?

objecissent contentiosissimis, et perversissimis haereticis, si falsum fuisset.

Est vero etiam modo haec Ecclesia universalis. Nam 1<sup>o</sup>. hodierna Romana Ecclesia est eadem illa, quam Patres catholicam praedicarunt, nec unquam ab ea per haeresim, aut schisma defecit; 2<sup>o</sup>. viget etiam modo in quatuor mundi plagis, in Asia, in Africa, in America, in Europa. In Asia reperiuntur in omnibus provinciis Sultano subjectis Romanae communionis fideles (licet schismatici numero excedant) nec non apud Indos, Persas, Sineses, Siameses, et in omnibus ferme insulis Oceani orientalis. In Africa fuit quidem Romana Ecclesia olim florentissima, nunc autem a barbaris occupata illa regione, habet etiam ibi sua membra, suos fideles. In America longe, lateque diffusa est per omnes regiones Hispanis, Lusitanis, Gallis subjectas, imo etiam in regionibus a Protestantibus occupatis non desunt catholici. Denique in Europa maximam partem occupat, et diffusa est per omnia omnino regna, etiam ea, in quibus praevaluerunt Protestantes. Est enim catholica Ecclesia in Italia, Hispania, Gallia, Germania, Hollandia, Anglia, Hibernia, Dania, Svecia, Russia. Ergo Ecclesia Romana fuit semper, et est modo catholica.

*Confutantur Objectiones.*

*Objic. I.* In multis terrarum regionibus non floret. Romana Ecclesia, ut in Anglia, Hollandia, Svecia, Dania, apud Graecos; Aegyptios, Abyssinos, aliasque Africae, et Asiae regiones. Ergo non est catholica.

¶ *Neg. cons.* Nam, ut sit catholica, non requiritur, ut omnes homines ejus veritatem agnoscant, et amplectantur, sed sufficit, ut moraliter sit ubique diffusa, licet ubique patiatur persecutionem adversariorum, in majori numero eam insectantium, ut accidit sub Imperatoribus Idololatri.

*Inst.* Sunt etiam nonnullae regiones, in quibus nulli omnino sunt catholici. Ergo.

¶ *Trans.*

*¶. Transeat ant. Neg. cons.* Etenim ut Ecclesia sit catholica non requiritur, ut in omnibus omnino vel minimis terrae angulis reperiat. Sic *Augustinus* haereticis constanter objicit Romanae Ecclesiae catholicitatem, licet ipse saepe fateatur, esse aliquas terrae regiones, in quibus Evangelium nondum erat praedicatum. Sufficit ergo, ut moraliter per omnes orbis cogniti partes diffusa sit, sive ut maximam orbis terrae partem occupet.

*Objic. II.* Certum est, Romanam Ecclesiam integra regna, et gentes amisisse. Ubi sunt enim modo tot Ecclesiae Africanae, Asianae etc.? In ipsa Europa nonne plures provinciae, immo et integra regna a communione Romana recesserunt, Svecia, Dania, Anglia, magna Germaniae, et Helvetiorum pars? Ergo si Patribus licuit Romanam Ecclesiam appellare catholicam, id hodie non licet; cum videamus pauca regna Romanae sedi esse conjuncta.

*¶. Dist. ant.* Certum est amisisse integra regna omnino, ut nulli in eis remanserint catholici, *neg.* Amisisse ex parte, hoc est desiisse in eis florere, ut prius, *Subdist.* Et tamen eodem tempore nova regna acquisivit, *con.* Secus, *neg.* Itaque licet in multis Orientis, et Occidentis regionibus non sit ita florens, et quodammodo dominans Romana Ecclesia, ut prius erat; non tamen omnino in iis defecit. Immo cum aliqua gens a Romana communione defecit, accessit nova. Sic deficientibus Arianis conversi sunt Saraceni, Aethyopes, Iberi: deficientibus Graecis Schismaticis, Hungaria, Svecia, Dania, Norvegia Romanae Ecclesiae adjecta est: Lutheranis, et Calvinistis rebellantibus, ad Indos, Japonenses, Sinenses, Brasilianos, Peruvianos, aliosque Americae populos Romana Ecclesia invecta est. *Aufertur* enim a nonnullis *regnum Dei, et datur genti facienti fructus ejus. Matth. XXI. 43.* cum praesertim in sola Romana Ecclesia, tamquam in corpore vivo, sit ardens illud studium seipsam semper augendi, et propagandi per Apostolicos *Missionarios*, quod non est in sectis haereticorum, quae, tamquam membra mortua, ibi putrescunt, ubi a corpore ressecla sunt.

## §. VI.

*De Apostolicitate Ecclesiae.*

*Adv. I.* Veram Christi Ecclesiam debere esse Apostolicam, diffitetur nemo. Per Apostolos enim Christus Ecclesiam suam fundavit. Sed quid requiratur, ut societas aliqua dicatur Apostolica, controversia est inter haereticos, et catholicos.

*II.* Haeretici enim omnes contendunt, requiri solam doctrinam Apostolicam, ut inde inferant, Ecclesiam suam esse Apostolicam, quia falso jactant, se docere quod docuerunt Apostoli.

*III.* Catholici fatentur, veram Christi Ecclesiam doctrinam Apostolicam tenere; sed docent *Apostolicitatem*, (ut ita dicam) quae nota est verae Ecclesiae, non in doctrina; sed in successione non interrupta Pastorum ponendam esse; ita ut non ex doctrina Apostolica cognoscatur, quatenam sit Ecclesia Apostolica; sed potius ex Ecclesia, quae serie perpetua Pastorum succedit Apostolis, cognoscendum sit, quatenam doctrina sit Apostolica.

*IV.* Igitur in hoc articulo quaeremus, ut in superioribus fecimus, 1°. utrum Apostolicitas sit Ecclesiae nota; 2°. in quo sita sit; 3°. cui societati conveniat.

## P R O P O S I T I O I.

*Apostolicitas est verae Ecclesiae nota.*

*Prob. I.* Patres ex eo probant, haeticorum societates non esse veram Christi Ecclesiam, quod non sunt Apostolicae. Ita *Tertullianus* in *Libro de Praescriptionibus*, *Optatus Milevitanus*, *Augustinus*, alique, quorum textus infra recitabimus. Ergo.

*Prob. II.* Cum Christus non nisi per Apostolos Ecclesiam suam fundaverit, non potest esse vera Christi Ecclesia, quae non est Apostolica; et vicissim Ecclesia Apostolica, si habeat etiam alias notas, unita-

tatem, sanctitatem, catholicitatem, non potest non esse vera Christi Ecclesia. Ergo Apostolicitas est nota verae Ecclesiae.

## PROPOSITIO II.

*Apostolicitas, quae est Ecclesiae nota, non est sita in doctrina Apostolica.*

*Prob. I.* Schismaticae societates initio schismatis saepe retinent doctrinam Apostolicam, et tamen dici non possunt Ecclesiae Apostolicae. Ergo.

*Prob. II.* Nota debet esse notior re, quam quaerimus; atqui doctrina Apostolica non est aliquid notius ipsa Ecclesia; omnes enim haereticorum sectae contendunt, se doctrinam profiteri Apostolicam. Ergo.

*Prob. III.* Patres docent, non ex doctrina cognoscendam esse Ecclesiam Apostolicam, sed ab Ecclesia Apostolica accipiendam esse doctrinam Apostolorum. Imo docent, haereticos, proferentes pro se Scripturas, non esse audiendos; quia cum Scriptura sit Ecclesiae patrimonium, quod ipsa accepit ab Apostolis, quicumque Scripturam pro se profert, repellendus est tamquam fur, nisi prius ostendat, Ecclesiam suam esse Apostolicam; quemadmodum in jure non est audiendus, qui ex chirographo alteri surrepto aliquid sibi deberi contendat, nisi prius ostendat, chirographum esse suum. Sic *Tertullianus Lib. de praescript. Cap. 37.* postquam fuisse hoc tractavit argumentum concludit: *Constat ratio propositi nostri definientis, non esse admittendos haereticos ad ineundam de Scripturis provocationem, quos sine Scripturis probamus ad Scripturas non pertinere.* Similia docent *Pacianus Epist. III. ad Simpron.* *Chrysostomus Homil. IX. in Epist. ad Ephes. alique.* Ergo.

## PROPOSITIO III.

*Apostolicitas Ecclesiae sita est in successione legitima, et non interrupta Pastorum, perveniente usque ad Apostolos.*

*Prob. I.* Patres in hac legitima, et perpetua successione Apostolicitatem Ecclesiae positam esse docent. Sic 1.<sup>o</sup> Tertullianus de Praescript. Cap. 32. Si quas (haereses) audent se interserere aetati Apostolicae, ut ideo videantur ab Apostolis traditae . . . possumus dicere: Edant ergo origines Ecclesiarum suarum; evolant ordinem Episcoporum suorum ita per successiones, ab initio decurrentem, ut primus ille Episcopus aliquem ex Apostolis, vel Apostolicis viris, qui tamen cum Apostolis perseveraverit, habeat ductorem, et antecessorem. Hoc enim modo Ecclesiae Apostolicae census suos deferunt. Sicut Smyrnaeorum Ecclesia Polycarpum ab Joanne collocatum refert: sicut Romanorum Clementem a Petro ordinatum edit etc.

2. Idem docet Irenaeus Lib. IV. Cap. 26., al. 43. Eis, qui sunt in Ecclesia, Presbyteris obaudire oportet iis, qui successionem habent ab Apostolis, sicut ostendimus, qui cum Episcopatus successione charisma veritatis certum secundum placitum Patris acceperunt: reliquos vero, qui absistunt a principali successione, et quocumque loco se colligunt, suspectos habere, vel quasi haereticos, et malae sententiae, vel quasi schismaticos, et elatos, et sibi placentes.

3.<sup>o</sup> Hinc etiam Optatus Milevitanus Lib. II. cont. Parmenian. sic provocat haereticos: Vestrae cathedrae originem reddite, qui vobis vultis Sanctam Ecclesiam vindicare. Quod et facit Augustinus tum in libro de Unitate Ecclesiae, tum alibi saepissime contra Donatistas. In Psalmo contra partem Donati sic ait: Nūmerate sacerdotes vel ab ipsa Petri sede, et in ordine illo Patrum quis cui successit, videte. Et in Libro contra Epist. fundam. cap. 4. Tenet me (in catholica Ecclesia) ab ipsa Sede Petri, cui pascendas oves Christus  
Do-

*Dominus tradidit, usque ad praesentem Episcopatum successio Sacerdotum; Ergo.*

*Prob. II. ratione.* Omne ens successivum, ut Scholae ajunt, unitatem suam amittit, si paulisper successio abruptatur. Sic si corpus motum parumper quiescat, et iterum deinde moveatur, posterior hic motus non est unus et idem cum primo, sed novus, atque diversus, quo iterum cieri incipit. Atqui Ecclesia est corpus successivum, quia primis Pastoribus, aliisque Ecclesiae membris defunctis alii succedunt. Ergo si vel minimum abruptatur haec successio, licet denuo corpus componi videatur; non erit hoc illud idem corpus, illa eadem Ecclesia, quam Christus per Apostolos fundavit, sicut si omne genus humanum diluvio periisset, profecto homines, qui nunc sunt, non essent ex stirpe Adami, licet eandem habeant humanam naturam.

#### PROPOSITIO IV.

*Protestantium, et Orientalium societates, a Romano Ecclesia sejunctae, non sunt Apostolicae.*

*Prob. 1. pars.* Protestantium aliorumque Novatorum societates non habent successionem Pastorum, continua serie pervenientem usque ad Apostolos. Nam *Lutherus, Calvinus, Zwinglius*, primi societatum illarum fundatores, nulli Apostolico Episcopo successerunt, sed ipsi semetipsos Pastores societatum suarum fecerunt; immo *Calvinus* laicus Ecclesiasticum ministerium usurpavit. Ergo etc. Idem dicas de quacumque societate haereticorum sive Orientalium, sive Occidentalium; si enim numerent Pastorum suorum successionem, ubi ad primum sectae auctorem pervenerint, ex. gr. *Nestorium, Euthychen, Socinum* etc. ulterius progredi non possunt. Ubi ergo erat Ecclesia Calviniana, Lutherana, Nestoriana, Eutychniana etc. ante *Lutherum, Calvinum, Nestorium* etc.? Nusquam profecto; nam si alicubi fuisset, illi Ecclesiae se adjunxissent. Sed ipsi nulli se Ecclesiae ad-

jun-



junxerunt, sed instituerunt novam. Ergo eorum societas Apostolica non est.

*Prob. 2. pars.* speciatim de Graecis Patriarchae Constantinopolitano adhaerentibus. Illorum societas non sunt Apostolicae, quae manifesti schismatis convincuntur. Atqui tales sunt societates Graecorum, Patriarchae Constantinopolitano adhaerentium, ut supra demonstravimus §. II. Quod argumentum rursus contra Protestantium etiam societates urgeri potest. Ergo.

*Solvuntur Objectiones.*

*Obje. I.* Pro societatibus Protestantium aliorumque Novatorum. In veteri lege Deus identidem suscitavit Prophetas, qui extirparent abusum in Ecclesiam irreperentes; nemo autem dixerit, Prophetas, et qui iis adhaerebant, recessisse ab Ecclesia Mosaica. Atqui vetus haec erat quaerela virorum doctriina, et pietate illustrium, irrepsisse scilicet graves in Ecclesiam abusum. *Quis mihi det;* inquit *Bernardus Epist. CCXXVIII. ad Eugen. antequam moriar videre Ecclesiam Dei sicut in diebus antiquis?* quod desiderium reformandae Ecclesiae testata sunt etiam tria Concilia OEcumenica Lateranense IV. Constantiense, et Basileense, et tamen nemo tot malis radicibus extirpandis manus umquam admovebat. Ergo Deus ipse in nova lege suscitavit Protestantium duces ad renovandam Ecclesiae faciem, et reformandos abusum, nec proinde eorum societates dicendae sunt ab Ecclesia Apostolica recessisse.

*Dist. maj.* Suscitavit Prophetas ad mutandum sacerdotium vetus, novumque instituendum, *negō.* Ad corrigendos abusum, salvo semper ordine, et successione sacerdotum, quos elegerat Dominus, *Subdist.* Et simul dedit Prophetis, illis signa manifesta suae divinae missionis, extraordinariae, *conc.* Nulla dedit extraordinaria signa, *negō.* Itaque Prophetae numquam ausi sunt attrectare sacra, expellere ministros Aaronicos, novumque ordinem sacerdotum instituire: quod si fecissent, profecto nova societas, ab ipsis

ipsis collecta, non fuisset amplius Mosaica; *translato enim Sacerdotio, necesse est, ut et legis translatio fiat*, inquit Apostolus *Heb. VII. 12.* Praedicabant igitur tantum, et insectabantur peccata populi, in primis idololatriam; inmo hanc ipsam praedicandi missionem divinam esse probabant non solum vitae sanctitate, verum etiam signis extraordinariis prophetiae, et miraculorum. Deus enim ipse *Deuteron. XVIII. 22.* signa statuerat, quibus veri a falsis prophetis discernentur.

At contra Novatores in Ecclesiae sacerdotium tanto furore insurrexerunt, et debacchati sunt, ut, quos potuerunt, Sacerdotes necaverint, reliquos in fugam egerint, novumque sacerdotium a seipsis incipiens instituerint; sine ullo Episcopali caractere novos ministros ordinaverint; doctrinam Ecclesiae rejecerint; antiquas haeresees, jam olim damnatas, ab inferis revocaverunt; sanctissimas Ecclesiae leges, et instituta, quasi essent abusus, conculcaverint. Ad haec autem facienda quaecumque signa suae extraordinariae missionis praetulerunt? imo vero omnes characteres, quibus Pseudoprophetae depinguntur a Petro *Epist. II. Cap. 2.* ipsis optime quadrant.

*¶ 2. Dist. etiam min.* •Erat vetus querela abusuum, in Ecclesiam irrepentium, circa dogmata fidei, et morum, *neg.* Circa disciplinam, *subdist.* Et tamen certum fixumque erat dogma, non recedendum ab unitate Ecclesiae Apostolicae propter abusus, sed potius Deum orandum, ut daret Ecclesiae opportunitatem eos corrigendi, *conc.* Secus, *neg.* Itaque sancti illi viri, qui de abusibus conquerebantur, sanam esse fatebantur Ecclesiae Romanae doctrinam circa fidem, et mores. Abusus a privatis invecos, non ab Ecclesia probatos; circa disciplinam, deplorabant; sed tamen docebant post *Cyprianum*, et *Augustinum*, non recedendum ab agro Domini propter palcas etc. Nomine autem abusuum non intelligebant, nisi malas bonae disciplinae corruptelas. At contra Protestantes totam Ecclesiae doctrinam, tamquam falsam

re-

rejecerunt, ipsam Ecclesiam Satanæ synagogam vocarunt, atque ab ea aperto schismate discesserunt, et nomine abusuum intellexerunt res bonas, et laudabiles, ut cultum Sanctorum, jejunia, vota, coelibatum, et cet. Propter hæc autem scelera non injuste, sed merito ab Ecclesia Apostolica, adhibitis prius frustra omnibus patientiæ, et lenitatis argumentis, paternisque admonitionibus, excommunicati, et resecti sunt.

*Inst.* Romana Ecclesia veros illos abusos, de quibus tot erant querimoniae, numquam extirpare voluit nec in Concilio Constantiensi, nec in Basileensi etc. Ergo non sunt reprehendendi Protestantes, qui illos correxerunt, cum publicis malis, ex quibus multorum sequitur ruina, ut incendio, unusquisque possit, ac debeat adhibere remedium.

*R. Dist. ant.* Numquam voluit, quia non potuit, nec erat opportunum ob multitudinem hominum malorum, atque potentium, qui eos abusus fovebant, *conc.* Quia eos probabat, *neg.* Itaque saepe Ecclesia tolerare debet zizania in medio tritici, ne, eradicans zizapia, eradicet simul et triticum. Quare *neg. cons.* Si enim liceret privatis praetextu abusuum expellere magistratus, occupare ministerium, longe majora orirentur mala, quam ipsi abusus, qui extirpandi dicuntur. Quod profecto accidit Protestantibus. *Nego* etiam *suppositum*, quia, ut supra diximus, Novatores non abusus extirperunt, sed laudabiles, ac sanctas Ecclesiae leges praetextu abusuum abrogarunt.

## PROPOSITIO V.

*Sola Ecclesia Romana Apostolica est.*

*Prob.* Sola Ecclesia Romana successionem habet non interruptam Pastorum, usque ad Apostolos pervenientem; ut patet enumeratione Pastorum cujusque Ecclesiae, quæ cum Romana communicat. Ipsa enim particularis Ecclesia, quæ Romæ est, habet perpetuam Pontificum seriem, sibi legitime succedentium usque ad Petrum. Reliquæ Ecclesiae, quæ cum illa communicant, habent singulae Episcoporum suorum

series, pervenientes ad aliquem Romanum Pontificem, qui Ecclesiae illi primum dedit Episcopum: et per hunc R. Pontificem ascendit usque ad Petrum. Atqui in nulla societate, quae ab Romana Ecclesia sit divisa, talis est pastorum successio. Ergo sola Romana Ecclesia Apostolica est.

*Obje.* In magno Schismate Occidentis, cum tres simul veluti Pontifices Romani de Papatu contendebant, interrupta est series summorum Pontificum. Immo vero saeculo IX. R. Pontificum series, atque successio interrupta est, cum *Leone IV.* mortuo, impudica quaedam mulier virili habitu ad R. Pontificatum erecta est, dietaque *Joanna Papissa*, quae sedit annis duobus, mensibus quinque, diebus quatuor, ut referunt *Martinus Polonus, Sigebertus, Marianus Scotus, Platina*, aliique. Ergo.

*W. Neg. ant.* Licet enim tres simul se gererent tamquam Pontifices, unus tamen erat verus, et legitimus; licet non omnes fideles clare cognoscerent, quis esset ex tribus, atque ideo in tres veluti communionem Ecclesia scissa videretur. Sed etsi daremus, quod falsum est; nullum ex iis verum fuisse Pontificem, non ideo successio abrupta esset, sicut non abrupta, cum mortuo legitimo Pastore, tempus aliquod excurrit, ut novus, et legitimus eligatur.

Quod vero ad putidissimam *Joannae Papissae* fabulam attinet, sciendum est, eam contra omnium coaevorum historicorum fidem post annos fere ducentos fuisse confictam, nec solum a Catholicis *Allatio, Bellarmino, Baronio, Panoinio, Mabillonio*, sed ab ipsis heterodoxis *Blondello, Curcellaeo* aliisque evidenter explosam, nec nisi impudenter, ac stulte adhuc a quibusdam Protestantibus narrari, ut in *Dictionary Hist.* observat *Baellius*. Sed etsi eam concederemus adversariis, nihil aliud inde sequeretur, nisi vacasse tunc Sedem Apostolicam donec legitimus *Leonis IV.* successor electus est *Benedictus III.*

#### Corollarium.

Ergo sola Romana Ecclesia est vera Ecclesia Christi, quia sola habet simul quatuor notas verae Ecclesiae.

*Scho-*

## Scholion.

Demonstrari etiam potest, Romanam Ecclesiam esse Apostolicam ratione Apostolicae doctrinae, haeticorum vero societates, etiam ratione doctrinae, non esse Apostolicas. Nam Ecclesiae Romanae doctrina antiquior est doctrinis omnium haeticorum, nec ullum notari potest tempus, quo Romana Ecclesia doctrinam Apostolorum mutaverit, atque corruerit; imo si quae novitas invecia esset, non potuisset omnes simul Ecclesias sine contradictione pervadere. Cum e contra-rio notari facile possit tempus quo haeticorum dogmata disseminari coeperint; imo statim ac spargi coeperunt, vox antiquae fidei iis contradixerit. Quod de Protestantibus praesertim in singulis Theologiae Tractatibus demonstrabimus. Sed hoc argumentum, a doctrina petitum, contra haeticos non adhibemus, quia brevius, et facilius iis ora obstruimus, demonstrantes, eorum Ecclesias Apostolicas non esse, quia successionem non habent ab Apostolis.

## CAP VI.

## De Ecclesiae Proprietatibus.

**E**cclēsiae proprietates, sive dotes praecipuae, tres sunt, *visibilitas*, *perpetuitas*, sive *indefectibilitas*, et *infallibilitas*, ut ajunt.

## §. I.

## De Ecclesiae visibilitate.

*Adv.* Protestantes, alique Novatores, ut supra diximus, duplicem distinguunt Ecclesiam; alteram vere, et proprie dictam, eamque ex solis justis, sive (ut addit *Calvinus*) praedestinatis compositam, et invisibilem; alteram vero improprie ita dictam, eamque fatentur ex bonis, malisque hominibus coalescere, et esse visibilem. Id eo consilio faciunt, ut omnes Christi promissiones, Ecclesiae factas, ad solam invisibilem Ecclesiam coarctent; atque ita asserere possint, Ecclesiam Protestantium extitisse ante Lutherum, et Calvinum, sed fuisse invisibilem. Hoc igitur haeticorum effugium praeccludendum est.

PRO-

## PROPOSITIO.

*Ecclesia Christi vere, et proprie dicta, semper visibilis est, hoc est videri, et discerni potest a falsis sectis. Est dogma fidei.*

*Prob. I.* Scriptura cum de Ecclesia absolute loquitur, nec ulla subest ratio eam intelligendi in sensu inapproprio, semper eam describit ut coetum visibilem. Sic *Isaiae II. 2.* praedicat Dominus: *Erit in novissimis diebus praeparatus mons domus Domini in vertice montium, et elevabitur super colles, et fluent ad eum omnes gentes.* Hic primo describitur Ecclesia, adeo conspicua, ut mons supra verticem montium erectus; deinde praedicatur talis, ut omnes gentes ad eam confluere possint, quod fieri non posset, si esset invisibilis. Et Christus *Matth. XVIII. 17.* fratrem frustra correptum ad Ecclesiam deferri jubet: *Dic Ecclesiae: si Ecclesiam non audierit, sit tibi sicut ethnicus, et publicanus;* quomodo autem id fieri posset, si non esset Ecclesia sole clarior, et conspicua etiam idiotis, ad quos etiam pertinet Christi praeceptum?

Practerea Apostolus congregans Episcopos Ecclesiae Ephesinae, sive Asianae; monet ut sibi et universo dominico gregi attendant: *Attendite vobis, et universo gregi, in quo vos Spiritus S. posuit Episcopos regere Ecclesiam Dei;* *Act. XX. 28.* cui autem gregi attenderent, quam Ecclesiam pascere, si haec visibilis non esset? Sic etiam *Act. XVIII. 22.* dicitur Paulus salutasse Ecclesiam. Ergo etc.

*Prob. II. ex Patribus.* 1°. Origenes *Homil. XXX. in Matth. Ecclesia*, inquit, *plena est fulgore ab Oriente usque in Occidentem.* 2°. Cyprianus *De unit. Eccl. Ecclesia Domini luce perfusa est; per totum orbem radios suos porrigit.* 3°. Augustinus id saepe inculcat contra Donatistas, ex visibilibus characteribus probans, Catholicorum Ecclesiam esse veram (a). Et in *Tract. I. in*

(a) *Lib. II. cont. Petil. Cap. 32. Lib. de Unit. Eccl. Cap. 25. Lib. III. cont. Epist. Parmenian. Cap. 5. Epist. XLVIII. Psal. XLIV, et XLVII. et al.*

in Epist. Ipan. n. 231, post recitata Scripturarum testimonia, quae Ecclesiam ostendunt, esse visibilem; Numquid, inquit, non sic digito ostendimus Ecclesiam, fratres mei? Nonne aperta est? nonne tenuit omnes gentes? nonne impletur quod ante tot annos praedictum est Abrahae, in semine ejus benedici omnes gentes? Ecce mons implens universam faciem terrae. Ecce civitas, de qua dictum est: non potest civitas abscondi supra montem posita, Ergo etc. *Prob. III. ratione.* Deus ita Ecclesiam fundavit ad omnium salutem, ut nemo extra illam salvus esse possit, quod supra ostendimus. Ergo sapientiae, et bonitatis ejus erat, ut eam redderet semper omnibus visibilem, atque conspicuam.

*Solvuntur Objectiones.*

*Objic. I.* Ecclesia redditur invisibilis. 1.º in persecutionibus infidelium, et haereticorum; tunc enim fideles omni studio latitant. 2.º cum haereses longe, lateque diffunduntur, ut olim Ariana. Ergo.

*R. Neg. ant.* Nam etiam in crudelissimis Imperatorum persecutionibus Ecclesia visibilis erat, non solum in regionibus, quae Romano imperio non erant subjectae, sed etiam in tot martyribus partim trucidatis, partim in carcerem, aut in exilium actis. Multo minus latere potest in persecutionibus haereticorum, aut in quacunque haeresis diffusionem; tum quia haeresis nunquam universum orbem occupare potest; tum quia in illis ipsis provinciis, quas occupat, veri fideles latere non possunt; eo ipso enim, quod se a conventiculis haereticorum separant, jam conspicui fiunt.

*Objic. II.* Ecclesia est objectum fidei: *Credo sanctam Ecclesiam*, est articulus Symboli. Hinc Ecclesia dicitur *domus spiritualis* I. Pet. II. 5. *mons non tractabilis* Heb. XII. 18. *Regnum Dei*, quod non venit cum observatione, sed est *intra nos* Luc. XVII. 20. *populus Dei* legem habens scriptam in cordibus *Hierem. XXXI. 33.* Ergo non videtur.

*R. Dist. ant.* Est objectum fidei quoad ejus veri-

Q

tatem

tatem, et interiores dotes, conc. quoad ejus existentiam, *neg.* Itaque quod haec sit Ecclesia a Christo instituta, conspicitur. Quod autem haec Ecclesia, a Christo instituta, vera doceat, Spiritu Sancto regatur, et vivificetur etc. id ereditur, ideoque dicitur *domus spiritualis, populus Dei legem habens scriptam in cordibus, et regnum Dei intra se.* Ceterum Regnum Dei *Luc. XVII.* intelligi potest de primo adventu Messiae, quod non venit cum observatione si-  
ve gloria, quam Pharisei expectabant: Et mons non tractabilis *Heb. XII.* non est Ecclesia militans, sed triumphans, ut legenti patet.

### Corollarium.

Ergo hinc rursus probatur, societates Protestantium, aliorumque Novatorum non esse veram Christi Ecclesiam, quia, ipsis fatentibus, ante *Lutherum*, et *Calvinum* erant invisibiles.

### §. II.

#### *De Ecclesiae perpetuitate, seu indefectibilitate.*

*Adv.* Nullus fortasse haereticorum asseruit, veram Christi Ecclesiam posse omnino deficere. *Donatistae* enim, qui Ecclesiam toto orbe periisse affirmabant, docebant tamen, remansisse eam in Africa in parte *Donati.* *Berengarius* etiam, qui teste *Ratramno Corbejensi Opusc. de Eucharist.* asserbat, Ecclesiam totam errasse, et periisse; contendebat tamen, eam remansisse saltem in *Berengarianis.*

II. Novatores etiam fatentur, Ecclesiam deficere non posse, sed id intelligunt de Ecclesia invisibili. Nam visibilem Ecclesiam deficere posse, docent, et aliquando defecisse. Novissime vero *Claudius Calvinista* novum excogitavit systema. Docet enim, Ecclesiam etiam visibilem nunquam posse deficere, sed aliquando corrumpi posse erroribus fidei contrariis; ita tamen, ut semper in ea remaneant aliqui fideles occulti.

PRO-



## P R O P O S I T I O

*Visibilis Christi Ecclesia defuere non potest.  
Fidei dogma est.*

*Prob. I. ex Scriptura. Prophetæ prædixerunt, visibilem Christi Ecclesiam perpetuam fore, et Christus ipse, et Apostoli id aperte promiserunt. 1.º Prophetæ id prænuntiarunt. Isaias enim Cap. LXI. 8. Foedus, inquit, perpetuum feriam cum eis. Et scient in gentibus semen eorum, et germen eorum in medio populorum: omnes, qui viderint eos, cognoscent illos, quia ipsi sunt semen, cui benedixit Dominus: quod Isaiæ vaticinium sine dubio de Ecclesia est intelligendum. Hic autem clare prædicit Isaias; Ecclesiam, quæ a cunctis gentibus videbitur, et cognoscetur, perpetuam fore, quippe quæ juncta sit Deo foedere perpetuo.*

*Et Michæas Cap. IV. 1. et 5. In novissimo dierum erit mons domus Domini præparatus in vertice montium, et sublimis super colles, et fluent ad eum populi. En Ecclesiam auctis visibilem. Nos autem, subdit, ambulabimus in nomine Domini nostri in æternum; en perpetuitatem. Et in Psalm. XLVII. qui totus est de Ecclesia, et quidem visibili, ut legenti patet: Sicut audivimus, sic vidimus in civitate Domini virtutum, in civitate Dei nostri: En visibilem Ecclesiam: Deus fundavit eam in æternum; en perpetuitatem. Mitto alia Prophetarum vaticinia.*

*2.º Ipse Christus Ecclesiæ visibili durationem perpetuam promisit. Matth. XXVII. 20. Ecce ego vobiscum sum usque ad consummationem sæculi. Et Matth. XVI. 18. Super hanc petram ædificabo Ecclesiam meam, et portæ inferi non prævalent adversus eam. Nulla autem ratio subest coarctandi hæc loca ad Ecclesiam invisibilem. Præterea Christus in omnibus parabolis, in quibus Ecclesiam designavit, eam dicit duraturam usque ad finem sæculi. Sic docet, in agro futura zizania cum tritico usque ad messem: in sagena futuros bonos cum malis piscibus, usque dum*

trahatur ad terram; in area futuras paleas cum frumento, donec triticum congregetur in horreum, paleae autem comburantur igni inextinguibili. Messis autem, tractio retis ad terram, divisio fruimenti a paleis, ipso Christo explicante, diem iudicii designant. Atqui hae parabolae fatentibus Protestantibus, pertinent ad Ecclesiam visibilem, quia invisibilis Ecclesia non continet, ut ipsi dicunt, bonos et malos. Ergo visibilis Ecclesia usque ad finem mundi duratura est.

3.° Idipsum praedicunt Apostoli. Paulus enim *Ephes. IV. 11. Ipse dedit, inquit, quosdam quidem Apostolos, alios Prophetas, alios Evangelistas, alios Pastores, et doctores. . . . donec occurramus omnes in unitatem fidei etc.* Quibus verbis testatur, ministerium Pastorum, quod utique non potest esse in Ecclesia invisibili, duraturum usque in diem iudicii. Ergo.

*Prob. II. ex Patribus. 1.° Hieronymus in Cap. VIII. Amos: Ex quo, inquit, intelligimus, Ecclesiam usque in finem mundi concuti quidem persecutionibus (quae non nisi contra Ecclesiam visibilem excitantur) sed nequaquam posse subverti; tentari, non superari. Et hoc fiet, quia Dominus Deus . . . se facturum esse pollicitus est, cujus promissio Lex naturae est. 2.° Augustinus in Ps. CI. conc. 2. Sed illa Ecclesia, quae fuit omnium gentium, jam non est, periit. Hoc dicunt qui in ea non sunt. O impudentem vocem! Illa non est, quia tu in illa non es? Vide, ne tu in ea non sis; nam illa erit, etsi tu non sis (a) 3.° Ambrosius loquens de persecutionibus; quae utique contra visibilem Ecclesiam excitantur; postquam Ecclesiam navi comparavit, subdit. Lib. de Salomone Cap. 4. Quae etsi undarum fluctibus, et procellis saepe vexatur, numquam potest sustinere naufragium, quia in arbore ejus, idest in Cruce Christus erigitur, in puppi Pater residet gubernator, proram Paracletus servat Spiritus. Hanc per angusta hujus mundi freta duodecim in portum*

re-

---

(a) V. etiam Lib. 1. De Symbolo ad Catech. cap. 6. Epist. XLVIII., et al.

remiges ducunt, idest duodecim Apostoli. 4.<sup>o</sup> Chrysostomus in Cap. VI. Isaiae: *fucilius est, solem extinguere, quam Ecclesiam deleri.* Mitto ceteros (b). Ergo.

Systema autem Claudii Calvinistae contradictionem involvit. Statuit enim iste, Ecclesiam visibilem non posse deficere, et tamen posse corrumpi erroribus fidei contrariis, quod aperte est *αυσετον*, sive repugnans. Eo ipso enim, quod societas aliqua in fide labitur, non est amplius Christi Ecclesia, sed Antichristi synagoga, Vide Bossuet *Hist. Variat. Lib. XIX.*

Objectiones solvuntur.

*Obje. I.* Vetus Ecclesia defecit aliquando; et 1.<sup>o</sup> quidem in Adam, et Heva, cum uterque peccavit. 2.<sup>o</sup> in egressu filiorum Israel ex Aegypto, cum, praecedente ipso Aaron, vitulum aureum omnes adoraverunt. *Exod. XXXII.* 3.<sup>o</sup> tempore Judicium, quando filii Israel fecerunt malum in conspectu Domini, et servierunt Baalim, ac dimiserunt Deum patrum suorum. *Judic. II.* 11. 4.<sup>o</sup> tempore impiorum Regum Achaz, et Manasse, qui, abolito publico ministerio religionis, idololatriam usque in Templum Domini intulerunt. 5.<sup>o</sup> aetate Jeremiae, qui *Cap. II.* 26. sic Dei nomine loquitur: *Confusi sunt domus Israel, ipsi et Reges eorum, Principes, et Sacerdotes, et Prophetae eorum, dicentes ligno: Pater meus es tu.... Quid vultis mecum iudicio contendere? Omnes dereliquistis me, dicit Dominus.* 6.<sup>o</sup> Denique cum summi Pontifices, et omne Concilium Sacerdotum, Scribarum, Pharisaeorum, et ipsa plebs Judaeorum Christum morti dedit. Ergo.

*II. Transeat ant. Neg. cons.* Dixi transeat ant. quia etsi concederetur, defecisse veterem Ecclesiam, sive potius Synagogam, non inde tamen sequeretur, deficere etiam posse Ecclesiam Christi, cum divinae

-pro-

---

(b) Orig. nem. *Hom. XXV. in Matth. Leo M. Serm. XI<sup>9</sup> de Passione, et Serm. II. in Annivers. suae. assumpt. Bernardus Serm. LXXIX. in Quat.* et alii.

promissiones isti, non illi factae sint; tamen falsum est, ipsam veterem Ecclesiam unquam defecisse.

1.<sup>o</sup> Etenim non defecit cum Adam, et Heva peccaverunt. Sive enim peccatum illud fuerit vera infidelitas, ut docent nonnulli Patres, sive fuerit simplex inobedientia, certum est, Ecclesiam post Adae lapsum coepisse: tunc enim revelatus est futurus Christi adventus, in cuius fide fundata est Ecclesia. Utrum autem incoeperit Ecclesia a poenitentia Adae, an ab Abel, quaestio est. Ceterum hoc argumentum nimis probat; si quid enim valeret, probaret etiam, in Adamo, atque Heva Ecclesiam invisibilem defecisse, quod fieri posse adversarii negant.

2.<sup>o</sup> Nec defecit vetus Ecclesia tempore Aaronis, Iudicum, aut Regum impiorum, aut Ieremiae; quia nec tunc defuerunt veri Dei cultores, qui et ipsi erant visibiles, cum non communicarent coetibus idololatrarum. Utitur autem Scriptura in oburgandis impiis generali quadam reprehensione totius populi, ut ostendat, peccantium magnum esse numerum; quod sexcentis confirmari potest exemplis.

3.<sup>o</sup> Denique in morte Christi defecit Synagoga, quia tunc deficere debebat; *finis enim legis Christus*, sed non defecit Ecclesia, tum quia tot erant per universum orbem dispersi Iudaei fideles, qui de praedicatione, et nece Christi nihil audierunt, tum quia in ipsa Iudaea, imo in ipsis Ierosolymis multi non consenserunt neci Christi, inter quos etiam viri principes, quales fuerunt *Joseph ab Arimathea, et Nicodemus*.

*Inst.* In Apostolis omnibus defecit fides in morte Christi, quod significari dicitur per lumina omnia, quae extinguuntur in Officio majoris Hebdomadae, excepta una B. Virgine. Imo ipse Christus *exprobrauit* Apostolis *incredulitatem eorum*: *Marc. XVI. 14.* Ergo a fortiori defecit fides in ceteris omnibus, ac proinde tunc defecit Ecclesia, quia sola B. Virgo non constituebat Ecclesiam, quae utique multorum coetum requirit.

*Res. 1.<sup>o</sup> Neg. ant.* Defecit enim in Apostolis constantia, et fortitudo in rebus adversis, sed non fides. Petrus enim, qui contra externam fidei confes-

tionem peccaverat, statim conversus flevit amare, quod non fecisset, si amisisset fidem; Christus ipse moriens matrem virginem Joanni commendavit, quod ostendit, etiam Joannem permansisse fidelem. A fortiori ceteri discipuli, qui fugerunt; nec tantis tentationibus objecti sunt, quantae *Petrum*, et *Joannem* impetiverunt. De extinctione autem luminum in majori Hebdomada varia est explicatio, ut videre potest apud *Ben. XIV. de Pestis*, sed licet explicemus de Apostolis; non sequitur, in eis extinctum fidei lumen, sed constantiam, quam Christo sponponderant. *Infidelitas* vero, quam Christus redivivus Apostolis reprobravit, non fuit *positiva*, sed *negativa*, hoc est: tarditas quaedam, et mora credendi *explicite* resurrectionem, quam putabant nondum idoneis testimoniis confirmatam, quia nondum ipsi viderant; quod quidem esse potuit veniale peccatum. Adde his, quod verba Christi non de omnibus accipienda esse Apostolis, docet Maldonatus in *Comment.* sed de uno *Thoma*, licet per syllepsin omnibus dicta sint.

¶ 2.<sup>o</sup> *Neg. cons.* Nam praeter Apostolos erant innumeri fideles tum in Judaea, tum in longinquis regionibus, ut supra dictum est.

*Objic. II.* Christus *Luc. XVIII. 8.* praedicat, ante adventum suum defecturam Ecclesiam: *Veniens filius hominis, putasne, inveniet fidem in terra?* Quod et confirmat Apostolus *II. Thessal. II. 3.* ubi ait, ante diem judicii venturam *discessionem*, h.e. generalem apostasiam. Ergo.

¶ 1.<sup>o</sup> Argumentum *nihilis probare.* Si enim nulla tunc erit fides, sed generalis apostasia, peribit etiam Ecclesia invisibilis; quod negant Protestantes.

¶ 2.<sup>o</sup> *Neg. ant.* Christus enim non ait: *filius hominis non inveniet fidem*, sed *putas-ne inveniet?* quo significat raritatem fidei, non qualiscumque, sed praecellentis, et firmissimae, de qua ibi loquitur. Et revera idem Christus *Matth. XIV. 22.* clare docet, futuros tunc electos: *propter electos breviabuntur dies illi.* Apostolus vero per *discessionem* non intelligit generalem defectionem a fide, cum ipse Apostolus *I. Thessal. IV. 16.* doceat, in ipso adventu Christi

fu-

futuros fideles , et alibi doceat , ipsos Judaeos convertendos esse ad fidem ante adventum Christi. Quomodo ergo adversarii per discessionem intelligere possunt *generalem* apostasiam , cum commode possit , et debeat intelligi *particularis* , sed magna defectio multorum ab Ecclesia , quam Scriptura toties inculcat fore perpetuam ? Vide *Estium* , et *D. Thomam Comment. in h. l.*

*Objic. III. Hieronymus* loquens de Concoiliis Ariminensi , et Seleuciensi , in quibus Episcopi subscripserunt formulae fidei ab Arianis compositae , sic ait *Dialog. cont. Luciferian. Tunc Usiae nomen abolitum est , tunc Nicaenae fidei damnatio conclamata est : ingemuit totus orbis , et se Arianum esse miratus est.* Ergo tempore Arianorum defecit Ecclesia.

*¶ Neg. cons. 1.º* enim non omnes orbis Episcopi ad Concilia illa venerunt : imprimis absuit Romanus Pontifex caput Ecclesiae , et centrum unitatis : *2.º* non omnes Episcopi formulae illi subscripserunt : *3.º* illi , qui subscripserunt , eam in sensu catholico intellexerunt : formula enim ita subdole erat concepta , ut fidem Nicaenam vidcretur exprimere ; mutata tantum voce *ὁμοῦσιον* , seu *consubstantiale*. Sed quia etiam sensum haereticum pati poterat , ideoque Ariani Episcopi gloriabantur , et *conclamabant damnationem fidei Nicaenae* ; ideoque totus orbis ingemuit , et miratus est , se , eo ipso tempore , quo Arianam perfidiam detestabatur , subscripsisse formulae , quae sensum Arianum habere poterat. Episcopi ergo illi nec *formaliter* fuerunt haeretici , nec etiam *materialiter* , quia verba formulae etiam in sensu obvio catholica videbantur.

*Objic. IV. Singuli fideles deficere possunt. Ergo et omnes.*

*¶ Neg. cons.* Cum enim promissio non ad singulos fideles , sed ad totum Ecclesiae corpus pertineat , a *distributivo ad collectivum* , ut Scholae ajunt , non valet conclusio.

*Inst.* Quod singulis convenit partibus , etiam toti convenire debet. Ergo etc.

*¶ Dist. ant.* Si sermo sit de proprietatibus *essentiali-*

*trialibus, conc.* Si de *accidentalibus neg.* Sic singuli aenatores jus non habent condendi leges, quod tamen totus Senatus habet. Cujus rei varia congeri possunt exempla.

*Inst.* Omnes simul fideles libere credunt, et manent in Ecclesia. Possunt ergo deficere omnes simul.

*¶ Neg. cons.* Etsi enim omnes libere credunt; tamen, cum fidelis Deus in promissis semper retineat multos per efficacem gratiam, qua *actu* credunt; non possunt simul non credere: cum credere simul, et non credere rationi repugnet; sicut repugnat hominem eodem temporis momento sedere, et ambulare, quamvis libere sedeat, aut ambulet. Cum igitur *impossibile* sit mentiri Deum; erit etiam impossibile, ut Ecclesia deficiat, licet omnes fideles libere credant. Quapropter si consideretur Ecclesiae *indefectibilitas* ratione divinarum promissionum, cum *phisice* impossibile sit, Deum mentiri; erit etiam *physice* impossibile, ut Ecclesia deficiat: si vero consideretur ratione humanae libertatis, erit tantum impossibile *moraliter*.

*Objic. V. et simul Inst.* Etiam Leviticum Sacerdotium, ideoque et Synagogam, promiserat, Deus in aeternum duraturam: *Exod. XXIX. 9. Erunt sacerdotes mihi Aaron, et filii ejus religione perpetua.* Quibus similia in aliis leguntur vet. Testamenti locis. Et tamen Synagoga defecit. Ergo divina promissa sunt sub tacita conditione intelligenda, modo, scilicet homines non se reddant indignos.

*¶ Dist. ant.* Promisit Deus, Leviticum Sacerdotium duraturum in perpetuum quoad rem significatam, scilicet Christum, ejusque Sacerdotium, et sacrificium, *conc.* Quoad ipsas figuras, *neg.* Cum enim quidquid in veteri illo populo Dei gestum est, figura esset novi, ut saepe monet Apostolus *I. Cor. X. Heb. X. etc.* imo in ipso veteri Testamento promittatur novum foedus, novumque sacrificium, quod vetera aboleret *Jerm. XXXI. 31. Molach. I. 10.* patet, non figuras ipsas, sed res inde significatas, futuras fuisse perpetuas. Condicio autem, quae temere in objectionem fingitur, non solum in Scripturis funda-

damentum nullum habet, verum etiam absurda est. Quomodo enim peccata hominum divinas abolerent promissiones, quae ad ipsa peccata remittenda, atque abolenda institutae sunt?

## §. III.

*De Ecclesiae veritate, sive infallibilitate in rebus fidei, et morum.*

*Adv. I.* Cum quaeritur, an Ecclesia infallibilis sit, de rebus dumtaxat ad fidem, et mores pertinentibus sermo est.

II. Ex dictis in superiori articulo certum est, non posse Ecclesiam universam falli in credendis fidei, et morum dogmatibus; si enim totum Ecclesiae corpus in fide errare posset, deficere etiam posse manifestum est.

III. Quaeritur ergo, an non solum in credendis, sed etiam in docendis rebus fidei, et morum Ecclesia falli possit, hoc est, an totum corpus Pastorum Ecclesiae (ad hos enim pertinet docendi officium) possit falli in tradendis fidei, et morum dogmatibus.

IV Et Novatores quidem communiter id affirmant. Cum enim totam visibilem Ecclesiam deficere doceant, a fortiori coetum Pastorum, qui pars est ipsius Ecclesiae, in docendo falli posse statuunt.

## P R O P O S I T I O

*Ecclesia in docendo, hoc est tota collectio Pastorum Ecclesiae, ad quas officium docendi pertinet, sive sit per totum orbem dispersa, sive in unum congregata, falli non potest in rebus fidei, et morum docendis. Est dogma fidei.*

*Prob.* Ex articulo superiori Ecclesia visibilis deficere non potest, nec in fide errare. Atqui fides est ex auditu, ut ait Apostolus Rom. X. 17. Ergo si nunquam potest Ecclesia deficere a vera fide, nunquam potest deficere vera praedicatio, et doctrina



na fidei, ac proinde non possunt pastores omnes, ad quos praedicare, et docere spectat, in docendo falli, aut fallere; alioquin oves Christi, fidem non amplius ex auditu concipientes, deberent credere contraria iis, quae a Pastoribus edocentur, atque ideo Ecclesia non esset amplius corpus compactum, et per omnem juncturam subministrationis connexum, ut eam describit Apostolus *Ephes. IV. 16.* Frustraque Christus Pastoribus dixisset: *Qui vos audit, me audit, qui vos spernit, me spernit, Luc. X. 16.* Tractat hoc argumentum egregie Canus *Lib. IV. Cap. 5.*

*Prob. II. ex Scriptura. 1º. Isaias LIX. 21.* praedicat, Spiritum S. nunquam ab Ecclesia discessurum, sed semper in ea servaturum verba Domini. *Hoc fœdus meum cum eis, dicit Dominus: Spiritus meus, qui est in te, et verba mea, quae posui in ore tuo, non recedent de ore tuo, et de ore seminis tui a modo, et usque in sempiternum.*

*2º. Hunc Spiritum Christus ipse promisit Ecclesiae, Joan. XIV. 16. Ego rogabo Patrem, et alium Paraclytum dabit vobis, ut maneat vobiscum in aeternum, Spiritum veritatis: et v. 26. ille vos docebit omnia, et suggeret vobis omnia, quaecumque dixero vobis.* Quae verba non solis Apostolis dicta sunt, cum ipsi non deberent manere in terris in aeternum, sed per Apostolos omnibus in ministerio successoribus. Et *Matth. XXVIII. 18. docete omnes gentes...* Ecce ego vobiscum sum usque ad consummationem saeculi; quibus verbis spondet Christus, se adfuturum Doctoribus Ecclesiae usque ad saeculorum finem.

*3º. Hanc promissionem Christum implevisse, docet Apostolus I. Tim. III. 15. Haec, inquit, scribo tibi, ut scias, quomodo oporteat, te in domo Dei conversari, quae est Ecclesia Dei vivi, columna, et firmamentum veritatis.* Haec Apostoli verba mirum est quantum haereticos torqueant. Dicunt enim, Ecclesiam esse columnam, et firmamentum veritatis, vel quia conservat Scripturas, vel quia ejus officium est tueri veritatem, licet huius officio aliquando desit, Quibus nihil ineptiusungi potest; nam etiam Judaei, et haeretici Scripturas conservant, et quique privati

te-

tenentur tueri veritatem, licet eam aliquando deserant. Quare Judaei, haeretici, et quique privati dici deberent columna, et firmamentum veritatis: quod falsum est. Igitur illa societas in docendo falli non potest, cui promissus est, et datus Spiritus veritatis, qui eam ita regit, ut reddat columnam, et firmamentum veritatis. Atqui talis est Ecclesia Christi, Ergo.

*Prob. III. ex Patribus.* 1°. Irenaeus *Lib. III. cap. 4.* Non oportet, inquit, apud alios quaerere veritatem, quam facile est ab Ecclesia sumere, cum Apostoli, quasi in depositarium dives, plenissime in eam contulerint omnia, quae sunt veritatis, ut omnis quicumque velit, sumat ex ea potum vitae. 2°. Augustinus *Lib. I. cont. Crescon. Cap. 33.* Scripturarum a nobis tenetur veritas, cum id agimus, quod universae jam placuit Ecclesiae, quam ipsarum Scripturarum commendat auctoritas, ut quoniam ipsa Scriptura fallere non potest, quisquis falli metuit alicujus obscuritate quaestionis, eandem Ecclesiam de illa consulat, quam sine ambiguitate saneta Scriptura demonstrat. Celebre est ejusdem effatum *Lib. cont. Epist. Fundam. cap. 5.* Evangelio non crederem, nisi me Catholicae Ecclesiae moveret auctoritas. Item illud *Lib. de haeres cap. ult.* Cur contra ista sentiat Ecclesia catholica, superflue quaeritur, cum propter hoc scire sufficiat, eam contra ista sentire. Accedit, quod Patres omnium saeculorum judicarunt haereticos, qui doctrinam universae Ecclesiae impugnarunt: imo ipsi Protestantes excommunicarunt Arminianos, qui decretis Ecclesiae Protestantium in synodo Dordracena conditis obsistebant. Vide Bossuet *Collation. cum Claudio, et Hist. Variat.* Ergo etc.

Diximus autem in propositione, Pastorum omnium collectionem sive per orbem dispersam, sive in unum congregatam falli non posse; quia eadem est Ecclesia, sive dispersa, sive collecta in unum, et Christi promissiones absolutae sunt, nulla apposita conditione sive dispersionis, sive adunationis: nisi quod in collectione Pastorum promittitur, et facilius, quae sit omnium sententia, conspicitur. Et revera Augustinus *Lib. IV. ad Bonifac. cap. ult.* contra Pelagianos docet,

omne

omnes ferme haeresees sine generali Pastorum Concilio fuisse ab Ecclesia damnatas: ut omnes haeresees ante Concilium Nicaenum exortae, et plurimae etiam post ipsum.

Si autem quæras, quanta Pastorum consensio requiratur, ut aliquid dici possit totius Ecclesiae doctrina, facilis responsio est, non requiri omnium consensum, ne uno quidem excepto; hoc enim vix fieri potest in tanta hominum infirmitate; sed sufficere consensum moraliter unanimum, hoc est tot Pastorum consensionem, ut moraliter dici possit; omnes ita sentire. Hinc *Vincentius Lirinensis Commonitor.* 1. doctrinam Ecclesiae eam esse, ait, *quod semper, quod ubique, quod ab omnibus creditum est.*

Objectiones contra hanc propositionem fieri solitas dissolvemus, ubi agemus de Conciliis Oecumenicis.

### Schölion.

Franciscus Veronius in *Regula fidei* §. 16. docet, abstinendum esse a voce *infallibilitatis*, cum loquimur de Ecclesiae auctoritate in docendo, eo quod, inquit, Concilium Tridentinum illud solum ut dogma fidei, proponit, quod *Ecclesiae sit judicare de vero sensu Scripturarum*, nec usquam utitur voce *infallibilitatis*, ideoque saltem ab haereticis, Ecclesiam redeuntibus, non esse exigendum, ut fateantur, Ecclesiam esse *infallibilem*. Sed ejus auctoris pace dixerim, idem esse judicare de sensu vero, hoc est non aberrare a veritate in judicando, ac esse *infallibilem*: licet Concilium ab hac Scholastica voce abstinerit. Cum ergo haeretici contrarium doceant, non video cur ab eis exigi non debeat, ut credant, Ecclesiam esse *infallibilem*. Ceterum modo ipsi rem eandem aliis vocabulis exprimant, ut facit ipse Veronius, de nomine non esse litigandum, concedimus.

*De Supremo Interprete Scripturae, et Traditionis, et Iudice controversiarum fidei, et morum.*

*Adv.* **O**stendimus *Cap. I.* non omnia ad salutem necessaria contineri in Scripturis; *Cap. II.* Scripturam aliquibus in locis esse obscuram, nec per loca clariora posse explicari: in aliis, licet claram, obscurari falsis haereticorum interpretationibus: praeterea in ipsa Traditione contingere posse obscuritatem, atque ideo requirendum esse interpretem aliquem, qui sit ab ipsa Scriptura, et Traditione distinctus, quique explicare possit quicquid in Scriptura, et traditione obscurum est, ac proinde de omnibus fidei, et morum controversiis judicare. Hunc interpretem ostendimus eodem capite, non esse privatum cujusque spiritum. Nunc ergo, cum *Cap. superiori* explicaverimus Ecclesiae naturam, notas, proprietates; quis sit legitimus, et falli nescius Scripturae, et Traditionis interpres, et omnium controversiarum fidei iudex, facile inveniemus.

II. Sed hac occasione quaeri etiam solet, utrum Ecclesia sit etiam *infallibilis* iudex quaestionum *facti*.

III. *Facta* autem alia sunt *dogmatica*, scilicet quae negari non possunt, quin simul negetur et dogma: alia simplicia, nihil cum dogmate connexa: alia quodammodo media; quae scilicet si negentur, non quidem aperte oppugnatur dogma, sed via sternitur erroribus fidei, et moribus oppositis: ut si quis *ex. gr.* damnans omnes Lutheri haereses contendat, eas non contineri in libris Lutheri; hic asserit factum, quod licet dogmata catholica aperte non impugnet, tamen viam sternit erroribus.

## PROPOSITIO I.

*Ecclesia est legitimus, et infallibilis interpres Scripturae, et traditionis, et Judex controversiarum fidei, et morum. Est dogmā fidei.*

*Prob. I.* In interprete, ac judice controversiarum quinque conditiones requiruntur; 1°. ut sit vivens; alioquin disceptantium rationes audire, ponderare, et judicare non poterit; 2°. ut sit visibilis; alioquin ad eum non erit accessus; 3°. ut sit semper manens, et indeficiens; alioquin in ejus defectu nulla erit ratio finiendi lites; 4°. ut sit *infallibilis*, alioquin semper ejus judicium nutabit, nec causa dici poterit finita, 5°. ut auctoritatem habeat coercendi eos, qui judicio sunt rebelles. Atqui omnes hae conditiones sunt in Ecclesia 1°. enim est vivens, sicut patet: 2°. est visibilis: 3°. indefectibilis: 4°. infallibilis, ut *Cap. superiori* ostensum est: 5°. auctoritatem habet coercendi rebelles, ut habetur *Matth. XVII. 18. Quaecumque alligaveritis super terram, erunt ligata et in caelis*; et constat ex clarissima Traditione, Ecclesiam omnibus saeculis a tempore Apostolorum hae potestate usam esse. Ergo.

*Prob. II.* Ex Scriptura 1°. *Matth. XVIII. 17.* ait Christus: *Dic Ecclesiae, si Ecclesiam non audierit, sit tibi sicut ethnicus, et publicanus. Amen dico vobis, quaecumque alligaveritis super terram, erunt ligata et in caelis, et quaecumque solveritis super terram, erunt soluta et in caelis.* Igitur Christus Ecclesiae auctoritatem dedit de omnibus judicandi; quae bonis moribus sunt adversa. Atqui non haberet eam potestatem, si non posset judicare de haeresi, quae capitale peccatum est. Ergo.

2°. Praeterea, qui est veritatis, tamquam depositi custos, et doctor, imo columna, et firmamentum veritatis, ille est judex supremus de falsitate, quae veritati adversa est. Atqui Ecclesia, cui Deus mandavit, *docere omnes gentes*, in qua Deus constituit *Pastores, et doctores, ne homines omni vento doctrinae*  
cui-

circumferantur, cui Apostoli depositum fidei commendarunt; est veritatis ipsius tamquam depositi eustos, columna, et firmamentum veritatis, ut supra diximus. Ergo etc.

3°. Non minus Deus Ecclesiae Christi consuluit, quam Synagogae, olim providerat, et consuluerat. Atqui in Synagoga constituit Ecclesiasticos Pastores, ut supremos controversiarum iudices, et interpretes Legis. Ergo. *Prob. min. Deut. XVII. 8, Si difficile, et ambiguum apud te iudicium esse perspexeris inter sanguinem, et sanguinem, causam, et causam, lepram, et lepram, et iudicum intra portas tuas videris verba variari, surge, et ascende ad locum, quem elegerit Dominus Deus tuus, veniesque ad Sacerdotes Levitici generis, et ad iudicem, qui fuerit illo tempore, quaeresque ab eis, qui indicabunt tibi iudicii veritatem. Et facies quodcumque dixerint qui praesunt loco, quem elegerit Dominus, et docuerint te juxta legem ejus, sequerisque sententiam eorum; non declinabis ad dexteram, neque ad sinistram. Qui autem superbierit, nolens obedire sacerdotis imperio, qui eo tempore ministrat Deo tuo, et decreto iudicis, morietur homo ille, et auferes malum de Israel.* Quod confirmavit Christus *Matth. XXIII. 2. Super cathedram Moysi sederunt Scribae, et Pharisei. Omnia ergo, quaecumque dixerint vobis, servate et facite.* Nihil clarius dici poterat. Vana autem effugia Protestantium refutata reperies apud Bellarminum *Lib. III. de Verbo Dei Cap. 4. Ergo etc.*

*Prob. III.* ex apertissima, et constantissima traditione. A tempore enim Apostolorum per XV III. Saecula quaecumque ortae sunt de fide, et moribus controversiae, eae, ab Episcopis in Synodos collectis decisae sunt, et rebelles anathemate perculsi. Quem morem ipsi Apostoli servarunt, qui controversiam de legalibus in Concilio Jerosolymitano finierunt; suamque definitionem pronunciarunt, tamquam sententiam Spiritus S. *Visum est Spiritui S., et nobis. Act. XV. 28. Ergo.*

*Prob. IV.* Accedit, quod si Ecclesia non esset supremus iudex, et interpret fidei, et morum; putaret etiam Scriptura, et Traditio. Pulchre *Augustinus Lib.*

Lib. cont. Epist. fundam. cap. 5. Quibus ego obtemperavi dicentibus, credite Evangelio; cur eis non obtemperem dicentibus mihi: noli credere Manichaeo, Socino, Luthero, Calvino etc. Infirmabis forte mihi catholicorum auctoritatem, qua infirmata, jam nec Evangelio credere potero, qui per eos illi credideram?

Prob. V. Denique idem probari potest ex refutatione aliarum sententiarum. Si enim neque Scriptura, neque privatus Spiritus est controversiarum iudex, nullus alius remanet, nisi Ecclesia, alioquin finiri nullo modo possent controversiae fidei, et inutilis foret divina revelatio.

Obje. Nemo iudex est in causa propria; atqui aliquando ab haereticis movetur controversia contra ipsam Ecclesiam, utrum scilicet illa sit vera Ecclesia Christi, sicut fiebat a Protestantibus contra Ecclesiam Romanam. Ergo in his controversiis Ecclesia iudex non est.

Ad. Dist. maj. Si sit iudex suprenus, neg. in unaquaque enim societate summi imperantes etiam in causa propria judicant. Si sit iudex inferior, subdist. Si ex proprio ingenio, et affectu judicare debet. conc. Si a Spiritu S. regatur in iudicando, sicut regitur Ecclesia ex Christi promissionibus, neg. Si vero haeretici litera moveant, quatenus sit vera Ecclesia Christi, facile ex notis Ecclesiae convinci possunt, eam esse solam Ecclesiam Romanam; caeci autem sunt, qui eam non vident.

Scholion.

Ex iis, quae supra posita sunt, manifestum est, Ecclesiam non novam accipere, et proponere revelationem, cum aliquid definit, sed explicare clarius, quod antea obscurius credebatur. Tota enim revelatio Apostolis, et Ecclesiae primitus facta est: sed quia ob humanam infirmitatem aliquando multi fideles dubitant, quid de aliqua controversia revelaverit Deus; hanc dubitationem Ecclesiae definitio, seu potius declaratio e medio tollit, ut fuse Vincentius Lirinensis Communit. I. Cap. 32. exponit.

R

PRO-

## PROPOSITIO II.

*Ecclesia est iudex infallibilis in factis mere dogmaticis.*

*Prob.* Facta dogmatica diximus esse ea, quae negari non possunt, quin simul negetur et dogma, ex gr. quod Scriptura, et Traditio praedicent, Verbum esse Patri consubstantiale, est factum dogmaticum, quod si quis neget, etiam neget necesse est ipsum dogma. Ergo non potest Ecclesia esse infallibilis in dogmatibus proponendis, quin simul in huiusmodi factis infallibilis sit; unde haec propositio a priori non differt, atque acque ad fidem pertinet.

## PROPOSITIO III.

*In factis simplicibus, quae asserti, et negari possunt, salvis fidei, et morum dogmatibus, Ecclesia infallibilis non est.*

*Prob. I.* In huiusmodi factis decidendis Ecclesia utitur adminiculis errori obnoxiiis, hominum scilicet testimoniis. Ergo ejus definitio non potest esse ab omni erroris periculo immunis.

*Prob. II.* Ex consensu omnium Theologorum, quorum longam seriem texuit Carolus Witasse, et Opstraet. Unum sufficiat citare Bellarminum, qui Lib. IV. de Sum. Pont. Cap. 2. sic ait: *Convenerunt omnes Catholici, et haeretici, posse Pontificem, etiam ut Pontificem, et cum suo coetu Consiliarios, vel cum Consilio generali errare in controversiis facti particularibus, quae ex informatione, testimonioque hominum praecipue pendent.*



## PROPOSITIO IV.

*Putandum non est, Ecclesiam unquam falli in definiendis factis mixtis, in quibus falsitas viam sterneret erroribus, qualis est praecipue censura librorum in rebus ad fidem, et bonos mores pertinentibus.*

*Prob.* Ecclesia in suis Pastoribus potestatem a Christo accepit pascendi ejus oves. *Pasce oves meas: Joan. XXI. 17.* Ergo putandum non est, Pastores unquam falli in judicando, ubinam sint pascua ovibus noxia. Hujus enim judicii falsitas ovibus ipsis non medioeriter noceret.

*Prob. II.* Ecclesia omnibus saeculis hujusmodi facta definiivit, imo aliquando poenis coercuit eos, qui ejusmodi definitionibus parere nollent. Sic in Concilio Nicaceno non solum haeresim, sed et personam, et scripta *Arii* damnavit. In Concilio Chalcedonensi non prius admisit *Theodoretum*, quam damnaret non solum haeresim, sed et personam *Nestorii*, quem antea ab errore excusaverat. In Concilio generali V. declaravit, haeresim *Nestorii* contineri in libris *Theodori Mopsuesteni*, et *Theodoreti* contra *Cyrillum*, et in Epistola *Ibae Edesseni* ad *Marim Persam*, eaque scripta anathemate damnavit. Haec sunt tria Capitula Concilii V. Ex quibus, aliisque longa serie relatis a *Tournely*, sic conficitur argumentum. Id fideles debent de Ecclesia sentire, quod ab ipsis Ecclesia exigit, alioquin dicendum esset, injuriam fidelibus irrogare Ecclesiam universam, cum id exigit, quod illi facere non tenentur. Atqui Ecclesia hujusmodi facta definiens, exigit a fidelibus; ut hujusmodi definitiones uti veras recipiant. Ergo ipsam unquam falli putandum non est.

*Prob. III.* Si Ecclesia falleretur in hujusmodi factis ex. gr. declarando librum aliquem haeresi infectum; falli posset etiam in damnandis propositionibus a libro avulsis. Quid enim aliud est liber, nisi

multarum propositionum collectio? Atqui ex demonstratis in *I. Prop.*, et fatentibus catholicis, Ecclesia in damnandis propositionibus a libro avulsis, falli non potest. Ergo etc. Hinc doctissimus *Norisius Apolog. Monac. Seyth.* loquens de damnatione trium Capitulorum in Concilio V. ait. *Quo judicio demonstratur, in damnandis propositionibus in sensu ab auctoribus intento, non errare Ecclesiam, neque latum ab ea semel judicium posse retractari.*

*Dices.* Omnes Theologi, qui ante *Jansenium* floruerunt, ingenuè professi sunt, falli posse Ecclesiam non solum in factis simplicibus, verum etiam in mixtis. Instar omnium sit *Bellarminus*, qui *Lib. IV. De Rom. Pont. Cap. 11.* loquens de VI. Synodo, quae damnavit *Honorium*: *Tuto, inquit, dicere possumus, hos Patres deceptos ex falsis rumoribus, et non intellectis Honorii Epistolis, immerito cum haereticis connumerasse Honorium.* Ergo.

*Respondeo.* Transeat ant. quod negari posset, cum nemo conceptis verbis asseruisse videatur, Ecclesiam falli posse in expendendo Librorum sensu, sed tantum in factis singularibus, quae ex hominum testimonio judicari debent, ut sunt ea, quae pertinent ad personas vel damnandas, vel absolvendas. Ipse *Bellarminus*, in objectione laudatus, ait, deceptos Patres VI. Synodi in damnanda *Honorii* persona ex falsis rumoribus, atque ex ejus Epistolis, quas putarunt, cum scripsisset, idcirco, atque animo haeretico. Dixi autem transeat, quia etsi darenus, scripsisse Theologos, Ecclesiam in hujusmodi factis absolute falli posse, staret adhuc quod in propositione affirmavimus, scilicet non esse putandum, id unquam accidere.

## PROPOSITIO V.

*Nemini privato licet Ecclesiae judicio in factis mixtis reluctari eo pretextu, quod Ecclesia, absolute loquendo, in hujusmodi factis judicandis falli possit.*

*Prob. I.* Si reluctari liceret judicio Superiorum eo praetextu, quod absolute falli possent, universa hominum societas pessum iret. Non audiendi essent parentes, non magistri, non amicorum exposcenda consilia, non magistratibus obtemperandum: imo nulum fieri posset judicium ex testimonio hominum: omnes enim absolute falli possunt. Atqui Ecclesiae judicium longe majoris est ponderis, quam omnia judicia hominum. Ecclesiae enim Pastoribus dictum est: *Qui vos audit, me audit; et, Si Ecclesiam non audierit, sit tibi sicut ethnicus, et publicanus.* Ergo a fortiori non licet Ecclesiae judicio reluctari. Hinc *Petrus Aurelius*: *Consensus*, inquit, *Ecclesiae, etiamsi verbo Dei non contineatur, certitudinem habet omni humana maiorem, adeo ut illi obstrepere sit erroneum.* Tum notat, plures haereticos, licet in Conciliis particulatim ( quae utique falli possunt ) damnatos, ab omnibus fidelibus fuisse rejectos.

Hinc etiam *Gregorius M. Lib. I. Ep. 24. Quintum Concilium*, inquit, *pariter veneror, in quo Epistola, quae Ibae dicitur, erroris plena damnatur . . . cunctas, quas praefata veneranda concilia personas respuunt, respuo . . . quia dum universi sunt consensu constituta, se et non illa destruit, quisquis praesumit aut solvere quos ligant, aut religere quos solvant.*

*Prob. II.* In rebus dubiis legitimo Pastori obtemperandum est; inquit enim *Bernardus Lib. de Praeceptis et dispens. Cap. 9. Ipsum, quem pro Deo habemus, in iis, quae non sunt contra Deum, audire debemus.* Atqui quando Ecclesia de aliquo facto judicavit, quaecumque rationes in contrarium adducantur, ad summum rem efficere possunt dubiam, nisi quis forte adeo insolenter superbus sit, ut putet, se melius rem per-

perspexisse, quam totam Ecclesiam. Ergo in ea dubitatione Ecclesiae obtinendum est.

*Objic.* Quando iudicium est evidenter falsum, et injustum, obedire non licet. Atqui aliquis, legens ex. gr. librum proscriptum, potest evidenter cognoscere, Ecclesiam in ejus Libri damnatione deceptam esse. Ergo.

*g. Dist. maj.* Quando iudicium est evidenter falsum evidentiā vera, *conc.* Falsa, *neg.* *Dist. etiam min.* potest id evidenter cognoscere evidentiā falsa, et apparenti, *conc.* Vera, *neg.* Cum enim saepe nos falli contingat in iis, quae evidenter vera videbantur, prudentia exigit, ut iudicium nostrum non praeferramus iudicio Ecclesiae, cui datum est oves Christi pascere, cui promissus est Spiritus veritatis, quam qui spernit, Deum ipsam spernit. Unde enim oriri potest nostra persuasio, et evidentiā, nisi ex insolentissima superbia, qua putamus, nos plus intelligere, quam Ecclesia?

### Corollaria.

I. Hinc inferes, multo minus Ecclesiam errare posse in approbanda disciplina, quae ubique terrarum servatur. Quod enim tota facit Ecclesia, id an sit faciendum, disputare, insolentissimae insaniae est, inquit Augustinus *Epist. LIV. al. CXVIII.*

II. Ex quo sequitur, etiam putandum non esse, Ecclesiam unquam falli in *canonizatione* Sanctorum. Maximi enim momenti est res haec, in qua credendum non est, Ecclesiam ita a Spiritu Sancto deseri, ut hominem damnatum cultui fidelium exponat.

III. Denique eadem de causa Ecclesia falli non potest in proferendis, confirmandisque regulis, ac institutis Ordinum Religiosorum, declarando scilicet, nihil in iis esse institutis Evangelio, bonisque moribus adversum. Utrum autem novum Religiosorum ordinem suadari expediat, non e scientia id solum, sed etiam ex prudentia pendet, variisque temporum, et locorum circumstantiis, factique potius, quam dogmatis quaestio est, ut observat Melchior Canus *Lib. V. Cap. 5.* CA-

## C A P U T . VIII.

## De regimine Ecclesiae.

*Adv.* **D**iximus *Cap.* superiori, Ecclesiam in definiendo falli non posse. Sed quoniam intelligi non potest, quandouam definitio aliqua pro legitima Ecclesiae definitione habenda sit, nisi cognoscatur etiam, quale sit ipsius Ecclesiae regimen; ad illud explicandum veniamus, fuis tamen prius ad Patrem luminum cuius precibus, ne nos in re tot controversiis agitata, tantique momenti, a veritate aberrare patiatur.

II. Lutherani, ut *Buddleus Inst. Lib. IV. Cap. 3. §. 17.* *Pufendorfius De habitu relig. Christ. ad vit. Civ.* alique rident catholicos, eo quod disputent, utrum Ecclesiae regimen sit *monarchicum*, an *aristocraticum*, an denique *democraticum*, cum haec vocabula ad terrenos principatus pertineant; at contra Ecclesiae pastoribus dixerit *Christus Luc. XXII. 25. Reges gentium dominantur eorum . . . vos autem non sic*, et alibi *Joan. XVIII. 36. Regnum meum non est de hoc mundo.* Sed fallit eos ratio: cum enim quaerimus, an Ecclesiae regimen sit *ex. gr.* monarchicum, non quaerimus, utrum Ecclesia civilem potestatem habeat, qua potiuntur monarchae, sed utrum potestas illa spiritalis, quam Christus Ecclesiae dedit, resideat in uno, sicut potestas civilis in uno principe residet in regimine monarchico.

III. Calvinistae scinduntur in partes duas, nempe Presbyterianos, et Anglicanos Episcopales. Primi post *Aërium*, et *Wicelsum* docent, presbyteros omnes pariter esse inter se potestatis, nec Episcopis jure divino esse minores: quod systema *Dallaeus*, *Blondel-lus*, *Basnagius*, *Salmasius* toto conatu adstruere moliti sunt. Posteriores vero agnoscunt Episcoporum supra presbyteros jure divino statutam potestatem. Ceterum Protestantes omnes regendae Ecclesiae potestatem aliquo pacto a populo pendere volunt, et

a monarchico Ecclesiae regimine valde abhorrent (a).

IV. Edmundus Richerius *Lib. de Ecclesiastica et politica potestate* formam Ecclesiastici regimini esse docuit quodammodo democraticam, licet, ad declinandam catholicorum offensionem, vocaverit etiam monarchicam, aristocratia temperatam. Statuit enim, Christum potestatem clavium ipsi Ecclesiae dedisse, sed eam potestatem exerceri ab Episcopis, tamquam Ecclesiae ministris; sicut in democratia suprema potestas est penes populum, quae tamen a Magistratibus, tamquam populi ministris, exercetur. Hoc systema statuerat antea *Tostatus Abulensis in Cap. XV. Num. Quaest. 49.* illudque post Richerium avide arripuerunt *Febronius, Dupinus (b)*, aliique. Sed Richerius, agente Cardinali Richelaeo, sententiam retractavit, heet ejus sectatores hanc retractionem vi, metuque extortam fuisse, dictitent. Marc. Antonius de Dominis *De Repub. Eccles. Lib. I.* docet, regimen Ecclesiae esse Aristocraticum, sed democratia quadam temperatum. Quidam *Joan. Sarazin* absolute monarchicum statuit, ita ut omnes potestates Ecclesiae sint a Papa quantum ad institutionem, et collationem; quam sententiam olim *Turrecrémata, Cajetanus*, mox P. *Laynez* cum nonnullis aliis Theologis in Concilio Tridentino, cum Episcoporum indignatione, propu-

gna-

---

(a) Mirum est *Laurentii Mosheimii* systema, s. u potius fabula. Ait enim, principio Ecclesiae regimen fuisse democraticum; mox Presbyteres, seu seniores paulatim omnia ad se traxisse, atque imminuisse privilegia populi, ita ut regimen evaserit Aristocraticum. Tandem inter ipsos Presbyteres unum Episcopum usurpasse principatum. Hoc systema ipsimet haeretici solide confutaverunt. *Beveregius in Observationibus in Canones Ecclesiae primitivae Lib. II. Cap. 1.* *Pearson in Vindictis Igratiani Part. II. Cap. 13.* *Cotelerius in Epist. Ignat. e nostris vero Petavius de Ecclesiast. Hierarchia, Natalis Alexand. Dissert. XI. IV. in Hist. Eccl. Saec. IV. Carolus Wuasse De Sacram. Ord.*

(b) *Febronius Lib. de Statu Ecclesiae, Tom. I. Cap. I. §. 2. n. 6. Dupin Dissert. VI. De Antiqua Eccles. Discipl. §. 1. n. 24.*

guavit. Vide. Pallavicinum. in Hist. Conc. Trid. Bellarmius Lib. I. de Rom. Pont. Cap. 1. statuit, esse monarchicum, aristocratia temperatam; quae communior sententia Catholicorum est.

## PROPOSITIO I.

*Potestas regendi, et pascendi non est a Christo data immediate ipsi Ecclesiae communitati, sed Pastoribus.*

*Prob. I. ex Scriptura. 1.º Christus Matth. XXVIII. 18. solis Apostolis dixit: Data est mihi omnis potestas in Caelo et in terra: Euntes ergo docete omnes gentes, etc. Ergo non immediate ipsi Ecclesiae communitati, sed Apostolis, eorumque successoribus potestas a Christo data est.*

*2.º Confirmatur. Christus citato loco Apostolos, eorumque successores constituit Magistros, et Doctores Ecclesiae, per eos colligendae. At absurdum est, Magistrum accipere potestatem docendi a discipulis, qui nondum existunt, sed adhuc colligendi sunt, et non potius immediate ab eo, a quo constituitur Magister. Ergo.*

*3.º Præterea ipse Christus Joan. XXI. et seq. Petro dixit: Pasce agnos meos; pasce oves meas: Petrus autem Epist. I. Cap. V. 2. omnibus Ecclesiae Pastoribus scribit: Pascite, qui in vobis est gregem Dei: et Apostolus. Act. XX. 28. Attendite vobis, et universo gregi: imo saepissime in Evangelio Communitas Ecclesiae vocatur grex Christi, ovile Christi; Atqui, absurdum est, potestatem pascendi non a domino gregis Pastoribus immediate dari, sed ipsis ovibus, quorum natura est, ut pascantur, non ut pascant. Ergo etc.*

*4.º Accedit, quod Apostolus I. Cor. XII. et Ephes. V. Ecclesiam describit ut corpus, in quo varia membra ab ipso Deo per electionem, et vocationem suam posita sunt, quorum alia praesunt, alia subsunt. Ergo potestas praesidendi, et regendi data est divinitus immediate iis membris, quibus datum est praesse, et regere, non iis, qui subesse, et regi concessum est.*

5. De-

5.° Denique quid clarius iis Christi verbis *Matth. XVI. 18. Tu es Petrus, et super hanc petram aedificabo Ecclesiam meam, et Tibi dabo claves Regni caelorum?* Igitur si Christus potestatem *αυτοῦ* dedisset Ecclesiae communitati, non dixisset Petro, *tibi dabo claves, sed Ecclesiae dabo claves.* Atqui etc. Ergo etc.

*Prob. II.* ex Traditione, scilicet ex testimonio Patrum, qui dicunt Episcopos *immediate* a Christo potestatem suam habere, quos infra citabimus.

### Solvuntur Objecta.

*Objic.* Augustinus *Serm. XVI. de divers.* ait: *Petrus multis in locis Scripturae personam gestat Ecclesiae, maxime illo in loco, ubi dictum est: tibi dabo claves Regni caelorum.* Ideo saepe repetit Augustinus, claves datas esse Ecclesiae, ut *Serm. I. de Verb. Dom. Tract. L. in Joau. et alibi.* Ergo.

*R. Neg. cons.* Claves enim datas esse Ecclesiae, Augustinus, aliique Patres ideo docent, quia potestas non data est a Christo Apostolis, ut singularibus personis, ita ut cum ipsis peritura esset: sed ut semper in Ecclesia duraret, scilicet transmissa successoribus Apostolorum in commodum Ecclesiae, sicut cum dicimus, Ecclesiam habere potestatem dimittendi peccata, non intelligimus, potestatem hanc esse in Ecclesiae communitate, sed in sacerdotibus ad utilitatem Ecclesiae. Uno verbo; sicut dicimus, corpus humanum habere cerebrum, quia cerebrum est in capite, sic dicimus Ecclesiam habuisse a Christo potestatem, quam ejus Pastores habuerunt.

*Inst.* Defuncto Petro, potestas clavium in Ecclesia remansit. Ergo Ecclesiae primario loco *αυτοῦ* data erat.

*R. Dist. ant.* Remansit in Ecclesia, hoc est in Ecclesiae communitate, *neg.* in Ecclesia, h. e. in pastoribus Ecclesiae, Petro inferioribus; *Subdist.* remansit potestas, nulli superiori obnoxia, *neg.* Pendens a successore eligendo, cui ipse Christus sua promissione, primaque institutione potestatem Petri communicat, *conc.*

PRO-



PROPOSITIO II.

*Singuli Apostoli, eorumque successores Episcopi immediate a Christo potestatem regendae Ecclesiae habuerunt.*

*Prob. I. Christus Matth. XXVIII. 19. omnibus Apostolis dixit: Euntes docete omnes gentes etc. et Matth. XVI. 15. Euntes in mundum universum, praedicate Evangelium omni creaturae, et Joan. XX. 21. sicut misit me Pater, et ego mitto vos: Paulus etiam docet, se esse Apostolum non ab hominibus, neque per hominem, sed per Jesum Christum, et Deum Patrem. Galat. I. 1. Sed Episcopos Apostolorum successores esse, omnes Patres docent. Cyprianus Epist. LXIX. Christus, inquit, dicit ad Apostolos, ac per hos ad omnes Praepositos, qui Apostolis vicaria ordinatione succedunt. Hieronymus Epist. LIV. Apud nos Apostolorum locum Episcopi tenent. Idem docet Augustinus in Ps. XLIV. Gregorius M. aliique; imo et ipsum Conc. Tridentinum Sess. XXIII. Cap. 4. et can. 6. Ergo. Vide Thomassinum P. I. Lib. I. Cap. 60.*

*Merito igitur Parisiensis facultas ad palinodiam compulit Joannem Sarrasinum, Nicolaum Quadrigarium, Joannem Munerium, qui contrariam doctrinam expositis thesibus propugnauerant.*

*Solvuntur Objecta.*

*Obje. I. Optatus Milevitanus Lib. VII. cont. Parmenian. ait: Bono unitatis B. Petrus, cui satis erat, si, postquam negavit, solum veniam consequeretur, et praeferrī omnibus Apostolis meruit, et claves Regni caelorum communicandas ceteris solus accepit. Ergo omnes Apostoli non acceperunt auctoritatem a Christo, sed a Petro.*

*8<sup>o</sup> Neg. cons. Non enim ait Optatus, claves communicandas ceteris a Petro; possumus ergo eum ita commode interpretari, ut non adversetur claris Scripturae, et aliorum Patrum testimoniis: scilicet B.*

*Pea.*

## PROPOSITIO III

*Romanus Pontifex jure divino habet super omnes  
Episcopos primatum non solum honoris, sed  
etiam jurisdictionis. Est dogma fidei.*

In hanc thesim haeretici omnes, et schismatici, licet in ceteris inter se discordes, vesano furore debacchantur. Ut ceteros praetermittam, *Waldenses* sedem Romanam *purpuratam meretricem* appellabant. *Lutherani*, et *Calvinistae* post *Wiclef* soliam Antichristi vocant, ipsumque Pontificem docentes esse Antichristum. Graeci Schismatici Constantinopolitanum Episcopum, quem paulatim ab ann. CCCLXXXI. in Concilio Constant. contra caeuones extollere coeperant, et in Calcedonensi parem quodammodo fecerant Romano Pontifici; volunt esse primum, et universalem Episcopum. Rom. vero Pontificem esse schismaticum, imo et haeticum propter additam Symbolo partem *Filioque*.

*Prob. prop. unico syllogismo.* Petrus a Christo super omnes Apostolos accepit primatum non solum honoris, sed etiam jurisdictionis. Atqui Romanus Pontifex Petro succedit non solum in Episcopatu, verum etiam in primatu. Ergo etc. Utraque ex praemissis negatur ab haeticis.

*Prob. itaque major. I. ex Scriptura. Matth. XVI. 18.* cum Petrus, tacentibus ceteris Apostolis, Christo interroganti respondisset: *Tu es Christus Filius Dei vivi*, respondit Christus: *Et ego dico tibi, quia Tu es Petrus, et super hanc petram aedificabo Ecclesiam meam, et portae inferi non praevalerunt adversus eam. Et tibi dabo claves Regni caelorum; et quodcumque ligaveris super terram, erit ligatum et in caelis; et quodcumque solveris super terram, erit solutum et in caelis.* Atqui ridiculum est asserere, per verba tam gravia, tantamque emphasis nihil Petro datum prae ceteris Apostolis. Ergo.

2.<sup>o</sup> Christus Joann. XXI. 15. cum Petrum interrogasset, utrum cum plusquam ceteri diligeret, subdit,  
pa-

*pasce agnos meos, pasce oves meas.* Atqui frustra majorem dilectionem exegisset, si non donasset altioris principatum, qui satis exprimitur per verba illa *pasce agnos, h. e. fideles, pasce oves, h. e. ipsos Episcopos, qui sunt respectu fidelium, sicut oves respectu agnorum.* Ergo.

3.<sup>o</sup> Quoties Evangelistae Apostolos enumerant, semper Petrum nominant *primum*, vel primo loco. *Matth. X. 2. Apostolorum nomina haec sunt: primus Simon, qui dicitur Petrus.* Similia habes *Marc. III. 16. Luc. VI. 14. Art. I. 13.* Atqui hoc non accidit, quia Petrus esset senior, vel prior ad Apostolatam vocatus, vel plus ceteris dilectus a Christo. Nam ex Evangelio constat, Andream vocatum fuisse primum: ex *Epiphanio* habemus, ipsum Andream fuisse ceteris seniore, *Haeresi LI.* ex Evangelio Joannis constat, ipsum Joannem propter virginitatis praerogativam fuisse plus ceteris dilectum, ita ut per antonomasiam diceretur *discipulus, quem diligebat Jesus, Joan. XXI. 7.* Ergo primus inter Apostolos recensetur Petrus propter primatum, quem a Christo accepit.

4.<sup>o</sup> Ille primatum honoris, et jurisdictionis habuit a Christo, qui ejus primatus actus exercuit. Atqui Petrus id fecit. Nam ipse prior proponit in concilio discipulorum electionem alterius Apostoli loco *Judae*: ipse prior die Pentecostes Evangelium praedicat, ipse prior Gentiles in Ecclesiam admittit, ipse prior in Concilio Jerosolymitano de observatione legalium sententiam dicit. Ergo.

*Prob. II. ex Traditione.* 1.<sup>o</sup> Ex PP. Graecis. *Basilii Serm. de Judicio Dei, de Petro ait: Ille beatus, qui ceteris praelatus discipulis fuit.* *Epiphanius Haeresi LI. Petrum elegit Christus, ut dux esset discipulorum.* *Chrysostomus Hom. XIV. in Joan. Deus solus concedere potest, ut futura Ecclesia ..... immobilis maneat, cujus Pastor, et caput est hominis piscator.* Idem saepissime repetit, et inculcat aliis in locis, ut *Homil. LV. in Matth. et alibi (a).*

3.<sup>o</sup> Ex

---

(a) Adde *Originem Hom. V. in Exod. et in Epist. ad Rom.*

2.º Ex Latinis. 1.º Ambrosius in Cap. XII. Ep. 2. Cor. Primatum, inquit, non accepit Andraeas, sed Petrus. 2.º Hieronymus Lib. I. cont. Jovin. Inter duodecim unus eligitur, ut capite constituto, schismatis tollatur occasio. 3.º Leo M. Serm. 3. de Assumptione sua ad Pontif. De toto mundo unus Petrus eligitur, qui et universarum gentium vocationi, et omnibus Apostolis, cunctisque Ecclesiae Patribus praeponatur, ut quamvis in populo Dei multi sacerdotes sint, omnes tamen proprie regat Petrus, quos principaliter regit et Christus. 4.º Augustinus Serm. XV. De Sanctis. Petrum itaque fundamentum Ecclesiae Dominus nominavit, et ideo digne fundamentum hoc Ecclesia colit, supra quod Ecclesiastici aedificii altitudo consurgit (a). Innumera alia PP. loca vide apud Nat. Alexandrum Dissert. IV. in Hist. Eccl. Sac. I. Bellarminum toto lib. I. de Rom. Pont. et alios (b).

Prob. min. ex perpetua Traditione. 1.º Patres uno ore docent, Romanos Pontifices esse Petri successores. Cyprianus Epist. LII. ad Antonian. Factus est, inquit, Cornelius Episcopus, cum Fabiani locus, idest cum locus Petri, et gradus cathedrae sacerdotalis vacaret. Optatus Lib. II. cont. Parmen. Sedit prior Petrus, cui successit Linus, Lino successit Clemens . . . et post enumeratam seriem Pontificum; Liberio Damianus, Damaso Syricius, qui noster est socius. Idem fecit Augustinus Epist. LIII. al. CLXV. ad Generosum, deducens Pontificum seriem a Petro usque ad Anastasium: Petro successit Linus, Lino Clemens etc. . . Syricio Anastasius . . . qui nunc super eandem Cathedram sedet. Hieronymus Ep. XIV. ad Damas. Cum successore piscatoris loquor . . . . Beatitude tuae, idest

---

Rom. Nazianzenum Orat. De Moderat. serv. Cyrillum Lib. II. Cap. 2, in Joan. Theophilactum in Cap. XXII. Luc. Euthymium in Cap. XVI. Matth.

(a) Adde Tertullianum Lib. de Praescript. Cyprianum, Epist. ad Quintum, et alibi saepe. Hilarius in Cap. XVI. Matth. Augustinum Serm. XV. De Sanctis, et Psalm. cont. pars. Donat. Paulinum Epist. IV. ad Severum. Gregorium M. Lib. VI. Epist. 37. ad Eulog. et alios.

(b) In Bibliotheca Roccaberti.

idest cathedrae Petri, communionem consocior. Unde patet impudentia Ulrici Veleni Lutherani, qui integro libro contra omnium veterum fidem asseruit, Petrum nunquam Romae fuisse; nec non Calvini *Lib. IV. Instit. Cap. 6. §. 15.* qui docet, Petrum fuisse quidem Romae, sed non ut Episcopum. Quae somnia qui fusius confutare vellet, frustra tempore abutetur. Vide, si lubet, Bellarminum *Lib. II. De Rom. Pont. a Cap. 1. ad 12. et Nicolaum Pallavicinum* singulari opere de hoc argumento.

2.<sup>o</sup> Patres, Romanam sedem primum habere, semper docuerunt. Irenaeus *Lib. III. Cap. 3. Ad hanc,* inquit, *Ecclesiam propter potentiorē principalitatem necesse est, omnem convenire Ecclesiam, hoc est eos, qui sunt undique fideles.* Cyprianus *Epist. LX.* Navigare audent ad Petri cathedram, atque ad Ecclesiam principalem. Augustinus *Epist. XLIII.* In Romana Ecclesia se, per Apostolicam cathedrae viguit principatus. Prosper *Carm. de Ingrat. Cap. 2.* Sedes Roma Petri, quae Pastoralis honoris Facta caput mundi, quidquid non possidet armis, Religione tenet.

3.<sup>o</sup> Idem Patres affirmant, ad Rom. Pontificem appellari posse a iudicio synodorum, ad eumque pertinere etiam causas Ecclesiae majores: quae duo in Jure Canonico tractantur uberius. Ergo ex constanti traditione Romanus Pontifex habet in Ecclesia universa primum non solum honoris, sed etiam jurisdictionis (a). Unde merito Concilium Florentinum, praesentibus etiam, et suffragantibus Graecis, *Sess. VI.* definiit, Sanctam Apostolicam sedem, et Rom. Pontificem in universum orbem tenere primum, et ipsum Rom. Pontificem successorem esse B. Petri prin-

---

(a) Vide aliorum Patrum testimonia apud Bellarminum, et alios supra laudatos, quae omnia recitare non potuit in historiā brevis. Loca sunt Athanasii *Apolog. II. et Epist. ad Pelicem P. Basilii Epist. LII. ad Athanas. Cyrilli Alex. Epist. X. XI. et XVIII.* Sozomeni *Lib. III. Cap. 7.* Optati *Lib. III. Con. Parm.* Ambrosii in *Cap. 2. r. ad Tim. Liricensis in Commont. Bedae Lib. II. Hist. Cassiodori Lib. XI. Epist. 2.* Anselmi *Lib. II. de Licarn. Cap. B.* Bernardi *Lib. II. de Consid. et aliorum.*

principis Apostolorum, et verum Christi Vicarium, totiusque Ecclesiae caput, et omnium Christianorum Patrem, et Doctorem existere, et ipsi in B. Petro pascendi, regendi, et gubernandi universalem Ecclesiam a Domino nostro Jesu Christo plenam potestatem traditam esse: quemadmodum etiam in gestis oecumenicorum Conciliorum, et in Sacris canonibus continetur, ut constat ex Concilio Nicaeno, Constantinopolitano I., Ephesino, Chalcedonensi, Lateranensi IV. Instar omnium sit Chalcedonense Concilium, in quo Act. I. Leo M. dicitur Apostolicum thronum gubernare, sedesque Romana Caput omnium Ecclesiarum. Et Act. II. cum Epistola Leonis lecta esset, Patres omnes adclamant: *Anathema, qui ita non credit: Petrus per Leonem locutus est.* Item Act. III. de Dioscoro Alexandrino Patriarcha, quem Leo damnaverat, inquit: *Sanctissimus Archiepiscopus magnae Romae una cum ter beatissimo Petro, qui est petra, et crepido catholicae Ecclesiae, et ille qui est rectae fidei fundamentum, nudavit eum episcopatus dignitate.* Quid poterat dici luculentius, et gravius? Ergo etc.

*Solvuntur Objectiones.*

Novatores, saltem numero objectionum, quamvis ineptarum vincere se posse, existimantes, tam multa congerunt contra primatum Papae, ut ea hic complecti omnia, nec vacet, nec juvet. Post ea, quae Nilus Thessalonicensis, Lutherus, Melancton, Calvinus, Brentius, Illyricus, aliique scripserant; Claudius Salmasius octo integros Libros contra Papae primatum evomuit. Praecipua argumenta dissolvemus.

*Obje. I.* Petrus non habuit a Christo primatum jurisdictionis. Nam verba illa *Matth. XVI. Super hanc petram aedificabo Ecclesiam meam*, non intelliguntur a Patribus de Petro, sed de Christo, qui est *Petra I. Cor. X. 4 et fundamentum*, praeter quod nemo potest aliud ponere *I. Cor. III. 11.* vel de professione divinitatis Christi. Hinc Hilarius *Lib. VI. de Trin.* verba illa *super hanc petram aedificabo etc.* sic explicat: *super hanc, confessionis petram.* Et Cyrillus Alex. *Lib. IV. de*

S

T. in.

*Trin. Petram*, inquit, opinor nihil aliud; quam inconcussam discipuli fidem. Similia docent Augustinus *Lib. I. Retract. Cap. 21.* Chrysostomus *Homil. LV. in Matth. alijque.* Ergo.

*v. Neg. ant. Ad confirm. Dist. ant.* Intelligentur de Christo; non excluso Petro, *conc.* Excluso Petro, *subdist.* si nomine *petrae* intelligatur *primarium* Ecclesiae fundamentum, *conc.* si intelligatur utrumque *primarium*, et *secundarium*, *neg.* Solutionem suppeditat nobis ipse Apostolus Paulus, qui *I. Cor. III. 11.* ait: *Fundamentum aliud nemo potest ponere, praeter id quod positum est, quod est Christus Jesus: et tamen idem Apostolus scribens ad Ephesios Cap. II. v. 20.* ait: *Superaedificati super fundamentum Apostolorum et Prophetarum* Quod utique intelligendum est de fundamento *secundario*, cum *primarium* sit ipse Christus, praeter quod nemo potest aliud fundamentum ponere.

Simili ergo ratione Patres ajunt, *petram* seu fundamentum *primarium* esse ipsum Christum, sed non negant, imo asserunt, etiam Petrum esse fundamentum *secundarium*; jam enim a tempore Augustini cantabatur in Ecclesia illud Ambrosii; hoc, ipsa *petra Ecclesiae*, canente, culpam diluit. Ita Leo M. cit. *Serm. III.* explicans verba Christi ait: *Ego fundamentum praeter quod aliud nemo potest ponere; tamen tu quoque petra es, quia mea virtute solidaris, ut quae mihi potestate sunt propria, sint tibi mecum participatione communia.* Et quia hanc praerogativam meruit Petrus admirabili confessione; et fide divinitatis Christi, ideo docent Patres, Ecclesiam aedificatam esse super fidei confessionem, super quam fundatus erat ipse Petrus. *Super me aedificabo te, non me super te*, inquit Augustinus *Serm. LXXVI. al. XIII. De Verb. Dom.*

*Inst.* Augustinus *Lib. I. Retract. Cap. 21.* retractat quod alibi scripserat, nempe verba illa *super hanc petram* intelligi de ipso Petro, et docet, intelligenda de Christo. Ergo Petrum excludit.

*g. Dist. ant.* Retractat, absolute rejiciendo priorem interpretationem, quae est ad litteram, *neg.* Retractat, novam interpretationem adjiciendo, non re-

jecta priori; *conc.* Non omnia enim, quae Augustinus retractat, rejicit; sed multa iterum tractat ad meliorem rei explicationem, quod proprie Latini *retractare* dicunt. Genuinus ergo sensus ejus loci *Tu es Petrus, et super hanc petram aedificabo Ecclesiam meam*, hic est: Tu es Petra (hoc enim significat Syriacum nomen *Cephas*, licet Latinus, et Graecus interpretres masculino genere dixerit *Petrum*) et super hanc petram, *h. e.* super te aedificabo Ecclesiam meam. Non enim recto sensu, atque ad litteram dicere poterat: *dico tibi, quia tu es Petra, et super me aedificabo Ecclesiam meam*. Patres tamen laudata verba extenderunt ad Christum, qui Petra est sine ulla dubitatione principalis. En verba Augustini *loc. cit.* *Dixi in quodam loco de Apostolo Petro, quod in eo, tanquam in petra, fundata esset Ecclesia, qui sensus cantatur in ore multorum ex versibus B. Ambrosii: hoc, ipsa petra Ecclesiae, canente, culpam diluit* (Ecce non reprobatur hanc interpretationem, quam agnoscit esse Ambrosii; et cantari in Ecclesia). *Sed scio, me postea saepissime sic exposuisse, ut super hanc petram intelligeretur, quem Petrus confessus est.*

*Objic. II.* Omnibus Apostolis pariter dictum est a Christo: *Quaecumque alligaveritis super terram, erunt ligata et in caelis: Matth. XVIII. 18. Sicut misit me Pater, et ego mitto vos. Joan. XX. 21.* Unde Paulus ait, fideles superaedificatos esse super fundamentum Apostolorum; et Cyprianus *Lib. De Unit. Eccl.* *Hoc erant utique ceteri Apostoli, quod fuit et Petrus. Imo ipse Leo M. cit. Ser. III. in ea verba: tibi dabo claves, inquit: Transivit quidem etiam in alios Apostolos jus potestutis istius, et ad omnes Ecclesiae principes decreti hujus constitutio commeavit.* Ergo Petrus non habuit super Apostolos primatum jurisdictionis.

*¶ Dist. ant.* Omnibus Apostolis dictum est a Christo *quaecumque alligaveritis etc.* omnibus; inquam, sub Petro eorum capite, sive, ut Scholae ajunt, *salva subordinatione ad Petrum omnium caput, conc. Secus, neg.* Hae distinctione explicantur omnes textus in objectionem recitati. Unde Cyprianus *loc. cit.* ait: *Super illum unum aedificavit Christus Ecclesiam*



suam, et illi pascendas mandat oves suas. Et quamvis Apostolis omnibus, post resurrectionem suam, parem potestatem tribuat . . . tamen ut unitatem manifestaret, unam cathedram constituit, et unitatis ejusdem originem, ab uno incipientem, sua auctoritate disposuit. Hoc erant utique ceteri Apostoli, quod fuit et Petrus, pari consortio praediti honoris, et potestatis, sed exordium ab unitate proficiscitur . . . Primatus Petro datur, ut Ecclesia una monstretur . . . Ecclesia Domini ramos suos in universam terram copia suae ubertatis extendit: unum tamen caput est, et origo una. Similia loquitur. Leo M.

*Inst.* Saltem negari non potest, Paulum omnino aequalem fuisse Petro. Nam 1º. ipse Paulus *Galat. II. 7.* ait: Creditum est mihi Evangelium praepitui, sicut Petro circumcisionis, et ibid. v. 11. cum venisset Cephias Antiochiam, in faciem ei restiti, quia reprehensibilis erat. Et *II. Cor. XI. 28.* instantia mea quotidiana, sollicitudo omnium Ecclesiarum. 2º. Petrus de Marca *Exercit. de singulari Primatu Petri* docet, Petrum simul, et Paulum fuisse Romae Episcopos, tum quia R. Pontifices aliquando successores se Petri, et Pauli esse dicunt, tum quia in eorum Bullis plumbeis apparet imago Petri simul, et Pauli, et quidem Pauli imago ad dexteram Petri. Idem docuerat Arnaldus in *Lib. de frequ. commun.*; ubi Petrum, et Paulum dicit, fuisse duo Ecclesiae capita, quae unum caput morale efficerent. Ergo.

*R. Neg. ant. et ad 1. resp.* omnes Apostolos habuisse sollicitudinem omnium Ecclesiarum, quia in omnem terram missi sunt, sed instinctu Spiritus S. divisae provinciae; sicut Petro praecipue Iudaei, Paulo praecipue gentiles, obtigerunt. Hoc tamen non obstabat, quin et Paulus Iudaeis, et Petrus gentilibus praedicaret. Verum licet Paulus, alique Apostoli omnium Ecclesiarum sollicitudinem haberent; omnes tamen Petro ut capiti subjecti erant. Correptio autem, qua Paulus Petrum redarguit, non ex auctoritate, sed ex fraterna charitate profecta est, qualis adhiberi etiam potest, salvo tamen obsequio, ac reverentia, ab inferiore, erga superiorem; nec aliud ostendit, nisi exemplum sanctae libertatis in Paulo,

et magnae humilitatis in Petro. Adposite *Augustinus Epist. LXXXII. al. XIX.* Rarius, inquit, et sanctius exemplum Petrus praebuit posteris; quo non dedignerentur a posterioribus corrigi; quam Paulus, quod confidenter auderent minores majoribus pro defendenda veritate, salva charitate; obsistere.

*Ad 2.* Sententia *Petri de Marca* stare non potest. Veteres enim, quoties de Romano Episcopatu proprie loquuntur, uni Petro illum adjudicant. Sed quia Paulus comes ejus in fundanda Romana Ecclesia, fuit, ideo aliquando veteres utrumque Romae Episcopum sive Apostolum fuisse scribunt, et Romani Pontifices successores se appellant etiam Pauli non in Romano Episcopatu; sed in minere Apostolica. Imago autem Pauli ad dexteram Petri, si quid probaret, nimis probaret, scilicet Paulum fuisse Petro majorem. Itaque imago Pauli aliquando ad dexteram, aliquando ad laevam Petri cernitur, ad designandam aequalitatem Apostolatus. Fortasse aliquando collocata est ad dexteram, vel quia apud veteres, qui amicitia arctiori juncti erant, sinistram locum tamquam honoratiorem dabant digniori, vel quia, ut advertit ipse *P. de Marca*, imago, quae respectu videntis est ad dexteram, respectu ipsius imaginis ad sinistram est.

*Ad 3.* Absurdum est, et monstruosum, imo Scripturis, et traditioni contrarium asserere duo Ecclesiae capita, Ceterum etiam in sententia *Petri de Marca*, et *Arnaldi*, staret primatus R. Pontificis. Nam licet *Petrus de Marca* Paulum cum Petro Episcopum Romanum faciat; fatetur tamen, primatum fuisse in uno Petro. *Arnaldus* vero licet duo capita constituat physica, fatetur tamen, ea constituisse caput unum morale, cui R. Pontifex succedit.

*Objic. III.* Incertum est, utrum *Petrus* Romae fuerit, ibique Episcopus sederit, et martyr obierit. Nam 1.<sup>o</sup> Quo tempore *Petrus* Romam venerit, valde obscurum est, variantque ea in re veteres. 2.<sup>o</sup> Paulus scribens ad Romanos, licet multos fratres salutandos jubeat, de Petro silet, et in Epistola, quam Roma scribit ad *Timotheum II. Tim. IV.* ait,

se ab omnibus fuisse derelictum; ac proinde non erat ibi Petrus. Ita *Velenus*, *Illyricus*, *Salmastius*, alique Protestantes, quos non mirum est, impiissimum, et procacissimum *Volternum* secutum esse.

*Neg. ant.* Si enim negemus, Petrum Romae Episcopum, et martyrem obisse, notabit omnis historiae Sacrae, et profanae fides; nulla enim est historia, quae pluribus, et gravioribus nitatur testibus, quam historia Episcopatus, et martyrii *Petri Romae*, ut ipsi fatentur moderatores haeretici.

*Ad 1. resp.* licet chronologia sit incerta, quod accidit etiam saepe in profanis historiis, non ideo tamen facti veritas nutat.

*Ad 2.* Petrus non ita Romae affixus esse potuit, ut non per finitimas urbes excurreret, praedicans Evangelium. Cum ergo Paulus scripsit ad Timotheum, Petrus fortasse Romae non erat, aut nihil Paulum juvare potuit. Cum autem scripsit ad Romanos, Petrus certe Roma exulabat, propter edictum *Claudii* Imperatoris, qui circa finem imperii sui Judaeos omnes Roma expulit, ut testatur *Suetonius in Claudio cap. 25.* et *Lucas Act. XVIII. 2.* eo ipso enim tempore scripta est Epistola ad Romanos, cum scilicet Paulus jam profecturus esset Jerosolymam, *Rom. XV. 25.* ubi comprehensus a Judaeis, perductus est ad tribunal *Felicii*, qui Judaeae praefuit circa finem imperii *Claudii*.

*Objic. IV.* *Cyprianus Epist. ad Quintum* videtur omnem primatum R. Pontifici abjudicare: Ait enim: *Neque quisquam nostrum Episcopum se Episcoporum constituit, aut tyrannico terrore ad obsequendi necessitatem collegas suos adigit, cum habeat omnis Episcopus pro licentia libertatis, et potestatis suae arbitrium proprium, tamquam judicari ab alio non possit, cum nec ipse possit alium judicare.* Ergo.

*Neg. ant.* Longe enim abest a mente *Cypriani*, ut nullus Episcopus alteri subdit, ac judicari possit, cum in *Epist. ad Stephanum* roget S. Pontificem, ut jubeat deponi *Marcianum Episcopum Arelatensem*, et alium institui, et in *Lib. de Unit. Ecclesiae* tam magnifice loquatur de primatu *Petri*.

*Ad confirm. N. dist. ant.* Nemo se constituit Epi-

Episcopum Episcoporum, non potest ab alio judicari etc. in rebus, quae non sunt contra fidem, et bonos mores, *conc.* in iis, quae fidei, et bonis moribus adversantur, *neg.* Putabat itaque *Cyprianus*, disciplinam, quae vigeat in Africa ab aliquot annis, repetendi scilicet baptismum datum ab haereticis, non esse fidei contrariam, sed consentaneam; ac proinde unumquemque Episcopum posse eam sequi. Ideo conqueritur *Cyprianus*, *Stephanum* Papam eam ob causam minatum esse excommunicationem Episcopis Africanis, si ab ea consuetudine non recederent. Quam in re decipiebatur *Cyprianus*: eum tamen excusat saepe *Augustinus*, eo quod haec controversia ipsi tunc obscura esset, necdum ab universa Ecclesia definita; et si quid contra *Stephanum* Papam in ipso controversiae aestu peccavit, id martyrio elucrit.

*Objic. V.* *Hieronimus Epist. ad Evagr.* ait: *Ubi-  
eumque fuerit Episcopus sive Romae, sive Eugubii,  
sive Constantinopoli, sive Rhégi, sive Alexandriae,  
ejusdem meriti est, et ejusdem Sacerdotii. Ergo.*

*¶. Dist. ant.* Ejusdem est Sacerdotii, quoad potestatem ordinis, *conc.* quoad potestatem jurisdictionis primatui adnexam, quam *Hieronimus* agnoscit, et mirifice extollit, praesertim in laudata Epistola ad *Damasum*, *neg.* Reprehendit ergo *Hieronymus* superbiam diaconorum Ecclesiae Romanae, qui ideo supra Episcopos ipsos extollebantur, quod proximi adstarent R. Pontifici.

*Objic. VI. R.* Pontificis primatus oritur ex Canonibus, et consuetudine Ecclesiastica. Ait enim Concilium Nicaenum *Can. VI.* *Antiqua consuetudo servetur per Aegyptum, Lybiam, et Pentapolim ita ut Alexandriae Episcopus horum omnium habeat potestatem, quia et Urbis Romae Episcopo peritis mos est.* Et Concilium Chalcedonense *Can. XXVIII.* *Antiquae Romae throno, quod Urbs illa imperaret, jure Patres privilegia tribuerunt. Ergo.*

*¶. Dist. ant.* Oritur ex lege Ecclesiastica quoad jura Patriarchalia, *conc.* quoad ipsam primatum in tota Ecclesia, *neg.* Concilia Nicaenum, et Chalce-

donense comparant Romanum Pontificem cum Patriarchis Orientis; atque ideo de solis Patriarchalibus juribus loquuntur. Igitur R. Pontifex considerari potest vel ut Episcopus urbis Romae, vel ut Metropolitanus suae provinciae, vel ut Patriarcha totius Occidentis, aut saltem Provinciarum suburbicarum, ut explicat Ruffinus *Lib. I. Hist. cap. 6.* quae Praefecto Urbis suberant, vel ut caput totius Ecclesiae. Ejus jura, tamquam Ecclesiae Capitis, sunt ex institutione divina: jura autem Metropolitana, et Patriarchalia, ex dispositione canonum, vel antiquae consuetudinis, quae dioecesim cujusque Episcopi terminavit. Ceterum Canon XXVIII. Chalcedonensis non fuit a Concilio editus, sed, absoluto Concilio, adjectus a Graecis ambitu *Anatolii* Episcopi Constantinopolitani, absentibus legatis R. Pontificis, qui ei Canonem contradixit; quia aliorum Patriarcharum Orientis jura minuebat contra Canones Nicaenos, nec Romana sedes, nisi studio pacis, multis postapnis eum canonem, apud Graecos consuetudine roboratum, servari permisit.

Quaenam ergo, inquires, sunt jura R. Pontificis *Metropolitica*, quaenam *Patriarchalia*; quaenam denique ipsi, ut Capiti Ecclesiae; conveniunt?

¶ Omissis juribus Metropolitanis, et Patriarchalibus, de quibus in jure Canonico disputatur, jura primatus ea sunt, sine quibus obtineri nequit finis, ob quem statutum est Ecclesiae Caput. Finis autem ille est, ut Ecclesia una monstretur, teste *Cypriano*; ut unitas servaretur, teste *Optato*; ut capite constituto, schismatis tollatur occasio, teste *Hieronymo*. Cum ergo Ecclesiae unitas sita sit in unitate fidei, et regiminis, sequitur, ad Romanum Pontificem pertinere, 1°. definire controversias fidei, ut fecerunt *Stephanus* in causa baptismi haeticorum, *Zosimus* in causa Pelagianorum, *Leo M.* in causa Eutychianorum etc. 2°. Constitutiones edere ad servandam, vel reparandam Ecclesiae disciplinam. 3°. Episcopis per vim contra canones oppressis, aut depositis, et ad eum appellantibus, opem ferre. 4°. OEcumenica Concilia, quando opus fuerit, indicare, iisque praesidere, et eadem

eandem, postquam absoluta sunt, adprobare, et confirmare; et in aliquibus Canonibus aliquando pro bono Ecclesiae dispensare.

*Obje. VII.* Si Pontifex in universa Ecclesia primatum haberet., ab omnibus posset ad eum appellari in caussis Ecclesiasticis. Atqui falsum consequens. Ergo etc.

*Probi. min. 1º.* Marcion ab Episcopo suo excommunicatus Romam venit, ut Ecclesiasticae communioni restitueretur. Ei tamen responsum est, non posse R. Ecclesiam illi communionem impertiri, injussu Episcopi sui, ut scribit Epiphanius *Haeres. XLII.* 2º. Cyprianus *Epist. III ad Cornel.* queritur, Presbyteros, et Clericos Africanos ad R. sedem appellare. Imo statutum est in Concilio Milevitano II. ut qui ad transmarina judicia putaverit appellandum, a nullo intra Africam communionem suscipiatur 3º. Africani Episcopi acriter restiterunt Zosimo P. qui causam Apriarii ad R. Sedem appellantis, retractari mandaverat per legatos suos, ut patet ex Actis Concilii Carthaginiensis VI. ea autem controversia etiam post mortem Zosimi sub Bonifacio, et Caelestino duravit. Unde Petrus de Marca jus appellationum nonnisi ex Concilio Sardicensi oriri docet. Ergo.

¶ *Dist. maj.* Ab omnibus posset appellari, si non obstarent Canones ab ipsis R. Pontificibus probati, conc. Secus, neg. Et distincta eodem modo *minori.* Neg. cons. Cum itaque primatus institutus sit in aedificationem, non in destructionem, cautum est ab Ecclesia, ipsis R. Pontificibus consentientibus, ut nonnullis in causis appellationi non esset locus, ne Ecclesiasticae disciplinae vigor infringeretur. Constitutum igitur est, 1º. ut excommunicatus a suo Episcopo, non posset ab altero communionem accipere, quod ab Apostolorum aetate sancitum, et consuetudine firmitum, Nicaena deinde Synodus *Can. V.* confirmavit; et ita intelligimus, cur Marcion Romae non est receptus, praesertim cum is Romam venerit, Hygino Papa mortuo, ac proinde, sede vacante, Romani Presbyteri excommunicatum a suo episcopo

recipere nec voluerint, nec potuerint (a). 2°. ne Presbyteri, et minores Clerici in Africa possent ad transmarina judicia, h. e. sedem Romanam appellare, sed tantum ad Africana concilia: atque hinc intelligimus, cur *Cyprianus*, et Concilium Milevitanum appellationes istas vetuerint, et Patres Concilii Carthag. VI. non cito acquieverint *Zosimo*, Apiarii presbyteri causam per legatos suos retractanti, cum praesertim *Zosimus* citaret pro appellationibus Presbyterorum Canones Concilii Nicaeni, qui nec habebantur in Codice Africano, nec in Alexandrino, nec in Antiocheno Canonum Nicaenorum, sed erant canones Concilii Sardicensis, in Codice Romano Canonibus Nicaenis subnexi. Nunquam tamen cautum est, ne Episcopi ad R. Pontificem appellarent. Unde Episcoporum appellationes frequentissimae fuerunt etiam ante Concilium Sardicense; quippe quae ortum habeant ex divino jure primatus, ut contra *Petrum de Marca* demonstrat. *Nat. Alexander Dissert. XXII. in Hist. Eccl. Saec. IV.*

Ceterum ipsi Canones, qui vetabant appellationes minorum Clericorum, probant R. Pontificis primatum; Si enim R. Pontifex primatum in Ecclesia non haberet, nemo ad eum appellasset.

*Inst.* *Cyprianus Epist. LXVIII.* laudat Hispanos, quod *Basilidem*, et *Martialem* Episcopos in conciliis damnatos; et a *Stephano P.* restitutos; recipere noluerant. Ergo.

*¶ Neg. cons.* Non enim ita scripsit *Cyprianus*, quod negaret *Stephani* primatum, sed quia judicavit, Epi-

---

(a) Accedit 1°. non esse inter eruditos exploratum, utrum *Marcion* revera appellaverit Romanam Ecclesiam, ut putat *Beilarminus*, an vero in ejus communionem subdole irrepere tentaverit sine vera appellatione. ut contendit *Natalis Alexander Dissert. II. in Hist. Eccl. Saec. II. art. 3. 2°.* Affirmare *Tertullianum Lib. de Praescript. Cap. 30.* *Marcionem* ab *Aleutherio* communioni restitutum, iterum ad vomitum rediisse, quod non solidis rationibus negat *Tillemontius*.

Episcopos illos manifesti criminis reos, falsis narrationibus R. Pontifici obrepsisse.

*Objic. VIII. Gregorius M. damnat nomen Episcopi universalis, quod assumserat Joannes Episcopus Constantinop. tanquam nomen blasphemiae Lib. VII. Ep. 32. imo Epist. 36. docet, nullum e Romanis Pontificibus hoc unquam nomen usurpasse. Ergo negat, Romanum Pontificem esse Episcopum universalem, h. e. totius Ecclesiae caput.*

*R. Dist. ant.* Damnatur in sensu pravo, *conc.* in sensu Catholico, *neg.* Nomen enim Episcopi universalis duplicem potest habere sensum. Primus falsus est, scilicet unum esse in tota Ecclesia Episcopum, cujus omnes alii Episcopi sint vicarii. Alter rectus, et catholicus, scilicet quod inter omnes Episcopos unus primatum habeat. Episcopo autem Constantinopolitano in neutro sensu nomen Episcopi universalis conveniebat; at Romano Pontifici nomen hoc convenit quidem in sensu recto, et catholico; sed *Gregorius* docet, praecessores suos ab eo nomine ob modestiam abstinuisse. Ceterum Concilium Chalcedonense *Act. III.* R. Pontificem vocat *Patriarcham Oecumenicum* et *Act. IV. Universalis Ecclesiae Pastorem.*

*Objic. IX.* Quod R. Pontifex succedat Petro in primatu Ecclesiae, oritur ex facto ipsius Petri, qui voluit Romae potius, quam Antiochiae permanere, ubi per plures annos Ecclesiam rexerat; cujus quidem facti notitiam non ex divina revelatione, sed ex humana accepimus historia. Ergo non est ex jure divino, nec dogma fidei.

*R. Dist. ant.* Oritur ex facto Petri primario, et absolute. *neg.* Secundario, et hypotetice, *Subdist. ex facto Petri, humana tantum prudentia agentis, neg. divina, conc.* Itaque quod Primatus Petro datus transiret in eum, qui Petro in Episcopatu successurus erat, ex jure divino est; quod autem talis successor sit Romanus Episcopus, est ex facto Petri, non humana, sed divina providentia dirigente. Cujus providentiae, et facti notitiam non ex humana solum historia accepimus, sed ex traditione divina vel ab ipso Petro, vel ab aliis Apostolis profecta, atque omnium



omnium Patrum testimonio confirmato; ex qua concilio Florentinum supra laudatum definivit, ut dogma fidei, R. Pontificem esse Petri primatus successorem. Vide Bellarminum *Lib. II. De Rom. Pont. Cap. 12.* Sylvium *Opusc. V.* Melchiorem Canum *Lib. VI.*

### Scholion.

Quod Petrus caput Ecclesiae fuerit jure divino, dogma fidei est. Quod ejus primatus ad ejus successorem jure divino transire debuerit, item est dogma fidei. Quod R. Pontifex sit constitutus Petri successor, ideoque juri divino sit Ecclesiae caput, jam diximus *in prop.* esse dogma fidei. Utrum autem jure divino sit constitutus Petri successor R. Pontifex, et non alius Episcopus, quaestio est ad fidem non pertincens, et inter Catholicos agitata, ut observat *Sylvius*. Verisimilior tamen est sententia affirmans.

### Corollarium.

Ergo regimen Ecclesiae non est democraticum, nec absolute Monarchicum, sed Monarchicum Aristocratia temperatum. Vide Bellarminum *Lib. I. de R. Pont. et alios ab eo citatos Cap. 5.* Celebre est illud Cypriani *Lib. de unit. Eccl. Episcopatus unus est, cujus a singulis in solidum pars tenetur*, h. e. licet multi divinitus constituti sint Episcopi, tamen omnes unum constituunt *episcopatum*, non solum quia vinculo charitatis in unum conjuncti sunt, sed etiam quia alter alteri ita connexus est, ut omnes ab uno regantur. Dicit autem, a singulis partem in solidum teneri, quia licet unicuique certi dioecesis limites assignati sint, ut jam usurpator habeatur, si in alienam dioecesium velit manum extendere; tamen haec partitio non impedit, quominus, in communi periculo, unusquisque Episcopus totius Ecclesiae sollicitudine tangatur: unde laudatur *Eusebius* Vercellensis Episcopus, qui in gravi Arianorum tempestate in alienis dioecesium Episcopos catholicos ordinavit. (a) CAP-

(a) Docet tamen *Beconius ad ann. CCCLXII.* id fecisse *Eusebium* ex R. Pontificis auctoritate, et legatione.

C A P. IX.

De Conciliis.

*Adv. I.* **Q**uoniam Ecclesiae regimen est Monarchicum Aristocratia temperatum, ut supra docuimus, patet, eam censendam esse totius Ecclesiae definitionem, quae sit consensu moraliter unanimi omnium Episcoporum, suo capiti R. Pontifici adhaerentium.

II. Hic autem consensus explicari potest vel ab Episcopis per orbem dispersis, vel in unum legitime congregatis. Legitima autem congregatio Episcoporum, aliorumque Pastorum, Concilium dicitur.

III. Concilia vel *particularia*, vel *generalia* sunt, Particularia rursus dividuntur in *diocæsana*, *provincialia*, et *nationalia*, quae ex unius dioecesis, provinciae, aut nationis Pastoribus componuntur. Et particularia quidem, si seorsim sumantur, in fide errare possunt, sicut accidit Conciliis a *Cypriano* habitis, in causa baptismi haereticorum. Raro tamen errarunt; imo magnae auctoritatis sunt, cum promiserit Christus *Matt. XVIII. 20. Ubi sunt duo, vel tres congregati in nomine meo ibi sum in medio eorum*; et accedente Ecclesiae adprobatione, auctoritatem infallibilem acquirunt, ut Concilium Arausicanum II.

IV. Generalia Concilia ( quae et *Oecumenica* Graece dicuntur ) sunt, quae constant ex Episcopis ab universa *οικουμένη*, sive terra habitabili, seu ab universo orbe Christiano legitime convocatis. Quaerimus ergo hic 1°. quid requiratur, ut haec Concilia sint legitima, 2°. quanta sint auctoritatis; 3°. quaenam eorum necessitas.

## PROPOSITIO I.

*Ut Concilium oecumenicum sit legitimum requiritur  
legitimā convocatio, legitima celebratio,  
legitimus exitus,*

*Explicatur, et prob. 1a. pars.* Per legitimam convocationem, intelligimus, 1°. ut ab illo convocetur, qui convocandi jus habet, qualis est R. Pontifex auctoritate ordinaria, et eo deficiente, R. Ecclesiae Cardinales auctoritate extraordinaria: 2°. ut ii convocentur, qui conveniendi jus habent, nemine excluso, scilicet omnes Christiani orbis Episcopi. Atqui, ut Concilium Oecumenicum sit legitimum, utrumque requiritur. Ergo.

*Prob. min. 1°. Requiritur, ut convocetur a R. Pontifice auctoritate ordinaria.* Ecclesiae enim regimen Monarchicum est, Aristocratia temperatum; ergo sicut in Regno, in quo regimen politicum est monarchico-aristocraticum, nulla censentur legitima comitia, nisi a monarcha cogantur, ita generalia Ecclesiae Concilia legitima non sunt, nisi a Principe omnium Pastorum convocentur. Parum autem refert, utrum convocentur a R. Pontifice ~~aut~~ immediate, vel mediate, hoc est ab aliis ex ejus consensu, sicut octo priora Concilia oecumenica ab Imperatoribus ex R. Pontificis consensu, convocata sunt. Confirmatur ex perpetuo usu, et praxi Ecclesiae. Unde Pelagius II. *Can. multis. Dist. 17. Multis, inquit, Apostolicis, Canonis, atque Ecclesiasticis instruimur regulis, non debere absque sententia R. Pontificis Concilia celebrari.*

Quod autem deficiente R. Pontifice, si necessitas Ecclesiae id exposcat, possit Concilium extraordinaria auctoritate convocari a R. Ecclesiae Cardinalibus (qui aliquam partem Pontificiae jurisdictionis habent, deficiente Papa; non secus ac Capitulum sede vacante) patet, quia aliter necessitati Ecclesiae succurri non posset. Ita si duo de Pontificatu contendant, nec, quis eorum verus sit pontifex, cognosci possit, nisi quaestio in Concilio oecumenico di-

rimatur; tunc si henter Concilium convocare velit, a Cardinalibus convocabitur, ut Concilium Pisanum. Idem dicas, si Pontifex ut privata persona labatur in haeresim, nec monitus velit respiscere, nec Concilium indicare.

2°. Requiritur, ut omnes convocentur, nemine excluso, qui conveniendi jus habeat, quales sunt de jure omnes Episcopi; omnes enim pascendi, et regendi Ecclesiam jus habent. Ex consuetudine quidem obtinuit, ut vocentur ad Concilium etiam Cardinales, Generales Ordinum ministri, et aliqui Abbates cum suffragio definitivo, ex privilegio Pontificio. Imo et Theologi, ut consultores; et principes saeculares, ut defensores. Sed Episcopi de jure praetermitti, et excludi sine culpa non possunt. Unde Aegyptii in Concilio Chalcedonensi dixerunt: *Synodus Episcoporum est, non clericorum; superfluos foras mittite*. Ergo. Haec 1a. pars est contra Lutheranos, qui docent Concilia indicendum esse a principe saeculari, et omnes etiam Laicos convenire debere. Quae duo longè absurdissima sunt etc.

*Explic. et Prob. 2a. pars.* Per legitimam celebrationem duo intelligimus, 1°. ut R. Pontifex per se, vel per legatos suos Concilio praesideat; 2°. ut Episcopi ex majori saltem provinciarum parte reipsa conveniant vel per se, vel per legatos suos, sufficienti numero, qui licet non sit a jure definitus, debet tamen esse non exiguus. Atqui utrumque requiritur ad legitimum concilium generale. Ergo.

*Prob. min. 1°. requiritur, ut praesideat R. Pontifex vel per se, vel per legatos;* nam alioquin Concilium non repraesentaret Ecclesiae corpus, si caput ipsum abesset. Hinc omnibus oecumenicis Conciliis R. Pontifex vel per legatos suos, vel per se ipse praefuit.

2°. Requiritur, ut Episcopi reipsa conveniant, et quidem numero sufficienti. Ridiculum enim esset, si quinque, aut decem Episcopi Concilii generalis nomen sibi tribuerent. Licet autem hic numerus certus non sit, ut patet ex historia omnium Conciliorum; quibus modo plures, modo pauciores Episcopi adfue-

adfluunt; necesse tamen est, ut ex majori provinciarum Christianarum parte Episcopi vel per se, vel per legatos conveniant. Si autem celebretur concilium, in oriente sufficit, ut aliqui saltem adveniant ex occidente, et vicissim.

*Explic. et prob. 3a pars.* Per legitimum exitum quatuor intelligimus; 1.<sup>o</sup> ut Episcopi libertatem habeant suffragiorum; 2.<sup>o</sup> ut nemo excludatur, qui audiri voluerit; 3.<sup>o</sup> ut adhibeatur etiam humana diligentia, in inquisitione veritatis; 4.<sup>o</sup> ut acta confirmentur a R. Pontifice. Atqui haec quatuor requiruntur. Ergo.

*Prob. min. 1.<sup>o</sup>* Requiritur suffragiorum libertas. Si enim Episcopi coacti sententiam dicunt, non constabit utrum locuti fuerint ex sententia Ecclesiae, an ex sententia ejus, qui coegit. Hac de causa Concilium Ephesinum II. evasit irritum, ac non legitimum.

2.<sup>o</sup> Requiritur, ne quis excludatur, qui audiri voluerit. Prudentia enim exigit, ut in veritatis inquisitione perpendamus etiam momenta partis adversae.

3.<sup>o</sup> Requiritur etiam humana diligentia in rebus obscuris investigandis. Qui enim nulla adhibita diligentia ad rem definiendam prosiliret, is utique tentaret Deum. Hinc in Concilio Hierosolymitano Apostolorum ait Lucas *Act. XV. 7. Cum magna conquisitio fieret etc.*

4.<sup>o</sup> Requiritur approbatio, et confirmatio R. Pontificis. Quod probatur tum ex praxi omnium Conciliorum generalium, tum ex ratione; non enim censeri potest, totum Ecclesiae corpus aliquid definire, si huic definitioni consensus, et approbatio ipsius capitis non accedat. Hinc Leo X. in *Concil. Later. Sess. XI.* recte ait: *consueverunt antiquorum Conciliorum Patres pro eorum, quae in suis Conciliis gesta fuerunt, corroboratione, a R. Pontifice subscriptionem, et approbationem humiliter petere, et obtinere, prout in Nicaena, et Ephesina, et Chalcedonensi, et VI. Constantinopolitana, et VII. eadem Nicaena . . . manifeste colligitur: quod etiam novissime Constantienses Patres fecisse constat.* Adde, nullum Concilium, cui R. Pontifex sub-

subscribere recusavit, habitum fuisse unquam in Ecclesia legitimum. Utrum autem satis sit ad Concilii firmitatem ea subscriptio, quae sit a legatis, nomine Pontificis Concilio praesidentibus, infra videbimus.

Dices cont. 1. part. pro Lutheranis. In Conc. Hierosolymitano Apostolorum, quod aliorum forma fuit, Act. XV. non solum Episcopi, sed etiam Presbyteri, et laici convenerunt. *Convenerunt Apostoli, et seniores videre de verbo hoc.* Et infra: *placuit Apostolis, et senioribus cum omni Ecclesia eligere viros ex eis, et mittere Antiochiam.* Ergo.

¶. Dist. ant. Non solum Episcopi, sed etiam alii convenerunt ut iudices, neg. convenerunt ut consultores, et auditores, conc. Itaque per seniores intelliguntur Presbyteri, quo nomine donabantur etiam Episcopi, ut patet ex Epist. I. Petri cap. ult. v. 1. *Seniores (πρεσβυτερος) qui in vobis sunt, obsecro consenior.* Si ergo nomine Presbyterorum apud Lucam Act. XV. intelliguntur Episcopi, patet, solos Episcopos cum Apostolis rem definivisse: nam ipsi soli convenerunt videre de verbo hoc: et ipsorum nomine scripta est Epistola, cujus initium est: *Apostoli, et seniores fratres.* Si vero nomine Presbyterorum intelliguntur etiam simplices Sacerdotes, dicendum est, eos admissos etiam ad suffragium consultivum, sicut aliis Conciliis Oecumenicis adsunt Theologi, vel etiam ad suffragium definitivum ex concessione Apostolorum, sicut etiam in aliis Conciliis admittantur Cardinales, Abbates, Generales Praepositi, ex privilegio Apostolico.

Quod autem Lucas ait, adfuisse omnem Ecclesiam, non probat, etiam laicos adfuisse ad definiendum, sed tantum ad audiendam definitionem, quae omni Ecclesiae placuit, hoc est gratissima accidit.

Inst. Concilium Oecumenicum totam Ecclesiam repraesentat. Ergo non soli Episcopi convenire debent.

¶. Neg. cons. Cum enim in corpore Ecclesiae varia membra non eundem actum habeant, ut ait Apostolus, illi soli repraesentant totam Ecclesiam do-

centem , qui soli sunt *Pastores* , et *doctores*. Num-  
quid enim omnes *doctores* ? Cor. XII. 29.

*Dices* II. cont. 2m. et 3m. part. Si duo de Papa-  
tu contendant , aut Pontifex , ut privata persona in haer-  
esim lapsus , a Concilio iudicandus sit ; non poterit  
R. Pontifex ei praesidere , nec cum fuerit absolutum  
adprobare , et tamen potest Concilium esse legitimum.  
Ergo non requiritur , ut R. Pontifex Concilio praesit ,  
illudq. confirmet.

¶ *Neg. cons.* tum quia in praedictis extraordina-  
riis causis perinde est , ac si Romana Sedes tunc va-  
caret ; tum quia iisdem in causis eligitur in ipso  
Concilio legitimus Pontifex , qui praesit reliquis Ses-  
sionibus , et Acta confirmet , ut factum est in Conci-  
lio Pisano , et Constantiensi.

## PROPOSITIO II.

*Legitima Concilia Oecumenica in fide , et moribus  
errare non possunt. Est dogma fidei contra  
Lutheranos , et Calvinistas.*

*Prob. I.* Ecclesia universa in fide , et moribus er-  
rare non potest , ut supra ostendimus. Atqui Conci-  
lia oecumenica universam repraesentant Ecclesiam ;  
licet enim soli Episcopi conveniant , non laici ; ta-  
men munus docendi non ad laicos , sed ad Pastores  
pertinet , ut inquit Apostolus *Ephes. IV. 11.* ac pro-  
inde illi soli totam Ecclesiam docentem repraesent-  
tant. Unde Augustinus *Lib. I. de Bapt. Cap. 18.*  
vocat sententiam Concilii plenarii *consensionem totius  
Ecclesiae*. Et Martinus V. in Conc. Constantiensi sus-  
pectos de haeresi interrogari jubet , *utrum credant ,  
quod Concilium generale universam Ecclesiam reprae-  
sentet.* Ergo.

*Prob. II.* Apostoli in Concilio Hierosolymitano *Act.  
XV.* definitionem ipsius Concilii vocant sententiam  
Spiritus Sancti : *visum est Spiritui Sancto , et nobis.*  
Unde merito Gregorius M. *Lib. I. Epist. XXIV. ad  
Joan. Antioch.* Sicut , inquit , Sancti Evangelii quatuor  
libros

libros, sic quatuor Concilia suscipere, et venerari me fateor. Ergo.

Prob. III: ex perpetua Ecclesiæ traditione, quæ definitiones Conciliorum generalium semper ut infallibiles, nec retractationi unquam obnoxias, quique ipsis reluctati sunt, pro hæreticis habuit (a). Ergo

*Solvuntur Objectiones.*

Objic. I. Augustinus *Lib. III. cont. Maxim.* Nec ego, inquit, Nicaenum tibi, neque tu Ariminense mihi debes tamquam præjudicaturus proferre Concilium. Nec ego hujus auctoritate, nec tu illius detineris. Ergo Augustinus non judicavit infallibilem auctoritatem Conc. Nicaeni.

¶ Neg. cons. Non enim ita scripsit S. Doctor, quia parvi penderet Nicaenum Concilium, de quo sic ait in eod. *Lib.* Hoc est illud homousion, quod in Conc. Nicaeno adversus Arianos a Catholicis Patribus veritatis auctoritate, et auctoritatis veritate firmatum est. Sed quia Maximinus Arianus ejus Concilij auctoritatem non agnoscebat, Cenciliabulum vero Ariminense prædicabat, ut legitimum, ideo, ne longiori disputatione demonstrare cogeretur Augustinus Concilium Nicaenum esse legitimum, Ariminense vero non legitimum, utitur præteritione: et missa tunc ea controversia, Arianam impietatem confodit ex Scripturis, quas adversarius respucere non poterat.

Objic. II. Idem Augustinus *Lib. II. de Bapt. cap. 5.* ait; ipsa plenaria Concilia priora a posterioribus emendari. Atqui emendari non possent, si omnino falli nequirent. Ergo.

¶ Dist. maj. Concilia plenaria priora a posterioribus

T 2

bus

---

(a) Athanasius *Epist. ad Epictet.* Nazianzenus *Epist. ad Cledon.* et *Orat. in Athanas.* Basilius *Episto. LXXXVII.* Cyrillus *Lib. 1. de Trin.* Augustinus *Lib. 1. de Bapt. cap. 18.* et *Epist. CLXXII.* Leo M. *Epist. LXXXVIII.* et al. Ambrosius *Epist. XXXII.* Hilarius *Lib. De Synodis*, et alii.



bus emendantur in rebus fidei, et morum, *neg.* in rebus facti, et disciplinae, quae est pro temporum, et locorum varietate mutabilis. *conc.* Subdit enim Augustinus, tunc emendari, cum aliquo rerum experimento aperitur quod clausum erat, et cognoscitur quod latebat: ex quibus manifestum est, Augustinum loqui de rebus facti, quae solae experimento rerum cognosci possunt.

*Objic. III.* Gregorius Naz. *Epist. LV. ad Procop.* ait, se omnem Episcoporum conventum fugerò, quoniam, inquit, nullius Concilii finem laetum et faustum vidi, nec quod depulsionem malorum potius, quam accessionem, et incrementum habuerit. Ergo.

*R. Dist. ant.* Et loquitur Gregorius de particularibus Conciliis suo tempore celebratis, Ariana factione omnia perturbante, *conc.* loquitur de Conciliis oecumenicis, ac legitimis, *neg.* Ipse enim *Orat. XXXII.* Concilium Nicaenum magnis laudibus extollit, imo Concilio Constantinopolitano interfuit.

*Objic. IV.* Plura Oecumenica Concilia manifesti erroris revincuntur, ut Lateranense III. quod expeditionem *Crucesignatorum* statuit contra infideles; Lugdunense II. quod eandem expeditionem statuit contra haereticos, et Fridericum Imperatorem exauctorare est ausum. Constantiense, quod Joannem Hus, et Hieronymum Pragensem contra publicam fidem ipsis datam morte damnavit; quae omnia injusta fuerunt, Ergo etc.

*R. Negari potest. ant.* Nam bellum quidem contra infideles, et haereticos susceptum est, non ut infideles, sed ut hostes, ad propulsandam injuriam, et ad defensionem, ex causis, quae tunc justae visae sunt, Fridericum Imperatorem non Concilium Lugdunense, sed Innocentius IV. damnavit, sacro praesente Concilio, non vero approbante, ut in Actis legitur. De cujus Innocentii facto non est hic dicendi locus. Denique Joannes Hus, et Hieronymus Pragensis haeretici, et seditiosi pluries a Concilio Constantiensi admoniti sunt, ut haeresim ejurent, sed in errore obstinati, damnati sunt a Concilio, poenis tantum Canoniceis. Morte vero eos damnarunt magistratus civiles,

1<sup>ca</sup>. Joanni Hus fides data non fuerat a Concilio, sed ab Imperatore sub conditionibus, quas ipse non servavit. Hieronymo vero Pragensi fides data fuerat quidem a Concilio, sed *salva iustitia*.

Sed quamvis daremus quod in *antecedenti* positum est, nihil sequeretur contra Conciliorum infallibilitatem. Non enim defendimus gesta Conciliorum, in quibus errore facti labi potuerunt, sed definitiones fidei, et morum, cujusmodi non sunt ea quae in Objectione commemorata sunt.

*Objct. V.* Concilium generale V. et Concilium VII. a nonnullis Ecclesiis diu recepta non sunt, nec tamen illae Ecclesiae habitae sunt haereticae. Ergo.

*¶. Dist. ant.* Quia illae Ecclesiae particulares errore facti putarunt, illa Concilia non fuisse oecumenica, et legitima, *conc.* Secus, *neg.*

*Inst. 1.<sup>a</sup>* Concilium Constantiense ab omnibus Catholicis habetur ut oecumenicum, et legitimum; et tamen plures catholici docent R. Pontificem esse supra Concilium, contra quod definitum est. *Sess. IV. et V.* illius Concilii. Ergo.

*¶. Dist. ant.* Et non constat inter omnes catholicos, utrum illa decreta *Sess. IV. et V.* fuerint a R. Pontifice adprobata, nec constat, utrum loquantur de Pontifice tempore schismatis, an etiam extra tempus schismatis, *conc.* Secus, *neg.* Itaque Martinus V. in Concilio electus Pontifex confirmavit omnia Concilii Acta, sed addidit in decreto confirmationis ea verba quae *conciliariter acta sunt*. Non constat autem inter omnes catholicos, utrum ea decreta *Sess. IV. et V.* sint acta *conciliariter* juxta mentem Pontificis. Sed etsi illud constaret non est inter omnes catholicos manifestum, utrum verba Concilii intelligenda sint de tempore schismatis illius, quod occasionem praebuit celebrandi concilii.

*Inst. 2.<sup>o</sup>* Ex concessis possunt quaedam particulares Ecclesiae errore facti, sine nota haeresis, non habere pro oecumenico Concilium aliquod, quod revera oecumenicum, et legitimum est. Ergo, quod aliquod singulare Concilium sit oecumenicum, et legitimum, dogma fidei non est, ac proinde a fortiori  
noti

non erit dogma fidei quod in Concilio illo definitum est.

*Respondent nonnulli Theologi, Dist. cons.* Quod aliquod singulare concilium sit oecumenicum, non est dogma fidei, nec unquam tractu temporis pervenire potest ad certitudinem fidei, *neg.* Non est dogma fidei aliquo spatio temporis, *subdist.* respectu totius Ecclesiae, *neg.* respectu aliquarum Ecclesiarum, quae propter peculiare circumstantias aliqua facti ignorantia laborare possunt, *conc.* Itaque quod aliquod singulare Concilium, *ex. gr.* Tridentinum, sit oecumenicum, et legitimum jam inquirunt, est dogma fidei *ex consensu* totius Ecclesiae, quae illud recipit ut oecumenicum. Sed antequam hic consensus cognosci possit, potest quidem ex humana certitudine, et consensu Scriptorum, praecipue vero *ex approbatione* sedis Apostolicae sciri, Concilium illud esse oecumenicum, et legitimum: sed possunt aliquandiu aliquae particulares Ecclesiae sine culpa ignorare quaedam facta, ex quibus pendet, ut Concilium legitimum, et oecumenicum censeatur, sicut accidit nonnullis Ecclesiis respectu Concilii V. et VII. Hoc autem contingere non potest Ecclesiae universae, quae a Spiritu S. edocta, falli non potest in agnoscendo aliquo Concilio ut oecumenico, vel eo rejiciendo ut irrito, ac non legitimo.

Verum quia haec responsio novis posset sternere viam objectionibus, idcirco, ea praetermissa, concedimus cum *Melch. Cano*, et *Bellarmino*, non esse dogma fidei, quod hoc singulare Concilium sit oecumenicum; id enim non est a Deo primitus Ecclesiae revelatum, sed cognoscitur certissime ex ipsa rerum serie, quae in Concilio gestae sunt. Cognoscitur, inquam, statim a tota Ecclesia, quae a Spiritu S. illustratur, ne in hoc negotio erret, tractu vero temporis ab Ecclesiis singularibus. Neque tamen inde sequitur, non esse dogma fidei, quod a Concilio definitum est; alioquin nullum esset dogma fidei; quod enim Deus locutus sit, et Ecclesiam fundaverit, *ex moticis credibilitatis* evincitur, quae naturali notitia comparantur. Fides quippe non consistit in qua-

quadam ratiocinatione, qua, ex duabus propositionibus fidei, tertia deducatur, sic enim procedendum esset in infinitum; sed in simplici assensu, quo mens, posita morali certitudine, quod Deus locutus sit Ecclesiae, et per Ecclesiam, ejusque Concilium nobis, firmiter, et sine ratiocinatione credit per gratiam Dei, quae revelata sunt, ut suo loco dicemus.

*Objic.* VI. Plura Concilia Oecumenica in fide errarunt, ut Ariminense, Seleuciense, Ephesinum II. Trullanum, Constantinopolitanum sub Leone Isaurico, etc.

¶ *Neg. ant.* Concilia enim ista nec legitima, nec Oecumenica fuerunt, nec a supremo Ecclesiae Capite probata, sed rejecta ut ex historia Ecclesiastica facile patet, excurrendo per singula.

*Objic.* VII. Singuli Episcopi in concilio errare possunt, praesertim cum saepe in concilium veniant Episcopi rerum Theologicarum rudes. Ergo et omnes vel saltem major pars, quae saepe in humanis coetibus meliorem vincit.

¶ *Neg. cons.* Promissiones enim Christi non singulis, sed omnibus simul factae sunt. Vide supra hanc eandem objectionem propositam, et exsufflatam *Cap. IV. §. 2.* ubi de Ecclesiae *indefectibilitate* diximus. Quod vero ajunt, Episcopos quosdam esse Theologiae rudes, id nihil est; non enim ex hominum doctrina, sed ex praesenti Spiritus S. auxilio Conciliorum repetimus infallibilitatem.

Ergo, inquires, quidquid in Concilio Oecumenico dicitur, dogma fidei est

¶ *Neg. seq.* Ea enim censenda sunt fidei dogmata, quae non ex opinione, sed firmo decreto definiuntur, cum praesertim contraria sententia declaratur contraria verbo Dei, aut anathemati subjicitur. Vide *Canum Lib. V. Cap. 4.* Hinc variae Patrum allocutiones, praefationes, incidentes propositiones, dogmata fidei non sunt, licet magnam habeant auctoritatem.

## PROPOSITIO III.

*Licet Concilia Oecumenica absolute necessaria non sint; tamen aliquibus occurrentibus caussis, sunt hypothetice necessaria.*

*Prob. 1a. pars.* Multas haereses proscripsit Ecclesia, praesertim tribus prioribus saeculis, sine ullo Oecumenico Concilio, ut Simonianos, Cerinthianos, Ebionitas, Marcionitas, Montanistas, Sabellianos etc. Nam Ecclesia ubique dispersa eandem habet infallibilem auctoritatem, ac Concilium Oecumenicum. Ergo Concilium Oecumenicum non est absolute necessarium. Hinc *Augustinus* disputans contra Pelagianos, qui contendebant, errorem suum non posse, nisi in Oecumenico Concilio examinari, et damnari, sic ait *Lib. IV. ad Bonifac. Cap. 12.* Quasi nulla haeresis aliquando, nisi Synodi congregatione damnata sit, cum potius rarissimae inveniantur, propter quas damnandas necessitas talis extiterit, multoque sint, atque incomparabiliter plures, quae ubi extiterunt, illic improbari, damnarique meruerunt, atque inde per ceteras terras devitandae innotescere potuerunt.

*Prob. 2a. pars enumeratione earum caussarum.* 1.<sup>a</sup> Si error aliquis longe, lateque sit diffusus, multoque ex ipsis Ecclesiae Pastoribus infecerit, ut olim Ariana haeresis. 2.<sup>a</sup> Si plures de Papatu contendant, nec ulla alia pateat via extinguendi Schismatis, quod Ecclesiam universam dividit, ut olim accidit in magno schismate Occidentis. 3.<sup>a</sup> Si generalis reformatio facienda sit abusu, qui in Ecclesiam universam irrepererunt, nulla alia efficacior, et convenientior erit ratio occurrenti malis, nisi Concilium Oecumenicum, ut patet ex perpetua praxi Ecclesiae in similibus caussis. Ergo (a). Co-

---

(a) De Conciliis tractant fusius Joannes Turrecremata *Lib. III. Summae de Ecclesia.* Jo. Gerson. *De potestate Ecclesiae, et Conciliorum.* Dionysius Chartusianus *tribus libris de Conc.*

Corollaria.

I. Quoniam Episcopi in generali Concilio totam Ecclesiam docentem repraesentant, sequitur, eos non esse tantum Pontificis consiliarios, ut perperam nonnulli affirmarunt, sed iudices. In ipso enim Apostolorum Concilio *Act. XV.*, 19. post dictam a Petro sententiam, Jacobus, prolatis ex Scriptura testimoniis, ait: *Propter quod ego iudico*, non inquietari etc. et nomine omnium Apostolorum scriptum est: *Visum est Spiritui S. et nobis*. Unde Paulus *Act. XVI.*, 4. ejus Concilii decretum vocat praecepta Apostolorum, et seniorum. Imo in omnibus Oecumenicis conciliis Episcopi non ut consilarii, cui officio aptiores essent docti Theologi, sed ut iudices subscripserunt.

II. Hinc illa dissolvitur quaestio, quam supra innuimus; utrum ipsa per se firma sit Concilii definitio, praesidentibus legatis Pontificiis edita, antequam ab ipso Pontifice sollemniter confirmetur. Quia in re distinguendum est. Vel enim legati, ut fieri solet, a Pontifice instructi de sententia R. Ecclesiae ad Concilium venerunt, vel non instructi. Si primum, vel juxta legatorum sententiam definivit Concilium, et tunc ipsa per se definitio firmum habet robur. Sin contra legatorum, ideoque ipsius Pontificis sententiam major Concilii pars definiat (nam omnes ad unum Episcopos contra Pontificis sententiam opinari, non est credibile) tunc vel reclamantibus legatis, ut in Ephesino latrocinio, vel timore consentientibus, infirma est definitio. Si vero legati ad Concilium sine ullis Pontificiis mandatis venerunt, tunc si major Concilii pars in unam con-

---

*Concillii.* Coclaeus *Lib. De Conciliis*. Cajetanus in *Opusculis*, Bellarminus, Sylvius, Melchior Canus, Jacobastius, Lindanus, Villalpandaeus. Historiam vero vel omnium, vel singulorum Conciliorum varii auctores scripserunt. Acta Conciliorum omnium collegerunt Harduinus et Labbeus.

consentiat sententiam, adhuc definitio ante Pontificis assensum infirma est; si vero omnes omniino Episcopi, ipsique legati in unum consentiant; quia non est credibile, R. Pontificem universae Ecclesiae consensui dissensurum, videtur jam transacta res, firmaque Concilii definitio. Sed quia sunt Theologi Catholici, ut *Cajetanus*, et *Turrecremata*, qui contra sentiunt, non posset nota haereseos inuri iis, qui contra definitionem illam loquerentur ante Pontificis confirmationem. Vide Canam *Lib. V. Cap. 5.* et *Snarez De fide Disp. V. Sect. 7.*

## C. A. P. X.

*Utrum Romanus Pontifex ex cathedra definiens controversias fidei, et morum errare possit.*

**Adv. I.** Diximus supra, ad primatum R. Pontificis pertinere, ut exortas de religione controversias definiat. Si igitur huic definitioni consensus universae Ecclesiae, vel per orbem dispersae, vel in Concilio congregatae accesserit, certissimum fidei dogma est, fatentibus omnibus catholicis; alioquin ipsa Ecclesia falli posset. Sed quaeritur, utrum sicut errare nequit in rebus fidei et morum generale Concilium, ita etiam nunquam errori obnoxia, sive *infallibilis*, censi debeat R. Pontificis definitio, etiam antequam consensus Ecclesiae cognoscatur.

II. Apud Veteres Patres hanc controversiam non videmus agitatam; omnes tamen decreta sedis Apostolicae summa reverentia prosequabantur. Sed quia turpe est hodie, nescire Theologum saltem historiam earum rerum, quae ad hanc causam pertinent; idcirco primum ea ponemus, quae apud omnes Catholicos certa sunt, in reliquis, more historicorum, contrarias opiniones, atque auctorum rationes proferemus in medium, ut liberum sit lectoribus ea sequi, quae, libris utrinque rationibus, aut vera, aut vero simillima videantur.

III. S. Thomas 2. 2. *Q. I. art. 10.* Summum Pontificem in rebus fidei definiendis infallibilem esse; ac

supremum judicem affirmat, ita ut ad eum pertineat, finaliter determinare ea, quae sunt fidei, ut ab omnibus inconcussa fide teneantur, ideoque ait, ipsam symboli editionem ad R. Pontificis auctoritatem pertinere. Eum sequuntur S. Bonaventura in *Exposit. Reg. S. Franc.* Joannes Turrecremata *Lib. II. Sum. Cap. 109. et seq.* Thomas Waldensis *Lib. II. Doc. fid. Cap. 47. et seq.* Joannes Driedo, Cajetanus, Ekius, Hosius, Petrus Soto, Mèlchior Canus, Bellarminus, aliique innumeri non solum ex Italia, ut falso affirmat Maymburgus (a) sed ex Gallia; Hispania, et aliis nationibus Theologi. Quippe Petrus de Marca Parisiensis Antistes, quem auctorem non ut Theologum, sed ut testem locupletissimum laudamus ejus doctrinae, quae in Gallia, aliisque regionibus sua aetate defendebatur, sic ait in *Observat. ad Theses Claremontanas*. Haec opinio ( quae Pontifici tribuit privilegium non errandi ) est illa, quam unice Hispania, Italia, aliaeque omnes Christianitatis provinciae docent, ita ut illa, quam sententiam Parisientium vocant, ad classem earum opinionum revocanda sit, quae solum tolerantur. Subdit, inter omnes Universitates solam veterem Sorbonam contra sentire, imo, addit, hoc quoque tempore hanc de infallibilitate Pontificis sententiam in ipsa Sorbona doceri videmus.

IV. E contrario vir sine controversia doctissimus Joannes Gerson, primus e Latinis Theologis ( nam Nilum Thessalonicensem, R. Pontifici insensissimum, nihil moror ) expresse docuit, S. Pontificem extra Concilium in fide, et moribus definiendis, errare posse. Eum secuti sunt Almainus *Lib. De potest. Eccl. Cap. 18.* Alphonsus de Castro *Lib. 1. cont. haeres. Cap. 16.* Hadrianus, aliique.

V. Haec controversia evasit celebris anno MDCLXXXII. quo anno occasione dissidiorum inter Ludovicum XIV., et Innocentium XI. multi Galliarum Episcopi, Parisiis collecti, sollemnem ediderunt De-

cla-

---

(a) Maymburg. *Traité Historique de l'établissement, et prerogatives de l'Eglise de Rome.*



clarationem Cleri Gallicani, quatuor continentem articulos, quorum hic erat quartus: *Licet R. Pontifex praecipuam partem habeat in quaestionibus fidei, ejusque decreta respiciant Ecclesias omnes, et singulas; ejus tamen judicium non est irreformabile, nisi Ecclesiae consensus accedat.* Monet tamen Bossuetus in *Defens. Declar. Dissert. praevia* §. 6. Clerum Gallicanum non edidisse declarationem illam *ut decretum, sed ut opinionem* (a). Adversus eam Declarationem scripserant *Antonius Charlas, Thyrsus Gonzalez, Emmanuel Schelstrate, Card. de Aguirre, Card. Sfondratus*, aliique. Speciatim vero pro R. Pontificis *assualtia*, sive infallibilitate certarunt, *Duwallius, Peronius, Orsius*, etc. Praeterea *Thomas Rocaberti* XXI. ingentia Volumina edidit, quibus varios collegit auctores, qui pro R. Pontificis auctoritate scripserant. Sed vir clarissimus, et doctissimus *Jac. Benignus Bossuet* duobus voluminibus, quae tamen viginti post ejus mortem annis prodierunt, omnes illos Scriptores refutare aggressus *Defensionem declarationis Cleri Gallicani* composuit. Ceterum *Parte III. Lib. X. Cap. 5.* distinguens sedem Apostolicam a sedente Pontifice fatetur, sedem Romanam in definiendo errare non posse, singulos vero Pontifices posse; ita ut si unus labatur, corrigatur ab altero, ut ita semper in Romana sede firmitas fidei constet.

VI. Porro R. Pontifex duplici ratione spectari potest, vel ut privata persona, doctorque privatus, vel ut *loquens ex Cathedra*, hoc est universam docens Ecclesiam, adhibito consilio fratrum, auditis Theologis, fuis, ad Deum precibus; uno verbo adhibita ea diligentia, quam pro rei gravitate necessariam judicaverit. Non defuerunt quidem R. Pontificis adulescentes, quibus etiam adstipulatus est Alber-

---

(a) Sub Innocentio XII. plures Gallicani Episcopi declarationem illam retractarunt in Epistola ad eundem Pontificem. Et quamvis contineat *Bossuetus*, Epistolam illam non fuisse retractationem, sed exhibitionem Declarationis, verbi tamen Epistolae clariora sunt, quam ut ullo pacto obscurari queant, ut observat ipse D. Racine. *Histoire Eccles. Siecl. XVII. art. 7.*

bertus Pighius *Lib. IV. De Eccles. Hierarch. Cap. 8.* qui affirmarent, eum, etiam ut privatum doctorem, in *formalem* haeresim labi non posse. Qua quidem opinione ab omnibus explosa, restat tantum quaestio de Pontifice, docente *ex cathedra*. In qua primum; ut diximus, quae apud omnes catholicos certa sunt, explicabimus, deinde quae in controversiam veniant, more historicorum, prolatis utrinque rationibus, proponemus.

### PROPOSITIO I.

*Romanus Pontifex, ut privatus doctor, in haeresim labi potest.*

*Prob.* Non potest Pontificibus asseri privilegium, quod ipsi Pontifices negant, ac respuunt. Atqui privilegium non incidendi in haeresim, ut privata persona, Pontifices ipsi negant, ac respuunt. Sic enim *Adrianus II.* in Epistola ad Concilium generale VIII. quae legitur *Actione V.* ait, ob crimen haeresis R. Pontificem a Concilio judicari posse. Sic et in *Can. Si Papa Dist. 40.* habetur, Pontificem a nemine judicandum, nisi *deprehendatur a fide devius*. Male igitur consulunt Pontificis auctoritati, qui mendaciis eam conantur extollere, sed exponunt potius ludibrio inimicorum. *Non eget Petrus mendacio nostro, adulatione nostra non eget*, ut inquit *Melchior Canus. Lib. V. Cap. 5.*

### PROPOSITIO II.

*Nulla hucusque proferri potuit definitio R. Pontificum ex cathedra, in qua definitione evidenter in fide erraverint.*

*Prob. I.* *Agatho* Papa, qui sedit post *Honorium*, aliosque Pontifices, qui erroris accusantur, in Epistola, quae probata fuit in Concilio VI. generali, confidenter ait: *Ecclesia Romana a tramite Apostolicae traditionis numquam erravit.* Et clarius post *Agatho-*  
nem

uem Leo IX. in *Epist. ad Petrum Antioch.* referens ea Christi verba: *Ego rogavi pro te, Petre etc.* subdit: *Quae venerabilis, et efficax oratio obtinuit, ut hactenus fides Petro non defecerit, nec defectura credatur in throno illius.* Adde Bernardum in *Epist. ad Innoc. II. etc.*

*Prob. H.* Qui gravius accusati sunt Pontifices, ut *Honorius, Liberius, Joannes XXII.* passim excusantur a Theologis, nosque suo loco ostendemus, nec Honorium docuisse ex cathedra Monothelitarum haeresim, nec Liberium Arianorum impietatem, nec Joannem XXII. quidquam definivisse de praesenti piorum beatitudinis. Reliquos Pontifices usque ad numerum quadraginta, de quibus levior est suspicio, erudite defendunt Card. Orsius *De R. Pontif.* Bellarminus *Lib. IV. De R. Pont.* Sylvius *Opusc. V.* ita ut hodie, qui moderatiores sunt Theologi, libenter fateantur, nullam hucusque R. Pontificis definitionem ex cathedra evidenter esse haereticam, totamque controversiam in eo versari, utrum aliquando id fieri possit. Ergo.

### PROPOSITIO III.

*Haec quaestio: utrum R. Pontifex ex cathedra definiens in fide et moribus errare possit, in neutram partem definita est ut dogma fidei.*

*Prob.* Nec ii, qui R. Pontificem ex cathedra falli posse tenent, asserunt, hoc esse dogma fidei, imo fatetur Bossuetus *Dissert. praev. §. 6.* id propositum esse tantum *ut opinionem non ut decretum*; nec R. Pontifices unquam Parisienses illos Theologos ut haereticos damnarunt. Licet enim *Alexander V. et VIII. Pius. VI.* eam sententiam improbaverint, non tamen ut haereticam proscripserunt: Male ergo veritati consulunt qui adversarios hac in re, tamquam haereticos, traducere audent.

## PROPOSITIO IV.

*Licet haec quaestio definita non sit, tamen decreta S. Pontificis, ex cathedra docentis, magna a fidelibus veneratione excipienda sunt, nec ullus iis temere reluctari potest eo praetextu, quod infallibilia non sint.*

*Prob. prop. in qua catholici omnes consentiunt, etiam ii, qui Pontificis infallibilitatem negant. Patres enim semper decreta sedis Apostolicae summe venerati sunt. Sufficeret recitare verba Petri Chrysologi, vere aurea, in Epist. ad Eutychum. Hortamur te, frater honorabilis, ut quae a beatissimo Papa Romanae civitatis scripta sunt, obedienter attendas, quia B. Petrus, qui in propria sede vivit, et praesidet, praestat quaerentibus fidei veritatem. Nec minus luculenter Hieronymus Epist. ad Damas. A pastore, inquit, praesidium ovis peto. Cum successore Piscatoris, et discipulo Crucis loquor. Ego nullum primum, nisi Christum sequens, Beatitudini tuae, idest cathedrae Petri communionem consocior. Super hanc petram aedificatam Ecclesiam scio . . . . . Quicumque tecum non colligit, spargit, hoc est qui Christi non est, Antichristi est. Et Prosper in Epigrammate adversus eos, qui post R. Pontificis definitionem Augustini doctrinam oppugnabant, haec habet :*

*Verte gradum, fuge perniciem, stratosque rebelles.  
Oris Apostolici fulmine ubique vide.*

*Prob. II. Petro ejusque successoribus dictum est a Christo : Pasce oves meas Joan. XXI. 17. Atqui ovis summe venerari debet vocem pastoris, positi ab ipso Christo, qui dixit : Qui vos audit, me audit, et qui vos spernit, me spernit : quae verba praecipue de capite omnium intelligenda sunt. Ergo.*

*Prob. III. ex praxi Ecclesiae in rebus difficilibus consulendi sedem Apostolicam, quod frustra licet, si possent fideles ejus responsa contemnere. Quanta autem fuerit totius Ecclesiae, et praesertim Gallicanae*

re-

reverentia erga sedis Apostolicae decreta, vide apud Card. de Auguirre *Defens. Cathed. S. Petr.* Sfondratum, in *Gallia vindicata*, Hiacyanthum Serry *De Rom. Pont.* et ipsum Bossuetum passim in *Defensione*.

### PROPOSITIO V.

*Proponuntur utrimque rationes Theologorum, qui sive pro infallibilitate R. Pontificis, sive contra ipsam certarunt. (a)*

Theologi itaque, qui pro R. Pontificis infallibilitate pugnant, eam probant primum ex Scripturis. Nam 1.<sup>o</sup> *Luc. XXII. 31.* ait Christus: *Simon, Simon, ecce Satanas expetivit vos, ut cribaret sicut triticum; ego autem rogavi pro te, ut non deficiat fides tua, et tu aliquando conversus, confirma fratres tuos.* Quibus verbis Christus Petro impetravit (oratio enim ejus erat efficacissima) tantam fidei firmitatem, ut non solum ipse nunquam deficeret, sed etiam nutantes Apostolos in fide roboraret. Atqui haec verba, ipso satente Bossueto *Part. III. Lib. X. Cap. 4. et 5.* non solum respiciunt Petrum ut singularem personam, sed etiam ut Caput Ecclesiae, ejusque successores, ut docent Patres, inter quos satis est laudare Bernardum Gallicanae Ecclesiae clarissimum decus, qui in *Epist. CXC. ad Innoc.* Oportet, inquit, ad oestrum referri, Apostolatuum pericula quaeque, et scandala regni Dei, ea praesertim, quae de fide contingunt. Dignum namque arbitror, ibi potissimum resarciri damna fidei, ubi non possit fides sentire defectum. Cui enim alteri sedi dictum est aliquando: *Ego rogavi pro te ut non deficiat fides tua?*

2.<sup>o</sup> Verba illa Christi *Matth. XVI. 18.* *Tu es Petrus et super hanc petram aedificabo Ecclesiam meam, et portae inferi non praevallebunt adversum eam,* latenter adversariis, ad Petrum, ejusque successores referuntur. Atqui Petri successor non esset petra, ac fundamentum Ecclesiae adeo stabile, ut contra illam

---

(a) Vide tamen ad causam hujus Libri II. *Exercitationem* nostram, quam de hoc argumento edidimus non historico more, ut in prioribus hujus operis editionibus factum est, sed Theologico.

lam portae inferi praevalere non possint, si circumferri posset omni vento doctrinae, atque ex cathedra universam docens Ecclesiam, posset haeresim docere. Idque ex eo confirmant, quod Ecclesia fundatur in Petro, ejusque successore, tamquam centro unitatis. Sed Ecclesia fundatur in fide, juxta illud *Osee II. 20. Sponsabo te mihi in fide*: unde laudata Christi verba multi Patres explicant non solum de Petro, verum etiam de Petri fide. Ergo non potest Petri successor Ecclesiae universae proponere haeresim, tamquam dogma fidei.

3.<sup>o</sup> *Joan. XXI. 17.* Christus Petro, ejusque successoribus praecipit: *Pasce oves meas*. Quibus verbis Petri successor constitutus est Ecclesiae doctor. Atqui Ecclesia in fide deficere non potest. Ergo nec supremus ejus doctor; alioquin Christus promississet discipulis non errandi privilegium quod non promisit supremo magistro, ac doctore, a quo discipuli fidem debent accipere, cum *fides sit ex auditu Rom. X. 17.*

*Probant II. ex Patribus 1.<sup>o</sup> Cyprianus* licet Stephanus S. Pontifici restiterit in causa baptismi haereticorum, vel quia aestu disputationis abreptus erravit, vel quia putavit, ut docet Natalis Alexander Parisiensis doctor, eam controversiam spectare ad disciplinam; tamen ante motam illam controversiam sic de Romano Pontifice loquitur *Epist. ad Cornel. Navigare audent ad Petri cathedram, atque ad Ecclesiam principalem, unde unitas sacerdotalis exorta est... nec cogitare, eos esse Romanos, quorum fides Apostolo praedicante laudata est, ad quos perfidia habere non possit accessum. 2.<sup>o</sup> Chrysostomus, Hom. II. in Psal. II. et Homil. De Petro, et Helia Sedem Apostolicam vocat Basin fidei immobilem. Et Concilium VI. generale Prosphonet. ad Constant. Imp. R. Pontificem appellat Adamantem fidei, cujus solida mens adgressionibus, atque confictionibus alienae a fide opinionis, non est vulnerabilis. 3.<sup>o</sup> Omissis ceteris, quos congerunt Sfondratus, alique, praestat, inquirunt, audire Patres, Concilia, et Theologos ipsius Ecclesiae Gallicanae, qui ante Gersonem, sive ante illud fatale*  
V. Oc.

Occidentis schisma floruerunt. Irenaeus Lugdunensis. *Lib. III. Cap. 3.* ait, *necesse esse, omnem Ecclesiam, hoc est omnes undique fideles ad R. Ecclesiam convenire, ex qua Apostolica traditio ad omnes manat.* Bernardus Ecclesiae Gallicanae columnen, nec certe Romanae sedis adulator, ut ex Libris *De consideratione* patet, quid de R. Pontificis infallibilitate senserit, jam supra vidimus, sed legenda cum primis est tota ejus Epistola ad *Innoc. cont. error. Pet. Abael.* S. Thomas Parisiensis Doctor, quem semper Gallia et vivum, et post mortem summe venerata est, atque haud scio an alterum ei parem Academia Parisiensis protulerit; R. Pontificem, ait, esse supremum, et *finalem* judicem, ad quem pertinet definire ea, quae ab universa Ecclesia iueoncussa fide teneri debent, ipsumque edere fidei Symbolum. 2a. 2ae. Q. 1. art. 10. Idem docet S. Bonaventura Parisiensis doctor loco supra laudato, ut mirum sit, Bossuetum asserere, se nihil in eo invenisse, quod huic sententiae, faveret. His addendi Avitus Viennensis, Jesse Ambianensis, Yvo Carnotensis, Regino Prumiensis, Hincmarus Rhemensis, Alcuinus, Lupus Servatus, Anselmus, Petrus Cellensis, Petrus Cluniacensis, alique quorum testimonia Sfondratus collegit. Praeterea Synodi Aurelianensis, Tournonensis, Ratisponensis, Trecentis, Pontigouensis, Lugdunensis I. et II. aliaeque synodi, et conventus Cleri Gallicani apud eundem Sfondratum.

*Probat. III.* idipsum ratione Theologica, eaque multiplici. 1.º inquit, perpetua haec fuit Ecclesiae praxis, ut in dubiis de religione R. Pontifex consulere, quod fecit saepissime ipsa Ecclesia Gallicana. Unde Hincmarus Rhemensis in *Opusc. de divor. Lothar. De omnibus*, inquit, *dubiis, vel obscuris, quae ad rectae fidei tenorem, vel ad pietatis dogmata pertinent, Sancta Romana Ecclesia, ut omnium Ecclesiarum mater, et magistra, nutrix. et doctrix est consulenda, et ejus salubria monita sunt tenenda.* Atqui hoc frustra factum esset, si R. Pontificis definitio falli posset; nam post ejus definitionem, eisdem res esset agitata controversiis, quibus antea agitabatur. Ergo etc. Hinc Augustinus *Serm. XI. al. CXXI. De verb.*

verb. Apost. loquens de haeresi Pelagiana, quam Innocentius I. damnavit, haec habet: *Jam enim haec de re duo concilia ad sedem Apostolicam missa sunt; inde etiam rescripta venerunt; causa ergo finita est*: quae postrema yerba multum videntur habere momenti: inde enim infert Augustinus, non esse ad eam causam necessarium generale Concilium, quod Pelagiani flagitabant.

2.<sup>a</sup> Multas haereses R. Pontifices sine generali concilio ex cathedra damnarunt, eorumque decreta ita venerata est Ecclesia, ut damnati a R. Pontifice ubique pro haereticis habiti sint. Sic Damasus Papa Apollinarem, Timotheum; et Vitalem: Syricius Jovinianum: Innocentius Pelagium, et Caelestium; alii alios haereticos damnarunt. Ergo etc.

3.<sup>a</sup> Cum multae saepe haereses oriantur, nec haberi possit concilium Oecumenicum, ut accidit tribus prioribus saeculis, et saepe alias; optime profecto Christus Ecclesiae providit, ne supremus ejus Pastor ex cathedra docens falli posset; alioquin nulla tunc pateret via cavendae; atque damnandae haeresis: et, ut observat S. Bonaventura, *Synagoga felicius fuisset, quam Ecclesia, quia illa habebat unum summum Pontificem, qui omnes discordias poterat terminare. Deut. XVII.* Nec dicas, posse tunc explorari consensum Ecclesiae per orbem dispersae, tum quia hoc opus longius temporis spatium exigit, quo tempore latius serpit error, tum quia saepe multae particulares Ecclesiae erroris vortice abripiuntur, ita ut non possit consensus Pastorum unanimis certo cognosci.

4.<sup>o</sup> Utantur etiam ratione S. Thomae. Cum Ecclesia sit infallibilis; supremus, et finalis controversiarum Judex debet esse infallibilis. Atqui supremus, et finalis Judex est S. Pontifex. Quippe ipsa Concilia oecumenica non censentur absoluta; nec legitima, nisi Romani Pontificis consensione firmentur. Quodnam enim extitit Concilium, quod a R. Pontifice improbatum, habeatur, ut legitimam, ac ratum? Ergo.

5.<sup>o</sup> Ajunt, neminem ante Gersonem conceptis ver-



bis asseruisse, R. Pontificem ex cathedra docentem falli posse. Quamvis enim *Bossuetus* innumera congerat testimonia Patrum, et Conciliorum, ex quibus argumentando colligit, hanc fuisse antiquam, atque perpetuam Ecclesiae doctrinam; quamvis semper Parisiensium sententiam, veluti perpetuam in illa Academia traditionem, objiciat; tamen cum ventum est ad auctores citandos, qui id expresse dixerint, nulum laudat *Gersonem*, aut saltem ejus magistro *Petro Alliaccensi* antiquiorem, cum contra *Bernardus*, Gallicanae Ecclesiae column, *S. Thomas*, Parisiensis Academiae maximum ornamentum, contraria ante *Gersonem* expresse docuerint. Ergo, inquit, verum est, quod prius traditum. Distinctionem vero sedis Apostolicae a sedente Pontifice, qua distinctione *Bossuetus* explicari putat sententias Patrum, et perpetuam doctrinam ipsius Ecclesiae Gallicanae, et Gallicanorum Patrum, et Theologorum, qui Sedem Apostolicam infallibilem esse tradunt; tamquam absurdam rejiciunt. *Bernardus* enim, cum Innocentium II. interpellabat; non sedem ejus, sed ipsum Pontificem interpellabat. Idemque dicas de aliis Patribus. Ideo autem Romanam sedem, cathedram, Ecclesiam appellare solent, quia Pontifex non solus, sed cum fratribus; idest ipsius Romanae Ecclesiae consilio judicare debet. Ergo etc.

Sed jam adversantium Theologorum rationes proponendae sunt. Ajunt igitur: 1.<sup>o</sup> Infallibilitas a Christo promissa est Ecclesiae, quae ab Apostolo dicitur *columna, et firmamentum veritatis*. Ergo non est promissa R. Pontifici.

2.<sup>o</sup> Si R. Pontifex ex cathedra definiciens infallibilis esset, frustra cogeretur generale Concilium cum tanto totius catholici orbis incommodo. Atqui constat ex perpetua Ecclesiae praxi, jam inde ab Apostolis deducta, ad definiendas de fide controversias Concilia oecumenica congregata esse: nec aliam visam esse definiendarum rerum aptiorem viam, a Concilio Apostolorum usque ad Tridentinum.

3.<sup>o</sup> Hanc autem rationem ex eo maxime confirmant, quod si R. Pontifex ex cathedra falli non pos-

posset, profecto postquam ille rem ex cathedra defini-  
vit, non liceret iterum definitionem ejus ad examen  
revocare. Sed contra accidisse, ex historia novimus.  
Nam post ipsam S. Pontificum definitionem genera-  
lia Concilia habita sunt, in quibus definitio illa sol-  
lemni judicio examinata est, nec probata, nisi post-  
quam inventa est Scripturae, et traditioni consona;  
quod et fecit ipsum Apostolorum Concilium, post-  
quam Petrus sententiam dixit. Sic definitio *Caelestini*  
contra *Nestorium* subjecta est examini Concilli Ephe-  
sim: definitio *Leonis X.* Concilio Chalcedonensi; de-  
finitio *Leonis M.* Concilio Tridentino, etc. Quod  
autem respondent prioris sententiae Theologi, nempe  
ideo Concilium aliquando esse necessarium, ut defi-  
nitio acquirat fidei firmitatem (cum infallibilitas  
S. Pontificis non sit dogma fidei) vel ut haereticorum  
pertinacia retundatur, cum se videant universae  
Ecclesiae judicio damnatos: id, inquiunt, nihil est,  
nec propositi argumenti robur infringit.

4.<sup>o</sup> Si veterum Patrum rationem habere volumus,  
certe *Cyprianus*, inquiunt, non solum Africanac, sed  
totius Ecclesiae lumen, licet malae causae patrocini-  
um suscepisset, rejiciens baptismum haereticorum,  
tamen restitit Stephano R. Pontifici, qui rem ex tra-  
ditione definiverat; quod certe non fecisset tantus  
Praesul, si R. Pontificem putasset infallibilem. Et  
tamen Augustinus *Lib. II. De bapt. cont. Donat.*  
*Cap. 4.* ideo cum ab haeresi excusat, quia licet  
S. Pontifex decretum emiseric, res tamen nondum  
erat in Concilio plenarie definita.

5.<sup>a</sup> Auctoritatem objiciunt Ecclesiae Gallicanae,  
et praecipue Parisiensis Academiae, quae, laudanti-  
bus ipsis R. Pontificibus, toto orbe celebrata est; et  
celebrabitur. Magnum certe est *Gersonis* nomen, qui  
tantum pro extinguendo schismate, et profligandis  
haereticis laboravit; magnum *Bossueti*, magnum alio-  
rum Parisiensium.

6.<sup>a</sup> Quid opus est, inquiunt, disputare utrum R.  
Pontifex falli possit, cum innumeros habeamus in ma-  
nifesto errore deprehensos? Quis ex gr. excusabit  
*Honorium*, quem tria Concilia Oecumenica, ut Mo-

notelitarum fautorem damnarunt? Quis *Joan. XXII.*? Quis alios quadraginta Pontifices? Sudet, inquit, *Bellarminus*, sudet *Sylvius*, sudet *Cardinalis Orsius*, nihil certe proficiunt. Multa praeterea congerunt argumenta utriusque partis Theologi. Sed cum omnia referre brevitati instituti non patiat, poterit lector ex iis, quae dicta sunt, veriore partem eligere, salvo vinculo charitatis, et pacis.

*Scholion.*

Aliam quaestionem, inter Theologos excitatam, utrum Pontifex Concilio oecumenico praestet; an Concilium Pontifici, libenter omittimus; utpote quae ad contentionem potius, quam ad pietatem fovendam valet. Quae autem ad Ecclesiae, et fidelium utilitatem in ea controversia pertinent, et apud omnes constant, haec sunt. 1.<sup>a</sup> Tempore Schismatis Concilium oecumenicum esse Pontifice ipso praestantius; id enim ex gestis Concilii Pisani, et Constantiensis manifestum est. 2.<sup>a</sup> Pontificem in crimine haeresis Concilio oecumenico subesse; id enim fatetur Hadrianus II. in Epistola ad Concilium VIII. 3.<sup>a</sup> Concilium simul cum Pontifice, et a Pontifice ipso probatum, esse Pontifice solo praestantius. Ipsi enim R. Pontifices fatentur, se Conciliorum generalium statuta pro suo arbitratu, ac sine causa mutare non posse. Nul-  
lus jam veraciter Christianus ignorat, uniuscujusque synodi constitutum, quod universalis Ecclesiae probavit assensus, nullam magis exequi sedem oportere, quam primam, inquit *Gelasius Epist. ad Episc. Dardan.* Et *Zosimus in Epist. ad Episc. Prov. Vien.* ap. *Gratian. Caus. XXV. Q. I. et Labbeum Tom. II. conc. Contra statuta Patrum condere aliquid; vel mutare, nec hujus quidem sedis (Apostolicae) potest auctoritas.* Quod tamen non impedit, quominus pro temporum, et locorum circumstantiis in ipsis Conciliorum generalium statutis Pontifices dispensare possint, ubi Ecclesiae id poscit utilitas. Sed haec ad Canonistas pertinent.

## C A P. XI.

*De auctoritate Scholasticorum.*

*Adv.* **S**cholasticorum nomine non eos intelligimus, qui Scriptura, et traditione posthabita, inutiles controversias excitant, solvuntque philosophicis ratiocinationibus; sed Theologos graves, qui Scripturarum, et Patrum auctoritate controversias versant, moribus fidelium formandis aptas.

## P R O P O S I T I O I.

*Ubi Doctores Scholastici dissentiunt, major numerus non est certum veritatis argumentum.*

*Prob.* Quando Scholastici dissentiunt, utraque pars rationes habet, atque adducit suas. Atqui fieri potest, ut minor Doctorum numerus pro se habeat rationes aut aequè graves, aut etiam graviore rationibus majoris numeri adversariorum. Saepe enim accidit, ut primus aliquis Doctor a veritate aberravit, qui tamen auctoritate sua alios in suam sententiam pertraxerit, atque hi alios; quia sunt nonnulli, qui, quasi avis avem, aut ovis ovem, sequuntur magistros; quorum auctoritatem suspiciunt. Ergo solus numerus non est certum veritatis argumentum.

## P R O P O S I T I O II.

*Communis Theologorum sententia tam probabile praebet argumentum, ut nisi manifesta in contrarium afferatur ratio, ei refragari temerarium sit.*

*Prob.* Sententia communis ea est, quam communiter tenent fere omnes, licet pauci aliqui dissentiant. Atqui ab hujusmodi sententia discedere, nisi ex manifesta ratione, temerarium est; cum in qualibet arte peritis habenda sit fides: Hinc Concilium Viennense. *Clem. un. de Sum. Trin.* opinionem illam, quae

quae dicit tam pueris, quam adultis conferri in baptismo gratiam informantem, et virtutes, tamquam probabiliorem, et dictis Sanctorum, et modernorum Theologiae doctorum magis consonam, statuit eligendam. Ergo.

Diximus autem: nisi manifesta in contrarium afferatur ratio, quia fieri potest, ut pauci illi doctores, qui contra sentiunt, tam graves rationes adserant, quae numero adversariorum aequale pondus habeant, fortasse etiam antecellant. Hinc Augustinus Lib. III. de Bapt. cont. Donat. cap. 4. Non quia, inquit, fieri non potuit, ut in obscurissima quaestione verius pluribus unus, paucive sentirent, sed quia non facile pro uno, vel pro paucis adversus innumerabiles ejusdem religionis, et unitatis viros, et magno ingenio, et ubere doctrinam praeditos, nisi pertractatis pro viribus, atque perspectis rebus, ferenda sententia est.

### PROPOSITIO III.

*Constans omnium Theologorum sententia in rebus fidei, et morum tantae auctoritatis est, ut ei contradicere, si non haeresis, saltem haeresi proximum sit.*

*Prob.* Quia numquam omnes Theologi in aliquo dogmate consentirent, nisi ex Scriptura, aut traditione consensus illa originem certam haberet; nec ullum invenitur dogma ab omnibus Theologis constanter propugnatum, cui Ecclesia contradixerit. Ergo. Vide de hoc Canum Lib. VIII. de Loc. cap. 4. Atque haec de internis Theologiae locis satis dicta sint (a). CAP.

(a) Antequam tamen hinc abeamus, juvat advertere, ad hos ipsos Theologiae locos internos revocari posse eum quem primus omnium observasse videtur saeculo superiori Scipio Maffei, inscriptiones scilicet, quae in veterum Christianorum sepulcris sculptae leguntur, in quibus non pauca de Deo, de Trinitate, de divinitate Christi, de mortuorum resurrectione, aliisque dogmatibus, non raro occurrunt: unde publica Ecclesiae fides quatenus eo tempore fuerit, luculenter ostenditur. Hinc ex ejusmodi ungueque corrogatis inscriptionibus, aliisque Ecclesiasticae auctoritatibus.

## C A P. XII.

*De locis Theologiae externis.*

*Adv.* **E**xterni theologiae loci sunt, ratio naturalis, Philosophorum placita, Historia humana (nam divina historia, quae habetur in Libris Sacris, ad Scripturam pertinet). De ratione naturali, et Philosophorum placitis diximus in *Dissertatione Pro-droma*, quantum sufficere putavimus. Restat ergo humana historia, quae duplex est, Ecclesiastica, et profana.

## P R O P O S I T I O I.

*Historia humana Theologo valde utilis est.*

*Prob.* Ex historia humana discimus, quid antiquum sit; quid novum: quae dogmata in Conciliis sint statuta: quae vetus, quae nova Ecclesiae disciplina: quae praxis Sanctorum in civilibus reipublicae perturbationibus; aliisque vitae moralis officiis, quae quidem praxis quodammodo vivens quaedam divinae legis in rebus obscuris explicatio est, et virtutis incitamentum; qua occasione scripserint Patres, aut habita sint Concilia; quod valde juvat ad eorum sensum intelligendum. Atqui haec omnia adeo sunt utilia, ut nemo possit eruditus censi Theologus, qui ea ignoret. Ergo.

*Scho-*

---

quittatis monumentis, novum quoddam lapidariae, ut ita dicam, et antiquariae Theologiae specimen edidit saeculo superiori D. Generus, quem laudat in litteraria historia Jo. Andres Tom. VI. Lib. I. Cap. 5. His autem addi possunt Acta S. Martyrum sincera apud *Ruinarium*. Quod enim illi Spiritu S. incitati coram tyrannis libere professi sunt, velut communis eo tempore Ecclesiae fides habenda est. Item Ecclesiarum Liturgiae, aliisque Ecclesiasticae antiquitatis monumenta.

## Scholium.

Tirones igitur compendium aliquod Ecclesiasticae historiae perlegant, quale est Breviarum Ecclesiasticae Hist. *Laurentii Berti*, aut Compendium Historiae *Gravesoni*; non enim expedit, ut in ipso Theologicarum institutionum curriculo per latissimum Historiae campum evagentur. Eo tamen emenso, *Baronii Annales cum Critica Pagii*, *Natalem Alexandrum*, *Tillemontium*, *Fleurium*, *Orsium*, aliosque, si licebit, lectitare poterunt. *Gaspar Sagittarius* edidit *Introductionem in Historiam Ecclesiasticam*, et singulas ejus partes, quam supplevit, auxitq. *Joan. Andreas Schmidius*, ubi satis copiose enarrant, atque in ordinem digerunt Scriptores omnes Ecclesiasticae Historiae, quod et fecit *Joan. Albertus Fabricius Tom. XII. Bibliothecae Graecae*.

Porro quamvis una Theologo satis esset Ecclesiastica historia, tamen quia illa sine aliqua civilis historiae notitia comparari nequit, sequitur ut haec etiam non omnino negligenda sit.

## PROPOSITIO II.

*Res gesta, a pluribus gravibus, et fide dignis historicis relata, probabile theologo argumentum praebet.*

*Prob. Si namque, inquit Canus Lib. XI. de Loc. cap. 4. Conc. 2. in ore duorum, vel trium stat omne verbum, cur adversus hanc legem pluribus testibus, rem eandem olim gestam contestantibus, fidem Theologus abrogabit?*

## PROPOSITIO III.

*Res gesta, ab omnibus gravibus, et fide dignis historicis enarrata, certum suppeditat ad stabilienda Theologiae dogmata argumentum.*

*Prob.* Quia de hujusmodi factis, quae graves historici omnes, nemine contradicente, enarrant, dubitare manifesta insania est. Quis enim *ex. gr.* serio dubitaverit, fuisse *Caesarem*? Quis negaverit, *Petrum* Romae fuisse? Imo si de hujusmodi rebus dubitari fas esset, nutaret etiam veritas earum rerum, quae *motiva credibilitatis* dicuntur: probari non posset, Concilium aliquod revera fuisse legitimum, et oecumenicum; atque pessum iret Theologia universa. Ergo.

*Dices.* Quatenam conditiones requiruntur, ut historicus aliquis fide dignus habeatur?

*R.* Tres. Prima, ut sit rei, quam enarrat, coaevus. Altera, ut in aliis rebus non sit deceptus, aut manifestas venditaverit fabulas. Tertia, ut ipsius non intersit, quod res ita evenerint, ut ab eo referuntur. Vide *Honoratum a S. Maria in Animadversionibus super regulas, et usum artis Criticae.*

## C A P. XIII.

*De Theologicis propositionum censuris.*

**S**olet Ecclesia propositiones a veritate aberrantes, quas Scriptor aliquis vulgavit, censoria nota inurere. Hae autem censurae praecipuae numerantur septem in Concilio Constantiensi *Sess. VIII.* in damnatione propositionum *Wiclefi*; quibus deinde aliae censurarum species additae sunt a R. Pontificibus, quarum sensum perspectum habere Theologos, necesse est. Aliae itaque propositiones dicuntur *haereticæ*, aliae *erroneæ*, aliae *schismaticæ*, aliae *seditionis*, aliae *blasphemæ*, aliae *impiae*, aliae *scandalosæ*, aliae *temerariae*, aliae *piarum aurium offensivæ*; aliae



aliae falsae; aliae verbo *Dei contrariae*; quas hic singillatim explicabimus.

Illud tamen sedulo animadvertendum est, censuras istas notare propositiones, quales ipsae per se, et ex *objecto* sunt, non quales sunt in eo, qui eas protulit. Fieri enim potest, ut qui propositionem ex *objecto* haereticam pronuntiaverit, haereticus non sit, eo quod ab ea pertinacia sit immunis, quae ad haereticum constituendum, et damnandum necessaria est; atque ideo in eo homine propositio *formaliter* haeretica non sit judicanda. Idem de aliis censuris esto iudicium. Nunc singula perstringamus.

I. Propositio *haeretica* dicitur ea, quae directe opponitur propositioni revelatae; et ab Ecclesia ad credendum propositae. Propositio autem revelata, et ab Ecclesia ad credendum proposita est, quae vel expresse habetur in Scripturis, vel si non habetur in Scripturis, aut non ita clare habetur; constat tamen ex traditione, et definita est ab Ecclesia ut dogma fidei. Sic ista propositio: *gratia Dei secundum merita nostra datur*, haeretica est, quia opponitur propositioni revelatae, quae expresse habetur in Scripturis: *si gratia, jam non ex operibus, alioquin gratia jam non est gratia Rom. XI. 6.* Item haec propositio, *baptismus ab haereticis forma legitima collatus, est irritus*, haeretica est, quia licet contrarium non habeatur expresse in Scripturis, habetur tamen ex traditione, et definitum ab Ecclesia est ut dogma fidei. Ante Ecclesiae definitionem propositio illa non erat haeretica, unde *Cyprianus*, qui eam asseruerat, excusatur ab *Augustino*, quia licet contrarium a Deo fuerat revelatum (revelatio enim, ut supra diximus, jam primitus plene facta est Apostolis) tamen ob humanam infirmitatem multis erat obscurum, quid ea de re revelaverat Deus, necdum Ecclesia rem declaraverat. Quod autem nonnulli recentiores Theologi affirmarunt, etiam post Ecclesiae definitionem posse aliquod dogma fidei iterum obscurari, ut jam haeretici non sint, qui contrarium tenent, id, ut mitissime dicam, valde temerarium est.

Illud autem est addubitatum, utrum propositio, quae

quae adversatur conclusioni Theologicae, quae ex duabus pendeat; quarum una ex fide, altera ex naturali ratione constet; haeretica censenda sit. Quae in re distinguendum est. Si enim conclusio ita evidenter ex dogmate fidei sequatur, ut potius ejus explicatio censenda sit, nec possit ullo pacto negari; quin simul dogma fidei negetur, unde ipsa derivatur; tunc contraria propositio haeretica censi debet. Sic illa propositio: *non sunt in Christo duae voluntates*; item illa: *non est in Christo anima rationalis*, haereticae sunt, quia contrariae adeo evidenter sequuntur ex illa: *Christus est homo*; ut potius ejus explanationes videantur, nec negari possint, salvo principio. At si conclusio sit alterius generis, contraria propositio haereseos notam effugiet. Vide libellum *Francisci Veronii*, cui titulus est: *Regula fidei*. Vide et *Canum Lib. XII.*

Huic censurae, qua propositio haeretica dicitur, affines sunt aliae tres, quibus propositio aliqua dicitur vel *suspecta de haeresi*, vel *sapiens haeresim*, vel *haeresi proxima*. Propositio *suspecta de haeresi* est; quae probabiliter; *sapiens haeresim* est, quae probabilius; *proxima haeresi* est, quae probabilissime opponitur veritati revelatae.

II. *Erronea* propositio est, quae opponitur veritati, quam universa tenet Ecclesia, vel constans omnium Theologorum sententia docet, licet nondum sit ab Ecclesia definita. Ita propositio: *B. Virgo non est in caelum cum corpore assumpta*; jam hodie erronea est.

III. *Schismatica* propositio dicitur, quae fideles a subiectione S. Pontificis, et legitimorum Pastorum retrahit. Sic qui diceret: *S. Pontifex tyrannicum gerit imperium*; schismaticam propositionem proferret.

IV. *Seditiosa* est, quae subditos ad rebellandum contra legitimos principes movet.

V. *Blasphema* est propositio, quae convicium aliquod in Deum, vel sanctos continet, tribuens illis aliquod indecens, vel negans quod illis debetur, ut est illa: *aliqua Dei praecepta hominibus justis volentibus, et conantibus secundum praesentes, quas habent vi-*  
res,

*res, sunt impossibilia, deest quoque iis adjutorium, quo fiant possibilia.*

VI. *Impia* dicitur propositio; quae ad cultum Deo debitum aut tollendum, aut minuendum tepdit.

VII. *Scandalosa* dicitur propositio, quae per se apta est ad proximum in peccatum inducendum, vel a virtutum exercitio retrahendum; ut si quis diceret: *ex confessione auriculari gravia sequuntur incommoda.* Potest autem aliqua propositio esse vera, et tamen pro temporum, locorum, aut auditorum circumstantiis scandalosa: ita ut, mutatis circumstantiis, defendi possit.

VIII. *Temeraria* est, quae nullo aut Scripturae, aut traditionis, aut rationis theologiae fundamento; a communi Theologorum sententia recedit.

IX. *Falsa* dicitur, quae factum aliquod historicum falso asserit, quod fidei aliquo modo nocere possit. Nam si fidei non noceat, Theologica censura notari non debet.

X. *Piarum aurium offensiva* propositio est, quae licet non sit haeretica, continet tamen aliquid absurdum, ex quo viri pii, non quidem ex imperita multitidine, sed graves, et prudentes offendantur, ut esset haec propositio: *Erravit Constantinus Ecclesiam dotando.*

XI. Demum propositio *verbo Dei contraria* est, quae opponitur Scripturae, aut traditioni, sed non ita clare, et aperte. Quando scilicet Scriptura, aut traditio non adeo clara est, et Ecclesia rem nondum definitivum.

Has censuras inurere ad Ecclesiam pertinet, non ad privatos. Solent tamen Theologi aliqua censura propositiones quasdam arguendo notare, hoc est rationibus Theologicis probare, aliquam propositionem censuram mereri, si ad Ecclesiae tribunal deferretur.

Movent hic nonnulli controversiam, utrum liceat, aut expediat multas simul propositiones damnare *in globo*, ut ajunt, hoc est damnare plures simul propositiones, erroneas, blasphemias, impias, piarum aurium offensivas, scandalosas, haereticas *respective*. Dicunt enim, ex hac damnatione in globo non con-

sta-

stare, quatenus censura cuique propositioni conveniat. Nobis sat est, quod Concilium Constantiense Oecumenicum id fecerit in damnatione articulorum *Wiclefi*; quod enim universa Ecclesia facit, id utrum fieri debeat disputare, insolentissimae insaniae est, ut ait *Augustinus*. Nec refert, quod non constet, quatenus cuique propositioni censura conveniat, cum constet, nullam ex iis propositionibus defendi posse; cum singulae unam saltem ex iis censuris mereantur. Fatemur tamen, optandum esse, ut quoad ejus fieri poterit, singulae propositiones sua censura notentur.

Vide de his propositionum censuris *Canum Lib. XII. Cap. 6.* ubi multa de his propositionum censuris: de haeresi praesertim disserit erudite, ac luculenter Card. de Turrecremata *Lib. IV. Summ. De Ecclesia. Part. 2.* et alios,

### *Libri conclusio.*

Ex iis, quae duobus jam libris disseruimus, patet, hominem sola naturali ratione non potuisse veram invenire religionem, atque ad beatam vitam pervenire. Hanc igitur necessitatem commiserans Deus, jam inde ab initio post Adae lapsum pollicitus est Christum *Gen. III. 15.* atque in fide ipsius Christi jam ab ipso mundi exordio religio Christiana fundata est, ad quam omnes justī, et electi pertinerent. Ab hac fide cum magna hominum pars ad idololatriam defecisset, vocavit Deus *Abraham*, ejusque familiam a ceteris gentibus circumcisione discevit, ac peculiari sibi foedere devinxit, quam etiam deinde per *Moysem* novis ritibus, ac Sacramentis, quae Christum significabant, ideoque in ejus morte abolenda erant, colligavit. Haec particularis Ecclesia, Mosaicis ritibus collecta, extra quam poterant homines per Dei gratiam justī, ac salvi esse, ideoque catholica non erat, communiter a Scriptoribus Ecclesiasticis *Synagoga* dicitur: quod nomen congregationem significat, et potest etiam irrationabilibus animantibus convenire, ideoque melius carnali populo aptatur, cum contra Ecclesia coctum significet vocatorum ho-

mi-

minum ratione utentium : ideoque melius Ecclesiae Christi catholicae conveniat ; licet Scriptura promissae Synagogam , et Ecclesiam vocet tum Mosaicam , tum Christianam societatem. Christi igitur Ecclesia numquam ab exordio mundi defecit , etiam Synagoga deficiente , nec unquam ex Christi promissis defectura est , ideoque nec unquam in fide errare potest. Quapropter eam , tamquam filii obediens , in omnibus audiamus , nec unquam ab ea ulla de causa discedamus. Illa enim semper erit , etsi nos in ea non simus.

*Finis Lib. II.*

---

## EXERCITATIO THEOLOGICA

D E

### ROMANI PONTIFICIS

*In definiendis ex cathedra fidei, morumque  
controversiis auctoritate.*

**D**e Romani Pontificis auctoritate, sive, ut Scholae ajunt, *infallibilitate* in definiendis Fidei, morumque controversiis in *Lib. II. Theologicarum Institutionum* historico potius more, quam Theologico disputavimus. Et quamvis ex ipsa rerum enarratione, quid in ea causa sentiremus, satis unicuique perspectum exploratumque esse possit; juvat tamen rem eandem explicare luculentius, ut et adolescentes in promptu habeant rationes, quibus contraria adversariorum argumenta refutent, et simul a calumnia illa vindicetur Italia nostra, quam quidam nobis impingere non cessant, quasi in sacris disciplinis adulatione potius Romanae Sedis moveamur, quam studio veritatis. Sed quid multa? Cum enim satis ibi, quantum instituti brevitatis patiebatur, hujus quaestionis tradita sit historia, explicatumque perspicue, quid sit private, quid ex *cathedra* docere (a) ipsa jam propositio totam nostram

X

ex-

---

(a) Ea igitur fides, seu doctrina fidei, quae in controversiis fidei ab ipsis Pontificibus ita proponitur, ut fratres, et fideles omnes continent in fide, et unitatem ejusdem fidei exgant, atque conservent in Ecclesia catholica, illa est, cui inerrantiae privilegium ex promissis Christi est vindicandum. Solas  
ita.

explicabit de R. Pontificis in fidei; morumque causis auctoritate sententiam.

## PROPOSITIO

*Judicium R. Pontificis universam Ecclesiam ex cathedra docentis, in rebus fidei, et morum falli non potest.*

*Prob. I. ex Scripturis. 1.º Luc. XXII. 31. sic Petrum affatur Christus: Simon, Simon, ecce Satanas expetivit vos, ut cribraret tanquam triticum: ego autem rogavi pro te, ut non deficiat fides tua, et tu aliquando conversus confirma fratres tuos. Quae quidem verba quis sanus negaverit, non ad omnes in commune discipulos, sed ad Petrum singulariter dicta? Ut quid enim singulares illae voces, Simon, rogavi pro te, fides tua; confirma fratres tuos, quae postrema sententia manifeste Petrum discernit a ceteris? Cum igitur absoluta Christi oratio semper efficacissima fuerit; intelligendum est, datum fuisse Petro, ut non solum ipse numquam a fide deficeret (quo sensu ait Augustinus lib. de corr. et grat. cap. 8. Quando rogavit Christus pro Petro, ne deficeret fides ejus, quid aliud rogavit, nisi ut haberet in fide liberrimam, invictissimam, perseverantissimam voluntatem<sup>2</sup>) verum etiam, ut mutantes in fide fratres, ipsosque Apostolos, atque discipulos confirmaret. Inquit enim Leo M. Serm. III. De assumpt. sua ad Pontifi. Specialis cura Petri a Domino suscipitur, et pro fide Petri proprie supplicatur, tanquam aliorum status certior sit futurus, si mens Principis victa non fuerit. In Petro ergo omnium fortitudo,*  
mu-

---

Itaque fidei definitiones id respicit a summis Pontificibus Ecclesiae propositas contra insurgentes dissensiones et errores in materiis fidei, non autem opiniones, quibus etsi aliquid statuant, nihil tamen decernunt credendum ex catholica fide, nihilque damnant tanquam alienum ab eadem; non simplicia praecepta, quae ad fidei definitionem referri non possunt; non judicia de personis tantum; non decreta disciplinae, quae ad fidem non pertinent; non tandem omissiones definitionum fidei. Ita P. Ballerinius in singulari libro de Primatu ec. Vide quae de Conciliis, oecumenicis diximus Lib. II. Cap. IX.

munitur, et divinae gratiae ita ordinatur auxilium, ut firmitas, quae per Christum Petro tribuitur, per Petrum Apostolis ceteris conferatur. Atqui laudata Christi verba non solum ad Petrum, ut singularem personam, verum etiam, ut Ecclesiae caput, ideoque ad ejus etiam successores pertinebant, ut post veteres omnes Patres docet Bernardus Gallicanae Ecclesiae ornamentum in *Epist. CXC. ad Innoc. II.* nec diffitetur Bossuetus *Defens. Declar. Part. III. Lib. X. Cap. 4.* Si ergo ad Petri successores, Romanos scilicet Pontifices ea Christi oratio pertinet, ut et ipsi a fide non deficiant, et fratres suos confirmant; patet, eos in rebus fidei, morumque ex cathedra docendis falli non posse.

2.<sup>o</sup> *Matth. XVI. 18.* ait Christus Petro: *Tu es Petrus, et super hanc Petram aedificabo Ecclesiam meam; et portae inferi non praevalerunt adversus eam;* ex quibus verbis primatum R. Pontificis suo loco demonstravimus. Non igitur negant adversarii, qui se catholicos profitentur, verba illa Christi Domini ad Romanum Pontificem Petri successorem pertinere, ita ut in eo Ecclesia universa tamquam in solidissima petra ita fundata sit, ut portae inferi adversus eam praevalere non possint. At si R. Pontifex posset ex cathedra aut contraria bonis moribus, aut haeresim docere, non esset adeo firmum, ac stabile fundamentum, quod universam Ecclesiae molem fulciret, ac sustineret. Sicut enim ruit aedificium, fundamento concusso, sic non posset Ecclesiae moles, Pontifice errante, consistere. Sed advertendum praeterea est, verba illa Christi Domini: *portae inferi non praevalerunt adversus eam,* non solum de Ecclesia ipsa intellecta, atque explicata esse a Patribus, verum etiam de ipsa Romana cathedra. Sic Origenes *Hom. in Cap. XVI. Matth.* Neque adversus petram, inquit, super quam Christus aedificavit Ecclesiam, neque adversus Ecclesiam portae inferi praevalerunt. Et Augustinus in *Psalm. cont. Part. Don.* Numerate Sacerdotes vel ab ipsa Petri sede, et in ordine illo Patrum quis cui successit videte. Ipsa est petra, quam



*non vincunt superbae inferorum portae.* Idem docent Leo M., Gregorius M., Epiphanius, aliique.

3.<sup>o</sup> *Joan. XXI. 21.* Postquam Christus ter Petrum interrogavit, utrum eum plus ceteris Apostolis diligeret; subiecit: *pasce agnos meos: pasce oves meas*: quibus verbis Petrus, ejusque successor R. Pontifex Ecclesiae doctor constitutus est; cum praecipua ejus pastionis pars in doctrina consistat. Quamvis enim Apostolis omnibus pascendi gregis, ac docendi cura commissa sit; imo et Episcopis omnibus scribat Petrus 1. *Pet. v. 2. Pascite qui in vobis est gregem Dei*: non tamen majorem praeceteris dilectionem a Petro postulasset Christus, nisi supremam ei non ovium duntaxat, sed et inferiorum pastorum mandare curam voluisset, supremamque ei cathedram destinasset, ex qua non modo discipulos, sed et doctores ipsos, hoc est Episcopos, atque presbyteros edoceret. Atqui grex ipse, Ecclesia scilicet universa, errare in rebus fidei non potest, ut contra haereticos fatentur nobiscum adversarii. Non igitur errare potest supremus Ecclesiae doctor. Quale enim esset hoc absurdum, ut discipuli errare non possint; contra vero magister, qui eos docere, atque ab errore avertere debet, in docendo errare possit?

*Prob. II.* Ex perpetua Ecclesiae traditione. 1.<sup>o</sup> Irenaeus de R. Ecclesia scribens (*Lib. III. Cap. 3.*) quam appellat *maximam, antiquissimam, et omnibus cognitam, a gloriosissimis duobus Apostolis Petro, et Paulo Romae fundatam, et constitutam Ecclesiam.* Ad hanc, inquit, *Ecclesiam propter potentiores principalitatem, necesse est omnem convenire Ecclesiam, hoc est eos, qui sunt undique, fideles, in qua semper ab iis qui sunt undique, conservata est ea, quae ab Apostolis est, Traditio. Potentiores autem principalitatem Romanae Ecclesiae tribuit, non propter Urbis amplitudinem, aut civitatis imperium, sed propterea quod illa principium, basis, ac veluti centrum est Ecclesiae unitatis; in qua velut in communi omnium gentium thesauro depositum Apostolicae traditionis conservatur.* 2.<sup>o</sup> Tertullianus *Lib. de Praescr. Cap. 36.* *Habes, inquit, Romam, unde nobis quoque (Ec-*  
cle-

eclesiae scilicet Africanæ) auctoritas præsto est. *Ista quam felix Ecclesia; cui totam doctrinam Apostoli cum sanguine suo profuderunt! Quid est autem ex Romana Ecclesia præsto esse omnibus auctoritatem, nisi ex illa omnibus præsto esse certam, indubiamque doctrinam?* 3.<sup>o</sup> Cyprianus *Lib. de unitate Eccles.* Qui cathedram Petri, supra quam fundata est Ecclesia, deserit, in Ecclesia se esse non confidat. Cathedram autem ille deserit, qui doctrinæ refragatur. 4.<sup>o</sup> Optatus Milevitanus. *Lib. II. cont. Parmen.* Negare non potes, scire te in Urbe Roma Petro primo cathedram Episcopalem esse collatam, in qua una cathedra veritas ab omnibus servaretur. Quæ verba, cum cathedra ad doctrinam maxime referatur, satis evincunt, in una R. Cathedrae doctrina unitatem Ecclesiæ consistere, quod non ita esset, si cathedra illa in fide, aut moribus falli posset. 5.<sup>o</sup> Hieronymus *Epist. ad Damas. LVII.* Beatitudini tuæ, idest cathedrae Petri, communionem consocior. Super illam petram aedificatam Ecclesiam scio. Quicumque extra hanc domum agnum comederit, profanus est; si quis in arca non fuerit, peribit, regnante diluvio. Quicumque tecum non colligit, spargit; hoc est, qui Christi non est, Antichristi est. 6.<sup>o</sup> Augustinus *Ep. CXC. al. CLVII.* In his verbis Apostolicæ sedis tam antiqua, atque fundata, certa, et clara est catholica fides; ut nefas sit dubitare Christianis. Et *Serm. CXXXI. al. II. de verb. Apost.* Jam enim hac de causa duo concilia ad Sedem Apostolicam missa sunt; inde etiam rescripta venerunt; causa ergo finita est. Quæ quidem verba maximum momentum habent, cum inde concludat Augustinus, non esse post Pontificis definitionem necessarium generale concilium; quod Pelagiani flagitabant. Iuane autem Bossueti, aliorumque Gallorum effugium, qui cathedram a sedente Pontifice distinguunt, infra refutabimus. Vide apud Cocceium in *Thesouro*, Card. de Aguirre in *Defens. Cath. S. Petri*, Card. Orsi, aliorum Patrum, imo et Conciliorum generalium testimonia, quibus R. Pontificem passim appellant *Basim fidei immobilem*; *Caput totius fidei*; *Adamantem fidei*, *enjus solida mens ag-*  
gres-

*gressionibus, atque confictionibus alienae a fide opinionis non est vulnerabilis; Custodem vitae, et fidei Christianae etc.*

Juvat tamen praesertim exponere, de hac re Gallicana ipsa Ecclesia quid antiquitus senserit, ut luce clarius appareat, recentiores istos Theologos, qui Gallicanam nobis objiciunt Ecclesiam a majorum suorum doctrina defecisse. Nam praeter *Irenaeum* Lugdunensem Episcopum, cujus supra testimonium recitavimus, sic *Avitus* Viennensis ad *Hormisdam* Pontificem scribit *Epist. LXXXVII. Securus, non dicam de Viennensi, sed de Totius Galliae devotione polliceor, omnes super statu fidei vestram captare sententiam. Et Synodus Tournensis anno DLXX. Quis, inquit, contra decreta talia, quae a Sede Apostolica processerunt, agere praesumat? Sedis Apostolicae semper fuit aut intrmittere auctores, quorum valere possit praedicatio, aut apocryphos facere; et Patres nostri hoc semper custodierunt, quod eorum praecesserit auctoritas. Hinc Jesse Ambianensis in encyclica Epistola: Sequimur Romanae Ecclesiae auctoritatem; ut unde catholicae fidei initia accepimus, inde exemplaria salutis nostrae semper accipere debeamus, ne umbra a corpore separetur suo; ne Claviger regni caelestis abjiciat, quos a suis diversos intelliget esse doctrinis. Praeterea sic habet *Rhéginus Prumiensis* in *Chronico: Stultitiae quidem elogio denotandi, qui illam Petri sedem, aliquo pravo dogmate fallere posse arbitrati sunt, quae nec se fefellit, nec ab aliqua haeresi unquam falli potuit. Atque in eandem sententiam loquuntur Yvo Carnotensis, Alcuinus, Anselmus, Petrus Cellensis, Petrus Cluniacensis, quorum testimonia passim apud nostrates invenies.**

Sed praetermissis aliis non paucis Gallicanae Ecclesiae Scriptoribus imo et Conciliis, vidcamus quid *Bernardus* ejusdem Ecclesiae lumen, et ornamentum senserit. Ait enim *Epist. CXC. ad Innoc. II. Oportet ad vestrum afferri Apostolatium pericula quaeque, et scandala emergentia in regno Dei, ea praesertim, quae de fide contingunt. Dignum namque arbitror, ubi potissimum resarciri damna fidei, ubi non possit fides*

*fides sentire defectum; haec quippe hujus praerogativa sedis; cui enim alteri aliquando dictum est: ego pro te rogavi, ut non deficiat fides tua. Egregia plane; et Bernardo digna sententia. Proferat autem, si potest Bossuetus vel unum ex Scriptoribus Gallis, qui ante Gersonem, hoc est ante Occidentis schisma, in quo sunt omnia perturbata, expresse affirmaverit, R. Pontificem ex cathedra fallere, et falli posse. Licet enim ubique Patres, et Gallicanam Ecclesiam jactet; cum tamen ad auctores laudandos, ventum est, qui R. Pontificem ex cathedra errare posse conceptis verbis asseruerit, nullum Gersone antiquiorem profert.*

At enim, inquit, Parisiensis Academia contrarium semper tenuit. Quod si verum esset, Academia potius illa, quam vetus Ecclesia, praesertim Gallicana, deserenda esset. Sed non est ita. Primo enim Stephanus Parisiensis solemne decretum de unanimi Magistrorum Theologiae facultatis consilio edidit anno MCCCXXIV. in quo ita constitutum est. *Sacrosancta Romana Ecclesia omnium fidelium mater, et magistra in firmissima D. Petri Christi Vicarii petra fundata est. Ad quam velut ad universalem regulam catholicae veritatis pertinet approbatio, et reprobatio doctrinarum, declaratio dubiorum, et confutatio errorum. Idemque Theologiae facultatis magistri Tractatum Theologicum Clementi VII., quem ut legitimum tunc habebant Pontificem, Avenione obtulerunt, in quo Prima conclusio est, quod ad Sanctam Sedem Apostolicam pertinet auctoritate judiciali suprema circa ea, quae sunt fidei judicialiter definire. Et hoc probatur, quia ad illius tamquam supremi judicis auctoritatem pertinet in fide judicialiter definire, cujus fides numquam deficit. Sed Sanctae Sedis Apostolicae fides numquam deficit; quia de hac Sancta Sede in persona Petri in ea praesidentis dictum est: Petre, rogavi pro te, ut non deficiat fides tua Luc. 22. Propter quod dicit Cyprianus: qui cathedram Petri, supra quam fundata est Ecclesia deserit, in Ecclesia se non esse demonstrat. Et Hieronymus dicit; Super eam fundata est Ecclesia; et qui cum Pontifice Romano non colligit, disperdit. Deinde quanti S. Thomam Parisiensem Doctorem semper fecerit Aca-*  
de-

demia illa, satis unicuique exploratum est; unde ex  
ejus Academiae Actis hoc S. Thomae elogium recitat  
Gonetus, Tom. I. Cum D. Thomas fuerit universae  
Ecclesiae lumen praefulgidum, gemma radius Cleri-  
corum, fons Doctorum, Universitatis nostrae speculum  
clarissimum, et candelabrum insigne, ac lucens, per  
quod omnes, qui vias vitae, et Scholas doctrinae sanae  
ingrediuntur, lumen vident, claritatis vivae, fanae  
clarae, et scientiae lucidae velut stella splendida et  
matutina etc. Hic ergo tantus Doctor, cui nullum  
Parisiensis Academia parem tulit, sic de R. Pontifice  
loquitur 2. 2. Q. I. art. 10. ubi quaerit, utrum ad  
R. Pontificem pertineat ipsum edere fidei Symbolum:  
Respondeo, dicendum, quod sicut supra dictum est,  
nova editio symboli necessaria est ad vitandos insurgen-  
tes errores. Ad illius ergo auctoritatem pertinet editio  
symboli, ad cujus auctoritatem pertinet finaliter deter-  
minare ea, quae sunt fidei, ut ab omnibus inconcussa  
fide teneantur. Hoc autem pertinet ad auctoritatem  
Summi Pontificis, ad quem majores, et difficiliore  
Ecclesiae quaestiones referuntur; ut dicitur in De-  
creto (Caus. 2. q. 6. can. Oppressus). Unde et Domi-  
nus Luc. XXII. Petro dixit, quem summum Pontificem  
constituit: Ego pro te rogavi, Petre, ut non deficiat fi-  
des tua, et tu aliquando conversus confirma fratres  
tuos. Et hujus ratio est, quia una fides debet esse to-  
tius Ecclesiae . . . . . Quod servari non potest nisi  
quaestio fidei de fide exorta determinetur per eum, qui  
toti Ecclesiae praeesit; ut sic ejus sententia a tota Ec-  
clesia firmiter teneatur; et ideo ad solum auctoritatem  
Summi Pontificis pertinet nova editio symboli, sicut  
et omnia alia, quae pertinent ad totam Ecclesiam, ut  
congregare synodum generalem, et alia hujusmodi.  
Luculentiora sunt ea verba, quam ut explicatione in-  
digeant; ita ut me suppuceat Bossueti, qui ad illa  
enervanda cavillationes tanto viro indignas commin-  
scitur Part. III. Lib. X. cap. 16. In eandem sententiam  
loquitur S. Bonaventura, et ipse egregius Parisiensis  
Doctor in Exposit. Regul. S. Franc., nec non Albertus  
M., Alexander Alensis, Nicolaus Liranus, alique.  
Vetus igitur Ecclesiae traditio, praesertim Gallicanae,

et Parisiensis Academiae ante *Gersonem*, et schisma Occidentis, R. Pontificem in rebus fidei, et morum ex cathedra definiendis errare non posse constantissime tenuit.

*Prob. III. ratione Theologica* 1.<sup>o</sup> Si Ecclesia falli nequit, ut catholici omnes certissime profiteantur; profecto supremum, ac finalem ut loquitur *S. Thomas*, iudicem controversiarum falli non posse, necesse est. Posito enim supremo aliquo, ac finali iudice, semper nutat, atque infirmum est, ante ejus assensum, iudicium aliorum; ideoque si finalis iudicis sententia falli posset, non esset aliorum iudicium inconcussum. Atqui supremus, ac finalis controversiarum iudex summus est Pontifex. Ipsa enim oecumenica concilia nondum rata, atque absoluta sunt, donec a R. Pontifice confirmantur, ut ex omnium Conciliorum historia, imo ex ipsa Ecclesiastici regimini ratione, ac natura perspicuum est. Et quamvis Bossuet daremus, hanc confirmationem nihil aliud esse nisi subscriptionem, qua R. Pontifex aliorum Episcoporum sententiae accedit, et assentitur; hoc tamen certum, exploratumque est, aut Pontificis assensum Concilia nondum oecumenica, rata, ac legitima, ideoque nec infallibilia existimari. Neque enim ullum tot jam elapsis saeculis concilium est, quod a R. Pontifice improbatum habeatur ratum, atque legitimum. Si ergo Pontifex ex cathedra falli posset; posset etiam subscribere, et assentiri concilio, quod in fide erraverit, ut ex. gr. Ariminiensi, Seleuciensi, Ephesino latrocinio; ideoque si R. Pontificis iudicium infirmum esset, ipsa conciliorum generalium nutaret auctoritas.

2.<sup>o</sup> Ea semper fuit Ecclesiae consuetudo, ut in rebus dubiis, ad fidem, moresque pertinentibus R. Pontificis iudicium exquireretur, ejusque sententiam velut oraculum omnes sequerentur; quod ex Hieronymi ad Damasum Epistola, aliisque veteris Ecclesiae monumentis constat. Hoc etiam saepe ipsam fecisse Gallie ecclesiam, noyimus. Hinc Lupus Servatus *Epist. CIII. ad Benedictum III.* In quibuscumque, inquit, ad religionem, vel ad honestatem spectantibus ambiguitatem creat varietas; ut optima quaeque eni-

teant, illic sollicita investigatione credimus recurrendum, unde fidei ubique manavit exordium. Et Hincmarus Rhemensis Epist. ad Nicolaum I. In omnibus dubiis, vel obscuris, quae ad rectae fidei tenorem, vel pietatis dogmata pertinent, sancta Romana Ecclesia ut omnium Ecclesiarum mater, et magistra, nutrix, ac doctrinae est consulenda, et ejus salutaria monita sunt tenenda. Et ne quis ea cum Bossueto non ad R. Pontificem dicta esse contendat, sed ad Romanam Ecclesiam, ait in eadem Epistola ad Nicolaum: Neque enim fas est, ut absque Vicario Dei, absque Clavigero coeli, absque curru, et auriga spiritualis Israelis, absque universitatis Pontifice, absque singulari Pastore, absque unico Papa, absque omnium arbitro, aliquid consummetur, aut divulgetur. Tu enim tenes claves David. Tu accepisti claves scientiae. In arca quippe pectoris tui, arca Testamenti, et manna coelestis saporis requiescunt. Et te quidem vera definire exortas de fide, ac moribus controversias ad R. Pontificem pertinere, nemo umquam negavit; imo et Sorbonici ipsi Theologi, Clerusque Gallicanus in solempni illa sua Declaratione profitentur. Hinc Gallicani ipsi Episcopi anno MDCLV. a S. Pontifice Innocentio X. iudicium de quinque Jansenii propositionibus postulantes; Majores, inquit, causae ad sedem Apostolicam referre solempnis Ecclesiae mos est, in qua fides Petri nunquam deficiens perpetuo conservatur. Atqui hoc frustra fieret, si R. Pontifex docens ex cathedra falli posset; cum post ejus definitionem iisdem res esset agitata controversiis; satiusque esset doctum aliquem, atque in Theologia versatum Episcopum consulere. Constat igitur, eam semper fuisse Ecclesiae mentem, R. Pontificis iudicium ex cathedra falli non posse, ejusque definitionem ita omnes ambiguitates tollere, ut causa finita sit, ut loquitur Augustinus. Quapropter merito illi ipsi, quos paulo ante commemoravi, Gallicani Episcopi Innocentio X. post Jansenianae causae definitionem gratias agentes; Perspectum, inquit, habemus non solum ex Christi sollicitudine Petro facta, sed ex actis priorum Pontificum, iudicia pro sancienda regula fidei a summis Pontificibus lata super Episcoporum consultatione divina

aeque, ac summa per universam Ecclesiam auctoritate niti, cui Christiani omnes ex officio ipsius quoque mentis obsequium praestare tenentur, seu suam Episcopi in consultatione sententiam ponant, seu non ponant.

3.<sup>o</sup> Multas saepe haereses vel a primis Ecclesiae saeculis R. Pontifices ex cathedra damnaverunt, quique ab iis sunt damnati, etiam sine ullo concilio, ab omnibus haeretici habitusunt. Sic *Victor* Theodotum, *Zephyrinus* Montanistas, *Damasus* Apollinarem, *Siricius* Jovinianum, *Innocentius*, et *Zosimus* Pelagianos, *Leo IX* Berengarium, *Innocentius II.* Petrum Abaelardum, *Eugenius III.* Gilbertum Porretanum; alii alios damnaverunt haereticos, ut omittamus interim *Stephanum*, *Caelestinum I.* Leonem *M. Martinum I. Gregorium II.* aliosque, quorum definitiones oecumenica concilia secuta sunt. Illud constat, damnatos a R. Pontifice ab omnibus pro haereticis habitos, causamque post Pontificis decretum esse finitam. Hinc *Augustinus Lib. II. cont. duas Epist. Pelag. cap. 3. Per Papae inquit, rescriptum causa Pelagianorum finita est; totoque Orbe post ejus damnationem damnati sunt, ac litteris Innocentii omnis de hac re dubitatio sublata est.*

4.<sup>o</sup> Cum oporteat et haereses esse, ut inquit Apostolus in Epistola 1. ad Corinthios, multaeque saepe numero exortae sint iis temporibus, quibus Concilia oecumenica haberi nullo modo poterant, profecto malis ingruentibus non potuisset occurri, nisi Deus supremum judicem controversiarum in Ecclesia posuisset, cujus sententia errori non esset obnoxia; et Synagoga, ut inquit S. Bonaventura, fuisset felicior, quam Ecclesia; in illa enim supremum judicem constituit Deus, cujus sententia in controversiis ad religionem pertinentibus retractari non poterat *Deuter. XVII.* Qui autem ad singulas haereses damnandas, singula Oecumenica concilia haberi vellent, nugantur, nesciuntque omnino quid dicant; quantaque molis sit generale concilium celebrari. Nec regeas, posse saltem consensum Ecclesiae per orbem dispersae cognosci, cum saepe haereses late diffusae consensum hunc unanimem omnino perturbent, ut difficillimo illo tempore accidit, quo, ut ait *Hieronymus*, ingemuit totus orbis,



et se Arianum esse miratus est; quam sententiam suo loco explicavimus.

5.<sup>o</sup> Doctrinae novitas, praesertim si ea singularis sit, certum est in rebus Theologicis falsitatis indicium. At ejusmodi est Parisiensium doctrina: Est enim nova, cum nemo eam ante *Gersonem*, ne in Gallia quidem expresse docuerit. Est vero etiam singularis. Inquit enim *Petrus de Marca* Parisiensis Archiepiscopus in *Observat. ad Theses Claremont.* *Hæc opinio; quæ R. Pontifici ex cathedra docenti, infallibilem auctoritatem tribuit, est illa quam unice Italia, Hispania, aliaeque omnes Christianitatis provinciae docent; ita ut illa, quam sententiam Parisiensium Doctorum vocant, ad classem earum opinionum revocanda sit, quæ solum tolerantur . . . Auctoritas infallibilem sententiam in causis fidei pronunciandi est R. Pontificibus omnium Universitatum consensu acquisita, excepta tamen antiqua Sorbona.* Imo, hoc quoque tempore hanc de infallibilitate Pontificis sententiam in ipsa Sorbona doceri videmus; nam die duodecima mensis Decembris anno MDCLX. in Sorbona publice hæc thesis defensa est, videlicet: *Romanus Pontifex controversiarum Ecclesiasticarum est constitutus iudex a Christo, qui ejus definitionibus indeficientem fidem promisit. Veterem autem Sorbonam appellat non veterem universam Academiam Parisiensem; in qua sententiam nostram jamdudum valuisse demonstravimus, sed peculiare collegium illud, quod Sorbonicum ab ejus autore appellatur, quodque grassante schismate saeculo XIV. novam illam opinionem, velut aptam terrendis (ut ipsis quidem videbatur) in tempore Pontificibus invexit. Respondet quidem Bossuetus non fuisse Petrum de Marca Theologum. Estq; sed negare non potest, fuisse virum eruditum, ideoque satis idoneum testem ejus doctrinae, quæ sua aetate tum in Gallis, tum alibi publice, in Scholis invaluerat, ac tradebatur. Non diffitemur quidem, alios etiam in aliis Academiis fuisse Theologos qui Sorbonicam illam opinionem sectati sunt, neque id Petrus de Marca ignorabat. Sed singulares anctores extiterunt, non integrae Academiae, atque Universitates, quæ eam doctrinam veluti suam ex profes-*

fesso propugnauerint. Cam igitur Sorbonica illa sententia nova sit, ac singularis, non est cur ejus sectatores despiciant contraria sentientes; verumque potius est, quod prius traditum, quod semper, quod ubique, quod ab omnibus.

6.<sup>o</sup> Concedit *Bossuetus* Sorbonicae sententiae clarissimus assertor, idque propterea tamquam totius Gallicanae Ecclesiae sententia, atque doctrina existimanda est, R. Sedem, sive cathedram falli non posse, idque saepe repetit, et inculcat Patrum auctoritate, atque unanimi consensu evictus. *Haec igitur*, inquit, *cathedra, haec sedes, haec Ecclesia est, quae pro sui Pontificis dignitate uniendae Ecclesiae necessaria, numquam a vera Ecclesia, numquam a vera fide abrumptur.* Part. III. Lib. X. Cap. 5. et Cap. 6. *Quae proinde cathedra si concidere posset, fieretque jam cathedra non veritatis, sed erroris, et pestilentiae, Ecclesia ipsa Catholica non haberet societatis vinculum; jamque schismatica, et dissipata esset, quod non est possibile.* Si autem Romana cathedra falli non potest, nec Pontifex ex cathedra illa docens falli poterit; cathedra enim non docet, nec loquitur, nisi per eum, qui in illa sedet, nec nisi per metonymiam omnibus notissimam docere cathedra dicitur, cathedrae scilicet nomine pro magistro, qui in cathedra sedet, usurpato. Neque vero patres, qui a R. Pontificibus definitiones controversiarum fidei postularunt, a cathedra ipsa, sed a Pontificibus in cathedra sedentibus responsa expectabant. Quod si forte Romanae sedis, et cathedrae nomine ipsam Romanam Ecclesiam intelligunt, cui tribunt *ασφαλειαν* privilegium, quod Pontifici negant, pugnantia se loqui, non intelligunt. Pontifex enim ex cathedra loqui tunc dicitur, cum ex ipsius Romanae Ecclesiae sententia loquitur; audito scilicet fratrum consilio, divina ope implorata, reque mature a Romanae Ecclesiae Cardinalibus, ac Theologis explorata, atque discussa. Quapropter si R. Pontifex ex cathedra loquens falli posset, falleretur et cathedra; quod si haec falli nequit, nec Pontifex docens ex cathedra errare umquam poterit.

Mirum vero est quod ait *Bossuetus*, hoc sensu Romanam cathedram falli non posse, quod si quis Pontifex ex cathedra docendo fallatur, corrigatur ab altero, ut ita non in Pontificibus singulis, sed in ipsa serie Pontificum fides semper immota consistat. Quis enim non videt aliud esse numquam falli, aliud errorem agnoscere, atque corrigere? Quis vero iudicabit, utrum prior erraverit Pontifex, an posterior, qui prioris erratum se correxisse putat? Sane ad istas declinant ineptias, qui in Romani Pontificis auctoritate oppugnanda summi Theologi videri volunt.

7.<sup>o</sup> Illud etiam *Bossuetus* non solum concedit invitus, sed constanter affirmat, magni esse faciendae ipsorum testimonia Pontificum, qui suae sedis privilegia commendant. Ait enim *Part. III. Lib. X. Cap. 6. Audio quid dicant; Romanis Pontificibus sedis suae dignitatem commendantibus, in propria videlicet causa non esse credendum. Sed absit; pari enim jure dixerint, ne Episcopis quidem, aut Presbyteris esse adhibendam fidem, cum Sacerdotii sui honorem praedicant; quod contra est. Nam quibus Deus singularem honoris, dignitatisque praerogativam contulit, iisdem inspirat verum de sua potestate sensum, ut ea in Domino cum res poposcerit libere, et confidenter utantur; fiatque illud, quod ait Paulus II. Cor. V. 12. Accepimus spiritum, qui ex Deo est, ut sciamus quae a Deo donata sunt nobis. Quod quidem hic semel dicere placuit, ut temerariam, ac pessimam responsionem confutarem; confiteorque me de Sedis Apostolicae majestate Romanorum Pontificum doctrinae, et traditioni crediturum. Atqui praeter veteres Pontifices, qui Romanam Cathedram affirmant errori obnoxiam esse non posse, quorum longam seriem *Bossuetus* ipse recenset, odio praecipue Romani Pontifices Sorbonicam illam doctrinam rejecerunt, ac damnarunt; primum quidem *Alexander VIII.* deinde vero *Pius VI.* ut cuique notum est. Ergo.*

## Refutantur Objecta.

*Objic. I.* Verba illa Christi Domini Petro dicentis: *Et tu aliquando conversus confirma fratres tuos* non aliud significant; nisi Christi praeceptum, quo jubetur Petrus, ejusque successores, nutantes in fide fratres confirmare; quod praeceptum ad ceteros etiam Apostolos, et Episcopos pertinet; unde Episcopo dicitur *Apoc. III. 2. Esto constans, et confirma cetera, quae moritura erant*. Sed non huic efficitur, eos huic officio numquam defuturos. Si enim jubendo Christus id praestat, ut praeceptum ipsum impleatur, jam omnes sunt *impeccabiles*. Ergo.

¶ *Dist. ant.* Significant praeceptum cum adjuncta promissione numquam errandi, *conc. Secus neg.* Ait enim Christus: *Ego rogavi pro te, ut non deficiat fides tua, et tu aliquando conversus confirma fratres tuos*; quae verba ceteris Apostolis, ac Episcopis dicta non sunt.

*Objic. II.* Distinctionem illam sedis a sedente, qua *Bossuetus* explicat, quo sensu veteres Romanam cathedram affirmant falli non posse, immerito Itali Theologi contemnunt, ac rident. Ait enim *Leo M. Epist. LXXX. al. LIII. Aliud sunt sedes aliud Praesidentes. Etsi enim, inquit Epist. XCII. al. LXI. diversa nonnunquam sunt merita Praesulum, tamen jura permanent sedium*. Licet ergo in Romana sede, sive cathedra immota maneat doctrina fidei, ut Patres affirmant; non hinc efficitur, errare non posse Pontifices ex cathedra docentes.

¶ *Neg. ant.* Verba enim *Leonis M.* in objectione posita nihil aliud sibi volunt, nisi peccata *Praesidentium*, prout privatam personam gerunt, suarum sedium juribus detrimentum afferre non posse; quod nos etiam de Romano Pontifice satemur. Si enim ille, ut privatus aut erret, aut peccet, non propterea Romana cathedra mutabit. Sed cum Pontifex ex cathedra docet, hoc est ex ipsius cathedrae sententia, tunc cathedram a magistro, qui in illa docet, distinguere valde absurdum est; ut supra explicavimus.

Ob-

*Objic. III.* Viri sancti Romanis Pontificibus ex cathedra docentibus audacter, ac fortiter restiterunt, nec propterea haeretici, aut scelesti homines existimati sunt. Sic Asiani Episcopi *Victori* obstiterunt in quaestione de celebratione Paschatis. Sic *Cyprianus* *Stephano* in causa baptismi haeticorum. Sic etiam ob V. Synodum a *Vigilio*, aliisque Pontificibus probatam, non solum Gallicani, verum etiam Itali Episcopi non pauci, ipseque vir sanctissimus *Columbanus* Monasterii Bobiensis Fundator, et Abbas, Romanorum Pontificum fidem suspectam habuere. Constat etiam, Gallicanos Episcopos Nicaenam II. Synodum a Pontifice confirmatam recipere aliquandiu noluisse. Ergo.

R. *Dist. ant.* Sancti viri Romanis Pontificibus ex cathedra docentibus restiterunt errando, *conc.* Vera sectando, *neg.* Hoc igitur non modo R. Pontificum firmissimam in docendo auctoritatem minime labefaciat; verum etiam firmat magis, ac roborat, quod nemo unquam Romanae cathedrae definitionibus, nisi errando potuit obsistere. Quapropter sicut *Augustinus* praedestinationem inde magis confirmat, quod nemo unquam adversus eam / nisi errando disputare potuerit; sic nos R. Pontificum inconcussam sive *infallibile* iudicium vel inde magis firmare possumus, quod nemo adversus illud, nisi errando disputavit. Tunc adversariorum valeret argumentum, si Ecclesia catholica pro Asianis Episcopis, pro *Cypriano*, pro Gallicis contra *Victorem*, contra *Stephanum*, contra *Vigilium*, aliosque Pontifices judicasset. Cum autem contra acciderit, ut qui R. Pontificum definitioni restiterunt, erraverint; nonne hoc magis confirmat, quam labefaciet eorum Pontificum *infallibile* iudicium?

*Ist. 1.º* Quamvis ii, qui R. Pontificum definitionibus restiterunt, erraverint; satis tamen hac ratione significarunt, non se ita firmum ac certum eorum iudicium existimasse, ut falli non posset; alioqui piaculum duxissent ei contradicere. Ergo.

R. *Transcat. ant. Neg. cons.* Sicut enim errarunt in eo dogmate, quod contra Pontificis sententiam tuebantur, sic errare potuerunt in alio. Dixi vero *transcat*

seat antecellens; propter eam quod non facile concedimus, viros illos sanctos facto ipso significasse, non se Pontificis iudicium ex cathedra docentis *infallibile* existimare. Potuerunt enim putare, Pontifices non ex cathedra, hoc est ex Romanae Ecclesiae sententia, atque consilio locutos, aut non omnia servata esse, quae ad definitionem ex cathedra requiruntur (a), aut definitionem non ad fidem, quae communis est totius Ecclesiae, sed ad disciplinam pertinere. Quod praesertim tum in quaestione de Pascha, tum in ea, quae de Baptismo haereticorum exarsit, accidisse perspicuum est, ut ostendit ipse *Natalis Alexander* Parisiensis Doctor in Historia Ecclesiastica.

*Inst. 2.º* Augustinus saepe Cyprianum excusat, non ex eo, quod putaverit definitionem *Stephani* aut non fuisse ex cathedra, aut ad disciplinam potius, quam ad fidem pertinere, sed tantum ex eo quod nondum ea quaestio tantis altercationum nebulis involuta ad plenarii concilii luculentam illustrationem confirmationemque perducta erat, *Lib. II. de Bapt. contra Don. cap. 4.* Ergo putavit Cyprianus, et ex *Augustini* sententia, innoxie putavit, ante concilii plenarii definitionem non esse ab erroris periculo immunem Pontificis definitionem. Ait enim ibidem Augustinus: *Neque nos tale aliquid auderemus asserere (quale Stephanus iussit) nisi Ecclesiae catholicae auctoritate concordissima firmati, cui et ipse (Cyprianus) sine dubio cederet, si jam illo tempore veritas eliquata, et declarata per plenarium concilium solidaretur.*

Y

w. Dist.

---

(a) Cum Pontifex aliquid ab omnibus credendum ut dogma fidei definiit, vel quod idem est, aliquid ut fidei, bonique moribus contrarium, ab omnibus respuendum damnavit, omnia rite servasse, quae ad definitionem ex cathedra requiruntur, potandum est; alioquin de omnibus Pontificum, et Conciliorum definitionibus dubitari posset. Deus enim, qui dat, ut in definiendo non erret, dat etiam, ut nihil eorum, quae ad rite definiendum sunt necessaria, praetermittat.

*¶. Dist. ant.* Excusat ab haeresi; *conc.* Excusat ab omni culpa, *neg.* Disputat enim eo libro *Augustinus* contra Donatistas, qui ab Ecclesia catholica secessionem facientes, etiam post plenarii Concilii definitionem, *Cypriani* exemplo, atque auctoritate abutebantur. Merito igitur ait, *Cyprianum* Donatistis adversari potius, quam favere. Ille enim ante Concilii plenarii definitionem, cui sine dubio cessisset, quamvis contraria sentiret iis, quae *Stephanus* edixerat, numquam tamen adduci potuit, ut Ecclesiae unitatem scinderet. Non erat autem in ea causa haereticus *Cyprianus* cum Pontificis e cathedra docentis *ασφαλεια* non esset dogma fidei; non tamen ab omni culpa eum fuisse itamunem ait *Augustinus*, sed si quid peccavit vel ante mortem correxisse, sententiam scilicet mutando (quod, inquit, fortasse factum est, sed nescimus) vel abluisse martyrio? Cetera enim multa, et magna ejus merita, et animus praecipua caritate plenissimus, . . . et in unitate Ecclesiae passio gloriosa satis ostenderunt, eum fuisse samentum in Christi radice fructuosum, quod Pater etiam ab ista reprehensione purgaret, ut fructum posset afferre majorem. Sic enim ait ipse Jesus (Joan. XV. 2.) Samentum, quod in me dat fructum, purgat illud Pater meus, ut majorem fructum afferat. Ostendens etiam in ipsis fructuosis agricolam, qui est in caelis, aliquid invenire quod purget.

*Obje. IV.* Si R. Pontificis ex cathedra docentis judicium falsum esse non posset, frustra oecumenica concilia habita essent, et haberentur tot laboribus, tot sumptibus, tanto et Episcoporum incommodo, et populorum detrimento, qui eam ob causam tamdiu suis Pastoribus carere debent. Atqui ea semper fuit Ecclesiae consuetudo, ut in majoribus quibusdam causis, praesertim cum haeresis late pervagata est, non nisi in oecumenico concilio causa finiretur. Ergo.

*¶. Neg. maj.* Necessarium enim visum est aliquando generale concilium, ad haereticorum pervitiam retundendam, atque catholicos in Ecclesia retinendos. Cum enim 1.<sup>o</sup> haeretici fere omnes in ipsam Romanam Ecclesiam insurrexerint, non satis videbatur, eos

R. Pou-

R. Pontificis definitione damnari, cujus auctoritatem spernebant. Sic cum Lutherani, et Calvinistae Romam appellarent Babylonem, Sedem Romanam cathedram pestilentiae, Romanum Pontificem Antichristum, quo tandem pacto ex sola R. Pontificis potuissent definitione revinci? 2.º Cum nondum definitum fuerit ut dogma fidei, R. Pontificem ex cathedra errare non posse; necesse fuit aliquando plenarium concilium, ut definitio apud omnes fidei firmitatem obtineret. 3.º Quamvis Pontifex ex cathedra docens falli non possit, aut fallere; non tamen debet ipse, ut recte Bellarminus observat, *contemnere media humana, et ordinaria, quibus deveniri potest ad veram rei cognitionem, de qua agitur; medium autem ordinarium est concilium majus, aut minus pro magnitudine rei, de qua agitur. Id, quod patet primo exemplo Apostolorum. Nam certe tam Petrus, quam Paulus poterant soli quamlibet controversiam definire; et tamen concilium convocaverunt, Act. XV. 4.º* Nulla definiri potest controversia fidei, nisi ex Apostolica traditione; fieri autem potest aliquando, ut longe, lateque pervagata haeresi, ipsisque Episcopis collabefactis, obscurior sit traditio, nisi ex pluribus orbis partibus in unum convocatis Pastoribus, generale concilium habeatur, quo omnium Ecclesiarum consensus a Pontifice cognosci possit. His igitur de causis poterit necessarium esse concilium, licet Pontifex ex cathedra docens falli non possit. Vide eundem Bellarminum *Lib. IV. de R. Pont. Cap. 7. et Lib. I. de Concil. cap. 10. et 11.*

*Inst.* Quamvis Pontifex in definiendo diligentiam omnem adhibere debeat, quae aliquando etiam illud requirit, ut plures advocentur, eorumque sententia rogetur; postquam tamen ille adhibita ea diligentia, quam sufficere judicaverit, rem ex cathedra definivit; non liceret amplius definitionem ad novum examen revocare, si falsa esse non posset. Atqui Pontificum definitiones conciliorum generalium examini, atque judicio subjectas esse videtur ex Historia Ecclesiastica notissimum. Sic *Victoris* definitio de celebratione Paschae in Concilio Nicacno iterum ad examen revoca-



ta est: definitio *Stephani* de Baptismo haereticorum in concilio plenario, de quo loquitur *Augustinus*: definitio *Caelestini* de Nestoriana haeresi in Concilio Ephesino: definitio *Leonis M.* de haeresi Eutychetis in Concilio Chalcedonensi; in quo ipse *Leo M. Epist. ad Theodoret.* gloriatur definitionem suam fuisse probatam: utque alia omittamus, definitio *Leonis X.* de haeresi Lutherana in Concilio Tridentino. Re igitur ipsa, sive facto significavit Ecclesia, Pontifices etiam ex cathedra docentes, ac desinientes errare posse. Hic est adversariorum Achilles.

*n. Dist. maj.* Si non esset haereticorum frangenda pertinacia, pacandique turbati fidelium animi sollemni iudicio, quod definitioni tribuat inconcussae fidei firmitatem, *conca-* Sceus, *neg-* Rarae igitur extiterunt haereses, ut observat *Augustinus*, propter quas damnandas generale Concilium fuerit necessarium; cum plurimae fuerint, quibus a R. Pontifice damnatis *causa finita est*. Sed cum, ut paulo ante diximus, R. Pontificis definitioni non acquiescerent haeretici, atque inter catholicos ipsos infirmiores nonnulli titubarent; oportuit aliquando post Pontificum definitiones convocari Synodos, ut sicut in Apostolorum Concilio *Act. XV.* *Jacobus* Apostolus Petri iudicium divinarum Scripturarum testimoniis confirmavit; ita in oecumenicis, quae a Pontifice definita fuerant Scripturis etiam, et Patribus firmarentur; totiusque Ecclesiae definitione roborata ab omnibus tamquam inconcussa fidei dogmata haberentur. Sic post Melchiadis iudicium in causa Donatistarum dedit *Constantinus aliud Arelatense iudicium*, inquit *Augustinus Epist. XLIII. al. CLXII.* aliorum scilicet Episcoporum, non quia jam necesse erat, sed eorum perversitatibus cedens, et omnimodo cupiens tantam impudentiam cohibere. Item post *Leonis M.* sententiam habitum est Chalcedonense Concilium; quamvis evidenter apparet, rem, de qua agebatur, nequaquam Synodali indigere tractatione; ut ait in *Epist. ad Theodosium Imp.* ipse *Leo M.* Atque haec responsio satis arcem adversariorum exertit, qui longam conciliorum seriem recensentes inutilem in hac causa conditionem

osten-

ostentant. Ceterum quae in Chalcedonensi Concilio acta sunt, evidenter ostendunt, non fuisse ibi *Leonis* definitionem examinatum, ut dubiam, sed habitam potius, ut inconvulsam formulam, a qua velatum quidem unguem Concilium ipsum posset discedere. Cum enim *Actione V.* Patres ita definitionem fidei informassent, ut unum, aut alterum verbum de *Leonis* Epistola demerent; *Paschdsinus, et Lucentius Vicarii Sedis Apostolicae dixerunt: Si non consentiunt Epistolae Apostolicae Beatissimi Papae Leonis, jubete nobis rescriptum dari, ut revertamur.* Et quamvis Patres in formula definitionis suae perseverarent; ita ut dissolutionem etiam Concilii minarentur; ad extremum tamen ad verbum secundum Pontificis Epistolam edita est definitio, ut ex *Act. V.* perspicuum est. Denique quomodo possent Concilia R. Pontificum definitiones ex cathedra examinare, judicare, improbare, cum ipsorum generalium conciliorum definitiones non valeant, nisi R. Pontificis confirmatio, atque adensus ex cathedra datus accesserit?

*Inst. 2.<sup>o</sup>* In oecumenicis conciliis post octavum in occidentem celebratis, quibus ipsi per se R. Pontifices praefuerunt, ut in quinque Lateranensibus, et duobus Lugdunensibus, decreta Pontificum nonnisi sollempnibus illis verbis: *Sacro approbante concilio*, edita sunt. Agnoverunt ergo ibi Pontifices supremam in concilio definiendi potestatem, cujus approbatione decreta ipsa Pontificum indigebant, sine qua falsa esse potuissent.

*¶ R. Neg. cons.* Quamvis enim fateamur, Episcopos in conciliis oecumenicis non esse meros Pontificis consiliarios, sed iudices, ut suo loco diximus *Lib. II. cap. 9.* ideoque revera Pontificis definitionem ad sensu suo, atque suffragio approbare; non hinc tamen efficitur, Pontificis iudicium, si fuerit revera *ex cathedra* pronunciatum, aut eam approbationem falsum esse potuisse; licet aliquando oporteat illud ad haereticorum frangendam pertinaciam, atque ad fluctuantium catholicorum animos confirmandos, in plenaria concilio probari.

*Objec.*

*Objic. V.* Non pauci sunt R. Pontifices, qui se falli posse, atque aberrare a veritate ingenue professi sunt. Sic Innocentius III. *Serm. II. de Consecr. Pontif.* In tantum, inquit, mihi fides est necessaria, ut cum de ceteris peccatis Deum solum judicem habeam; propter solum peccatum, quod in fide committitur, possem ab Ecclesia judicari. Et Clemens VI. gravi correptus morbo, cum de vita periclitaretur, quidquid in Pontificatu errare potuisset, retractavit: Si qua, inquit, nos disputando, legendo, praedicando, aut alias contra catholicam veritatem, et fidem, vel bonos mores ex lapsu linguae praecipitanter forte protulimus, revocamus, et volumus pro revocatis haberi. *Brevi 7. Decemb. 1351.* Quod et Urbanus V. et Gregorius XI. in vitae exitu fecerunt. Item alii Pontifices, se in fide errare potuisse ingenue fassi sunt. Ergo.

*R. Neg. cons.* Quis enim non videt pias illas, modestasque Pontificum voces non de Pontifice docente ex cathedra, sed de privata ejus persona intelligenda esse? Hinc Clemens ipse VI. in objectione laudatus de Pontifice ex cathedra desinente hunc posuit articulum inter eos, quos Patriarchae Armenorum subscribendos dedit. *Si credidisti, et adhuc credis, solum R. Pontificem in dubiis emergentibus circa fidem catholicam, posse per determinationem authenticam, cui sit inviolabiliter adhaerendum, finem imponere, et esse verum, et catholicum quidquid ipse auctoritate clavium sibi creditarum a Christo determinat esse verum; quod determinat esse falsum; et haeticum, tale sit censendum.* Quae vero nonnulli Pontifices vel verbo, vel facto, ut privati peccaverint, non faciunt ad hanc causam. Quapropter frustra nobis objiciunt praesertim haeretici, aut lapsum Petri, ejusve imprudentiam, qua gentes cogebat exemplo suo judaizare, ut inquit Apostolus *Galat. II.* aut *Marcellini* (si vera est) idololatriam, aut *Liberii* subscriptionem formulae Arianorum, aut aliorum Pontificum errata; quae non sollemni judicio ex cathedra pronunciata, probatae sunt; sed humana privatim imbecillitate, aut improbitate commissa: homines enim erant, humani nihil ab iis alienum fuisse putandum est. last.

*Inst.* Hadrianus IV. in IV. Dist. 7. non de privata Pontificum persona, sed de Pontifice ex cathedra docente haec habet: *Si per Romanam Ecclesiam intelligatur caput illius, puta Pontifex, certum est, quod possit errare etiam in his, quae tangunt fidem, haeresim per suam determinationem, aut Decretalem asserendo. Plures enim fuere Pontifices Romani haeretici.* Neque vero reponi potest, haec scripsisse *Hadrianum*, cum publicus Lovanii Theologiae Professor esset. Quippe ad summum Pontificatum evectus tantum abest, ut ista retractaverit, quin eosdem suos Commentarios Romae recudi curaverit, ne verbo quidem uno immutato, imo et Pontificio Stemmate in fronte praefixo. Ergo.

¶ *Neg. cons.* Quae enim *Hadrianus* Lovaniensis Doctor antea scripserat, non magis nobis incommodant, quam privati alicujus Sorbonici Doctoris opinio: Quod autem ad Pontificatum evectus Commentarios non correxerit, nemini mirum videri debet; cum initio brevis illius Pontificatus tot curis, atque negotiis obrutus, in tanta Ecclesiae perturbatione de librorum suorum retractatione ne cogitare quidem potuerit. Fortasse etiam data opera nihil immutatum voluit, ne Romana editio a Lovaniensi discreparet; ideoque tamquam interpolata, aut mutila contemneretur. Quidquid tamen ejus rei fuerit, cum non ex cathedra commentarios illos *Hadrianus* confirmaverit, non majorem habent auctoritatem, quam privati doctoris.

*Obje. VI.* Multi Pontifices ex cathedra docentes errarunt. Sic *Victor I. Montani*, et *Maximillae* prophetias approbavit, teste *Tertulliano Lib. cont. Prax.* *Stephanus I. Cypriani* sententiam de rebaptizandis haereticis rejiciens, in contrarium impegit scopulum, docens, neminem esse baptizandum a quacumque haeresi venerit; hoc est etiam ab iis, quae sollemnem baptismi formulam ratam, atque legitimam non servabant; ut ei exprobrat *Cyprianus Epist. LXXIII.* et fatetur in quodam opusculo *Benedictus XII.* docens; *Nicaenum concilium opinionem et Cypriani, et Stephani correxisse.* *Zosimus* etiam *Pelagium* et *Caelestium* catholicos iudicavit, ut patet ex ejus epistola

ad

ad *Augustinum*, aliosque Africanos Episcopos, ipseque id fatetur *Augustinus Lib. II. ad Bonifac. cap. 3.* Item *Hormisdas*. propositionem illam *Scytharum Monachorum*, *Unus de Trinitate passus est carne* damnavit; quam deinceps *Joannes II. in Epist. ad Justinian.* Quinta Synodus, *can. 10.* et *Lateranensis* sub *Martino I. can. 2.* ut catholicam probarunt. Praeterea *Vigilius* tria illa capitula celeberrima primum tamquam orthodoxa defendit sollemni judicio quod *Constitutum* appellavit; deinde vero ut plena erroris, atque perfidiae post Concilii V. definitionem damnavit. Quid de *Honorio* dicemus, quem tria Concilia oecumenica, nec non *Leo II. et Hadrianus II.* cum *Monothelitis* damnarunt? *Gregorius III.* rescribens *Bonifacio* Moguntino Episcopo praecipit, ut baptizati a Paganis, atque Judaeis rursus baptizentur. *Stephanus II.* interrogatus a quibusdam Britanniae Monachis baptismum in vino ministratum probavit. Et *Nicolaus I.* ad *Bulgaros* baptismum in nomine Christi ratum habuit. Praeterea *Alexander III. cap. Cumeset.* De testamentis, definivit, alienum esse ..., a divina lege, ut testamenta, nisi quinque, vel septem testium fuerint subscriptione munita, penitus rescindantur; quod quidem falsum est. *Innocentius III.* teste *Caesario Lib. III. Historiarum memorab. cap. 32.* in ipso Cardinalium Consistorio definiivit, Sacramentalis confessionis sigillum aliquando reserari posse. Quod idem in simili causa respondisse *Innocentium IV.* auctor est *Dominicus Soto in IV. Dist. XVIII. q. 4. art. 9.* Graviter etiam videtur errasse *Bonifacius VIII.* definiens omnia regna mundi Romanis Pontificibus subesse in temporalibus; quod et in celebri Decretali *Unanz Sanctam* asseruit, quam deinde *Clemens V.* in Concilio Viennensi abrogavit. Praeterea duo Pontifices *Nicolaus III.* et *Joannes XXII.* duo sibi invicem aperte contraria definiverunt; ideoque alterutrum errasse perspicuum videtur. Definivit enim *Nicolaus III. in Cap. Exiit. de Verb. signif. in 6.º* Franciscanos fratres veram, atque Evangelicam paupertatem profiteri, eo quod nullius rei, etiam, quae usu consumitur, ut panis, vini, vestium dominium, ne in com-

mini quidem, haberent; ita ut ipsis merus esset earum rerum usus non *juris*, sed *facti*; dominium verò penes Summum Pontificem; ejusque paupertatis Christum, et Apostolos exemplum praeuisse. Contra vero *Joannes XXII. in Extravag. Ad conditorem: de verb. signif.* definivit in iis rebus, quae usu consumuntur, òmn posse dominium ab usu separari. Et in *Extravag. Cum inter nonnullos* ait, haereticum esse asserere; Christum ejusmodi paupertatem aut verbo, aut exemplo docuisse. Idem etiam Pontifex definivisse dicitur, beatam Dei visionem ad extremum usque iudicii diem dilatare, ac reservatam esse Sanctis. Sunt denique et alii Pontifices, quos erroris accusant adversarii, ita ut errantes Pontifices ad quadraginta numerentur. Ergo.

R. Neg. ant. Omnes enim Pontifices in objectione notati, atque alii, quos adversarii tamquam erroris auctores insimulant, vel revera non errarunt, vel non errarunt *ex cathedra*. Ad 1m. Tertullianus jam Montanista gratis asserit ad malae causae patrocinium *Pictorem*, vel alium R. Pontificem (non enim quemquam expresse nominat; sed *Romanum Episcopum*) litteras pacis ad Montanistas *jum emissas revocasse*. Sed demus haec vera esse, nec *Tertullianum*, ut contendit *Rigaltius*, in ea historia tam recenti mentiri potuisse. nihil aliud hinc efficitur, nisi Romanum Pontificem specie pietatis, atque austerioris disciplinae, quam Montanus, ejusque assectatores principio profitebantur; *errore facti non dogmatici*, ut ajunt, sed *personalis*, eos catholicos judicasse, cum necdum pestiferae doctrinae virus evomissent, ut advertit *Baronius*. Quod autem Pontifex *ex cathedra*, hoc est ex R. Ecclesiae consilio, atque sententia definivit, veram esse Montanistarum doctrinam, nec *Tertullianus* asserit, nec, si assereret, fidem ei habere cogere mur.

Ad 2m. Perperam *Stephani* mentem *Cyprianus* interpretabatur, utique ejus decreto conflaret invidiam, ita verba illa a *quacunque haeresi* intelligebat, quasi eorum etiam haereticorum baptismum probaverit *Stephanus*, qui formulam baptizandi sollemnem immu-

ta-

tabant. Quod quidem falsum esse perspicuum est ex Epistola *Fumiliani ad Cyprianum*, quae est *LXXIV.* inter *Cypriani* Epistolas, ubi ita luculenter *Stephani* sententiam exponit: *Non putat quaerendum esse, quis sit ille; qui baptizaverit, eo quod, qui baptizatus est gratiam consequi potuerit, invocata Trinitate nominum Patris, et Filii; et Spiritus Sancti. Benedictus vero XII.* *Cypriani* auctoritate deceptus ea scripsit, quae in objectione posita sunt, ante Pontificatum, ut privatus doctor, ideoque non multum nobis sententia ejus incommodat.

*Ad 3.m* Constat *Zosimum* subdola *Pelagii*, ac *Caelestii* professione fidei circumventum non eorum probasse haeresim, quam fraudolenter obtegebant, sed eos errore facti existimasse catholicos, cum et emendaturos se, si quid errassent, pollicerentur, et Sedis Apostolicae judicio obtemperaturos. Cum se litteris *Papae Innocentii* (qui *Pelagii* dogmata damnaverant) consentire *Caelestius* respondisset, et se omnia, quae *Sedes Apostolica* damnet, damnaturum esse promitteret, ut inquit *Augustinus Lib. II. ad Bonif. Cap. 3.* iudicatus est Catholicus. Imo, ut dicamus verius, non iudicatus, neque sollemni judicio absolutus, sed commendatus duntaxat *Episcopis Afris*, donec veritas innotescret. Ubi autem intellexit *Zosimus* ex eorum Epistolis, fuisse se a *Pelagio*, *Caelestioque* deceptum, mox eos, eorumque haeresim, et ipse damnavit.

*Ad 4.m* Cum una, eademque propositio variam habere potest interpretationem, ac sensum; potest pro varia ejus significatione et damnari, et defendi. Ejusmodi autem erant illa: *Unus de Trinitate passus est carne*, quam *Hormisdas* a *Scythis* Monachis pronunciari existimavit in sensu *Euthychianorum*; meritoque illam eo sensu damnare potuit. Alii vero Pontifices, et *V. Synodus* sensu catholico probarunt. Quamquam, si verum amamus, non omnino *Hormisdas* propositionem illam improbavit, sed cum contenderent *Monachi*, ea verba omnino addenda esse definitioni *Concilii Chalcedonensis*, eos tamquam inquietos homines, novarum cupidos quaestionum, temerarios, atque *Euthychianismi* suspectos ab se rejecit, ut in Epistola ad

*Pos-*

Possessorem luculenter declarat. Hinc ingenue Natalis Alexander Parisiensis et ipse Doctor in Hist. Eccl. Saec. VI. Dissert. II. Ex his, inquit, collige Joannis II. decreta Hormisdæ non esse contraria, cum Hormisdas propositionem non damnaverit: quam approbavit Joannes, nec oppositam proposuerit fidelibus credendam, quam anathemate Joannes confixit. Unde perperam Forbesius Lib. III. Instruct. Historico-Theolog. Cap. 21. num. 30. scripsit: Hic habent, in quo ingenia sua exerceant infallibilitatis Pontificiae assertores. . . . Mera vero calumnia est, Hormisdam hanc propositionem: Unus de Trinitate crucifixus est carne; ex cathedra damnassee, quam ne quidem examinare tunc voluit, hanc disceptationem intempestivam judicans, et turbandae potius Ecclesiae, quam aedificandae opportunam.

Ad 5m. Quod attinet ad *Vigiliam*, non definivit ille quidem ex cathedra; tria capitula orthodoxa esse, sed putavit damnari non posse, praesertim defunctis auctoribus, cum ea Chalcedonense Concilium intacta reliquisset. Hoc ipsum autem ejus judicium non definitio fuit Romanae cathedrae, cum ille Constantino-  
poli teneretur, longe a fratrum societate, atque consilio. Re vero maturius examinata, ac veritate perspecta non dubitavit capitula illa damnare.

Ad 6m. De *Honorio* nota quidem est *Bellarmini*, *Baronii*, aliorumque responsio; acta scilicet Conciliorum illorum, quae cum Pontificem cum Monothelitis damnarunt, in quibus etiam Epistolae Leonis II. et Hadriani II. leguntur, a Graecis fuisse corrupta, falsoque iis insertum *Honorii* nomen, ne soli orientales Episcopi damnati viderentur: Sed quamvis hoc a Graecorum ingenio non abhorreat, ut ex aliis illorum mendaciis, ac fraudibus *Bellarminus* ostendit; non est tamen credibile; Graecos exemplaria omnia depravare potuisse, praesertim ea, quae in Romanae Ecclesiae Seriniis servabantur. Ea igitur opinione praetermissa, respondemus, evinci numquam posse, Epistolas *Honorii*, ex quibus ille damnatus est, fuisse definitiones ex cathedra, neque tamen Monothelitarum haeresim continere; damnatumque *Honorium* non ut haereticum, sed



sed ut haereticorum fautorem, quorum causam imprudenti silentio, quod in Epistolis illis indixerat, confovebat. Et primo quidem probare numquam poterunt adversarii, Epistolas *Honorii* ad *Sergium* ex cathedra emissas; hoc est audito fratrum consilio, sollemnibus indictis precibus, ceterisque rite servatis, quae erant ad id negotii necessaria. Quin potius ex iis, quae scribit post *Honorii* obitum *Joannes Abbas*, qui Pontifici fuerat a Secretis, constat ejus Epistolas privato nomine, atque consilio conscriptas; cum fateatur *Joannes*, Epistolas ab se scriptas, nullamque faciat mentionem consilii, quod aut a Romano clero, aut saltem ab aliis viris doctis, ac sapientibus *Honorius* postulasset, quod sane fuisset ad Pontificis defensionem valde opportunum. Deinde *Honorii* verba haeresim Monothelitarum non probant, sed catholico sensu intelligi et possunt, et debent. Ait enim, unam fuisse in Christo voluntatem, non quod negaret voluntates duas, divinam, et humanam, sed quod humanam voluntatem unam esse affirmabat, cum non esset in eo voluntas carnis voluntati spiritus adversa; ac reluctans. Unam, inquit, in Christo Domino voluntatem fatemur, quia a Divinitate assumpta est natura, non culpa . . . . . Lex alia in membris, aut voluntas diversa non fuit, aut contraria Salvatori. Idque luculentius explicat is, quem diximus *Joannes Abbas*, qui Epistolas *Honorii* scripserat. Cum scripsisset, inquit, *Sergius*, esse aliquos, qui dicerent, in Christo duas esse contrarias voluntates; rescripsimus, Christum non habuisse duas contrarias voluntates; carnis, inquam, et spiritus, sed unam tantum, quae naturaliter humanitatis ejus character est. Id ita esse evidenter ex hoc monstratur, quod membrorum, et carnis facta est mentio, quae divinitati ejus non possunt attribui. Quae quidem verba luce clariora *Honorium* ab haeresis crimine liberant. Hinc merito post *Honorium* *Agatho R. Pontifex* in Epistola Synodali, quae habetur in Actis sextae Synodi, affirmare potuit; Romanam Ecclesiam juxta Christi promissionem, a vera fide numquam deflexisse, sed suos praedecessores semper haeresibus restitisse, et fratres in

*fide confirmasse.* Vido Joannis IV. Apologiam pro Honorio ad Constantinum Imperatorem, Maximum Martyrem in *Dialogo cum Pyrrho*, et in *Epistola ad Marinum*, et ut alios sileam innumeros tam Historicos, tum Theologos, Natalem Alexandrum *Dissert. II. in Hist. Eccl. Saec. VII.* Nec immerito tamen damnatus censeri debet. Cum enim silendi amplius tempus non esset, longe, lateque pervagata Monothelitarum haeresi, ipse silentium catholicis indicabat, quod unum maxime ad stabilicendam, ac latius divulgandam haeresim a Monothelitis petebatur.

*Ad 7m.* Praecipit Gregorius III. ut Baptizati a Paganis, ac Judaeis baptizentur iterum; quia merito dubitari poterat, utrum illi baptismi formam rite servassent; ideoque Pontificis responsio reprehendi non debet.

*Ad 8m.* Non prohibere Stephanum baptismum vino ministratum, demonstrabimus *Lib. VIII. Part. 2.*

*Ad 9m.* Non fuerat Nicolaus a Bulgaris de forma Baptismi interrogatus, sed de ministro; utrum scilicet a Judaeo, aut Pagano collatus baptismus ratus haberi debeat. A quodam, inquit, Judaeo nescitis, an Christiano, an Pagano multos in patria vestra baptizatos asseritis, et quid de iis sit agendum consulitis. Recte autem respondit ratum esse, si in nomine SS. Trinitatis esset ministratus. *Hi profecto si in nomine S. Trinitatis baptizati sunt . . . rebaptizari non debent.* Addit vero de suo propositionem illam incidentem; sive in nomine Christi; unum enim, idemque est. Propositiones autem sermoni incidentes ad definitionem ipsam non pertinent. Ceterum nondum est ut dogma fidei definitum, non valere baptismum in nomine Christi collatum, suntque etiam Patres nonnulli, qui ratum illum existimarunt; ita ut quamvis Nicolai propositio non incidens, sed absoluta esset, non posset haeresis judicari.

*Ad 10m.* In Alexandri Decreto duo distinguenda sunt; ipsa scilicet intentio, et ratio, qua Pontifex Decreti intentionem confirmat. Intentio autem ejus Decreti est; ut in testamentis ad pias causas factis, duo, vel tres testes sufficiant; quod quidem contra bonos

bonos mores nequaquam pugnat. Ratio vero, quam Pontifex affert est divina lex in Deuteronomio lata, ut scilicet *in ore duorum, vel trium testium stet omne verbum*; quae quidem ratio, quamvis ad probandam Decreti intentionem infirma esse dicatur, cum leges omnes veteris testamenti, ceremoniales ac judiciales, peculiare essent Israelitici populi, atque ad Christianos non pertineant, nihil tamen id praecipuae Pontificis intentioni officit. Inquit enim Melchior Canus *L. VI. de Loc. Cap. 8. In conclusione Pontifices summi errare nequeunt, si fidei questionem ex Apostolico tribunali decernant. Si vero Pontificum rationes necessariae non sunt, ne dicam aptae, probabiles, idoneae, in his nihil est videlicet immorandum. Non enim pro causis a Pontificibus redditis tamquam pro aris, et focis depugnemus. Alexander igitur non definit, consuetudinem illius modi, quinque, vel septem testes exigendi in testamentis esse divinae legi contrariam; sed (quod Jurisperitis fere placere video) jubet, ut in legatis piis duo, vel tres solum testes a iudicibus exigantur. Haec Decreti hujus conclusio est, hic finis, nec dubium est, quin rem eam Pontifex jure quodam suo potuerit praescribere. Sed si in ejus praescripti confirmationem Deuteronomii lege utitur (hanc quippe divinam nuncupat) si ad Canonum statuta revocat, si Ecclesiae morem affert, non est operae pretium rationes illas ad vivum resecare.*

*Ad 11m.* Neque Innocentius III. neque Innocentius IV. definiverunt, reserari posse aliquando Sacramentale sigillum, cum propositae illis species essent non de confessione Sacramentali, sed ficta, et pravo consilio instituta, ad sacerdotem, scilicet vel depravandum, vel impediendum, ut in reum ex sui muneris officio animadverteret. Ceterum multis Caesarii Historiae fabellis scatent.

*Ad 12m.* Calumniæ est impacta Bonifacio VIII. ea, quæ in objectione ponitur; quam calumniam ipse Pontifex in publico Consistorio depulit oratione ad Cardinales habita, quam refert Spondanus ad an. *MCCCL.* In Decretali quidem *Unam sanctam*, ait Bo-

Bonifacius, subesse R. Pontifici omnino esse de necessitate salutis omni humanae creaturae; quae propositio vera est, si de rebus spiritualibus, atque ad aeternam salutem pertinentibus intelligatur. Falsum autem est, Clementem V. Decretalem illam *Unam sanctam* abrogasse, cum eam explicaverit dumtaxat, ita ut nullum inde detrimentum Galliarum Regno sit illatum. Quod si quae sunt in ea Decretali propositiones incidentes aliquanto duriusculae, non eae ad definitionem, atque intentionem Decreti pertinent, ut paulo ante advertimus.

*Ad 13m.* Unum est, in quo sibi invicem aperte adversantur *Nicolaus III. et Joannes XXII.* quod scilicet prior asserit, posse in rebus, quae usu consuevantur, usum ipsum a dominio divelli, ac separari, alter e contrario id omnino fieri posse negat. Sed haec quaestio Philosophorum est, neque ad fidem ullo pacto pertinet. Quod vero *Nicolaus* asseruit, Christum ejus perfectissimae paupertatis exemplum praebuisse: *Joannes* vero haeticum esse definiit, Christum numquam aliquid possedisse; potest utrumque verum esse, si dicamus, Christum aliquando quidem perfectissimae illius paupertatis, de qua *Nicolaus* loquitur, exemplum praebuisse; sed quia ad informandam Ecclesiam loculos etiam habuisse legitur in Evangelio, ideo haeticum esse dogma, Christum numquam aliquid proprium habuisse, ut *Joannes* declaravit. Vide *Melch. Canum, Bellarminum etc.* Quod autem *Joannes XXII.* ex cathedra pronunciaverit, beatam Dei visionem sanetis usque ad extremum judicii diem differri, ac reservari, putidissima calumnia est, quam *Lib. III.* confutabimus.

*Inst.* Nonnulli Pontifices praedecessorum suorum definitiones aperte retractarunt, improbarunt, falsasque fuisse sollemni judicio pronuntiarunt. Sic *Innocentius III. Cap. Quanto: De Divitiis* definiit, non dissolvi matrimonii vinculum; si conjugum alter, aut in haesim incidat, aut aliter a fide deficiat; licet, inquit, quidam Praedecessor noster aliter sensisse videatur. Est autem praedecessor ille, quem innuit *Caelestinus III.* qui contrarium ante *Innocentium* constituerat in Decretali

*tali Laudabilem: De conversione conjugatorum*, quam in margine citat *Glossa*; licet in novis *Decretalium* editionibus honoris causa expuncta sit. Eam tamen in sua *Decretalium* collectione edidit *Antonius Augustinus*. Simili ratione *Alexander III. in Cap. Licet. De Sponsa duorum*: quorundam praedecessorum suorum sententiam explodit definiens, prius matrimonium ratum, ac validum, licet non consummatum, non dissolvi per aliud, licet hoc posterius consummatum etiam fuerit, quamvis, inquit, a quibusdam praedecessoribus nostris aliter sit aliquando judicatum. Contrariae autem definitiones verae simul esse non possunt. Manifestum est igitur, errasse aliquando ex cathedra Pontifices.

¶ *Neg. maj.* Non enim, ut *Melchior Canus* advertit *Lib. VI. Cap. 8. Caelestini III.* aliorumque Pontificum ab *Alexandro III.* laudatorum responsa, definitiones ex cathedra existimandae sunt, sed judicia quaedam in singularibus privatorum causis. Quod ex ipsis *decretalium* verbis in objectione recitatis non obscure colligitur. Ait enim *Innocentius III.* praedecessorem suum aliter sensisse; imo aliter sensisse videri. Aliud autem esse sentire; aliud ex cathedra definire quis non videt? Item *Alexander III.* ait, a praedecessoribus quibusdam suis aliter aliquando fuisse judicatum, quibus verbis non definitionem sollemnem significat ex cathedra pronuntiatam ad universam docendam Ecclesiam, sed judicia quaedam inter privatos, in quibus non omnia illa servari solent, quae ad definitionem ex cathedra esse necessaria saepe diximus.

*Inst. 2º.* *Formoso R.* Pontifice defuncto, successor ejus *Stephanus VII.* omnia ejus acta rescidit, eosque qui ab eo ordinibus initiati fuerant iterum ordinari iussit. Contra vero *Stephano* mortuo, ejus successores *Theodorus II.* et *Joannes IX.* ipsius acta irrita declararunt, confirmaveruntque acta *Formosi*. At eorum successor *Sergius III.* iterum acta *Formosi* rescidit, *Stephani* confirmavit. Quis autem in tanta Pontificum contradictione infallibiles eos esse dixerit? Ergo.

¶ *Neg. min.* Nam neque *Stephani VII.* neque *Theodori*, *Joannis*, *Sergii*que acta definitiones fuerunt

ex Cathedra de fidei, morumve controversia; sed iudicia de *Formosi* persona, quem *Stephanus*, et *Sergius* non legitimum, nec verum Pontificem iudicaverunt; legitimum contra *Theodorus*, ac *Joannes*. Iure ne id fecerint, an injuria, odio, iracundia, alia quaestio est, de qua vide *Natalem Alex.*, *Baronium*, aliosque viros doctos, qui causam hanc fusius atque accuratius pertactarunt. Illud cuique exploratum est, iudicia illa R. Pontificum non de dogmate ullo instituta esse, sed de persona. In factis autem, ut ajunt, *personalibus* errare posse Pontifices, non negamus. Neque vero quemquam movere debet, quod *Stephanus VII.* ordinationes *Formosi* irritas judicaverit. Primo enim quamvis fide certum sit, baptismum etiam ab haereticis legitima forma collatum ratum esse, non est tamen dogma fidei, idem etiam de confirmatione, atque ordine sentiendum, cum contraria *Morini* sententia damnata non fuerit, ut in *Lib. III.* diximus. Deinde quo sensu ordinationes nonnullae apud veteres irritae dicerentur, quidque fuerit nova manuum impositio, quo ii, qui a ministris legitimis initiati erant ad exercenda suorum ordinum officia in Ecclesia recipiebantur, ibidem explicavimus.

*Obj. ic. VII.* Negari non potest, contra Pontificis *ασφαλειαν* sensisse viros doctissimos, summosque Theologos *Gersonem*, *Almainum*, *Tostatum Abulensem*, Cardinalem *Cusanum*, *Aeneam Sylvium*, *Adrianum VI.* aliosque innumeros. Ergo.

*R. Trans. ant. Neg. cons.* Quamvis enim daremus omnes illos, qui in objectione positi sunt, quorum nemo ante schisma Occidentis, et Constantiense Concilium floruit revera adversus Pontificum auctoritatem certasse, nihil tamen negotii eorum nobis faceretur auctoritas, eum opponere iis possimus praeter testimonia Scripturarum, Ecclesiae Patres, Concilia, ipsamque Gallicanam Ecclesiam, et Parisiensem Academiam, *S. Thomam*, *S. Bonaventuram*, totque praeterea Catholicos Theologos, ut dicere audeat *Suares. De Fide disp. V. sect. 8. Veritas catholica est, Pontificem definientem ex cathedra fidei regulam esse, quae errare non potest. Ita docent hoc tempore omnes catholici Doctores, et censeo, rem esse fide certam. Et*

Sylvius Opusc. V. Lib. IV. q. 2. art. 8. Responsio fide certa est, R. Pontificis iudicium in rebus fidei determinandis esse infallibile, ita ut quando ex cathedra definit, nullo casu possit errare. Et Gregorius de Valentia Tom. III. Disp. 1. Haec veritas adeo continet summam, et caput totius Christianae religionis, ut nemo catholicus esse possit, qui illam non amplectitur. Petri vero de Marca testimonium supra recitavimus. Sed neque concedimus, omnes illos, qui obijciuntur, Theologos aut contra Pontificem ἀσφαλείαν sensitisse, aut eorum sententiam alicujus esse in hac causa ponderis, et auctoritatis. Nam Tostatus quidem, licet junior ira percitus, eo quod Eugenius IV. Theses ejus nonnullas notavit, quas Senis propugnaverat, in Pontificiam auctoritatem invecus sit, ubi tamen deferbuit aëstus, prudentiorque successit aetas, ab ea sententia discessit, ut constat ex iis, quae scribit in Math. Cap. XVI. q. 56. Cardinalis Cusanus, licet alia senserit ferventibus Basileensis Concilii studiis, tamen, pacatis contentionibus, maturius discussa, ad communem catholicorum sententiam rediit, ut patet ex ejus Epistola II. ad Bohemos de usu calicis. Aeneas Sylvium retractasse, quod scripserat, cuique notum est. Almainus in Gallia scripsit calentibus odiis Ludovici XII. in R. Pontificem Julium II. idque satis est ad ejus auctoritatem omnino emendandam. Adrianus VI. non rem ex professo tractavit, sed obiter paucis verbis asseruit, falli posse Pontificem; revocassetque sententiam, si paulo diuturnior ejus Pontificatus fuisset. Unus est Gerson, cujus pietati, et doctrinae nihil detractum volumus. Sed quid iste contra Ecclesiae Patres, et contra veterem totius Ecclesiae Gallicanae sententiam? Cum praesertim in turbulentissima illa Ecclesiae tempestate, contendentibus de Pontificatu tribus, qui universam Ecclesiam diro schismate dilaniabant, ac disciplinam gravissime pessumdebant, putaverit fortasse vir ille doctus, non aliud esse opportunius tantis calamitatibus remedium, quam de R. Pontificem auctoritate quaestiones serere. Reliqui vero auctores, quos innumeros adversarii dicunt, nihil aliud egerunt, nisi Gersonis propugnare sententiam.

Olyio.

*Objic. VIII.* Declaratio Cleri Gallicani haberi potest tamquam definitio Concilii totius Ecclesiae Gallicanae. At Concilii ejusmodi magna apud omnes esse debet auctoritas, non solum ex illa Christi Domini promissione *Matth. XVIII. 20. Ubi sunt duo, vel tres congregati in nomine meo, ibi sum in medio eorum;* verum etiam ex tot Episcoporum, qui convenerant, pietate, ac doctrina; cum praesertim adfuerit etiam, ac subscripserit Meldensis Episcopus Bossuetus, vir sine ulla dubitatione doctissimus. Ergo.

R. 1.<sup>o</sup> *Neg. maj.* Non enim Concilium, sed conventus quidam fuit illa Episcoporum, aliorumque a Clero missorum congregatio, non servato conciliorum more, ac rita, neque omnibus convocatis, qui suffragii jus habuissent; Parisiisq. habita occasione contentionis, ac dissidii inter Ludovicum XIV. et Innocentium XI. de jure, quod vocant *Regaliae*. Nec ipsi Episcopi, qui eo convenerunt, obtrudere conventum illum ausi sunt, ut Gallicanum Concilium. Imo *Declarationem* illam nequaquam ediderunt ut *decretum*, aut definitionem, sed ut opinionem; ideoque Bossuetus in *Dissertatione praevia §. VI.* objectionem eorum, qui Clerum Gallicanum accusaverant, quasi definitionem fidei edidisset, repellit ut falsam, recitatisque verbis Archiepiscopi Cameracensis, quae in Gestis ejus Conventus leguntur, ita concludit: *En perspicuis verbis Gallicani Patres testantur, non eo se animo fuisse, ut decretum de fide conderent, sed ut eam opinionem tanquam potiore, atque omnium optimam adoptarent. Opinionem sane.*

2.<sup>o</sup> Quamvis daremus, quod falsum est, quodque ne Galli quidem umquam Theologi asseruerunt, Conventum scilicet illum fuisse Concilium, non fuit certe Oecumenicum, sed *nationale*. Hujusmodi autem concilia errare posse nemo negaverit, qui norit Africanorum Conciliorum decreta sub *Cypriano* de baptismo haereticorum.

3.<sup>o</sup> Quamvis falso poveremus, conventum illum fuisse oecumenicum concilium; tamen non probatum a R. Pontifice nullius esset auctoritatis, ac roboris.

4.<sup>o</sup> Romani Pontifices non solum non probarunt *Declarationem* illam, sed expresse reprobarunt ac dam-



parunt, ut constat ex Constitutionibus *Alexandri VIII.* et *Pii VI.* Si ergo ipsa oecumenica Concilia a R. Pontifice improbata ab omnibus explosa sunt; quid de Conventu illo putandum est?

5.<sup>o</sup> Illi ipsi qui *Declarationem* in conventu illo informaverunt, sub *Innocentio XII.* datis ad eum litteris eam revocarunt. Quod enim ajunt nonnulli, non fuisse eam proprie retractationem, ipse *D. Racine* in *Historia Ecclesiastica*, quamvis Gallicanarum opinionum imo et Jansenianarum partium non modo acerrimus, verum etiam acerbissimus propugnator, irridet. Clariora enim sunt verba, quibus illi protestentur; *dolere se vehementer de eo, quod in conventu illo actum est; et velle haberi pro non decreto quidquid ibi circa Ecclesiasticam potestatem, et Pontificiam auctoritatem decretum censeri potuit*; quam ut in alienum sensum detorqueri possint.

6.<sup>o</sup> Denique Parisiensi conventui opponimus Concilia oecumenica, Patres, et Concilia ipsius Ecclesiae Gallicanae.

*Obje.* IX. Privilegium non errandi Ecclesiae datum est, quae ab Apostolo dicitur *columna*, et *firmamentum veritatis*: *Tim. III. 15.* Non ergo R. Pontifici: Ita Theologiae Lugdunensis Auctor arguit.

*¶ N. Dist. ant.* Datum est Ecclesiae, hoc est Ecclesiae Pastoribus; in bonum Ecclesiae, *conc.* Datum est *αὐτοῖς* ipsi Ecclesiae communitati, *neg.* Cum igitur oves a Pastoribus regi, pascique debeant, iis in Ecclesia datum est non errandi privilegium, quibus pascendi gregis, hoc est docendi auctoritas commissa est. Sed cum singuli errare possint, posuit Deus Pastorem supremum, cui gregis universi, ipsorumque adeo inferiorum pastorum curam mandavit; pro cuius fide, ne umquam illa deficeret, Christus oravit; qui si universam Ecclesiam, ipsosque inferiores pastores ex cathedra docens, errare posset, in detrimentum Ecclesiae redundaret error. Datum igitur supremo huic Pastori universam Ecclesiam docendi jus, ac non errandi privilegium, Ecclesiae ipsi datum est.

Cetera autem adversariorum argumenta leviora praetermittimus. Non enim omnia persequi operae pretium

tium duemus, cum hæc provincia jamdiu a viris doctissimis suscepta, ac præclare ornata sit, a quibus plura mutuari poterit, qui rem totam ad ultimos apices cognoscere non inutile existimaverit. Hæc tamen, quæ diximus, ad Exercitationem satis esse visa sunt

## APPENDIX AD LIB. II.

**Q**uoniam sæpe in Theologicis disputationibus Pontificum R. Conciliorum generalium, Patrum, aliorumque Scriptorum Ecclesiasticorum, et hæreticorum mentio occurrit; visum est mihi breviter hæc omnia ante oculos lectorum ponere; non ut ea tirones memoriae mandare cogantur, sed ut quo tempore Pontifices, et Patres floruerint, aut emergerint hæretici, quæ occasione Concilia generalia habita sint, facile inveniant. Controversias autem chronologicas inter eruditos agitas prætermisi, verisimiliora secutus.

### C A P. I.

#### *De Summis Pontificibus.*

##### Nomina Pontificum. Initium Pontificatus. Obitus.

Petrus Galilæus Romam venit, ibique Pontificatum init	Anno	Æ. V. 40	Obiit an. 65
Linus Etruscus Creatus	Anno	65	Obiit an. 76
Cletus Romanus Creatus	Anno	76	Obiit an. 89
Clemens I. Romanus	Cr. an.	89	Ob. an. 98
Anæletus Atheniensis	Cr. an.	98	Ob. an. 100
Evaristus Syrus	Cr. an.	100	Ob. an. 109
Alexander I. Romanus	Cr. an.	109	Ob. an. 117
Sixtus I. Romanus	Cr. an.	117	Ob. an. 127
Thelesphorus Thuriensis	Cr. an.	127	Ob. an. 130
Hyginus Atheniensis	Cr. an.	130	Ob. an. 142
Pius I. Aquilejensis	Cr. an.	142	Ob. an. 156
Anicetus Syrus	Cr. an.	156	Ob. an. 168
Soter Fundanus	Cr. an.	168	Ob. an. 177
Eleutherius Neapolitanus	Cr. an.	177	Ob. an. 192
Victor I. Afer	Cr. an.	192	Ob. an. 201
Zephyrinus Romanus	Cr. an.	201	Ob. an. 219
Callixtus I. Romanus	Cr. an.	219	Ob. an. 224
Urbanus I. Romanus	Cr. an.	224	Ob. an. 231

Pon-

Pontianus I. Romanus	Cr. an. 231	Ob. an. 235
Anterus Graecus	Cr. an. 235	Ob. an. 236
Fabianus Romanus	Cr. an. 236	Ob. an. 250
Cornelius Romanus	Cr. an. 250	Ob. an. 252
Sub hoc Pontifice primum Schisma factum est a Novatiano Antipapa, duravitque annis circiter sex.		
Lucius I. Romanus	Cr. an. 252	Ob. an. 253
Stephanus I. Romanus	Cr. an. 253	Ob. an. 257
Sixtus II. Atheniensis	Cr. an. 257	Ob. an. 258
Dionysius Graecus	Cr. an. 258	Ob. an. 271
Felix I. Romanus	Cr. an. 271	Ob. an. 276
Eutychianus Hetruscus	Cr. an. 276	Ob. an. 283
Cajus Dalmata	Cr. an. 283	Ob. an. 296
Marcellinus Romanus	Cr. an. 296	Ob. an. 304
Marcellus I. Romanus	Cr. an. 304	Ob. an. 309
Eusebius Graecus	Cr. an. 309	Ob. an. 311
Melchiades Afer	Cr. an. 311	Ob. an. 313
Sylvester I. Romanus	Cr. an. 314	Ob. an. 335
Marcus Romanus	Cr. an. 336	Ob. an. 336
Julius I. Romanus	Cr. an. 336	Ob. an. 352
Liberius Romanus	Cr. an. 352	Ob. an. 356
Felix II. Romanus vivente adhuc Liberio factus Pont. eo mortuo legitime electus est.	Cr. an. 356	Ob. an. 367
Damasus I. Hispanus	Cr. an. 367	Ob. an. 384
Ursicinus Romanus	Diaconus	Antipapa.
Siricius Romanus	Cr. an. 384	Ob. an. 398
Anastasius I. Romanus	Cr. an. 398	Ob. an. 402
Innocentius I. Albanus	Cr. an. 402	Ob. an. 417
Zosimus Graecus	Cr. an. 417	Ob. an. 418
Bonifacius I. Romanus	Cr. an. 418	Ob. an. 423
Caelestinus I. Comensis	Cr. an. 423	Ob. an. 432
Sixtus III. Romanus	Cr. an. 432	Ob. an. 440
Leo I. M. Thuscus	Cr. an. 440	Ob. an. 461
Hilarus Sardus	Cr. an. 461	Ob. an. 467
Simplicius Tiburtinus	Cr. an. 467	Ob. an. 483
Felix III. Romanus	Cr. an. 483	Ob. an. 492
Gelasius I. Africanus	Cr. an. 492	Ob. an. 496
Anastasius II. Romanus	Cr. an. 496	Ob. an. 498
Symmachus Sardus	Cr. an. 498	Ob. an. 514
Laurentius Romanus	Archid.	Antipapa.
Hormisdas Campanus	Cr. an. 514	Ob. an. 523
Joannes I. Thuscus	Cr. an. 523	Ob. an. 526

*De R. Pontificibus*

359

Felix IV. Beneventanus	Cr. an. 526	Ob. an. 530
Bonifacius II. Romanus	Cr. an. 530	Ob. an. 532
Dioscorus Antipapa.		
Joannes II. Romanus	Cr. an. 532	Ob. an. 535
Agapetus I. Romanus	Cr. an. 535	Ob. an. 538
Sylverius Campanus	Cr. an. 536	Ob. an. 540
Vigilius Romanus	Cr. an. 540	Ob. an. 555
Pelagius I. Romanus	Cr. an. 555	Ob. an. 560
Joannes III. Romanus	Cr. an. 560	Ob. an. 573
Benedictus I. Romanus	Cr. an. 574	Ob. an. 578
Pelagius II. Romanus	Cr. an. 578	Ob. an. 590
Gregorius M. Romanus	Cr. an. 590	Ob. an. 604
Sabinianus Thuscus	Cr. an. 604	Ob. an. 606
Bonifacius III. Romanus	Cr. an. 606	Ob. an. 607
Bonifacius IV. Romanus	Cr. an. 607	Ob. an. 615
Deusdedit Romanus	Cr. an. 615	Ob. an. 618
Bonifacius V. Neapolitanus	Cr. an. 618	Ob. an. 625
Honorius I. Campanus	Cr. an. 625	Ob. an. 638
Severinus Romanus	Cr. an. 639	Ob. an. 640
Joannes IV. Dalmata	Cr. an. 640	Ob. an. 642
Theodorus I. Jerosolimitan.	Cr. an. 642	Ob. an. 649
Martinus I. Thuscus	Cr. an. 649	Ob. an. 655
Eugenius I. Romanus	Cr. an. 655	Ob. an. 657
Vitalianus Campanus	Cr. an. 657	Ob. an. 672
Adcofatus Romanus	Cr. an. 672	Ob. an. 676
Donus I. Romanus	Cr. an. 676	Ob. an. 678
Agatho Siculus	Cr. an. 678	Ob. an. 682
Leo II. Siculus	Cr. an. 682	Ob. an. 683
Benedictus II. Romanus	Cr. an. 684	Ob. an. 685
Joannes V. Syrus	Cr. an. 686	Ob. an. 686
Conon Trax	Cr. an. 686	Ob. an. 687
Sergius I. Syrus	Cr. an. 687	Ob. an. 701
Joannes VI. Graecus	Cr. an. 701	Ob. an. 705
Joannes VII. Graecus	Cr. an. 705	Ob. an. 707
Sisinnius Syrus	Cr. an. 708	Ob. an. 708
Constantinus Syrus	Cr. an. 708	Ob. an. 715
Gregorius II. Romanus	Cr. an. 715	Ob. an. 731
Gregorius III. Syrus	Cr. an. 731	Ob. an. 741
Zacharias Graecus	Cr. an. 741	Ob. an. 752
Stephanus II. Romanus	Cr. an. 752	Ob. an. 757
Paulus I. Romanus	Cr. an. 757	Ob. an. 767
Constantions adhuc laicus Antipapa.		
Stephanus III. Romanus	Cr. an. 768	Ob. an. 772

Hadrianus I. Romanus	Cr. an. 772	Ob. an. 795
Leo III. Romanus	Cr. an. 795	Ob. an. 816
Stephanus IV. Romanus	Cr. an. 816	Ob. an. 817
Paschalis I. Romanus	Cr. an. 817	Ob. an. 824
Eugenius II. Romanus	Cr. an. 824	Ob. an. 827
Valentinus Romanus	Cr. an. 827	Ob. an. 827
Gregorius IV. Romanus	Cr. an. 827	Ob. an. 844
Sergius II. Romanus	Cr. an. 844	Ob. an. 847
Leo IV. Romanus	Cr. an. 847	Ob. an. 855
Benedictus III. Romanus	Cr. an. 855	Ob. an. 858
Anastasius Presbyter Antipapa.		
Nicolaus I. Romanus	Cr. an. 858	Ob. an. 867
Hadrianus II. Romanus	Cr. an. 867	Ob. an. 872
Joannes VIII. Romanus	Cr. an. 872	Ob. an. 882
Marinus I. Faliscus	Cr. an. 882	Ob. an. 884
Hadrianus III. Romanus	Cr. an. 884	Ob. an. 885
Stephanus V. Romanus	Cr. an. 885	Ob. an. 891
Formosus Portuensis	Cr. an. 891	Ob. an. 896
Sergius Rom. Diac. Card. Antipapa.		
Bonifacius VI. Thuscus	Cr. an. 896	Ob. an. 896
Stephanus VI. Romanus	Cr. an. 896	Ob. an. 897
Romanus Faliscus	Cr. an. 897	Ob. an. 898
Joannes IX. Tiburtinus	Cr. an. 898	Ob. an. 900
Benedictus IV. Romanus	Cr. an. 900	Ob. an. 903
Leo V. Ardeatinus	Cr. an. 903	Ob. an. 903
Christophorus Romanus	Cr. an. 903	Ob. an. 904
Sergius III. Romanus	Cr. an. 904	Ob. an. 911
Anastasius III. Romanus	Cr. an. 911	Ob. an. 913
Landus Sabinus	Cr. an. 913	Ob. an. 914
Joannes X. Romanus	Cr. an. 914	Ob. an. 928
Leo VI. Romanus	Cr. an. 928	Ob. an. 929
Stephanus VII. Romanus	Cr. an. 929	Ob. an. 931
Joannes XI. Romanus	Cr. an. 931	Ob. an. 936
Leo VII. Romanus	Cr. an. 936	Ob. an. 939
Stephanus VIII. Romanus	Cr. an. 939	Ob. an. 942
Marinus II. Romanus	Cr. an. 942	Ob. an. 946
Agapetus II. Romanus	Cr. an. 946	Ob. an. 957
Joannes XII. Romanus	Cr. an. 957	Ob. an. 964
Leo VIII. Rom. Diac. Antipapa.		
Benedictus V. Romanus	Cr. an. 964	Ob. an. 965
Joannes XIII. Romanus	Cr. an. 965	Ob. an. 972
Be.		

*De R. Pontificibus*

361

Benedictus VI. Romanus	Cr. an. 972	Ob. an. 974
Bonifacius VII. Rom. Diac.	Antipapa.	
Donus II. Romanus	Cr. an. 974	Ob. an. 975
Benedictus VII. Romanus	Cr. an. 975	Ob. an. 984
Joannes XIV. Papiensis	Cr. an. 984	Ob. an. 985
Joannes XV. Romanus	Cr. an. 985	Ob. an. 996
Joannes XVI. Episc.	Placen. Antipapa.	
Gregorius V. Saxo	Cr. an. 996	Ob. an. 999
Sylvester H. Aquitanus	Cr. an. 999	Ob. an. 1003
Joannes XVII. Romanus	Cr. an. 1003	Ob. an. 1003
Joannes XVIII. Romanus	Cr. an. 1003	Ob. an. 1009
Serpius IV. Romanus	Cr. an. 1009	Ob. an. 1009
Benedictus VIII. Romanus	Cr. an. 1009	Ob. an. 1024
Gregorius VI. Presbyter	Antipapa.	
Joannes XIX. Romanus	Cr. an. 1024	Ob. an. 1033
Benedictus XI. Romanus	Cr. an. 1033	Ob. an. 1044
Silvester II. antea	Joannes, Antipapa.	
Joannes Antipapa.		
Clemens II. Saxo	Cr. an. 1046	Ob. an. 1047
Damasus II. Bavarus	Cr. an. 1047	Ob. an. 1048
Leo XI. Tullensis	Cr. an. 1048	Ob. an. 1054
Victor II. Germanus	Cr. an. 1054	Ob. an. 1057
Stephanus IX. Lotharingus	Cr. an. 1057	Ob. an. 1058
Benedictus X.	Antipapa.	
Nicolaus II. Allobrox	Cr. an. 1059	Ob. an. 1061
Alexander II. Mediolanen.	Cr. an. 1061	Ob. an. 1073
Honorius II. Episc.	Parmae Antipapa.	
Gregorius VII. Thuscus	Cr. an. 1073	Ob. an. 1085
Clemens III. Archiep.	Ravennae Antipapa.	
Victor III. Beneventan.	Cr. an. 1086	Ob. an. 1087
Urbanus II. Gallus	Cr. an. 1087	Ob. an. 1099
Paschalis II. Thuscus	Cr. an. 1099	Ob. an. 1118
Sylvester III. antea	Theodoricus, Antipapa.	
Gelasius II. Neapolitan.	Cr. an. 1118	Ob. an. 1119
Gregorius VIII. antea	Mauritius, Antipapa.	
Callixtus II. Burgundus	Cr. an. 1119	Ob. an. 1124
Honorius II. Bononiensis	Cr. an. 1124	Ob. an. 1130
Innocentius II. Romanus	Cr. an. 1130	Ob. an. 1143
Anacletus III. antea	Petrus Leo, Antipapa.	
Victor II. antea	Gregorius, Antipapa.	
Caelestinus II. Thuscus	Cr. an. 1143	Ob. an. 1144

Lu-

Lucius II. Bononiensis	Cr. an. 1144	Ob. an. 1145
Eugenius III. Thuscus	Cr. an. 1145	Ob. an. 1153
Anastasius IV. Romanus	Cr. an. 1153	Ob. an. 1154
Hadrianus IV. Anglus	Cr. an. 1154	Ob. an. 1159
Alexander III. Thuscus	Cr. an. 1159	Ob. an. 1181
Victor IV. antea Octavianus Romanus, Antipapa.		
Paschalis III. antea Guido de Crema, Antipapa		
Calixtus III. antea Joannes ex Hungaria, Antipapa.		
Lucius III. Lucensis	Cr. an. 1181	Ob. an. 1185
Urbanus III. Mediolanen.	Cr. an. 1185	Ob. an. 1187
Gregorius VIII. Benevent.	Cr. an. 1187	Ob. an. 1187
Clemens III. Romanus	Cr. an. 1188	Ob. an. 1191
Caelestinus III. Romanus	Cr. an. 1191	Ob. an. 1198
Innoc. III. Anagninus	Cr. an. 1199	Ob. an. 1216
Honorius III. Romanus	Cr. an. 1216	Ob. an. 1227
Gregorius IX. Anagninus	Cr. an. 1227	Ob. an. 1241
Caelestinus IV. Mediolanen.	Cr. an. 1241	Ob. an. 1241
Innocentius IV. Genuensis	Cr. an. 1241	Ob. an. 1254
Alexander IV. Anagninus	Cr. an. 1254	Ob. an. 1261
Urbanus IV. Gallus	Cr. an. 1261	Ob. an. 1264
Clemens IV. Gallus	Cr. an. 1265	Ob. an. 1268
Gregorius X. Placentinus	Cr. an. 1271	Ob. an. 1276
Innocentius V. Burgundus	Cr. an. 1276	Ob. an. 1276
Hadrianus V. Gennensis	Cr. an. 1276	Ob. an. 1276
Joannes XXI. Lusitanus	Cr. an. 1276	Ob. an. 1277
Nicolaus III. Romanus	Cr. an. 1277	Ob. an. 1281
Martinus IV. Gallus	Cr. an. 1281	Ob. an. 1285
Honorius IV. Romanus	Cr. an. 1285	Ob. an. 1287
Nicolaus IV. Asculanus	Cr. an. 1287	Ob. an. 1292
Caelestinus V. Neapolitanus; Eserninus, dictus		
Petrus de Morone	Cr. an. 1294	abdicaavit an. 1294
Bonifacius VIII. Anagninus	Cr. an. 1294	Ob. an. 1303
Benedictus XI. ex Tarvisio	Cr. an. 1303	Ob. an. 1304
Clemens V. Gallus	Cr. an. 1305	Ob. an. 1314
Joannes XXII. Gallus	Cr. an. 1316	Ob. an. 1334
Nicolaus V. antea Petrus de Corbaria, Antipapa.		
Benedictus XII. Gallus	Cr. an. 1334	Ob. an. 1342
Clemens VI. Gallus	Cr. an. 1342	Ob. an. 1352
Innocentius VI. Gallus	Cr. an. 1352	Ob. an. 1362
Urbanus V. Gallus	Cr. an. 1362	Ob. an. 1369
Gregorius XI. Gallus	Cr. an. 1370	Ob. an. 1378

*De R. Pontificibus*

363

Urbanus VI. Neapolitan.	Cr. an. 1378	Ob. an. 1389
Clemens VII. Robertus Gebennensis, Antipapa.		
Petrus de Luna Antipapa.		
Bonifacius IX. Neapolitan.	Cr. an. 1389	Ob. an. 1403
Innocentius VII. Sulmonen.	Cr. an. 1404	Ob. an. 1406
Gregorius XII. Venetus	Cr. an. 1406	abdic. an. 1409
Alexander V. Bononien.	Cr. an. 1409	Ob. an. 1410
Joannes XXIII. Neapolitan.	Cr. au. 1410	Ob. an. 1415
Martinus V. Romanus	Cr. an. 1417	Ob. an. 1431
Eugenius IV. Venetus	Cr. an. 1431	Ob. an. 1447
Felix V. antea Armeadeus, Sabaudiae Dux, Antipapa.		
Nicolaus V. Sarzanensis	Cr. an. 1447	Ob. an. 1455
Callixtus III. Hispanus	Cr. an. 1455	Ob. an. 1458
Pius II. Senensis	Cr. an. 1458	Ob. an. 1464
Paulus II. Venetus	Cr. an. 1464	Ob. an. 1471
Sixtus IV. Savonensis	Cr. an. 1471	Ob. an. 1484
Innocentius VIII. Genuen.	Cr. an. 1484	Ob. an. 1502
Alexander VI. Hispanus	Cr. an. 1492	Ob. an. 1503
Pius III. Senensis	Cr. an. 1503	Ob. an. 1503
Julius II. Savonensis	Cr. au. 1503	Ob. an. 1513
Leo X. Florentinus	Cr. an. 1513	Ob. an. 1521
Hadrianus VI. e Belgio	Cr. an. 1522	Ob. an. 1523
Clemens VII. Florentinus	Cr. an. 1523	Ob. an. 1534
Paulus III. Romanus	Cr. an. 1534	Ob. an. 1549
Julius III. Aretinus	Cr. an. 1550	Ob. an. 1555
Marcellus II. Italus	Cr. an. 1555	Ob. an. 1555
Paulus IV. Neapolitanus	Cr. an. 1555	Ob. an. 1559
Pius IV. Mediolanensis	Cr. an. 1559	Ob. an. 1565
Pius V. Alexandrinus	Cr. an. 1566	Ob. an. 1572
Gregorius XIII. Bononien.	Cr. an. 1572	Ob. an. 1585
Sixtus V. Montaltus Picenus	Cr. an. 1585	Ob. an. 1590
Urbanus VII. Romanus	Cr. au. 1590	Ob. an. 1590
Gregorius XIV. Mediolanen.	Cr. an. 1590	Ob. an. 1591
Innocentius IX. Bononien.	Cr. an. 1591	Ob. an. 1591
Clemens VIII. Florentiu.	Cr. an. 1592	Ob. an. 1605
Leo XI. Florentin.	Cr. an. 1605	Ob. an. 1605
Paulus V. Romanus	Cr. an. 1605	Ob. an. 1621
Gregorius XV. Bononien.	Cr. au. 1621	Ob. an. 1623
Urbanus VIII. Florentin.	Cr. an. 1623	Ob. an. 1644
Innocentius X. Romanus	Cr. an. 1644	Ob. an. 1655
Alexander VII. Senensis	Cr. an. 1655	Ob. an. 1667
Cle-		



Clemens IX. Thuscus	Cr. an. 1667 Ob. an. 1669
Clemens X. Romanus	Cr. an. 1669 Ob. an. 1676
Innocentius XI. Comensis	Cr. an. 1676 Ob. an. 1689
Alexander VIII. Venetus	Cr. an. 1689 Ob. an. 1691
Innocentius XII. Neapolitan.	Cr. an. 1691 Ob. an. 1700
Clemens XI. Urbinas	Cr. an. 1700 Ob. an. 1721
Innocentius XIII. Romanus	Cr. an. 1721 Ob. an. 1724
Benedictus XIII. Romanus	Cr. an. 1724 Ob. an. 1730
Clemens XII. Florentin.	Cr. an. 1730 Ob. an. 1740
Benedictus XIV. Bononien.	Cr. an. 1740 Ob. an. 1758
Clemens XIII. Venetus	Cr. an. 1758 Ob. an. 1769
Clemens XIV. Riminensis	Cr. an. 1769 Ob. an. 1774
Pius VI. Caesenas	Cr. an. 1775 Ob. an. 1799
Pius VII. Caesenas	Cr. an. 1800 Ecclesiam ho- die feliciter regit.

## C A P. II.

## De Conciliis Oecumenicis.

## §. I.

## Concilium Nicaenum I., et Sardicense.

Post Concilium Apostolorum Hierosolymis habitum ad finiendam controversiam de Mosaicorum rituum abrogatione, quae universam Ecclesiam turbarat, primum generale Concilium celebratum est Nicacae in Bythinia anno CCCXXV. Convocatum est a Constantino M. non sine consensu R. Pontificis, quod et in aliis septem prioribus Conciliis oecumenicis factum esse, merito existimamus. Praefuerunt Concilio Osius Episcopus Cordubensis, Vitus, et Vincentius Presbyteri, nomine Sylvestri S. Pontificis. Convenerunt Episcopi trecenti octodecim, ut testatur communis omnium veterum consensus, ex qua patet, mendosum esse locum Eusebii Lib. III. De vita Constant. ubi Episcopos numerat ducentos quinquaginta. Ipse Constantinus Concilio interfuit, sed infra Episcopos, et quidem ipsis rogantibus, sedit. In eo 1.<sup>o</sup> damnata est Arianæ haeresis, quae jam multos in  
Egyp-

*Aegypto*, atque *Asia* in eccrat, ipseque *Arius* Presbyter *Alexandrinus*, qui Verbi divinitatem negabat; eamque ob causam inserta symbolo est vox *ὁμ-ούριος*, consubstantialis, cui *Arius* subscribere noluit, ut testatur *Athanasius*, qui rem melius nosse potuit, quam *Hieronymus*, qui in *Dial. cont. Lucifer.* ait, ipsum *Arium* formulæ Nicaenæ subscripsisse. 2.º Dammati *Quartodecimani*, qui Pascha cum Judæis ipsa die decimaquarta lunæ celebrandum docebant, sancitumque, ut semper Dominica sequenti, ut hodie fit in Ecclesia, celebraretur; et ita demum sopita controversia, quæ inter occidentalem, et plures orientales Ecclesias fere ab ipso Ecclesiæ initio duraverat. 3.º Ad extinguendum schisma Meletianum, conflatum scilicet a *Meletio* Lycopolis Episcopo, qui variis criminibus Episcopatu motus; adhuc pergebat ordinationes, et alia Episcopalia celebrare officia, statutum est, ut *Meletius* ipse solum retineret Episcopi nomen; ordinati vero ab eo Clerici Alexandrino Episcopo subessent. 4.º Canones editi sunt viginti, ad disciplinam pertinentes; alii enim, qui circumferuntur Nicaeni canones, apocryphi sunt.

Absolute Nicaeno Concilio, Arianæ Episcopi, qui metu exilii subscripscrant Nicaenæ fidei, nullum non moverunt lapidem, ut eam abolerent, et *Athanasium* strenuum ejus vindicem perderent, pluribus coactis synodis, variisque, ac novis fidei formulis concinnatis, freti maxime patrocinio *Constantii*, et *Valentis* Imperatorum. Celebriores eorum Synodi fuerunt *Tyria*, *Antiochena*, *Ariminensis*, *Seleuciensis*, *Syrmienensis*. Sed tandem sub *Theodosio* M. fractis Arianorum viribus, pax Ecclesiæ restituta est.

Concilium Sardicense anno CCCXLVII. habitum est sub *Constantio*, et *Constante* Imp. presidente eodem *Orio* Cordubensi; et duobus presbyteris legatis S. Pontificis. In eo concilio Nicaena fides confirmata est. Fuisse autem Oecumenicum Concilium, *Natalis* *Alexander* ostendit adversus *Petrum de Marca*; sed quia habitum est a veteribus, tamquam Nicaeni Concilii appendix, ejusque Canones sæpe sub nomine Concilii Nicaeni laudantur a veteribus, non numeratur

ut alterum concilium generale post Nicaenum. De eo vide eundem Nat. Alexandrum *Dissert. XXVII. in Hist. Eccl. Saec. IV.*

## §. II.

### *Concilium Constantinopolitanum I.*

II. Concilium Constantinopolitanum I. indictum est a *Theodosio M.* habitumque anno CCCLXXXI. Praefuit huic Concilio primum *Meletius* Episcopus Autiochenus; deinde, eo mortuo, *Gregorius Nazianzenus*, qui in eodem Concilio electus est Episcopus Constantinopolitanus, depulso ejus sedis invasore *Naxinio Cynico*. Cumque ortis dissensionibus, ipse *Gregorius* Episcopatu Constantinopolitano, studio pacis, se abdicasset; praefuit *Timotheus Alexandrinus*, donec electus *Nectarius* Episcopus Constantinopolitanus usque ad finem Concilio praefuit. Adfuerunt Episcopi centum quinquaginta. Et quamvis ipsi Concilium generale non constituerent, absentibus omnibus Episcopis Occidentis, tamen cum *Damasus* Papa, una cum concilio occidentalium, Constantinopolitani decreta probasset, evasit hoc Concilium oecumenicum. In eo 1.<sup>o</sup> confirmata est Nicaena fides, damnati Arianus, Sabellianus, Photiniani, Apollinaristae: 2.<sup>o</sup> damnatus *Macedonius*, Episcopus Constantinopolitanus, qui Spiritus S. divinitatem negabat, insertaque symbolo verba illa, quae ad ejusdem Spiritus S. divinitatem spectant; 3.<sup>o</sup> Editi canones septem circa disciplinam, quamquam in collectione *Dionysi Exigui* quatuor tantum sint.

## §. III.

### *Concilium Ephesinum.*

III. Ephesinum indictum est a *Teodosio* Juniore, habitumque anno CCCCXXXI. praesidente primum *Cyrillo Alexandrino*, deinde legatis S. Pontificis. Convenerunt Episcopi plusquam ducenti. Damnatus est in eo Concilio *Nestorius* Constantinopolitanus Episcopus.

scopus docens, in Christo duas esse personas divi-  
nam, et humanam, ideoque B. Virginem non esse  
dicendam *θεοτοκον*, *Deiparam*. Etiam Pelagiani, qui  
ab Italia pulsi, ad *Nestorium* confugerant, damnati  
sunt. *Joannes Antiochenus*, *Nestorio* favens, quem ab  
haeresi putabat immunem, tardius Ephesum adve-  
nicus, et indigne ferens *Nestorii* damnationem, cum  
Episcopis suis conciliabulum habuit: *Cyrrillum*, alios-  
que Episcopos damnavit. Tandem, dissoluto Conci-  
lio, pax inter eos inita est.

## §. IV.

*Concilium Chalcedonense.*

IV. Chalcedonense indictum est a *Marciano*, et ce-  
lebratum anno CCCCLI. praesidentibus S. Pontificis  
*Leonis M.* legatis. Adfuerunt Episcopi sexcenti trigin-  
ta sex. 1.<sup>o</sup> Damnatus *Eutyches* docens, unam esse  
Christi naturam, ejusque fautor *Dioscorus Alexandri-  
nus*, qui in Ephesino Concilio, quod vulgo *latroci-  
nium Ephesinum* dicitur, *Eutychen* absolverat, *Flavia-  
num* Constantinopolitanum Episcopum damnaverat,  
omniaque vi, et armis perturbaverat. 2.<sup>o</sup> Editi cano-  
nes viginti octo, inter quos ille celeberrimus, qui  
Constantinopolitanum Episcopum ad Patriarchalem di-  
gnitatem, et auctoritatem extollebat contra canones  
Nicaenos; ideoque diu a Romanis Pontificibus impro-  
batus, deinde, studio pacis, tacito consensu recep-  
tus, tandem in Concilio Lateranensi IV. sub *Inno-  
centio III.* confirmatus est.

## §. V.

*Concilium Constantinopolitanum II.*

V. Constantinopolitanum II. indictum est a *Justi-  
niano*, et celebratum anno DXLIX. Convenerunt E-  
piscopi centum sexaginta circiter. In eo primum qua-  
tuor priora Concilia oecumenica confirmata sunt.  
Deinde damnatus est, quamquam mortuus, *Theodorus*  
*Mop-*

*Mopsuestenus*, ejusque opera; damnata quoque scripta *Theodoretii Cyrensis* contra *S. Cyrillum*, et Epistola *Ibae Edesseni* ad *Marim Persam*, quae scripta *Nestorio* favere videbantur. Sed quia *Theodoretus*, et *Ibas* a Concilio Chalcedonensi judicati fuerant catholici, dicentes anathema *Nestorio*, ejusque haeresi; ideo non ipsi, sed ipsorum scripta contra *Cyrillum* damnata sunt. Haec sunt tria Capitula, de quibus magna animi contentione certatum est etiam post Concilium Constantinop. II. sed quia illud a *Vigilio* primum Pontifice, deinde ab Ecclesia universa paulatim receptum est, evasit Occumenicum.

## §. VI.

*Constantinopolitanum III.*

VI. Constantinopolitanum III. indictum a *Constantino Pogonato*, celebratumque est anno DCLXXX. Adfuerunt Episcopi circiter ducenti, praesidentibus legatis *S. Pontificis*. Damnata haeresis *Monothelitarum* negantium duas in *Christo* voluntates, et operationes, divinam, et humanam. Quoniam autem quintum, et sextum generale Concilium non ediderant canones ad disciplinam pertinentes, habita est in *Trullo*, seu amplo cubiculo Palatii Imperialis Synodus *Trullana*, seu *Quinisexta*, quasi ad supplendum quintum, et sextum Concilium. Eam tamen Synodum, in qua jam superbiae Graecorum igniculi erumpebant, Romana Ecclesia non recepit.

## §. VII.

*Nicaenum II.*

VII. Nicaenum II. convocatum a *Constantino*, et *Irene* ejus matre; habitumque est anno DCCLXXXVII. contra *Iconomachos*, sive *Iconoclastas*, qui sacras imagines confringebant, asserentes, earum venerationem ad idololatriam pertinere. Adfuerunt Episcopi trecenti quinquaginta. Damnata igitur ea haeresis est; cul-

cultus imaginum restitutus, improbat, si qui irrepserant, ea in re abusus.

### §. VIII.

#### Constantinopolitanum IV.

VIII. Constantinopolitanum IV. indictum est ab Imperatore *Basilio*, habitumque anno DCCCLXIX. Convenērunt Episcopi centum, et unus, praeter patriarchas; praesidentibus etiam S. Pontificis legatis. Dam-natus, atque in ordinem redactus *Photius*, qui Patriarchalem Constantinopolis sedem invaserat, et expulso legitimo Episcopo *S. Ignatio*, qui in hoc Concilio restitutus est. Sed cum *Photius* deinde iterum eam sedem occupasset, *Ignatio* depulso, semina schismatis inter Graecam, et Latinam Ecclesiam jecit; quod Schisma saeculo XI. agente *Michaelae Caerulario* Constantinopolitano Episcopo, confirmatum est, adjuncta haeresi de processione Spiritus S. ex solo Patre. Hinc sequentia Oecumenica Concilia sine Graecis Schismaticis in Occidente celebrata sunt.

### §. IX.

#### Lateranense I.

IX. Lateranense I. celebratum est Romae a *Callixto II.* in Lateranensi Basilica anno MCXXIII. ad finiendam controversiam, quae tot annos totam turba-verat Europam, de Investituris, sive electionibus Episcoporum et Abatum, quas Imperatores, alique principes per traditionem annuli, et baculi celebrabant. Statutum itaque est, ut libera deinceps Clericis, et Monachis esset electio Episcoporum, et Abatum. Electi tamen *Regalia*, quae, a Principibus donata, possidebat Ecclesia, ab ipsis Principibus non per baculi et annuli traditionem, sed per Sceptri contactum acciperent. His conditionibus inter Imperatorem, et Pontificem, redintegrata pax est. Editi etiam in eo Concilio Canones duo, et viginti.

## §. X.

*Lateranense II.*

X. Lateranense II. ab *Innocentio II.* celebratum est anno MCXXXIX. convenientibus Episcopis, Abatibus, aliisque patribus circiter mille. Rescissa sunt acta *Petri Leonis* Antipapae. Dammati haeretici *Petrus de Bruis*, et *Arnaldus Brixiensis*. Conditi canones circa disciplinam triginta.

## §. XI.

*Lateranense III.*

XI. Lateranense III. ab *Alexandro III.* habitum est anno MCLXXIX. Adfuerunt Episcopi trecenti, inter quos aliqui etiam orientales. Dammati in eo Concilio *Albigenses*, et *Paldenses*. Occasione autem Shismatis *Octaviani* Antipapae sancitum, ut nemo censeretur electus Pontifex, nisi a duabus tertiis Cardinalium partibus eligeretur. Conditi Canones ad disciplinam spectantes vigintiseptem.

## §. XII.

*Lateranense IV.*

XII. Lateranense IV. sub *Innocentio III.* celebratura est anno MCCXV. convenientibus Episcopis quadringentis duodecim, Abatibus vero, aliisque patribus plusquam octingentis. Dammati iterum *Albigenses*, nec non haeresis *Almarici* docentis, unumquemque debere fide divina credere, se esse membrum *Christi*: et Liber Abatis *Joachimi* contra *Petrum Lombardum*. Decreta etiam est expeditio ad Terram Sanctam, sive Palaestinam e Saracenorum potestate liberandam. Condita est fidei expositio, et Canones circa disciplinam sexaginta novem.

## §. XIII.

## §. XIII.

*Lugdunense I.*

XIII. Lugdunense I. ab *Innocentio IV.* habitum est in Gallia anno MCCXLV. convenientibus Episcopis centum triginta, Abatibus, aliisque Praelatis, contra *Fridericum II.* Imperatorem. Decretum quidem contra illum editum est ab ipso *Innocentio IV.* *Sacro praesente Concilio*, reliqua vero *Sacro approbante Concilio*. Decreta iterum expeditio Terrae Sanctae, aliaeque circa disciplinam statuta sunt.

## §. XIV.

*Lugdunense II.*

XIV. Lugdunense II. a *Gregorio X.* celebratum est anno MCCLXXIV. convenientibus Episcopis quingentis, Abatibus, aliisque Praelatis circiter mille. Graeci, ejurato Schismate, cum Latinis iniere pacem, decantato sollemniter symbolo cum adjecta particula *Filioque*; quam tamen pacem non diu servarunt. Decretum subsidium pro expeditione Ierosolymitana. Canones circa disciplinam triginta et unus a *Gregorio ipso* promulgati sunt.

## §. XV.

*Viennense.*

XV. Viennense a *Clemente V.* habitum est anno MCCCXI. Viennae Allobrogum. Adfuerunt Episcopi circiter trecenti, Abates, aliique Praelati. Extinctus ordo *Templariorum*. Damnati *Beguardi*, et *Beguinae*, qui falsam quandam Christianae vitae perfectionem commenti, varias docuere haereses, quibus postetiorum saeculorum *Quietistis* praeluserunt; nec non errore *Petri Joannis*, *Fraticellorum*, *Dulcinistarum*, de quibus vide quae infra dicentur. Actum etiam de



subsidio Terrae Sanctae, ac de gravissimo inter Bonifacium VIII. Clementis praecessorem, et Philippum Pulchrum Galliarum regem dissidio, Canones circa disciplinam condidit, ac promulgavit ipse Clemens V.

### §. XVI.

#### Constantiense.

XVI. Constantiense convocatum est a Joanne XXIII, anno MCCCCXIV. duravitque annis quatuor. In eo Concilio abolitum est Schisma, quod Ecclesiam Occidentis tot annis diviserat, ac perturbaverat, electis primo duobus, deinde tribus summis Pontificibus. Duo exauctorati sunt Joannes XXIII. et Benedictus XIII. tertius vero Gregorius XII. sponte Pontificatu se abdicavit. Electus deinde Otho Columna, qui Martinus V. appellatus est. In eodem concilio damnati sunt Johannes Wiclefus, Johannes Hus, et Hieronymus Pragensis. Sancitum, ut Eucharistia deinceps a laicis sub unica tantum specie sumeretur. Actum de Ecclesiae reformatione, sed ea res dilata est.

### §. XVII.

#### Basileense.

XVII. Basileense a Martino V. primum Papiae indictum, tum Senis haberi coeptum, demum Basileam translatum est anno MCCCCXXI. Aduerunt Episcopi circiter trecenti. Actum est de Ecclesiae reformatione. Sed hoc concilium, initio Oecumenicum, in exitu Schismaticum evasit, cum Eugenius. IV. Martini successor, concilium indixit primo Ferrariae, deinde Florentiae ad reducendos in Ecclesiae sinum Graecos. Episcopi enim nonnulli Basileae manserunt, ibique ipsum Eugenium damnare, atque exauctorare tentarunt, creato Felice V. Antipapa.

## §. XVIII.

*Florentinum.*

XVIII. Florentinum ab *Eugenio IV.* habitum est anno MCCCXXXVIII. primum Ferrariae, ubi sexdecim habitae sunt sessiones, deinde, peste ibi grassante, Florentiam translatum, ibique novem reliquae sessiones celebratae sunt. Concilio adfuit ipse *Johannes Palaeologus* Graecorum Imperator, *Josephus* Patriarcha Constantinopolitanus, ceterique Graeci Episcopi. Reintegrata inter Graecos, et Latinos concordia, et unio, sopitis controversiis de processione Spiritus Sancti a Patre et Filio, de adjectione particulae *Filioque* facta Symbolo, de consecratione Eucharistiae in azymo, et fermentato, de purgatorio, de beatitudine animarum sanctarum ante resurrectionem, de primatu summi Pontificis. Ceterum profitentibus Graecis, procedere Spiritum S. ex Patre, et Filio recteque additam a Latinis symbolo particulam *Filioque*, concessum est, ut symbolum ipsum sine ea additione in Ecclesia Graeca recitare pergerent, cum ea res ad disciplinam pertineret, ut ex Actis Concilii Florentini advertit *Benedictus XIV. Constit. XLVII. Tom. IV. Bullar.* quae incipit *Allatae sunt* §. 30. Unus *Marcus* Episcopus Ephesinus subscribere detrectans, in Patriam reversus, multos Graecorum a pace abalienavit, et in schismate confirmavit.

## §. XIX.

*Tridentinum.*

XIX. Tridentinum a *Paulo III.* convocatum, anno MDXLV: inchoatum est tum ad definiendas fidei controversias a Lutheranis, et Calvinistis excitatas, tum ad Ecclesiae reformationem. Deinde intermissum, a *Julio III.* restitutum; mox denuo intermissum, a *Pio IV.* revocatum, absolutum est anno MDLXIII. Quamvis autem hoc Concilium propter nonnulla di-

sci-

## Saeculo I.

1.<sup>o</sup> *Simon Magus*, haereticorum omnium antesignanus, Persarum philosophia imbutus, qui duo rerum principia statuebant, et magiae artibus, dolisque instructus; postquam a *Petro* repulsus est, cui pecuniam obtulerat ad spiritualem potestatem comparandam, ex quo crimen hoc *simonia* dicitur; docuit 1.<sup>o</sup> mundum corporeum a malo principio conditum, et ab eodem latam esse Mosaicam legem. 2.<sup>o</sup> Unam esse Dei summi, ac boni personam, quae ob varia opera nunc Pater, nunc Filius, nunc Spiritus Sanctus dicitur. 3.<sup>o</sup> Legem Mosaicam, utpote a malo Deo latam, spernendam, ac violandam esse. 4.<sup>o</sup> Ut homines ab ea redimeret, Deum bonum apparuisse non vero corpore indutum, quod a malo principio est, sed falsa corporis imagine. 5.<sup>o</sup> Postquam homines praestigiis decepit, ut crederent, ipsum Simonem esse plusquam hominem, docuit, se esse summum Deum, qui Judaeis apparuerat ut Filius, Samaritanis ut Pater, Gentibus ut Spiritus Sanctus. 6.<sup>o</sup> Negabat corporum resurrectionem. 7.<sup>o</sup> Spirituales quasdam substantias a summo Deo emanasse, inter quas Verbum quinto loco ponebat. 8.<sup>o</sup> Promiscuam docebat libidinem, et mysteria quaedam spurcitiae plena, aliaque turpissima. 9.<sup>o</sup> Illud erat ipsi cum ceteris ejusdem farinae haereticis commune dogma, omnia licere, etiam idolis immolare, ad vitandam mortem, ac martyrium.

2.<sup>o</sup> In eodem luto haeserunt *Menander*, *Saturninus*, a nonnullis dictus *Saturnilus*, et *Basilides*, Simonis discipuli; licet paucis immutatis, et Latbaris quibusdam nominibus inventis, novae potius haeresis auctores, quam alienae sectatores videri voluerint.

3.<sup>o</sup> *Cerinthus Judaeus* docuit, 1.<sup>o</sup> legem Moysis necessariam esse ad salutem; 2.<sup>o</sup> Christum purum hominem, ex Josepho, et Maria genitum, necdum resurrexisse, sed resurrecturum in fine mundi, tuncque mille annorum regnum in epulis, carnalibusque voluptatibus transigendum.

4.<sup>o</sup> He-

nis contra gentiles primum defensore, deinde haereticis auctore, docebant, illicitum esse matrimonium; abstinendum a vino, etiam in Eucharistiae celebratione; Adamum esse damnatum. Inde exorti *Severiani* a *Severo* Tatiani discipulo.

4.<sup>o</sup> *Cerdon* e Syria Romam profectus, sedente Hygino Pontifice, duorum principiorum systema ab aliis haereticis primo saeculo informatum, in Italiam invexit.

5.<sup>o</sup> *Marcion* *Cerdonis* discipulus, dogma de duobus rerum principiis latius disseminavit. Legem, Prophetas, ipsumque praeceptum, quo Deus Adam vetuit comedere de pomo in Paradiso, a malo principio esse docuit: Christum assumsisse non corpus, sed falsam corporis imaginem; damnandas esse nuptias. Eandem haeresim, paucis immutatis, secutus est *Ampelles*.

6.<sup>o</sup> *Montanus* jactavit, se esse Spiritum Sanctum, vel eo afflatum, suasque sectatrices *Priscillam*, et *Maximillam*, quas nonnulli meretrices vocant, eodem Spiritu motas, prophetare. Docuit autem, secundas nuptias a fornicatione non differre; non licere fugam in persecutione, nec Ecclesiam habere potestatem graviora scelera dimittendi. Ejus discipuli passim a veteribus *Cataphryges* appellantur, eo quod in Phrygia praesertim, unde *Montanus* ortus est, eorum secta invaluerat.

7.<sup>o</sup> Emerserunt etiam hoc saeculo *Theodotus Trapezita*, qui docuit, Melchisedec fuisse virtutem quandam Christo majorem, *Theodotus Coriarius*, et *Artemon*, qui Christum purum hominem cum aliis haereticis affirmarunt; et *Hermogenes*, qui materiam esse voluit non creatam, sed Deo coaeternam.

### Saeculo III.

1.<sup>o</sup> *Praxeas* Phrygius Trinitatem personarum in divinis negavit, unamque personam Patris agnovit. Eum secuti *Beryllus Bostrensis*, *Noetus Ephesinus*, *Sabellius Ptolemaidensis*, et *Paulus Samosatensis*. Hi omnes in duas classes divisi sunt. Alii enim docebant,  
Chri-

*Christum* purum fuisse hominem, singulari Dei virtute praeditum; alii vero docuerunt, unicam illam personam, quam in Deo agnoscebant, fuisse incarnatam; eamque esse Christum Dominum, unde dicti sunt Patripassiani.

2.<sup>o</sup> Omnibus pestilentior fuit Manes, sive Sapiens, Persa, dictus a Graecis *Manichaeus* (quasi ore suo manna fundens, eo quod Graeca lingua *Manes* furiosum sonat) qui *Simonis*, *Cerdonis*, *Marcionis*, aliorumque dogma de duobus rerum principiis subtilius instruxit, ac latius propagavit. Inde paucis immutatis orti sunt *Hieracitae*.

3.<sup>o</sup> *Novatiani* a *Novato* Carthaginiensi, et *Novatiano* Romano, quos non recte veteres nonnulli confundunt, conflato adversus Cornelium R. Pont. schismate, docuerunt, non esse Ecclesiae a Christo datam remittendi peccata potestatem, quod postea emollientes, ad graviora scelera coarctarunt. Item Sacramentum Confirmationis, quod Novatianus in lecto baptizatus non susceperat, negligebant. Contra vero *Felicissimus* Carthaginiensis contra *Cyprianum* schismaticum, lapsis in idololatriam sine poenitentia absolutionem a peccatis dabat.

4.<sup>o</sup> Emerserunt etiam hoc saeculo *Angelici*, qui latrae cultum impendebant Angelis: *Apostolici*, qui eos, qui uxoribus utebantur, a sua communione pellebant: *Valesiani*, qui semetipsos, et hospites Eunuchos faciebant: *Arabes*, qui immortalitatem animorum negabant: *Rebaptizantes*; *Origenistae*.

#### Saeculo IV.

1.<sup>o</sup> *Donatistae* Sacramenta, a ministris improbis collata, asseriebant esse irrita. Hoc praetextu schisma in Africa conflavit teterrimum, quod multis duravit annis usque ad saeculum quintum. Affirmabant praeterea, Ecclesiam toto orbe periisse, remansisse vero tantum in Africa in parte *Donati*, quem praeter hos errores, etiam Ariana labe fuisse aspersum, testatur Augustinus *Lib. De haeres. Cap. 69*.

2.<sup>o</sup> *Ariani*, duce *Ario* Presbytero Alexandrino, docue-

ouerunt, Verbum esse creaturam, licet nobilissimam, et ceterarum creaturarum initium. Damnati in Concilio Nicaeno, scissi sunt in duas partes, *Anomoeos*, et *Semiarianos*. *Anomoei*, ducibus *Actio*, *Eunomio*, et *Eudoxio* docuerunt, Verbum esse Patri *αὐτομόν*, dissimile; *Semiariani* simile in substantia, sed non *consubstantiale*.

3.<sup>o</sup> *Macedoniani*, vive *Pneumatomachi* asserebant, Spiritum Sanctum non esse Deum, sed creaturam.

4.<sup>o</sup> *Apollinaristae* affirmabant, Verbum assunxisse corpus absque anima rationali, ideoque in Christo ipsum Verbum mentis vicem gessisse.

5.<sup>o</sup> *Photinus* Sabellii haeresim, paucis mutatis, professus est, Christumque purum hominem esse docuit, nec ante Mariam extitisse.

6.<sup>o</sup> *Priscillianus* Hispanus Manichaeorum dogmata de duobus principiis, de fatali rerum necessitate, aliaque per Hispaniam propagavit.

7.<sup>o</sup> *Helvidius* Mariae negavit virginatatem. Ejus vero discipulus *Jovinianus* docuit, servandam non esse castitatem, peccata omnia esse aequalia, paria fore praemia justorum, et malorum poenas.

8.<sup>o</sup> *Aerius* Arianus docuit, Episcopos non esse Presbyteris superiores.

9.<sup>o</sup> *Colluthiani* a *Collutho* Arii coaevo, qui presbyter Episcopalia munera, ipsamque ordinationem presbyterorum celebrare ausus est, docuerunt, Deum non esse malorum naturae, et poenae auctorem.

10. *Eustathiani* duce *Eustathio* Sebasteno Ariano, nuptias, et usum carnum damnabant.

11.<sup>o</sup> Emerserunt etiam hoc saeculo *Antropomorphitae*, qui corpus humanum Deo affingebant; *Collyridiani*, qui cultum Iatriae B. Virgini exhibebant, ei que offerebant sacrificia; *Messaliani*, qui Sacramenta et bona opera tamquam inutilia spernabant, solumque orationem necessariam esse docebant, unde dicti sunt *Euchitae*; *Bonosiaci*, qui duce *Bonoso* Sardicensi Episcopo, docebant, Christum purum esse hominem, duosque in eo agnoscendos esse Filios Dei, unum aeternum, alterum temporalem, qua in re *Nestor-*

*storia* videntur praelusisse; Virginitatem vero B. Mariae post partum negabant.

### Saeculo V.

1.<sup>o</sup> *Pelagius* Britannus, docuit 1.<sup>o</sup> *Adamum* conditum fuisse mortalem, et lapsu suo sibi soli, et non posteris nocuisse, ideoque parvulos nasci sine peccato originali, coque in statu, in quo fuit Adam ante peccatum, nec privari vita aeterna (quam distinguebat a regno caelorum) si sine baptismo moriantur. 2.<sup>o</sup> Ignorantiam, et concupiscentiam, ipsamque mortem non esse poenam peccati, sed primordia naturae. 3.<sup>o</sup> posse hominem sine actuali gratiae supernaturalis auxilio vitare omnia peccata, etiam venialia, totamque legem servare. 4.<sup>o</sup> Ignorantiam, et oblivionem omnino excusare a peccato. Ei praeluserant *Origenis* opera, nec non *Theodorus Mopsuestenus*, et *Ruffinus*. Praecipui Pelagii sectatores fuere *Caelestius*, et *Julianus*.

2.<sup>o</sup> *Semipelagiani*, sive *Massilienses* in hoc tantum a *Pelagianis* non dissidebant, quod vellent, voluntates humanas non praeveniri a gratia Dei, sed saltem initium fidei, salutis desiderium, et perseverantiam, habere homines ex libero arbitrio absque gratia; ideoque negabant praedestinationem gratuitam; in ceteris vero cum catholicis sentiebant.

3.<sup>o</sup> *Nestorius* C. P. Patriarcha docuit, in Christo duas esse personas divinam, et humanam, ideoque B. Virginem non dicendam esse Θεοτοκον *Deiparam*, sed Χριστοτοκον *Christiparam*.

4.<sup>o</sup> *Eutyches Archimandrita*, sive Abbas Monasterii Constantinopolitani, docuit, in Christo unam esse naturam, sive ex divina, et humana permixtam, sive divinam tantum, quae humanam absorbit. Praecipui ejus assectatores fuere *Dioscorus Alexandrinus*, *Timotheus Aelurus*, *Petrus Mongus*, *Petrus Gnaphaeus* etc. *Eutychiani* in varias sectas scissi sunt, quae hoc, et in sequenti saeculo vexarunt Ecclesiam.

5.<sup>o</sup> *Vigilantius* 1.<sup>o</sup> martyram reliquiis bellum. indixit, earumque cultum oppugnavit. 2.<sup>o</sup> negabat, mar-

martyres orare pro nobis, ideoque frustra eos invocari docebat. 3.<sup>o</sup> Virginitatem, et coelibatum impugnavat. 4.<sup>o</sup> monasticum institutum spernebat.

## Saeculo VI.

1.<sup>o</sup> *Eutychiani* hoc saeculo in varias sectas divisi, magnos in Ecclesia motus excitarunt. Praecipuae eorum sectae fuerunt, 1.<sup>o</sup> *Corrupticolae*, et *Incorrupticolae*. Priores post *Severum* Antiochenum fitebantur, Christum doloribus obnoxium, ejusque corpus ante resurrectionem corruptibile; posteriores vero post *Julianum Halicarnassensem* in contrariam factionem, et haeresim discesserunt. 2.<sup>o</sup> *Theopaschitae*, qui ipsi divinitati in Christo passionem tribuebant. 3.<sup>o</sup> *Agnostae*, qui aliquam Christo adscribebant ignorantiam. 4.<sup>a</sup> *Trithitae*, qui duce *Joanne Philopono* Eutychiano, tres divinas personas tres esse naturas divinas affirmabant, idque ex palmari illo Eutychianorum dogmate, nimirum tot esse naturas, quot personas.

## Saeculo VII.

1.<sup>o</sup> *Monothelitae*, Eutychianorum propago, docuerunt, unicam in Christo agnoscendam esse voluntatem, et operationem. In eam autem haeresim pertracti sunt etiam multi ex iis, qui contra Eutychianos duas in Christo naturas profitebantur. Ejus sectae antesignani fuerunt *Theodorus Pharanites*, *Sergius Alexandrinus*, *Pirrhus*, et *Paulus Constantinopolitani*. Honorius Papa, a *Sergio* deceptus, tamquam fautor haeticorum habitus est.

2.<sup>o</sup> Prodiit hoc saeculo *Mahometanorum* religio, duce *Muhammede*, quae longe, lateque vi, et armis propagata est. Totum ejus religionis systema continetur in Alcorano, quod ab Archangelo *Gabriele* (a), se per partes acceperisse, *Muhammedes* mentitus est.

Mul-

---

(a) In priori Editione *Michael* pro *Gabriele* mendose positus est.



Multa habet ex veteri, novoque testamento decerpta, multa vero a *Muhammede* addita de suo, quae longum est hic exponere. Deum esse unum, unamque divinitatis personam; Christum fuisse prophetam ex virgine natum: necessitate omnia evenire. Paradisum fidelibus promissum, in voluptatibus corporis constituit. Multa vero habet in rebus moralibus, legi naturali contraria.

3.<sup>o</sup> *Pauliciani*, duce *Paulo* quodam Samosatensi, Manichaeorum haeresim hoc saeculo suscitaverunt, lateque propagaverunt; nonnullisque adjectis, novae haeresis auctores visi sunt.

### Saeculo VIII.

1.<sup>o</sup> *Iconoclastae*, Sacras Imagines non solum non esse habendas, et honorandas, sed confringendas, et concutandas, docebant; omnemque cultum imaginibus exhibitum, idololatriam esse. Graeci Imperatores *Leo Isauricus*, *Constantinus Copronymus*, *Leo Armenus* totis viribus hanc haeresim stabilire conati sunt, et Catholicos vehementer insectati, quorum multos crudeliter interfecerunt.

2.<sup>o</sup> *Felix Urgelitanus*, et *Elipandus Toletanus*, Christum, docebant, dicendum esse filium Dei adoptivum. Sed disputatur inter Theologos, utrum Christum dicerent adoptivum secundum naturam humanam, an absolute.

### Saeculo IX.

1.<sup>o</sup> Hoc saeculo *Photius*, Constantinopolitanae sedis invasor, litem movere coepit Latinis de processione Spiritus Sancti ex Patre et Filio, jecitque fundamenta Schismatis Graecorum.

2.<sup>o</sup> Magnas hoc saeculo in Ecclesia, praesertim Gallicana, excitavit turbas haeresis, quae disseminari solebat, *Praedestinatianorum*, qui docere dicebantur, praedestinationem ad vitam, et ad mortem aeternam fatali necessitate homines agere ad bonum, et ad malum. Hujus haeresis nomine, *Gotheschalchus*  
ma-

male habitus est ab *Hinemaro Rhemensi*, et perpetuo carcere inclusus. Nonnulli tamen volunt, hanc haeresim fuisse figmentum Semipelagianorum.

3.<sup>o</sup> Eodem saeculo *Jouannes Scotus Erigena* veritatem Corporis, et Sanguinis Christi in Eucharistia negavit, *Sergiotae*, et *Baanitae* a *Sergio*, et *Baane*, Manichaeorum haeresim, paucis adjectis, in Orientem disseminarunt; *Claudius vero Taurinensis* Iconoclastarum haeresim in Occidentem.

## Saeculo X.

Singularis Dei providentia hoc saeculo enituit, quod in tanta malorum colluvione, quae tunc grassata est, tantaque ignorantia/sacrarum litterarum, non permiscuit, novas emergere haereses. Pauci enim, qui haereticos postulati sunt, veteres errores, praesertim Manichaeorum, profitebantur.

## Saeculo XI.

1.<sup>o</sup> *Berengarius* Archidiaconus Andegavensis, negavit, panem, et vinum in Eucharistia converti in Corpus, et sanguinem Christi. Ipse tamen saepius damnatus, et ejurata haeresi, reversus ad vomitum, tandem poenitens, et Catholicus obiit.

2.<sup>o</sup> *Roscelinus*, *Petri Abaelardi* magister docuit, tres divinas personas substantia distinctas esse, non secus ac tres homines.

3.<sup>o</sup> *Michael Caerularius*, C. P. Patriarcha, confirmavit schisma Graecorum, affirmans, Spiritum Sanctum ex solo Patre procedere, et consecrationem Eucharistiae in azymo esse irritam.

4.<sup>o</sup> Prodierunt etiam hoc saeculo clerici concubinarij, et Simoniaci, qui non solum in his rebus peccabant, sed etiam eas defendebant ut licitas. Contra illos, longe lateque diffusos, acriter hoc saeculo decretatum est.

## Saeculo XII.

1.<sup>o</sup> *Tanchelinus* se Dei Filium mentitus, omnis generis impurissimas libidines licitas esse, et verbo, et exemplo impudentissime praedicabat. Antuerpiae praesertim disseminavit haeresim, quae opera *S. Norberti* Episcopi extincta est.

2.<sup>o</sup> *Petrus de Bruis*, et *Henricus* ejus discipulus, ex quibus *Petrobrusiani*, et *Henriciani* dicti sunt, rejiciebant vetus Testamentum; docebant, baptismum ante usum rationis non esse administrandum; cruce aliasque imagines confringebant, sacras aedes diruebant; psalmos, et quascumq. preces ore recitatas irridebant, rejiciebant sacrificium Missae, et sacerdotum consecrationem.

3.<sup>o</sup> *Bogomili*, Manichaeorum propago, praeter reliqua ejus sectae dogmata, affirmabant, daemones habitare in corporibus defunctorum, ideoque eorum ossa, et cineres extra Ecclesias projiciebant. Deo, quem Christiani colunt, maledicebant.

4.<sup>o</sup> *Petrus Abaelardus*, Peripateticae Philosophiae nimis addictus, eamque ad religionis Christianae mysteria pertractanda adhibens, in varios declinavit errores. A *S. Bernardo*, quem adversarium habuit acerrimum, accusatus est *Arianismi*, et *Pelagianismi*, et *Neistorianismi*.

5.<sup>o</sup> *Arnaldus Brixiensis*, quem postea secutus est *Marsilius Patavinus*, et *Joannes de Janduno*, docuit, Clericos bona temporalia possidere non posse, multoque minus Episcopos jura regalia, et monachos agrorum, aut silvarum fundos.

6.<sup>o</sup> *Gilbertus Porretanus* Deum a Deitate, et divinas relationes realiter ab essentia distingui docuit.

7.<sup>o</sup> *Petrus Waldus Lugdunensis*, a quo *Waldenses*, qui et pauperes de Lugduno, et *Insabati* (propter ligneos calceos, quibus utebantur) dicti sunt, Evangelicam, ut ipse aiebat, paupertatem professus, in haeresim incidit. Docuit nimirum, Ecclesiam Romanam jam inde a tempore *Silvestri* Papae defecisse, et Sacerdotes in peccatum lapsos irrita Sacramenta con-

con-

conficere, ac ministrare; ea tamen a laicis piis rite, sive *valide* ministrari affirmabat. Ecclesiae Praesules, ritus, ceremonias, legesque spernebant Waldenses: cetera cum Catholicis sentiebant, licet postea Calvinianam haeresim amplexi sint.

8.<sup>o</sup> *Albigenses* ex civitate *Albia* provinciae *Narbonensis*, ubi plurimum invaluerant, quos Calvinistae perperam cum *Waldensibus* confundunt, ut in *Historia variationum* ostendit *Bossuet*, erant Manichaeorum sectatores, multaque, praeter Manichaeorum haeresim, docebant, quae turpe est et dicere. Ab his non multum abhorrebant *Apostolici*, contra quos scribit *Bernardus Serm. I. XIV. in Cant.* Eodem tempore *Constantinus Chrysomalus* docuit, duas esse in homine animas, non exhibendum principibus honorem plusquam diabolo, et alia hujusmodi. *Folmarus* in Germania, Corpus Christi in Eucharistia integrum esse, negavit.

## Saeculo XIII.

1.<sup>o</sup> *Iidem Albigenses*, de quibus paulo ante diximus, hoc saeculo late per Provinciam, et vicinas Italiae civitates vagati sunt. Eorum occasione institutus est ordo *Prædicatorum*, et *Inquisitio* contra haereticam pravitatem.

2.<sup>o</sup> *Almaricus Gallus* docuit, non futuram hominum generatichem, si *Adam* innocentiae statum servasset; nihil aliud esse poenas inferni, nisi conscientiae vermem; in morte Christi cum *Lege Moysis* cessasse potestatem Patris, tempore ipsius *Almarici* cessasse potestatem, et legem Christi, et vigere legem Spiritus Sancti, ita ut, abolitis Sacramentis, ceterisque religionis officiis, sola interiori gratia homines salvi fiant; dummodo credant fide divina, se esse membra Christi, aliaque addebat ejusdem generis. Illius autem discipuli, eo mortuo, docuerunt, Eucharistiam nihil esse, nisi panem, et vinum; Romam esse Babylonem, et R. Pontificem Antichristum, cultum Sanctorum esse idololatriam etc.

3.<sup>o</sup> *David de Dinardo* asservit, Deum esse materiam

riam primam, quod ad *Pantheismum*, videtur pertinere.

4.<sup>o</sup> Fuerunt etiam hoc saeculo *Guilhelmiani* in Bohemia, qui *Guilhelmnam* quandam impurissimam feminam esse aiebant, Spiritum sanctum incarnatum, multaque turpia, atque infanda perpetrabant. *Stadtingi* in finibus Saxoniae, qui sacros ministros uocabant, sacra mysteria polluebant, Diabolum colebant, Deum execrabantur, aliaque docebant, et faciebant horribilia.

#### Saeculo XIV.

1.<sup>o</sup> *Fraticelli*, qui etiam *Beguardi*, *Beguini*, *Bisochi*, et *Fratres Spirituales* dicti sunt, e familia Fratrum minorum exorti, zelo majoris perfectionis, ut aiebant, et strictioris observantiae regulae S. *Francisci*, a reliquo ordine discedentes docuerunt, duas esse ecclesias, alteram carnalem, et divitiis affluentem, cui R. Pontifex praeerat, alteram spiritalem, virtutibus, et paupertate decoram; quae ex ipsis constabat. Tum e *Waldensium* haeresi varia mutuati sunt, praesertim, ministros impios omnem amittere potestatem, advenisse Antichristum etc. hominem in hac vita ad summum perfectionis gradum posse pertingere, in quo amplius de lege, et virtutum exercitio non debeat esse sollicitus, et in clara Dei visione quiescat, nihilque ei jam tribuatur peccato. Praecipui inter eos fuerunt *Joannes Oliva*, *Joannes Parmensis* Auctor *Evangeli*i aeterni, in quo multae continentur haereses, et absurda, *Michael Caesenas*, *Guillelmus Okam* etc.

2.<sup>o</sup> *Flagellantes*, exorti primum superiori saeculo in Italia, ideo sic appellati, quod flagellis usque ad sanguinem se caedebant, in haeresim lapsi docuerunt, neminem saluum esse posse; nisi sectae suae dedisset nomen; sibi quoque invicem, etsi laicis, confitebantur peccata, et absolutionem impertiebant.

3.<sup>o</sup> *Geraldus Segarellus* Parmensis, ejusque discipulus *Dulcinus* Novariensis, a quo *Dulcinistae*, dicebantur. Pontifices omnes post *Sylvestrum* reductores suis.

fuisse, uno excepto *Cælestino V.* Ordines regulares fidei esse detrimento; perinde esse, Deum orare in stabulo, ac in Ecclesia; aliaque ejusmodi. Præterea eodem sæculo *Circumcelliones* a veteribus Donatistis diversi, docebant, R. Pontificem, et omnes Ecclesiae Episcopus esse hæreticos, nullamque habere Sacramentorum ministrandorum potestatem.

4.<sup>o</sup> *Turlopini*, omni pudore abjecto, nudi incedebant, ad omnem libidinem projecti, quam licitam esse docebant. E secta *Manichæorum*, siye ut aliis placet, *Adamitarum* orti sunt. His similia *Hermannus Pongilupus* docuit, veterumque Gnosticorum infanda dogmata renovavit.

5.<sup>o</sup> *Palamitæ*, duce *Gregorio Palama*, docebant, se in oratione conspicerè divinum lumen ab aeternitate diffusum, quod ab essentia divina distinguebant. Dicti sunt etiam *Quiescentes* a quiete animi, quam in oratione se experiri jactabant.

6.<sup>o</sup> *Lolhardi* in Austria primam exorti, *Luciferum*, et rebelles Angelos laudabant; *Michaellem*, et sanctos Angelos afficiebant contumeliis; B. Virginem blasphemabant: salutem nomine diaboli adprecabantur: sacramenta, omnesque Ecclesiae ritus, jejunia, missam, cultumque sanctorum spernebant. Negabant, Deum cognoscere omnia, quae patrantur peccata, et alia impia, atque absurda prædicabant. Porro *Lolhardi* dicti sunt etiam sectatores *Joannis Wicleffi*, de quo mox.

7.<sup>o</sup> *Joannes Wicleffus* Anglus, a Praefectura Collegii ejusdam Oxoniensis depulsus, ira percitus, docuit, Romanam Ecclesiam esse Synagogam satanae, ideoque Decretalium auctoritatem contemnedam; studiumque abjiciendum; Monachorum institutionem, suadente diabolo, esse inventam; Confirmationem, et ordinationem Episcopos ex avaritia sibi reservasse; donationem bonorum Ecclesiis esse peccatum. His addebat, quae *Waldenses*, *Arnaldus Brixiensis*, *Marsilius Patavinus*, aliique doquerant. Docebat, substantiam panis, et vini in Eucharistia remanere, licet varie hac de re videatur locutus; et alia, quae in quadraginta quinque articulis damnata sunt in Concilio Constantiensi. Porro *Wicleffi* dogmata, librique, late

late diffusi, magnam sequentibus saeculis Ecclesiae ruinam intulerunt.

8.<sup>o</sup> Fuerunt etiam hoc saeculo *Arnaldus de Villanova*, *Joannes de Mercuria*, *Raymundus Lullus*, *Echardus*, *Ceccus*, sive *Franciscus Asculanus*, *Joannes de Latone*, *Arnaldus Montancrius*, *Joannes de Montesono*, alique, quorum varia feruntur errata.

### Saeculo XV.

1.<sup>o</sup> *Joannes Hus*, et *Hieronymus Pragensis Wicleff* doctrinam mordicus propugnarunt, et seditiose praedicarunt. Affirmabant, Ecclesiam ex solis constare praedestinatiis, haereticos non posse tradi iudicibus puniendos; neminem a praedicatione verbi Dei prohiberi posse. Triginta novem hujusmodi propositiones a Concilio Constantiensi damnatae sunt. Ceterum de Eucharistia, confessione Sacramentali, invocatione sanctorum, Purgatorio etc. non videntur a Catholica Ecclesia dissentisse.

2.<sup>o</sup> Ex his prodierunt *Calixtini*, qui communionem sub utraque specie laicis omnibus necessariam esse ad salutem, affirmabant.

3.<sup>o</sup> *Guillelmus de Hildernissen*, et *Aegydius Cantor* sectam informarunt, quae dicta est *hominum intelligentiae*. Affirmabant, Diabolum, hominesque scelestos salvos fore; spurcissimas libidines esse licitas: orationes, jejunia, aliaeque pietatis officia esse inutilia. Veterum vero *Adamitarum* errores suscitavit *Picardus*, et *Adamus Pastoris*. Damnati etiam hoc saeculo sunt varii errores *Matthaei Grabon*, *Joannis Parvi*, *Petri Oxoniensis*, *Augustini Romani* etc.

### Saeculo XVI.

1.<sup>o</sup> *Martinus Lutherus*, Ordinis Augustiniani Apostata, et haereticorum hujus saeculi signifer, docuit, solam Scripturam esse fidei regulam, eamque privato cujusque spiritu explicandam: rejiciendam traditionem; Ecclesiam constare ex solis justis, ideoque esse invisibilem; Romanam Ecclesiam esse Babylonem,

nem, et R. Pontificem Antichristum; concupiscentiam esse peccatum, quae cum non deleatur in justificatione, addidit, justificatione peccata non deleri, sed tegi per applicationem justitiae Christi, apprehensae per fidem, qua quis certo credit, peccata sibi esse remissa; sacramenta eatenus prodesse, quatenus excitant fidem, a quocumque ministrentur; indulgentias, invocationes sanctorum, Missas privatas, jejunia, vota, aliaque religionis officia reficienda. Ceterum longior est totius systematis Lutherani expositio, nosque passim de eo in variis Theologiae tractatibus diximus.

2.<sup>o</sup> *Zwinglius, Calvinus, Bucerus, OEcolampadius* in hoc à *Luthero* praecipue dissenserunt, quod praesentiam Christi *realem* in Eucharistia rejecerunt, unde *Sacramentarii* dicti sunt. Praeterea *Calvinus* Deum facit peccati auctorem, praedestinationem statuit ad mortem aeternam ante praedicta peccata.

3.<sup>o</sup> Cum omnium horum haeticorum commune dogma fuerit, solam Scripturam, privato cujusque spiritu intellectam, esse regulam fidei, hinc inter eos quot capita, fere tot sententiae, ac saepissime multis in capitibus doctrinam mutarunt, ut fuse *Bossuet* in *Historia variationum* exponit. Eorum autem Theologi singuli nova aliquot addiderunt, vel mutarunt. Praecipui fuerunt *Philippus Melancton, Matthias Flaccus Illyricus, Andraeas Carlostadius, Joannes OEcolampadius, Martinus Bucerus, Bernardinus Osiander, Petrus Martyr, Hieronymus Zanchius, Andraeas Osiander, Franciscus Stancarus, Wolfgangus Musculus, Martinus Kemnitius, Joannes Brentius, Theodorus Baeza*, alique.

4.<sup>o</sup> *Anabaptistae*, duce *Nicôlao Storechio*, et *Thoma Muncero* ex secta Lutheranorum, docuerunt, pueros non esse baptizandos; et baptizatos, in adulta aetate rebaptizandos: illicitum esse omne juramentum: nefas esse Christianis gerere bellum, cum ipsis contra seditionem, et cardibus Germaniam perturbaverint.

5.<sup>o</sup> *Arminiani*, duce *Jacobo Arminio*, negarunt praedestinationem; omniaque pendere voluerunt a libera hominum electione, unde *Semipelagianorum* dogma



recoherunt. Eis adhaeserunt sequenti saeculo *Hugo Grotius*, *Simon Episcopus*, *Stephanus Curcellaeus*, *Philippus Limborchius*, *Joannes Clericus*. Contra eos pugnarunt *Gomaristae*, duce *Francisco Gomaro*, qui Calvinianae praedestinationis decretum defendunt.

6.<sup>o</sup> Sociniani, ducibus *Michaelae Serveto* Hispano, qui Genevae, agente *Calvino*, vivus combustus est; *Georgio Blandrata*, *Laelio Socino*, et *Fausto Socino* Italibus, qui sectae nomen dederunt; universa fere religionis Christianae dogmata corruerunt, novumque systema, quod potius *Naturalismum* dixeris, informarunt, veteres haereses recoquendo. Nimirum cum *Arianis*, *Macedonianis*, *Sabellianis*, *Photinianis* etc. negarunt Trinitatis mysterium, unde *Anti-Trinitarii* dicti sunt. Affirmarunt, Christum esse merum hominem, nullamque pro peccatis Deo obtulisse satisfactionem, aut sacrificium: nullum esse peccatum originale: non futuram corporum resurrectionem: Sacramenta nullam habere virtutem: Eucharistiam meram esse ceremoniam etc. Quibus addiderunt reliqua Lutheranorum, et Calvinistarum deliria contra Romanam Ecclesiam, ejusque dogmata, ritus, et praeccepta. In Polonia praesertim, et Transylvania invaluerunt.

7.<sup>o</sup> *Guillelmus Postellus* varia edidit opera pluribus haeresibus, et erroribus plena, *De trinitate mundi*, *Corporis*, et *animarum*, *De salvandis omnibus hominum sectis*, *De clave absconditorum a saeculo*, quae nec *Apostoli*, nec *Ecclesia* portare potuisset, De mysteriis sibi revelatis ab *Angelo Razielle* etc. Sed tandem ejuratis erroribus, poenitens mortuus est.

#### Saeculo XVII. et XVIII.

1.<sup>o</sup> *Quietistae*, duce *Michaelae Molinos* Hispano, docuerunt, statum perfectionis in eo esse situm, ut ad quietem, imo ad nihilum redigantur omnes animae potentiae, ita ut ipsa nihil agat; spem, timorem, omnemque salutis sollicitudinem, et virtutum actus abjiciat, nec amplius contra tentationes pugnet, quae in inferiori animae parte insurgant. Multa hu-

jusmodi addiebant ex *Beguardorum* fontibus hausta.

2.<sup>o</sup> *Báji*, *Jansenii*, et *Quesnelli* opera quantas in Europa excitaverint turbas, notissimum est; nosque *Lib. VII.* eorum systemata exponemus.

3.<sup>o</sup> Magna vero hisce saeculis errorum colluvies grassata est. *Quakeri* in Anglia, *Illuminati* in Hispania, *Massones* in universa fere Europa monstrosas informarunt haereses, et periculosas societates, et conventicula. Opera vero *Benedicti Spinozae*, *Petri Baeclii*, *Joannis Lokii*, *Helvetii*, *Volterrii*, *Roussoji*, aliorumque ejusdem farinae hominum, integrum adgressa sunt Religionis Christianae aedificium labefactare. Quapropter oremus Deum, et patrem Domini nostri Jesu Christi, ut in fide nos faciat stabiles, eosque, qui erraverunt, et errant, in rectam salutis viam, et Ecclesiae sinum revocet, ac reducat. Amen.

## L I B E R III.

## SEU TRACTATUS DE DEO UNO.

*Praefatio.*

**I**N superioribus libris Theologiae fundamenta jecimus. Nunc de primario ejus *objecto*, quod Deus est, non profanae eruditionis, aut humanae Philosophiae lumine, sed ipso duce, et adjutore Deo disserendum est, qui arcana sapientiae suae abscondit a sapientibus, et prudentibus, et revelavit ea parvulis *Matthaei XI.*, 25. Tria autem summa Capita sunt hujus tractatus, scilicet de existentia unius Dei, ejusque essentia, et attributis.

## C A P. I.

*De existentia, et unitate Dei.*

*Adv. I.* **Q**Uoniam tirones habemus jam edoctos ea, quae Metaphysici demonstrant de existentia Dei, idcirco erimus in hac parte breviores.

II. Athei alii sunt *theoretici*, alii *practici*. Theoretici sunt, qui revera sibi persuadent, nullum esse Deum: practici vero, qui ita scelerate vivunt, quasi nullus esset Deus malorum vindex.

III. Multos esse atheos practicos, experientia docet, et testatur Psalmista. *Ps. XIII. Dixit insipiens in corde suo: non est Deus; Corrupti sunt, et abominabiles facti sunt.* Utrum vero etiam athei theoretici unquam fuerint, aut hodie sint, ambigitur. Inter veteres multi hac infamia laborarunt, sed constat, nonnullos, non quidem veri Dei, sed falsorum numinum negasse existentiam, ut probant Justinus *In Apolog. I.* Clemens Alex. *In Protreptico*, alique: unde primis Ecclesiae saeculis Christiani ab idolorum cul-

ctatoribus vocabantur athei. Difficilius tamen excusantur ab hoc crimine *Protagoras Abderitanus*, *Diagoras Melius*, *Theodorus Cyrenaicus*, *Evemerus*, de quibus Cicero *Lib. I. de nat. Deor.* *Plutarchus de placit. Philosoph.* *Laërtius de Vit. Philos.* *Eusebius in Praepar. Evang.* *Agnobius contra Gen.* alique: videntur enim isti, omne numen sustulisse; idque solum dubitari potest, an id dixerint ex animi sententia. Certe eos defendunt *Clemens Alex. Ibid.* *Muretus Lib. X. Var. lection.* *Nourry Appar. ad Bibl. PP. Lib. I.* *Jaquelotius cont. Baylium.* Videamus ergo 1.<sup>o</sup> utrum existentia Dei demonstrari possit; 2.<sup>o</sup> utrum possit a quoquam invincibiliter ignorari; 3.<sup>o</sup> utrum sit fidei dogma; 4.<sup>o</sup> utrum ostendi possit, non nisi unum esse Deum.

## §. I.

*Utrum Dei existentia demonstrari possit.*

*Adv. I.* Demonstratio alia est *a priori*, sive per causam, alia *a posteriori*, sive per effectus. Constat, Dei existentiam non posse demonstrari *a priori*, sive per causam, cum Deus a nulla causa pendeat. Sociniani plures post *Socinum*, *Praelect. Cap. 2.* negant, Dei existentiam ullo modo, etiam *a posteriori*, demonstrari posse. Eos sequuntur, qui vulgo *Spiritus fortes* dicuntur, sed revera maxime imbecilles sunt, et passionum, vitiorumque omnium servi.

## P R O P O S I T I O I.

*Dei existentia potest a posteriori demonstrari.*

*Prob. I. ex Scriptura. Job. XII. 7. Interroga jumenta, et docebunt te. Ps. XVIII. Caeli enarrant gloriam Dei, et opera manuum ejus annuntiant firmamentum. Sap. XIII. 1. Vanus sunt omnes homines, in quibus non subest scientia Dei, et de his, quae videntur bona, non poterunt intelligere eum, qui est, neque operibus attendentes agnoverunt, quis esset artifex . . . A magnitudine enim speciei, et creaturae cognoscibiliter poterit creator ho-*

horum videri. Rom. I. 20. *Invisibilia enim ipsius a creatura mundi per ea, quae facta sunt, intellecta conspiciuntur, sempiterna quoque ejus virtus, et divinitas, ita ut sint inexcusabiles.* Ergo etc.

*Prob. II.* Existentia causae demonstrari potest ab effectu, qui ab illa necessario pendet. Atqui sunt effectus, nempe creaturae, quae non existunt a se, ac proinde necessario pendent a causa, quae a se existit, nempe Deo. Ergo.

*Dices.* Nulla inter finitam, atque infinitum proportio est. Atqui omnes, quos videmus, naturae effectus finiti sunt. Ergo ex iis ens infinitum demonstrari non potest.

*R. 1.º Dist. maj.* Nulla est proportio naturae, si ve ut ajunt, *entitatis, conc.* Nulla est proportio habitudinis, quae inter effectum, et causam intercedit, *neg.*

*R. 2.º Dist. min.* Omnes naturae effectus finiti sunt, si spectetur tantummodo eorum natura, *conc.* Si spectetur eorum productio ex nihilo, *neg.* Licet enim finita sint, quae videmus, eorum tamen productio ex nihilo opus est infinitae virtutis, ideoque causam arguit infinitam.

## PROPOSITIO II.

*Dei existentia demonstrari potest argumentis metaphysicis, physicis, et moralibus.*

*Prob.* Indicando breviter argumenta illa, quae fusi-  
us in metaphysica pertractata sunt.

### *Argumenta metaphysica.*

*I.* Existit aliquid. Hoc negari non potest; si enim cum *Idealistis* negare quis velit ceterarum rerum existentiam, tamen sui ipsius existentiam, nisi sit amens, negare non poterit. Ergo existit aliquod *ens* ab aeterno, quod ab alio non pendeat; alioquin *ens*, quod nunc existit, prodisset ex nihilo sine ulla causa, quod repugnat. *Atqui ens* ab aeterno existens, mini-

me-

neque ab alio pendens, Deus est; nam *ens* ejusmodi existit a se, hoc est in sua ipsius natura rationem habet sufficientem suae existentiae, ac proinde est *ens* necessarium, ideoque infinitum, cum nullum *ens* finitum excogitari possit, quod sit necessarium. Ergo etc. Illustrant hoc argumentum *Clarkius*, *Cudworthus* etc.

II. Omnibus hominibus ab ipsa natura ingentiam esse Dei ideam, Patres docent, et ratio suadet. *Animae enim a primordio conscientia Dei dos est*, inquit *Tertullianus Lib. I. cont. Marcion. cap. 10.* Unde *Arnobius Lib. I. cont. Gentes: Quisquamne est hominum*, inquit, *qui non cum illius principii cognitione diem primae nativitatis intraverit? cui non sit ingentum, non affixum, imo ipsi pene in genitalibus matris non impressum, non insitum, esse regem, ac dominum cunctorum, quaecumque sunt, moderatorem (a)?* Primus id negasse videtur *Socius in praelect. Theol. Cap. II.* quem secuti sunt *Worstius in Not. ad disp. de Deo*, et *Episcopus Instit. Lib. I. Cap. 3.* in quorum sententiam miror descendisse quosdam e nostris recentioribus Philosophis, post *Joan. Lokium*, qui ipsam Dei ideam volunt esse adventitiam, sive ortam a rerum sensibilibus contemplatione. Atqui quod est ab ipsa natura insitum, falsum esse non potest. Ergo etc. Tractat hoc argumentum *Cartesius in Meditationibus*, Sed demus, ideam Dei esse adventitiam, certe omnes homines ita a natura comparati sunt, ut statim eam ex rerum visibilibus contemplatione concipiant. Cum ergo natura ipsa in falsum inclinare non possit, sequitur, veram esse Dei ideam, quae vel insita est, vel ad quam inclinat, et quodammodo cogit animum ipsa natura.

III. Idipsum Metaphysici demonstrant ex ente contin-

---

(a) Adde *Justinum Apolog. II.* *Clementem Alex. in Protrept. Ny-senum Oct. V.* *Cyprianum de vanis. idol. Lactantium Lib. II. Instit. Cap. I.* Consentunt ipsi Gentiles Philosophi; *Cicero; Plato; Plotinus, Iamblicus* etc.

tingente, ex idea bonitatis, et veritatis, ex conjunctione animi, et corporis in homine.

### Argumenta Physica.

Physica argumenta petuntur 1.<sup>o</sup> ex admirabili totius universi mole, dispositione, atque ordine: *Quid enim*, inquit Cicero *Lib. II. de Nat. Deor.* *esse potest tam apertum, tamque perspicuum, cum caelum suspeximus, caelestiaque contemplati sumus, quam esse aliquod Numen praestantissimae mentis, quo haec regantur? . . . quod qui dubitat, haud sane intelligo, cur non idem, sol sit, an nullus sit, dubitare possit.*

2.<sup>o</sup> Ex admirabili structura singularum partium universi, in quibus tam stupendus est *mechanismus*, tamque apte singula suis finibus respondent, ut manifestae insaniae sit dubitare, utrum illa a sapientissimo artifice sint composita. Hinc Caesar Vaninus atheismi accusatus, ut iudices falleret, stipulam manu accipiens, *haec*, inquit, *palea jubet, ut Deum credam*; ut refert testis oculatus Grammondus *Hist. Galliae Lib. III.* quo testimonio exsufflantur omnia Petri Baylii mendacia, qui impiissimi istius athei nescio quam animi fortitudinem saepe commendat. Hoc argumentum, ex admirabili structura partium Universi petitum, egregie tractant Nieuventilus, et Derham, quibus addi potest etiam P. Segneri (a).

3.<sup>o</sup> Ex motu. Cum enim materia ad motum, et quietem sit *indifferens*, profecto quidquid movetur, ab alio moveatur necesse est. Ergo agnosci debet primus motor immotus, mens scilicet infinitae potentiae, et sapientiae, quae talem, tantumque motum materiae impresserit, qui ad hoc universum formandum, et conservandum esset necessarius. Physi-  
ca

---

(a) Nieuventit. *Traité de l'existence de Dieu.* Derham *Theologie Physique.* Segneri. *L'incredulo senza scusa.*

ca haec argumenta passim adhibent Patres (a), et veteres Philosophi.

*Argumenta moralia.*

Ex consensu omnium gentium morale argumentum deducitur pro Dei existentia. Ait enim Plutarchus, *Lib. cont. Coloten. Si terram peragraveris, invenies quidem civitates sine muris, sine litteris, sine rege, sine tectis, sine divitiis, sine monetis, sine theatris, sine gymnasiis. Sed civitatem sine templis, sine Deo, sine precibus, sine juramentis, sine oraculis, et quae sacrificia non offerat, ut bona consequatur, malaque avertat, nemo est, neque fuit umquam, qui viderit.* Idem docet Cicero *Lib. I. de Legibus Cap. 8. et alibi*, alique veteres Philosophi, Historici, et Poëtae (b). Neque audiendi sunt Lokius, et Baylius, qui aliquas Africae, et Americae gentes sipe religione reportas asserunt, ut Casros, Huttentottos, Canarienses, Caraibas, Brasilienses, et silvestres homines Virginiae, Floridae, et Canadae. Constat enim, eos alicujus numinis notitiam, et religionem habuisse, ex testimonio viro- rum utique doctissimorum, qui eas gentes propius, et diligentius observarunt. Vide haec testimonia erudite collecta apud P. Monilium *Lib. Contra Fatalistas in Praef. et Patutium De futuro impiorum statu cap. 9. (c)*. Stat igitur, Dei existentiam communi omnium gentium consensione firmari, si paucos excipias atheos ( si modo sint ) hac illac dispersos, quasi a natura ha-

---

(a) Athanasius *Lib. cont. Gent. Nazianzenus Orat. XXXVI.* Justinus, sive Auctor. *Quaest. Graec. Damascenus Lib. 1. De fide Cap. 3.* Augustinus *Lib. X. Confession. Cap. 6. et Lib. VIII. de Civ. Cap. 6. et al.* Tertullianus *cont. Marcion.* Basilius *Orat. in illud Ap. Attende tibi.* Dio Chrysost. Epictetus, Simplicius, Proclus etc.

(b) V. Jaquelot *Traité de l'existence de Dieu.* Gro- tium *De J. B. et P. Lib. 1. Cap. 1.*

(c) V. et Fabricium *Apolog. pro gen. hum. contra calumn. atheismi.* La Croze *Enres sur divers sujets d'ht. etoire, Volsium de atheism. falt. susp.*



humana degeneres. Atqui omni in re consensio omnium gentium vox naturae putanda est, ut bene advertit Cicero *Lib. I. Tuscul. Cap. 13.* Nam haec universalis, et perpetua apud omnes homines persuasio nec praedictis, nec calliditati legislatorum tribui potest. Ergo etc.

II. Omnes homines legem naturalem, tamquam cordibus inscriptam gerunt; ita ut nullius magisterio edocti, quaedam bona, quaedam mala esse noscant, imo et post male facta conscientiae stimulis agitentur, et supremum malorum vindicem timeant. Atqui haec notitia nonnisi ab ipsa natura oriri potest. Ergo.

*Dices.* Si ponamus, Mundum extitisse ab aeterno, qualis nunc cernitur, atque in eo homines, animalia, plantas perpetuis generationibus sibi invicem succedentia, jam corrueant argumenta omnia metaphysica, physica, et moralia, quibus Dei adstruitur existentia. Atqui talem ab aeterno fuisse mundum, nihil habet absurdum. Ergo.

*¶ Neg. min.* Si enim mundus ab aeterno est, est utique a se ipso, atque adeo ens necessarium, immutabile, et in omni genere infinitum, et summe perfectum, ideoque Deus. Sed hoc ineptum est, et absurdum. Mundus enim corpus est; corpus autem mutabile, iners, in uno tantum genere perfectum, scilicet extensione, ac mobilitate, ceterum omnes spirituales perfectiones, intellectum, voluntatem etc. respiciens. Sed argumenta superius explicata probant, esse ab aeterno mentem necessariam, infinitam etc. Accedit, quod in generationibus, sicut et in quocunque motu, absurdus est processus in infinitum; sed semper ad primam aliquam causam deveniendum est, a qua motus inceperit, ut evidenter ostendit *S. Thomas Lib. 1. cont. Gent. Cap. 13.*

*Inst. 1.º* Licet mundus in singulis seorsim partibus mutabilis sit, et in pluribus etiam partibus iners, et cogitationis exers; non repugnat tamen ponere, totum simul mundum esse immutabilem, et duabus simul proprietatibus praeditum, extensione, et cogitatione; ita ut omnes ejus partes, omnesque motus,

et

et ipsae mentis nostrae cogitationes sint quaedam modificationes unius, et summi entis, quae quidem est opinio Spinozae, multorumque veterum philosophorum. Ergo.

*Neg. ant.* Etenim 1.<sup>o</sup> repugnat, ex partibus natura mutabilibus fieri totum immutabile; cum in proprietatibus essentialibus, quod partibus omnibus convenit, idem toti necessario conveniat. 2.<sup>o</sup> Repugnat, unam, eandemque substantiam extensione, et cogitatione esse praeditam, quae duae proprietates sese mutuo excludunt; ut Metaphysici demonstrant. 3.<sup>o</sup> Repugnat, omnes universi motus esse modificationes summi Entis; inde enim fieret, ut omnia mala physica, et moralia essent modificationes entis summe perfecti, quo quid fingi potest absurdius?

*Inst.* 2.<sup>a</sup> Sicut repugnat, uni substantiae extensionem, et cogitationem convenire, ita repugnat, mundum creatum esse ex nihilo. Ergo cum utrinque sint ambages, satius est hac de re dubitare cum Scepticis.

*Resp. Neg. ant.* Posito enim ente necessario, intelligente, atque omnipotente, jam non repugnat creatio mundi ex nihilo, ut *Lib. V.* demonstrabimus; aliud enim est, idem simul esse, et non esse, quod repugnat; aliud vero, ut quod non erat, esse incipiat.

Reliquas atheorum objectiones, in metaphysica jam solutas, omittimus.

### Scholiorum

Quaerunt hic Scholastici, utrum haec propositio: *Deus est*; sit *per se nota*. Propositionem autem per se notam vocant eam, in qua praedicatum pertinet ad ipsam essentiam subjecti, ut haec propositio; *homo est rationalis*. Sed rursus propositionem per se notam dividunt in propositionem per se notam quoad se et quoad nos. Illam vocant, in qua praedicatum pertinet quidem ad essentiam subjecti, sed hoc a nobis non statim cognoscitur: (quidquid sit de hoc loquendi modo; nam illud est notum quod cognoscitur)

Dd

hanc

hanc vero dicunt esse, in qua nos ex sola nominum notione cognoscimus, praedicatum subjecto convenire, ut est haec propositio: *totum est majus sua parte.*

His explicatis, omnes fatentur, hanc propositionem: *Deus est*; esse per se notam quoad se. cum existentia ad essentiam Dei pertineat; sed utrum sit etiam quoad nos per se nota, disputatur. Doctissimus Estius in I. Dist. III. §. 4. cum pluribus Thomistis negat, alii affirmant. Nobis Estii sententia magis placet; quae est etiam S. Thomae I. P. Q. II. art. 1. non enim est per se notum quoad nos, quod demonstratur per *media*, ab ipsis terminis distincta; sicut demonstratur Dei existentia per effectus, nempe per creaturas. Fateniur tamen, Dei existentiam esse per se notam quoad nos, si idea Dei intelligatur confuse sub ratione beatitudinis, bonitatis, et veritatis in communi.

Dices: Idea entis summe perfecti necessario existentiam includit, quae est maxima perfectio, et fundamentum aliarum. . . §. Dist. includit existentiam *idealem, conc. realem, neg.* Hoc est, si cogitas ens summe perfectum, debes illud cogitare ut existens; sed adhuc probare debes, ens hoc summe perfectum, de quo cogitas, revera existere extra mentem, nec esse unam ex ideis, quas mens fingit, nec usquam extra mentem existunt.

## §. II.

*Utrum Dei existentia possit invincibiliter ignorari.*

*Adv. I. Invincibiliter ignorari dicitur, quod nullo studio, nulla diligentia sciri ne probabiliter quidem potest, nec debet; ut fusius dicemus in Tractatu de Actibus humanis.*

II. *Molina*, et *Poncius* asseruerunt, posse hominem in toto vitae suae cursu invincibiliter ignorare Deum. Alii docuerunt, hanc ignorantiam in aliquo esse posse saltem ad breve tempus.

## PROPOSITIO

*Dei existentia a nemine potest etiam brevi tempore invincibiliter ignorari.*

*Prob.* Illud non potest invincibiliter ignorari, quod ex principiis lumine naturae notis, ratiocinio facili, ab hominibus etiam rudioribus deducitur. Atqui talis est existentia Dei. Si enim homo utcumque rudis videns aedificium, aut aliud opus affabre elaboratum, in quo singulae partes suo fini respondent, statim cognoscit, illud a sapiente artifice fuisse compositum, quanto magis videns admirabilem totius universi structuram, atque ordinem, statim concludet, esse Deum, a quo haec omnia producta, et ordinata sunt. Hinc Apostolus Rom. I. vocat inexcusabiles eos, qui non probaverunt Deum habere in notitia.

*Prob.* II. ex PP. Gregorius M. Lib. XVII. Moral. cap. 13. Omnis homo, inquit, ex ipso, quod rationalis est conditus, debet ex ratione colligere, eum, qui se condidit, Deum esse. Damascenus Lib. I. Orthod. Fid. cap. 1. Notitia Dei omnibus a natura est insita, neque id aliquis ratione utens ignorare potest. Ergo.

## Corollaria.

I. Ergo si qui sunt qui Deum ignorare videntur, in iis ignorantia haec est potius impia quaedam oblivio, et attentionis defectus, qui ex morum improbitate, atque animo vitiorum sordibus exaeccato, proficiscitur.

II. Merito damnata est ab Alexandro VIII. propositio illa. Peccatum philosophicum, quantumvis grave, in eo, qui vel ignorat Deum, vel de Deo actu non cogitat, est grave peccatum, sed non est offensiva Dei, neque peccatum mortale dissolvens amicitiam Dei, neque aeterna poena dignum.

*Objic.* Puer in silvis, vel quod peius est, inter barbaros, silvestres, et atheos homines educatus, postquam ad usum rationis pervenit, aliquo temporis spa-

tio indiget, ut harum vocum; *Deus, existit*, notionem compararet. Ergo illo saltem tempore potest invincibiliter ignorare Deum.

*¶ Dist. ant.* ut compararet hanc notionem sub ratione propria, et distincta *Deitatis*, *conc.* sub ratione confusa primae causae, *neg.* Hoc autem sufficit, ut ignorantia non sit invincibilis.

*¶ Inst.* Etsi puer ille in primo rationis usu habeat Dei distinctam ideam, tamen aliquo tempore indiget, ut ex creaturis colligat, illum existere. Ergo.

*¶ Neg. ant.* Tam clara enim est conscientiae testimonium, tam necessaria connexio creaturae cum creatore, sive effectus cum causa, ut ne momento quidem temporis possit aliquis carere saltem confusa quadam notitia Dei, si non demonstratione exquisita, at saltem probabili, et conjecturali, quae sufficit, ut ignorantia invincibilis non sit. Quod si quis voluntarie vitiis, et sceleribus immergatur, ideoque non attendat ad conscientiae, et creaturarum testimonium, iam culpa sua est.

### §. III.

#### *Utrum Dei existentia sit fidei objectum.*

*Adv.* Cum Dei existentiam naturali lumine cognosci posse, imo invincibiliter ignorari non posse, supra docuerimus, merito quaeritur, utrum illa ad fidem pertineat; Fides enim est *non apparentium Heb. XI. 1.* Et Thomistae quidem docent, Dei notitiam non esse dogma fidei, sed *praeambulam* fidei in iis, qui sciunt demonstrationes naturales, quibus Dei existentia evincitur. Estius vero *In I. Dist. III. §. 3.* sapienter distinguit in fide certitudinem, et obscuritatem. Si ergo fides ita intelligatur, quatenus utrumque complectitur, fatetur, Dei existentiam non esse *objectum* fidei in iis, qui naturales tenent demonstrationes. Si vero intelligatur *inadaequatè* pro sola certitudine objecti, docet, esse objectum fidei in omnibus, sive teneant, sive non teneant demonstrationes naturales; cumque objecti certitudo sit, quae praeci-

oipue attenditur in fide, absolute dicendum esse affirmat, existentiam Dei esse objectum fidei.

# PROPOSITIO I.

*In iis, qui non capiunt naturales demonstrationes, Dei existentia est objectum fidei.*

*Prob. I.* Apostolus Heb. XI. 6. ait; *accedentem ad Deum oportet credere; quia est.* Atqui, si hoc non esset verum saltem in iis, qui demonstrationem non capiunt, falsum esset omnino. Ergo.

*Prob. II.* In iis, qui demonstrationem non capiunt, nihil obstat, quominus existentia Dei sit objectum fidei; possunt enim illi habere hujus objecti certitudinem, et obscuritatem. Ergo.

*Dices.* Fides est eorum, quae revelavit Deus. Ergo ante fidem supponenda est notitia existentiae Dei, qui revelavit; ac proinde haec notitia ad fidem non pertinet.

*¶ Neg. cons.* Sicut enim Sol est causa, cur videatur lumen, et alia corpora per lumen illustrata, ita fides est causa, cur cognoscatur Deus, et alia a Deo revelata.

# PROPOSITIO II.

*Si fides intelligatur prout duo simul complectitur, scilicet certitudinem, et obscuritatem; existentia Dei non est objectum fidei in iis, qui naturales tenent demonstrationes.*

*Prob.* Non potest idem simul esse, et non esse simul esse evidens, et non evidens. Atqui demonstratio naturalis efficit, ut existentia Dei sit evidens; ergo non potest illa per fidem esse obscura in homine, in quo per demonstrationem naturalem est evidens. Id tamen hoc sensu intelligimus, atque hoc sensu verum esse putamus quod docent vulgo Philosophi, scientiam, fidem, et opinionem non posse simul esse in eodem subjecto de eadem re: si scilicet

scientia, et fides sumantur ambo quoad habitum, vel ambo quoad actum; nam nihil videtur ob stare, quominus in eodem subjecto de eadem re, sit habitus scientiae, et actus fidei, vel contra: ac proinde in eo, qui habitu novit demonstrationem existentiae Dei, sit de eadem re actus fidei.

### PROPOSITIO III.

*Si fides intelligatur de sola objecti certitudine, innixa divinae revelationi; Dei existentia est objectum fidei omnibus hominibus; ac proinde absolute dici potest, existentiam Dei esse objectum fidei respectu omnium.*

*Prob. 1.<sup>o</sup> pars. I.* Apostolus absolute loc. cit. de omnibus dicit: *decedentem ad Deum oportet credere quia est.* 2.<sup>o</sup> Ecclesia ab omnibus Christianis, quantumvis doctis, et ingeniosis, ad Baptismum venientibus, exigit fidem de Dei existentia; eisque recitandum, discendum, et credendum proponit symbolum, in quo primus articulus est: *Credo in Deum.* Ergo.

*Prob. II.* Si fides existentiae Dei exigeretur ab iis tantum, qui demonstrationem non capiunt, varia sequerentur absurda. Sequeretur enim 1.<sup>o</sup> Philosophum, ad Christianam religionem accedentem, minori certitudine cognoscere Dei existentiam, quam fidelem indoctum; ille enim eam cognosceret ex ratione, hic ex fide, quae est certior ratione, quia innititur firmiori momento. 2.<sup>o</sup> sequeretur, eum, qui existentiam Dei jam credidit ex fide antequam demonstrationem intelligeret, si postea intelligat etiam demonstrationem, amittere eam certitudinem, quam prius habebat, eamque cum minori certitudine commutare. Ergo.

*Prob. III.* Licet demonstratio existentiae Dei eam efficiat certam, et evidentem; constat tamen, eam certitudinem, et evidentiam posse adhuc augeri, quia non tanta est, quanta erit in patria per visionem. Sicut ergo per visionem augetur certitudo, et evidentia scientiae, non destructa ipsa scientia, ita per

per fidem augetur certitudo ipsius scientiae, licet non augeatur evidentia, nec per maiorem illam certitudinem evidentia scientiae destruitur.

*Prob. 2.<sup>a</sup> pars.* Obscuritas, quae est in rebus fidei subjectis, non producit ab ipsa fide, sed ab imbecillitate mentis humanae, non valentis percipere rationes rei revelatae; ac proinde considerari potest, ut *accidens* ipsius fidei, certitudo vero, ut *essentialis*. Cum ergo omnibus fidelibus insit certitudo fidei de Dei existentia; ex accidenti autem fiat; ut in quibusdam haec certitudo conjuncta sit cum obscuritate, in aliis cum evidentia; absolute dici debet, existentiam Dei esse objectum fidei. De rebus enim loquimur secundum ea, quae sunt ipsis *essentialia*; non secundum *accidentalibus*.

## §. IV.

*Unus tantum existit Deus.*

*Ado.* Dei unitatem oppugnaverunt 1.<sup>o</sup> Gentiles, id est Polytheistae appellati, qui *creaturae servientes potius, quam Creatori*, ut loquitur Apostolus Rom. I. 25. res innumeras, etiam brutas, et irracionales, imo ipsa hominum vitia pro Diis habuerunt. 2.<sup>o</sup> Simoniaci, Marcionitae, et Manichaei, d<sup>no</sup> rerum principia statuentes, bonum, et malum. Quorum historiam haereticorum erudite prosequitur Joan. Christophorus Wolphius in libro *De Manichaeismo ante Manichaeos*. 3.<sup>o</sup> Tritheitae IV. saeculo, qui, duce Joanne Philopono, tres SS. Trinitatis personas tres esse Deo asserebant, quia in re iis praeciverant aliquot obscuri nominis haeretici vetustioribus saeculis.

## P R O P O S I T I O.

*Unus tantum existit Deus. Est dogma fidei.*

*Prob. I. ex Scriptura. Deuteron. VI. 4. Audi Israel: Dominus Deus noster, Dominus unus est. Et ib. XXXII. 39. Videte, quod ego sim solus, et non sit alius Deus*  
prae



*praeter me: Psal. XVII. Quis Deus praeter Dominum, aut quis Deus praeter Deum nostrum? Et Joan. XVII. 3. Haec est vita aeterna, ut cognoscant te, solum verum Deum. Et Ephes. IV. 6. Unus Deus et pater omnium, qui est super omnes, Ergo etc.*

*Prob. II. ex PP. praesertim priorum saeculorum, qui scribentes contra Gentiles, potius polytheismum, quam atheismum impugnarunt, ut Athenagoras, Justinus, Minucius Felix, Tertullianus, Cyprianus, Arnobius, Lactantius, Eusebius, Clemens Alex. Augustinus, et alii (a). Eorum loca vide apud Petavium Lib. I. cap. 3.*

*Prob. III. ratione. 1.º Si plures essent Dii, omnes deberent esse a seipsis, ac proinde omnes deberent in hoc genere convenire, distingui verò a se invicem per differentias vel specificas, vel individuas. Atqui hoc posito, alter non haberet perfectiones alterius, ideoque non esset ens perfectissimum, et summe bonum, ut patet. Ergo si plures fingerentur Dii, nullus esset Deus. Recte Tertullianus Lib. I. cont. Marc. cap. 3. Deus inquit, si non unus est, non est.*

*Idem probatur 2.º ex consensu Gentilium Philosophorum, qui licet exterius falsam populi religionem sequerentur, et veritatem Dei in injustitia detinerent Rom. I. 18. tamen unum esse Deum fatebantur. Eorum plura testimonia videre est apud Athenagoram, aliosque supra commemoratos (b); 3.º ex ipso ordine, et structura universi, in quo ita omnia secum apta sunt, atque ad unum finem composita, ut non nisi ab uno Deo condì, regique potuerint, ut evidens.*

(a) Athenagoras *Legat. pro Chist.* Justinus, vel quivis auctor *Cohors ad Græc. et Lib. de Monarchia*, Minucius in *Octavio*, Tertullianus in *Apolog.* et *Lib. de testim. animi*, Cyprianus *Lib. de Idol. vanit.* Arnobius *Lib. II. cont. Gent.* Lactant. *Lib. I. Instit.* et *Lib. De ira Dei*, Clemens Alex. in *Protrept.* et *Lib. VII. Strom.* Euseb. *Lib. XIII. De Praep. Evarg.* Augustinus *Lib. 6. De Civ. Cy. rillus Alex. Lib. I. cont. Julian.* Athanasius *Lib. cont. Gent. etc.*

(b) *Vid. Fluctium in Alnesanis Lib. II. Cap. 2. et Pflannerum in System. Theologiae Gentil. Purioris Cap. 2. § 2.*

denique ostendunt Minucius Felix in *Octavio*, et Athanasius *Lib. cont. Gentiles*; 4<sup>o</sup> ex ipso conscientiae testimonio. Ipsi enim Gentiles in rebus adversis non falsa numina, sed unum Deum invocare consueverunt (a): o Deus, o bone Deus etc. quod Tertullianus appellat *testimonium animae naturaliter Christianae Apolog. cap. XVII*. Imo plerique inter immensam inanium Deorum turbam unum quendam supremum cognovere Deum, quem fortasse ab Hebraeo nomine *Jehova*, Jovem appellarunt. Vide *S. Thomam Lib. I. Cont. Gent. et P. I. Summae*.

Porro contra Manichaeos speciatim evincitur, praeter unum Deum summe bonum, non posse alium excogitari summe malum. Nam 1.<sup>o</sup> malum est boni privatio, ac proinde summum malum est privatio cujuscunque boni, ideoque nihil est; si enim est, jam aliquid habet boni, ipsam nempe existentiam. 2.<sup>o</sup> Si duos fingamus Deos, bonum, et malum; cum sint ambo infiniti; propter aequalem, et contrariam utriusque vim, vel neuter quidquam posset efficere, ideoque nec esset omnipotens, nec Deus; vel si alter, altero invito, potestatem suam in alterius opera exerceret, uterque imbecillus esset, ideoque nec esset Deus; Ergo etc. Vide haec fusius apud Natalem Alex. *Hist. Eccl. Saec. II. Dissert. XVI*.

*Solvuntur objecta.*

*Obje. I. Psalm. LXXXI. Deus stetit in Synagoga Deorum. Et Apostolus I. Cor VIII. 5. Siquidem, inquit, sunt Dii multi, et Domini multi. Ergo etc.*  
*¶ Neg.*

(a) Etiam de Atheis, qui se forticulos praebere satagunt, ita canit ipse Lucretius *Lib. III*.

*... Multoque in rebus acerbis*

*Acrius adveniunt animos ad Religionem.*

*Quo magis in dubiis hominem spectare periculis*

*Convenit, adversisque in rebus nocere qui sit.*

*Nam verae voces sum demum pectore ab imo*

*Eliciuntur, et eripitur persona, manet res.*

*n. Neg. cons.* In Psalmis enim, aliisque Scripturae locis Dii appellantur homines, in quibus divina potestas elucet. *Ego dixi Dii estis, et filii Excelsi omnes: vos autem sicut homines moriemini.* Apostolus vero loquitur de falsa Gentilium opinione; ait enim; *Sunt qui dicuntur Dii, sive in caelo, sive in terra; siquidem sunt Dii multi, et Domini multi; nobis autem unus est Deus.*

*Inst.* Scriptura Deos gentium agnoscit, ut veros dominos earum regionum, in quibus colebantur. Ait enim *Jephthe Ammonitis Judic. XI. 24. Nonne ea, quae possidet Chamos Deus tuus, tibi jure debentur? Quae autem Deus noster victor obtinuit, in nostram cedent possessionem.* Ergo etc.

*n. Neg. ant.* Verba enim *Jephthe* dicta sunt ad hominem contra Ammonitas, qui falsa Gentilium opinione putabant, unicuique genti peculiarem praeesse Deum. Ex quo principio, licet falso, sed ab adversariis recepto, recte arguit *Jephthe*: Sicut vos defenditis regiones vestras, quas dicitis a *Chamos* possideri, ita nos defendimus regiones, quas nobis Deus noster jure belli per admirabiles victorias concessit, quasque tot annorum possessione praescripsimus.

*Objic. II.* Negari non potest, multa esse in mundo mala. Ergo agnoscendum est primum aliquod mali principium; quod cum non possit esse Deus bonus, duo rerum principia ponenda sunt, bonum, et malum; id est duo Dii.

*n. Dist. ant.* Mala existunt improprie, tamquam aliquid negativum, sive tamquam privatio boni, quod supponunt ante se, *conc.* Existunt proprie, tamquam aliquid positivum, *neg.* Quare *neg. cons.* Cum enim malum nihil aliud sit, nisi boni privatio; vel negatio, ejus prima causa non est efficiens, sed deficiens. Ita voluntas creata, cum non sit summe perfecta, potest a summo bono deficere, atque ita peccare. Dixi autem generatim, mala improprie existere, tamquam aliquid negativum, quod convenit malis moralibus, quae proprie mala sunt; mala enim physica, quae positive existunt, non sunt vere mala, sed bona quaedam, quae quia displicent iis, qui sum-

imus

mun bonum non amant, a quo ista fiunt, dici solent mala; cum revera bona sint, quibus utitur Deus vel ad puniendos malos, vel ad servandum ordinem universi.

*Inst.* Si unus esset Deus, isque summe bonus, non permetteret mala moralia, seu non permetteret, creatas voluntates a summo bono deficere; quod utique facere posset, salva earum libertate, per gratiam, quam Theologi appellant efficacem. Ergo.

*¶. Dist. ant.* Non permetteret mala moralia, si non esset adeo sapiens, omnipotens, et bonus, ut sciret etiam, et posset bona facere de malis, *conc.* Secus, *neg.* Deus omnipotens, inquit Augustinus *Enchir.* Cap. 11. nullo modo sineret mali aliquid esse in operibus suis, nisi usque adeo esset omnipotens, et bonus, ut bene faceret etiam de malis. Bona autem, quae Deus e malis eruit, quaedam hic videntur a nobis, ut exaltatio Josephi ex invidia fratrum, constantia martyrum ex persecutione tyrannorum: quaedam vero pertinent ad inscrutabilia judicia Dei, et videbuntur in patria; ubi clare intuebimur in Deo ipso rationes aeternas, quibus ipse universum gubernat.

*Objie. III.* Tres sunt in Deo personae. Ergo tres Dii.

*¶. Neg. cons.* Ut enim essent tres Dii, tres etiam deberent esse naturae divinae. Et in rebus quidem creatis, quae finitae sunt, ubi plures sunt personae, plures etiam naturae sunt, quia una persona, omnem exhaurit modum, quo natura una potest existere. Non ita autem se res habet in natura infinita, quae licet una, tribus tamen modis subsistit. Sed de hoc plenius in *Lib. seq.* ubi dicemus de Trinitate.

## C A P. II.

### De natura, sive essentia Dei.

*Adv. I.* **E**Unomius, teste Theodoro, *Lib. IV. Haeret. Fab.* Cap. 3. jactabat, se nosse Dei naturam, non secus ac eam novit ipse Deus.

II. Catholici omnes docent, Dei naturam, sive essentiam hic a nobis ignorari. Si enim rerum creaturarum naturae, quae finitae sunt, mentis nostrae aciem fugiunt, multo magis natura Infiniti.

III. Nihilominus cum varias Dei proprietates, sive attributa per revelationem simul, et rationem noscimus, quae quidem proprietates in Deo sunt unum simplicissimum ens, sed a nobis singillatim considerantur, quia non possumus eas omnes uno simul mentis intuitu complecti; ideo quaerimus, quatenam inter Dei proprietates sit prima, ex qua ceterae, nostro intelligendi modo, tamquam ex radice manant, quamque Dei naturam, sive essentiam appellamus.

IV. Scotistae proprietatem illam, quam inquirimus, volunt esse *infinitem radicalem*, ut ajunt: Nominales *infinitem actualement*, seu cumulam omnium perfectionum: Thomistae *intellectionem actualement*: reliqui passim Theologi esse ens a se, quam sententiam illustrat, ac tuctur Petavius, quem sequuntur Berti, Tournely, Boucat, Lodovicus Hubert, Juënius, alique Theologi. Nomine autem Entis a se non intelligunt ens aliquod limitatum, sed ipsum esse non limitatum, aut circumscriptum in aliquo peculiari genere, sed complectens quidquid entis nomine significari potest.

## PROPOSITIO I.

*Dei natura, sive essentia non potest hic a nobis naturaliter cognosci. Est dogma fidei.*

Prob. I. ex Scriptura. Eccli. XLIII. 35. Quis videbit eum, et enarrabit? Et Isaiae XLV. 15. Vere tu es Deus absconditus. I. Tim. VI. 16. Lucem inhabitat inaccessibilem. Ergo.

Prob. II. ex PP. Auctor Libri De Trinitate inter opera Tertulliani Cap. 7. Id quod est (Deus), inquit, secundum id quod est, nec humano sermone dici, nec humanis auribus percipi, nec humanis sensibus colligi potest. Vide etiam Patres, qui contra Eunomium scripserunt, praecipue Gregorium Naz. Orat. XXXIV. et Basilium Lib. II, cont. Eunom. Et generatim docent Pa-

Patres, quid non sit Deus, posse intelligi, at quid sit, intelligi non posse. Unde Augustinus in Psalm. LXXXV. n. 12. *Intendat charitas vestra: Deus ineffabilis est; facilius dicimus quid non sit, quam quid sit..... Quæris quid sit? quod oculus non vidit, nec auris audivit, nec in cor hominis ascendit. Quod et agnoverunt gentiles Philosophi. Ammonius in Categor. Aristot. Cum Timæum interrogasset Socrates: quid est Deus? respondit ille: quid non sit scio, quid sit autem, nescio.*

Prob. III. ratione. Natura Dei est si mul simplicissima, et infinita; at quod est infinitum, non potest mens naturaliter uno, et simplici actu, ut est in se, cognoscere. Ergo.

Corollarium.

Hinc sequitur, Deum esse ineffabilem, hoc est, nullo nomine ejus essentiam, prout est in se, clare designari. Hinc Prov. XXX. 4. *Quod nomen est ejus, et quod nomen filii ejus, si nosti? Justinus in Cohortat. ad gent. Fieri non potest, ut proprium aliquod Deo nomen attribuat. Vide alia PP. et Philosophorum testimonia apud Thomassinum Lib. VI. Theol. dogm. cap. 5. Petavium Lib. VIII. cap. 6. et Huetium in Alnetanis. Habent quidem Hebraei decem Dei nomina quorum præcipua sunt 1.º יהוה Jehova nomen τετραπαραμυτον quod soli Deo tribuitur in Scripturis, ab eoque pronunciando Hebraei abstinent, imo veram ejus prononciationem ignorant. Patres, et linguae Hebraicae periti varie prononciant; communiter tamen post Petrum Galatinum dicunt Jehova, Qui est. 2.º אדוני Adonai Dominus. 3.º אלהים Elohim Princeps, Judex. Sed haec nomina, et alia apud varias nationes usurpata, ut θεός apud Graecos, apud Latinos Deus, essentiam Dei, non prout in se est, sed prout a nobis intelligitur, exprimunt. Vide de variis Dei nominibus Petavium Lib. VIII. cap. 9. Angelum Caninium de Loc. Hebraic. cap. 2. et alios.*

## PROPOSITIO II.

*Infinitas sive radicalis, sive actualis non est primum attributum, quod in Deo mente concipimus, quodq. essentiam vocamus.*

*Prob. 1.º* Illud non est primum Dei attributum, quod ab alio fluere intelligimus; atqui infinitatem ab alio fluere intelligimus, nempe ab *existentia a se*. Ideo enim Deus est infinitus, quia a se existit, ideoque ens necessarium est, atque a nullo ejus essentia limitari, et circumscribi potest. Ergo.

*2.º* *Infinitas* est modus existendi; atqui modus existendi non potest constituere rei essentiam, unde ait Titus Bostrensis *Lib. 1. cont. Manich. Esse prius quodammodo est cogitatione, quam talem esse*. Ergo.

## PROPOSITIO III.

*Intellectio non constituit Dei essentiam.*

*Prob. I.* Intellectio vel pro facultate intelligendi ponitur, vel pro ipso actu intelligendi. Atqui neutro modo posita constituit Dei essentiam. Essentia enim debet esse prima in re, et radix omnium proprietatum. Atqui intellectio, utrovis modo accepta, non est prima, quae mente concipitur, nec est radix omnium Dei attributorum. Non quidem est prima, quae mente concipitur in Deo; nam prius est esse, quam facultatem habere intelligendi, aut actu intelligere, quippe facultas operandi, et ipsa operatio sequitur naturam, a qua promanat. Nec ab ipsa intellectione fluunt reliquae Dei proprietates; nam non idcirco Deus mente concipitur omnipotens, aut misericors, quia est intelligens. Ergo.

*Prob. II.* Idipsum insinuant Scriptura, et Patres. Scriptura quidem; nam *Job. XII. 13.* dicitur *Apud ipsum est sapientia, et fortitudo: ipse habet consilium, et intelligentiam*, ubi sapientia, et intelligentia, non secus ac omnipotentia describuntur tamquam proprietates

tates, quarum subjectum est Deus; ac proinde adjiciuntur; et afficiunt nostro intelligendi modo essentiam divinam. Ex Patribus vero satis est citare Chrysostomum *Orat. I. de Incomprehensib. Dei nat.* Non a sapientia, inquit, substantia, sed a substantia sapientia est.

Objectiones Scotistarum, et Thomistarum satis multas omittimus, ut in gravioribus postea possimus esse copiosiores. Paucæ ista, quæ diximus, sufficiunt; ut non omnino Scholarum morem contempsisse videamur.

#### PROPOSITIO IV.

*Essentia Dei, seu primum, quod in Deo concipimus, attributum est esse a se.*

*Prob. I. ex Scriptura.* Ipse Deus *Exod. III. 14.* a Moyse interrogatus; quodnam esset nomen ejus, respondit: *Ego sum qui sum, sic dices filiis Israel: qui est misit me ad vos.* Et *Job. XXIII. 13.* de Deo ait: *Ipse solus est.* Sic et in Apocalypsi legitur *Cap. I. 4.* *Gratia vobis ab eo; qui est, et qui erat, et qui venturus est.* Quibus verbis existentia dicitur ita Dei propria, ut ipsa sit nomen ejus (quod utique ad designandam rei essentiam, quantum intelligi a nobis potest, imponitur) eumque a creaturis distinguat. Atqui existentia, quæ est Dei propria, est existentia a se, quia creaturis etiam convenit existentia, sed ab alio pendens. Ergo.

*Prob. II. ex PP.* Hilarius *Lib. I. de Trin. n. 5.* in ea verba Exodi: *Ego sum, qui sum: Admiratus sum,* inquit, *tam absolutam significationem, qua naturæ Divinæ incomprehensibilem cognitionem aptissimo ad intelligentiam humanam sermone loqueretur.* Non enim aliquid magis proprium Dei, quam esse intelligitur, quia idipsum, quod est, neque desinentis est aliquando, neque coepti: scilicet verbum est significat esse necessarium, et æternum, sive quod a se existit; cum creaturæ quæ existunt ab alio, dicantur non esse *Job. loc. cit.* In eandem sententiam loquuntur Justinus



nus in *Exhort. ad Graecos*. Clemens Alex. *Lib. 1. Paedagogi cap. 8.* Ambrosius in *Psalm. XLIII.* Epiphanius *Haeres. LXIX. n. 7.* alique (a).

*Prob. III. ratione.* Esse a se est primum, quod in Deo mente concipimus, et ex quo tamquam ex radice caeterae proprietates prodire intelliguntur. Est quidem primum; nam quodcumque de Deo cogites, superadditur esse a se; prius est enim esse a se (nostro intelligendi modo) quam esse sapientem, potentem, justum, etc. Est vero veluti radix, a qua caeterae proprietates prodire intelliguntur, quia ex eo quod Deus est ens a se, sequitur, cum esse ens necessarium: et ex quo est ens necessarium, sequitur, eum esse infinitum, cum nullum ens finitum fingi possit necessarium: denique ex quo est ens infinitum, sequitur, cum omnes alias habere proprietates, quia si vel una careret, jam non esset infinitus. Ergo.

2.<sup>o</sup> Illud est essentia Dei, quod Deum ab omnibus aliis entibus distinguit; nam idem est *constitutum*, et *distinctivum*, ut scholae loquuntur. Atqui esse a se distinguit Deum 1.<sup>o</sup> ab omnibus creaturis, quarum essentia est, ut sint ab alio, tamquam a causa; 2.<sup>o</sup> distinguit *virtualiter* essentiam divinam ab ipsis attributis divinis, quae sunt ab alio, scilicet ab essentia divina, tamquam ab radice. Ergo. Hinc Graeci nonnulli Philosophi Dei naturam in eo ponunt, ut sit. Ita Plato in *Timaeo*. Plutarchus *Libro De si apud Delphos*, Plotinus, Numenius, etc.

### *Diluuntur Objecta.*

*Objic. I.* Si essentia divina constitueretur in eo, quod est a se, Filius, et Spiritus Sanctus non essent

---

(a) Hieronymus in *Cap. III. ad Ephes.* Augustin. *Tract. XXXIII. in Joan. et al.* Auctor *lib. de Cognitione verae vitae. Cap. 7. Tom. IX. Opp. August. Nazianzenus. Orat. XXXVI.* Dionysius *Lib. de Div. nom. Cap. 4.* Bernardus *Lib. 1. de consid. Cap. 6.*

sent Deus ; nam Filius , et Spiritus Sanctus sunt ab alio. Falsum consequens ; ergo et antecedens.

¶. *Neg. seq. maj. Ad confirm. Dist. ant.* Filius , et Spiritus Sanctus sunt ab alio tamquam a causa , *neg.* sunt ab alio tamquam a principio , *subdist.* ratione personae , *conc.* ratione naturae , *neg.* Cum igitur Pater generat Filium , ei communicat eandem numero naturam divinam , quae nec gignit , nec gignitur , ideoque sicut natura Patris est a se , ita et natura Filii , quae eadem numero est. *Persona* quidem Filii producitur , et est a Patre non tamquam a causa , a qua pendeat , sed tamquam a principio , cum quo ejusdem est naturae. Idem dicas de processione Spiritus S. a Patre , et Filio. Quod autem persona Filii , et Spiritus S. est ab alio tamquam a principio , non destruit , sed magis confirmat sententiam nostram , quia ex hoc patet , *esse a se* , ita esse proprium essentiae divinae , ut eam *virtute* distinguat ab ipsis *personalitatibus* , ut loquuntur Scholastici , quae sunt ab alio tamquam a principio.

*Objic. II.* Essentia Dei constituenda est in aliquo Dei attributo perfectissimo. Atqui perfectius est esse intelligens , infinitum etc. quam simpliciter esse a se. Ergo.

¶. *Dist. maj.* Constituenda est in aliquo perfectissimo , quod sit primum , et radix ceterorum attributorum , *conc.* Secus , *neg.* Nego etiam *min.* Nam nomine entis a se intelligimus ipsum esse non limitatum in aliqua essentiae specie , sed omnes vel *formaliter* , vel *eminenter* continens. Hinc Damascenus *Lib. I. Cap. 12.* Videtur , inquit , omnium , quae de Deo dicuntur , nominum maxime proprium Ens , sicut Moysi respondens in monte dixit : Dic filiis Israel : Qui est misit me. Totum enim in seipso comprehendens habet esse , velut quoddam essentiae pelagus infinitum , et interminatum.

*Inst.* Ens est genus remotissimum , ac supremum , quod naturales rei proprietates non explicat. Atqui essentia rei cujuslibet definiri debet per proximum genus , unde male homo definiretur *ens rationale* , recte vero *animal rationale*. Ergo Dei natura definiri non debet *ens a se* , sed *intelligens* , ac *vivens a se*.

E c

¶. *Dist.*

*¶ Dist. maj.* Si nomen entis adhibeatur ad significandum aliquid finitum, ac terminatum, *con.* Si adhibeatur ad significandum ipsum esse infinitum, ac in terminatum, complectens quidquid entis nomine significari potest, *neg.*

*Scholion.*

Quia nomen *entis* alio sensu Deo attribuitur, ac creaturis, ideo Patres saepe docent, *essentiae, substantiae, verae* nomina Deo non convenire; non quia non sit ens, ac substantia, sed quia non sit eo sensu, quo ista nomina passim usurpamus, sed supra essentiam, et supra substantiam, ut *Dionysius, Damascenus*, aliique docent. *Substantia in illo non est vere substantia, sed ultra substantiam*, inquit Boëtius *Lib. de Trin.*

*Corollarium.*

Quoniam igitur solus Deus est a se, ceterarum autem rerum natura est esse ab alio, hinc sequitur, creaturas omnes ita a Deo pendere, ut radios a sole, cujus influxus si vel uno momento cessaverit, evanescent. Quicquid igitur videmus, sentimus, aut etiam patimur, a Deo est, qui omnia per creaturas operatur, excepto peccato; ac proinde in omnibus semper Dei majestatem, potentiam, sapientiam revereri debemus.

C A P. III.

*De divinis attributis generatim.*

*Adv. 1.* **A**tributa a Theologis dicuntur perfectiones, quae essentiae jam constitutae superaddi, ab eaque tamquam ab radice prodire intelliguntur: quaeque Graeci Patres, ut Gregorius Nyss. *Lib. II. cont. Eunom. ἀγνώματα, ιδιότητες, ποικίλα*: Latini, ut Tertullianus *Lib. I. cont. Marc.* proprietates appellant. Licet enim omnia in Deo sint

sint unum, tamen mens nostra, non valens uno simul intuitu complecti omnia, quae revelatione, vel ratione de Deo cognoscit, ea veluti per partes contemplatur, atque ideo quaedam statuit tamquam constituentia ipsius essentiam, quaedam vero ab essentia ipsa prodeuntia: quod non est tantummodo Scholasticorum commentum, sed a Patribus etiam usurpatum. Ait enim Chrysostomus *Homil. LXXIV. in ea verba Joan. XIV. 8. Domine ostende nobis Patrem; Videamus quid Philippus videre quærat, num sapientiam Patris? num ejus bonitatem? minime, sed quid sit Deus, ipsam substantiam.*

II. Dei attributa alia *absoluta* sunt, alia *relativa*. Absoluta dicuntur, quae ad ipsam pertinent Dei naturam, communiaque sunt tribus personis, nec significant relationem ad aliud, ut omnipotentia, aeternitas etc. Ea rursus dividuntur in affirmantia, quae aliquam perfectionem Deo tribuunt, ut justitia, bonitas; et negantia, quae aliquam imperfectionem Deo negant, ut *infinitas, immensitas*. Haec negantia attributa melius explicant quae cogitamus de Deo, de quo facilius dicimus, quid non sit, quam quid sit, ut supra diximus. Vide etiam Dionysium *De Myst. Theol. cap. 2. et de Caelesti Hierarc. cap. 2.* Relativa attributa sunt, quae explicant relationem ad aliud. Eaque iterum dividuntur in relativa *ad intra*, et *ad extra*. Illa sunt, quibus tres divinae personae intra ipsam Dei essentiam ad se mutuo referuntur, ut Paternitas, Filiatio, Spiratio; ista vero, quibus designatur creaturarum ad Deum relatio, sive habitudo, ac subjectio, qua ab illo pendent, tamquam effectus a causa, ut esse creatorem, dominum, provisorem (a).

E e 2

III.

(\*) Celebris etiam est apud Scholasticos quaedam attributorum divisio in *modificativa* sive *transcendentia*, ut *ajunt, et adjuncta*. Prima sunt veluti interni ipsius essentiae modi, dicunturque *transcendentia*, quia *transcendunt*, seu pervadunt omnia attributa; sicut aeternitas ex. gr. de omnibus attributis praedicari potest. Alia vero attributa dicuntur *adjuncta*; quia essentiae jam constitutae advenire intelliguntur, ut justitia, misericordia. Quidquid de hac divisione sit, parum videtur habere utilitatis.

III. De attributis ergo divinis quaeritur, quomodo inter se, et ab essentia divina distinguantur. Distinctio primum duplex est, alia *realis*, alia *rationis*. *Realis* est quae, etiam nemine cogitante, intercedit inter res duas; eaque rursus triplex, *major*, *minor*, et *formalis*. *Distinctio realis major* est, quae intercedit inter duas res vel separatas, ut Petrus, et Paulus, vel separabiles, ut anima, et corpus, vel per relationem oppositas, ut in divinis Pater, et Filius. *Realis minor*, quae et *modalis* dicitur, intercedit inter rem, et modum ab ipsa re separabilem, ut inter hominem, et ejus sapientiam. *Formalis*, quae et *Scotistica* dicitur, inventa est a *Scoto* inter varia rei attributa, quae etsi unam habeant existentiam, diversam tamen habent formam, seu naturam, ac definitionem, ut justitia, et misericordia. *Distinctio rationis* est, quae non est in re, sed fit cogitatione mentis nostrae, eaque iterum duplex vulgo statuitur in Scholis: altera dicitur *rationis ratiocinantis*, alia *rationis ratiocinatae*. Illa fit cogitatione sine fundamento in re, ut si quis cogitatione distingueret Simonem, Petrum, et Cephā; ista e contrario cum fundamento in re, cum scilicet res una multis aequivalet. Haec distinctio, si in ipsa re consideretur, dicitur *distinctio virtualis*.

IV. His explicatis, *Aëtius*, et *Eunomius* Ariani nullam inter Dei attributa distinctionem ne *rationis* quidem esse docebant. Ex quo inferbant, Verbum non esse Deum, quia cum esse *ingenitum*, quod est Patris attributum, nulla ratione ab essentia divina distingui posset, cumq. Filius non sit ingenuus, concludebant, illum non esse Deum. Vide Basilium *Lib. I. cont. Eunom.* Gregorium *Niss. Lib. I. cont. eund.* Epiphanium *Haeres. LXXVI.* Ab hoc errore non multum recedere visi sunt *Nominales* Scholastici, qui duce *Guillelmo Okam* solam rationis ratiocinantis distinctionem in divinis agnoscunt, sive solam distinctionem nominum.

V. E contrario *Theodorus Mopsuestenus*, teste *Leontio Byzantino Lib. III. cont. Nestor.* divinam essentiam ab attributis reapse distingui opinatus est; quoniam

quem errorem deinde secutus est *Gilbertus Porretanus* Pictaviensis Episcopus medio circiter XII. Saeculo, at damnatum in Concilio Rhemensi ejuravit. Rem nar- rant Bernardus, acer ejus adversarius *Serm. LXXX.* in *Cant. Otho Frisingensis Lib. I. Hist.* In eundem scopulum impigit Gregorius Palamas Episcopus Thes- salonicensis Saec. XIV novam distinctionem commi- niscens inter essentiam Dei, ejusque increatam *εὐεργε- τειαν*, sive operationem, acriter confutatus a *Barta- lamo* Episcopo Hieracensi, et *Gregorio Acyndino* (a). Nec multum a Gilberti sententia recessit Scotus cum sua formali distinctione.

VI. Non satis constat inter eruditos, utrum *Gil- bertus* distinctionem realem agnoverit inter essentiam, et omnia Dei attributa, itemque inter ipsa invicem attributa; an vero solum inter essentiam, et attributa relativa, seu inter essentiam, et personarum divinas. Petavius *Lib. I. de Deo Cap. 8.* alique passim priorem sententiam sequuntur, et probant ex verbis *Bernardi. Vasquez Disp. CXVI. in 1. p. cap. 2.* et *Frassen* poste- riorem sententiam probant ex *Othone Frisingensi*, quem tamen constat, fuisse in *Gilbertum* paulo pro- pensiozem, et morti proximum, quae pro *Gilberto* scripserat, Ecclesiae judicio subjecisse, ut *Radevicus* ejus *Continuator Lib. II. Cap. 11.* memoriae prodidit.

## PROPOSITIO I.

*Nulla est agnoscenda in Deo realis distinctio neque inter essentiam, et attributa, neque inter ipsa invicem attributa. Est fidei dogma.*

*Prob. I. ex Scriptura.* Ea, quae de se invicem praedicantur, non sunt reapse distincta. Atqui in Scripturis essentia, et attributa divina de se invicem praedicantur. *Prov. VIII. 12.* Deus dicitur sapientia. Ego

---

(a) Vide haec apud Leonem Allatum *De Ecclesiae Oecid. atque Orient. perpetua consens. Lib. II. cap. 7.* Multa etiam de his habet Dupinus in *Biblioth. Saec. XIV.*

*Ego sapientia habito in consilio. Et Joan. XIV. 6. Ego sum via, veritas, et vita. Ergo etc.*

*Prob. II. ex Patribus. 1.º Basilii Lib. I. cont. Euzom. et Gregorius Nyssen. Lib. XII. cont. eundem docent. Dei attributa mente solum, sive κατ' ἐννοίαν distinguunt. 2.º Augustinus Lib. V. de Trin. Cap. 10. Deus, inquit, non ea magnitudine magnus est, quae non est, quod est ipse, ut quasi particeps ejus sit Deus, cum magnus est; alioquin illa erit major magnitudo, quam Deus. Deo autem non est aliquid majus. Ea igitur magnitudine magnus est, quae est ipse eadem magnitudo. Et ideo sicut non dicimus tres essentias, sic nec tres magnitudines. Hoc est enim Deo, esse, quod magnum esse... quia ipse sua est magnitudo. Hoc et de bonitate, et de aeternitate, et de omnipotentia Dei dictum sit, omnibusque omnino praedicamentis, quae de eo possunt pronunciari. 3.º Idem docent Fulgentius Resp. ad Perand. Epist. XIV. Gregorius M. Lib. XVI. Moral. cap. 43. Isidorus Hispal. Lib. I. de summo bono Cap. I. Anselmus Monolog. Cap. XVII. et praecipue Bernardus Lib. V. de Consid. Cap. 7. et Sermon. LXXX. in Cantic.*

*Prob. III. ex Conciliis. Damnatus enim est hic error 1.º in Concilio Rhemensi coram ipso Eugenio III. 2.º in Concilio Lateranensi IV. sub Innoc. III. in quo damnatus est error Abbatis Joachim, de quo suus erit in sequenti Libro dicendi locus; atque expresse definitum, in Deo Trinitatem esse, non quaternitatem, quae quidem quaternitas sine dubio ponitur, si essentia ab attributis relativis reapse distinguitur. 3.º denique in Concilio Florentino, ubi inter omnes Graecos, Latinosque convenit, in Deo omnia esse unum, et idem, ubi non obviat relationis oppositio, qualis est ex. gr. inter Patrem, et Filium.*

*Prob. IV. ex Theologicis rationibus, quas profert Bernardus loc. cit. contra Gilbertum. 1.º Si divinitas ex. gr. non esset Deus, sed a Deo distincta, vel esset major, vel minor, vel aequalis Deo. At non potest esse major, nihil enim Deo majus est; non minor, cum ipsa constituat Deum; non aequalis, quia nihil est a Deo distinctum, quod Deo possit aequa-*

aequari, alias essent duo summa bona, quod repugnat. Idem dicas de bonitate, sapientia, omnipotentia, caeterisque attributis. Ergo.

2<sup>o</sup>. Deo nihil melius, et perfectius excogitari potest. Posset autem aliquid excogitari perfectius, si ejus attributa distinguerentur ab essentia, aut a se invicem; nam posset excogitari ens simplicius, in quo nulla esset attributorum distinctio. Ergo.

Corollarium.

Ergo cum sententia *Gilberti* rejicienda est etiam *formalis distinctio Scoti*. Quae enim *formaliter* distinguuntur, habent formas, seu naturas distinctas. Sed quae naturas habent distinctas, distinguuntur reipsa. Ergo si removenda est a divinis distinctio realis, etiam *formalis* removenda est.

Solvuntur objectiones.

*Objic. I.* Patres docent, distinguere essentiam Dei ab attributis praesertim relativis. Ita *Augustinus Lib. VII. de Trin. Cap. 4.* Deo Patri, inquit, aliud est, quod Deus sit, aliud, quod Pater sit, quia Deus dicitur ad se, Pater ad Filium. Et *Nazianzenus Orat. XXXI.* Quid? an etiam immortalitas, innocentia, et immutabilitas essentia Dei sunt? Ergo.

¶ *Dist. ant.* Docent distinguere virtute, et per mentem, sive ratione ratiocinata, *conc.* Distinguere reipsa, sive realiter, *neg.* Idem enim *Augustinus*, alique Patres locis sup. cit. omnem realem distinctionem prorsus a Deo remouent. Patet autem responsionis nostrae veritas ex eorundem Patrum scopo. Agebant enim contra *Eunomianos*, qui distinctionem rationis praefracte negabant. Unde inquit *Basilus Lib. I. cont. Eunom.* Cum Deus unum sit secundum subjectum, sitque una substantia simplex, et non composita, alias aliter seipse nominat, diversas appellationes inter se ratione discernentes sibi ipse accommodans.

*Inst.* *Chrysostomus loc. sup. cit.* docet, *Philippum* non petiisse a Christo, ut videret sapientiam, aut  
be-



bonitatem Patris, sed ipsam substantiam. Ergo distinguit attributa ab essentia.

*¶. Dist. ant.* Non petit videre sapientiam, aut bonitatem, qualis imperfecte cognoscitur per creaturas, *conc.* Non petit videre sapientiam, aut bonitatem Patris, ut in se est, *neg.* Si quis enim sapientiam, aut bonitatem Dei clare, ut in se est, intueretur, is ipsam videret Dei substantiam, a qua reipsa non distinguitur sapientia, sicut et cetera attributa. Sed quia mens nostra ex creaturis quaedam Dei attributa imperfecte cognoscit, hoc est, non cognoscit ut sunt in se ipsis omnia unum infinitum, sed singillatim, et per partes, ideoque qui Dei attributa ex creaturis cognoscit, non ideoque Dei essentiam videt.

*Obje. II.* Una eademque simplicissima res non potest simul communicari, et non communicari; hoc enim contradictionem involvit. Atqui essentia divina per generationem a Patre communicatur Filio, non communicatur autem paternitas, ut in sequenti libro docebimus. Ergo essentia divina, et Paternitas reipsa distinguuntur.

*¶. Dist. ant.* Non potest una, ac simplicissima res communicari, et non communicari eadem ratione, sive *sub eodem respectu*, *conc.* Id enim contradictionem implicat. *Sub diverso respectu*, *neg.* Cum igitur res una sub variis rationibus, ac respectibus considerari potest, ideoque rebus multis a se invicem distinctis aequivalet, non repugnat, communicari uno respectu, non autem alio. Ceterum cum paternitas ab essentia reipsa non distinguatur; paternitas ipsa in Filio est per *circuminsessionem*, de qua Libro sequenti dicemus.

*Obje. III.* Quae non distinguuntur ab uno tertio, non distinguuntur inter se. Ergo si relationes divinae non distinguerentur reipsa ab essentia divina, non distinguerentur inter se; quod tamen falsum est.

*¶. Dist. ant.* Quae non distinguuntur ab uno tertio, non distinguuntur inter se in eo, in quo a tertio non distinguuntur, *conc.* In aliis, *neg.* Porro relationes divinae sunt eadem inter se in essentia divina, quae tribus personis communis est, et a qua re-

la-

lationes reipsa non distinguuntur. Non sunt eadem inter se in *personalitate*, in qua sibi invicem opponuntur.

*Objic. IV. cum Scoto.* Quorum definitiones sunt diversae, eorum forma diversa est, ac distincta. Atqui definitiones justitiae, et misericordiae Dei diversae sunt, imo et contrariae. Ergo.

*℞. Dist. maj.* Si definitiones explicant res, prout in se sunt; *conc.* Si eas explicant, prout imperfecte cognoscuntur a nobis, *neg.* Definitiones itaque justitiae, misericordiae, aliorumque Dei attributorum non explicant ea attributa, prout in Deo sunt. Nam in Deo justitia, et misericordia unum sunt, a nobis vero mente concipiuntur separatim, cum non possimus omnia simul Dei attributa cognoscere.

## PROPOSITIO II.

*Agnoscenda est in Deo virtualis distinctio inter essentiam, et attributa, et inter ipsa invicem attributa.*

*Prob. I.* Scriptura saepe varia Dei attributa nobis exponit; cum scilicet Deum fortem, justum, misericordem, sapientem vocat. Ergo est in Deo fundamentum ista omnia cogitatione distinguendi. Quamvis enim haec attributa in Deo unum sint; tamen cum diversos producant effectus, qui a causis reapse distinctis produci solent (unde inquit Augustinus *Lib. XV. De Trin. Cap. 17. In Deo Unum aliquod est, quod omnia valet*) sunt utique virtute multiplicia.

*Prob. II. Ex PP. Basilii Lib. II. cont. Eunom.* Quomodo, inquit, *ridiculum non est; creandi facultatem substantiam esse dicere, aut etiam providentiam, aut similiter praescientiam rursum substantiam esse, et uno verbo omnem actionem substantiam putare?* Idem docet Gregorius Nyss. *Or. XII. cont. Eunom.* Et Augustinus *Lib. VII. De Trin. Cap. 4. Sunt quidem unum paternitas, et essentia; nefas tamen dictu est, Patrem paternitate esse Deum, paternitate sapientem.* Ergo etc.

Co-

## Corollarium.

Ergo rejicienda est etiam sententia *Nominalium*. Si enim Dei attributa nomine tenus distinguerentur, omnia idem significarent; non ergo distinguerentur virtute, sicut non est *virtualis* distinctio inter *Simonem*, *Cephram*; et *Petrum*, quae nomina eundem hominem significant. Apposite Basilius *loc. cit.* *Quod si omnia haec (attributa) ad unum significatum tendunt, necesse omnino est, ut nomina idem inter se valeant, quemadmodum fit in iis, qui multis nominibus appellantur, sicuti cum eundem dicimus Simonem, et Petrum, et Cephram.* Sed quoniam doctissimus P. Berti hanc *Nominalium* sententiam ita emollire studuit, ut ad Thomistarum doctrinam trahi facile possit, nos si de re inter nos convenit, de verbis nolumus esse contentiosi.

## Solvuntur Objectiones.

*Obje. I.* In Concilio Rhemensi sub *Eugenio III.* cautum est, *ne ratio theologica inter Dei naturam, et personam distinguat.* Ergo.

*¶ Dist. aut.* Ne distinguat reali distinctione, ut faciebat *Gilbertus*, cujus error in eo Concilio proscriptus est, *conc.* Ne distinguat per mentem, *neg.* Veteres dicebant, distingui ratione sive *κατ' εννοιαν* ea etiam, quae reapse distincta sunt, sed ita secum conjuncta, ut separari non possint. Ita in divinis tres personas: in Christo naturam divinam, et humanam; in homine animam, et corpus ratione distingui passim docent: Ita *Cyrillus Alex. Lib. I. in Joan.* *In hujusmodi, inquit, separari quodammodo εννοια, cogitatione videtur gignens ab eo, quod gignitur, et sine ulla divisione prodit: unum tamen est natura, et idem utrumque, nec ullo modo est alterum, sine altero.* Idem alii affirmant, ut videre potes apud *Petavium Lib. I. de Deo cap. 10.*

*Obje. II.* Ens simplicissimum omnem excludit distinctionem.

stinctionem. Atqui Deus est ens simplicissimum. Ergo.

*¶ Dist. maj.* Omnem excludit distinctionem *realem*, *conc. virtualem*, et rationis, *neg.*

*Inst.* Distinctio rationis; quae non est objecto consentanea, falsa est. Ergo.

*¶ Dist. ant.* Falsa est, si fiat per affirmationem, aut negationem, *conc.* Si fiat per simplicem praecisionem, *neg.* Distinctio fit per affirmationem, quando asseritur, res extra mentem reapse distingui, quae a mente distinctis ideis apprehenduntur. Atque haec distinctio in Deo falsa est. Fit vero distinctio per simplicem praecisionem, quando mens objectum simplicissimum, sed infinitum, non valens uno intuitu contueri, contemplatur veluti per partes, mentē concipiens seorsim misericordiam, justitiam etc. non tamen affirmans, ea esse inter se reapse distincta. Haec autem distinctio falsa non est: quia licet Deus sit objectum simplicissimum, tamen cum sit infinitum, ideoque aequivalens multis reipsa distinctis objectis, fundamentum menti praebet seorsim concipiendi distinctis ideis varias ejus proprietates.

### PROPOSITIO III.

*Inter attributa Dei relativa realis distinctio agnoscenda est. Est dogma fidei.*

*Prob.* Quae sunt invicem opposita, *realiter* distinguuntur. Atqui attributa relativa, *ex. gr. paternitas*, et *filiatio* invicem opponuntur, nec possunt eidem *supposito* eodem respectu convenire. Ergo etc. Hinc axioma: *In Deo omnia sunt unum, ubi non obviat relationis oppositio.*

Objectiones refutabimus *Lib. seq. in Tractatu de Trinitate.*

## C A P. IV.

*De attributis Divinis speciatim, et primo de  
ejus simplicitate.*

*Adv. I.* **N**unc de praeceptis Dei attributis singillatim disserendum est. Et ut aliquis servetur ordo, primum de negativis, seu negativis, deinde de affirmantibus, seu positivis agemus. Negantia autem attributa dicimus non solum ea, quae nominibus negativis exprimuntur, ut *infinitas*, verum etiam ea, quae licet affirmanti nomine exprimantur, sensum tamen habent in mente nostra potius negantem, ut *aeternitas*, quam non aliter concipimus nisi per negationem principii, et finis, et simplicitas, quae concipitur per negationem compositionis.

II. Attributa negantia, de quibus hic agemus, septem sunt, *simplicitas*, *infinitas*, *immutabilitas*, *aeternitas*, *immensitas*, *invisibilitas*, *incomprehensibilitas*, nam de *ineffabilitate* supra diximus. Affirmantia vero sex, *perfectio*, *bonitas*, *veritas*, *omnipotentia*, *scientia*, *voluntas*, et *providentia*.

III. Simplicitas Dei est negatio cujuscunque compositionis. Compositio autem triplex est, *physica*, quae exurgit ex partibus re ipsa distinctis, sive partes sint corporeae, sive non corporeae; *metaphysica*, quae constat ex partibus cogitatione distinctis, ut ex *essentia*, et *existentia*, *natura*, et *supposito*; et *Logica*, quae est ex *genere*, et *differentia*.

IV. Physicam in Deo compositionem commenti sunt 1.<sup>o</sup> Gentiles, qui creaturas corporeas colebant ut Deos. 2.<sup>o</sup> *Sadducaei*, qui nullum agnoscebant Spiritum Act. XXIII. 8. 3.<sup>o</sup> *Antropomorphitae* haeretici, qui corpus humano simile tribuebant Deo, quales fuerunt Saeculo V. quidam in Aegypto Monachi, de quibus *Sozomenus Lib. VIII. Cap. 11.* in quem scopulum impetisse visi sunt etiam *Tertullianus*, *Melito Sardensis*, et *Audius*. 4.<sup>o</sup> *Spinoza*, qui post veteres quosdam Philosophos deliravit, Deum non aliud esse nisi

nisi hoc universum: *Jupiter est quodcumque vides, quocumque moveris.* 5.<sup>o</sup> denique *Gilbertus Porretanus*. De *Spinoza* dictum est in *Metaphysicis*; de *Gilberto* supra capite praecedenti. Restant ergo primum alii duo errores confutandi, nempe *Deum* esse corporeum, aut corpori conjunctum: deinde inspiciendum, an compositio aliqua metaphysica, vel logica ei possit attribui.

PROPOSITIO.

*Nulla in Deo compositio physica ponenda est, ideoque Deus nec corpus est, nec corpori ullo modo conjunctus. Dogma fidei est.*

*Prob. I. ex Scriptura Joan. IV. 24. Spiritus est Deus, et eos, qui eum adorant, in Spiritu, et veritate oportet adorare. Act. XVII. 29. Non debemus existimare sculpturae artis, aut cogitationis hominis divinum esse simile. Ergo.*

*Prob. II. ex PP. 1.<sup>o</sup> Origenes Lib. I. Peri Arch. Cap. 1. Non ergo, inquit, aut corpus aliquod, aut in corpore esse putandus est Deus, sed intellectualis natura, simplex, nihil omnino in se adjunctionis admittens . . . ut sit ex omni parte monas, et ut ita dicam, totus mens. Idem docet Hom. I. et. III. in Genes., et Lib. VII. cont. Cels. 2.<sup>o</sup> Gregorius Naz. Orat. XXXIV. fuse, et eleganter idem docet, et probat. An corpus, inquit, eum esse dices? Quomodo ergo immensus, infinitus, figurae expers, ac denique ejusmodi, ut nec tangi, nec oculis cerni queat? 3.<sup>o</sup> Augustinus Lib. XII. de Trin. cap. 7. Turpiter vana cogitatio est, quae opinatur, Deum membrorum corporalium lineamentis definiri, atque circumscribi. Reliquos praetermittimus in re manifesta. Vide Petavium Lib. II. Cap. 1. Accedit consensus tum saniorum Judaeorum, tum videre est apud Philonem Lib. de somniis, tum clarissimorum inter Graecos Philosophorum, ut ex Platone, et Cicerone probat Augustinus Lib. VIII. de Civ. cap. 6. et Lib. XXII. cap. 20. (a).*

*Prob.*

---

(a) Adde Petavium loc. cit., et Huetium in *Alnetanis*.

*Prob. III. ratione* 1.<sup>o</sup> Deus est ens, quo nihil melius, aut perfectius excogitari potest, si autem esset corpus, aut corpori conjunctus, non esset ejusmodi; posset enim esse ens illo melius, nempe quod omni corporis commixtione careret. 2.<sup>o</sup> Omne corpus est iners, et *in potentia*, nec ducitur in actum, nisi ab alio. Deus autem est primum ens actus, a nullo alio ente pendens. 3.<sup>o</sup> Si Deus corpus esset, aut corpori conjunctus, esset ubique *divisibilis*, penderet a partibus, nec esset ubique totus. 4.<sup>o</sup> esset corpus infinitum, ac proinde omne aliud corpus excluderet. Quae quidem absurda sunt. Ergo etc.

*Solvuntur Objectiones.*

*Objic. I.* Scriptura Deo tribuit membra corporea, oculos, aures, os, brachia, pedes; praeterca animam *Heb. X. 38. Si subtraxerit se, non placebit animae meae*, et animae affectiones, iram, tristitiam etc. Ergo.

*W. Dist. ant.* Haec omnia Scriptura tribuit Deo per metaphoram, *conc.* Proprie, *neg.* Cum enim nos per sensus intelligamus rerum proprietates, et virtutes, Scriptura nostrae imbecillitati se accomodans, sub similitudine rerum corporalium spiritalia nobis tradit, unde inquit *Novatianus de Trin. Cap. 5. ad calc. Opp. Tertull. Ut haec de Deo dicantur, non Deo, sed populo potius imputetur.* Itaque scientiam Dei, quae cuncta cognoscit, et audit, explicat per oculos, et aures; omnipotentiam per brachia; justitiam, quae reos punit, per iram, tristitiam, poenitentiam etc. Quod autem haec non proprie accipienda sint, patet ex aliis Scripturae locis, in quibus id aperte traditur, ut *Isaiae XL. 18. Cui similem fecistis Deum, aut quam imaginem ponetis ei?* Et *Job. X. 4. Numquid oculi carnei tibi sunt, aut sicut videt homo, et tu videbis?* *Joan. IV. 24. Spiritus est Deus* etc.

*Objic. II.* Homo factus est ad imaginem, et similitudinem Dei, *Genes. I. 26.* Atqui homo constat animo, et corpore. Ergo et Deus.

*W. Dist. maj.* Factus est homo ad imaginem, et simi-

militudinem Dei quoad animum; *conc.* quoad corpus, *subdist.* Factus est ad imaginem Dei, corpore induti, vel induendi per incarnationem, *transeat.* Dei, qualis est in se, *neg.* Patres ergo, ut suo loco dicemus, imaginem Dei in animo hominis constituunt, similitudinem in gratia sanctificante. *Ambrosius in Psalm. 118.*

*Octon. 10.* Quod enim, inquit, secundum imaginem est, non est in materia, sed in anima rationabili. Et *Augustinus Lib. XXIV. cont. Faust. Cap. 2.* Eum ad imaginem suam non fecit, nisi secundum quod interius est, non solum incorporeum, verum etiam rationale, quod pecoribus non inest. Quod quidem varie Patres explicant. Nonnulli enim rationem imaginis statuunt in ipsa animae natura spiritali, per quam ad Deum, qui spiritus est, quodammodo accedit; alii in tribus animae facultatibus mente, memoria, et voluntate, quibus SS. Trinitatem videtur exprimere; alii in dominatu, quem habet in res terrenas propter illud, quod dicitur: *et praesit piscibus maris, et volatilibus caeli, et bestiis, universaeque terrae etc.* Sed quia Tertullianus *Lib. de Resurrect. carnis cap. 6.* putavit, Deum in creatione hominis corpus quoddam assumpsisse secundum formam corporis, in quo Christus erat venturus, ad ejusque imaginem creatum esse hominem; quodcumque enim limus exprimebatur, Christus cogitabatur homo futurus, quae sententia nobis nihil incommodat; ideo dixi: *transeat.*

*Obje. III.* Melito Sardensis Episcopus, teste Origene apud Theodoretum *Quaest. XX. in Genes. et Genadio De dogmatib. Ecclesiast. cap. 4.* Deum corporeum posuit. Idem docet Tertullianus, teste Augustino *Lib. X. de Genes. ad lit. cap. 24. et alib. S. Thoma Lib. 1. cont. Gent. Cap. 2.* aliisque Patribus; imo clara sunt ejus verba *Lib. cont. Praxeam Cap. 7.* Quis negabit, Deum corpus esse, etsi Deus Spiritus est? Spiritus enim corpus est sui generis. Et *Lib. de Carne Christi. Nichil est incorporale, nisi quod non est.* Audius etiam, quem Epiphanius *Haeres LXX. orthodoxae doctrinae* fuisse docet, in eandem sententiam concessit, teste Theodoro *Lib. IV. haeretic. fab. cap. 13.* Augustino *haeres. L.* et aliis. Ergo.

*II. Ter-*



18. *Transeat ant.* Duorum enim, aut trium hominum error, praesertim Schismaticorum, qualis fuit *Audius*, aut haeticorum, qualis fuit aliquando *Tertullianus*, doctrinam Scripturis, Traditione, et ratione firmatam, nequit evertere. Dixi *transeat*, quia *Melitonem* multi ab hoc errore vindicare conantur, tum quia *Eusebius lib. IV. Hist. cap. 26.* et *Hieronymus de Script. Eccl. cap. 24.* eum summis laudibus effecerunt, tum quia veteres, qui de Antropomorphitis scripsere, non recensent inter eos *Melitonem*, quo illi auctore maxime gloriati essent. *Origenes* igitur, si vere id dixit, videtur, inquit, deceptus ex titulo libri, quem ille inscripsit *περί ενσωματου θεου de Deo corporato*, ex quo putavit, *Melitonem* asserere Deum corporeum (a). *Tertullianus*, etsi a multis saepe reprehenditur, tamen eum aliquando *Augustinus* excusat, et benigne explicat, eo quod corporis nomen latissima significatione usurpaverit ad significandum quod non est nihil; sed substantia: potuit propterea putari corpus Deum dicere, quia non est nihil, non est inanitas *Lib. de haeres. cap. 86.* (b) *Audius* etiam excusari ab hoc errore potest; nam conevus scriptor *Epiphanius Haeres. LXX.* eum orthodoxae doctrinae fuisse docet; imo refellit *Audii* sententiam, qua statuebat similitudinem hominis eum Deo in ipso corpore, eo quod inde sequeretur absurdum, (quod non concedebat *Audius*) scilicet, Deum esse cor-

cor-

---

(a) Haec qualiscumque *Melitonis* excusatio frigida videtur *Petavio Lib. 11. Cap. 1. Clerico Hist. Ecc. ad an. 149. Caveo, Thonassino, Bersi*; apud quos *Origenis* testimonium, auctoris utique enaei, plus est, quam quidquid recentiores pro *Melitone* causati sunt. Ceterum excusant eum *Tournely, Nat. Alexander, Boucat, Sixtus Senensis.*

(b) Habuit *Tertullianus* hac in parte patronos, atque adversarios nobilissimos. Cum enim defendunt *Natalis Alex. Tournely, L. Herminier, Habert, Bucat* etc. Accusant, praeter *S. Thomam, Petavius, Annatus, Huesius, Pamelius*, et Critici fere omnes, ut inquit *Bersl.*

corporeum (a). Ex male intellectis igitur *Audii* ver-  
bis *Antropomorphitae Audiani* dicti sunt.

*Objic. IV.* Sunt in Deo tres personae reipsa di-  
stinctae; ex tribus ergo compositus est unus Deus.

*R. Neg. cons.* Non enim tres personae partes sunt  
divinitatis, sed unaquaeque est totus Deus, ita ut in  
natura divina tres simul unum sint simplicissimum,  
tribus modis subsistens. Vide hoc argumentum fusc  
pertractatum, et ex Patrum testimoniis illustratum  
a Petavio *Lib. II. Cap. 4.*

## PROPOSITIO II.

*In Deo non est admittenda compositio metaphysica  
ex essentia, et existentia. Sed si nomine compositionis  
metaphysicae intelligatur illa, quae mente concipitur  
in ente simplicissimo, in quo est virtualis distinctio  
inter essentiam, et attributa; potest haec metaphysica  
compositio in Deo admitti.*

*Prob. 1a. pars.* Essentia Dei ab ejus existentia nec  
per mentem distingui potest, cum ejus essentia sit exi-  
stentia a se, ut supra dictum est. Atqui ubi nulla  
distinctio est, nec compositio fingi potest. Ergo.

*Prob. 2a. pars.* In Deo agnoscenda est distinctio  
virtualis, ut supra docuimus. Utrum autem haec vir-  
tualis distinctio dici possit compositio Metaphysica,  
vel non, quaestio est tantum de nomine. Si ergo per  
metaphysicam compositionem intelligas etiam illam,  
quae ex hac virtuali distinctione exurgere intelligitur;  
potest illa hoc sensu de Deo affirmari. Hinc *Basilius  
Lib. II. cont. Eunom.* complexionem aliquam, quae  
cogitatione concipitur, in Deo agnoscit: *Proprieta-  
tes, Inquit, id, quod commune est distinguunt. Ex  
utriusque autem complexu tum communis, tum pro-  
prij innascitur nobis comprehensio veritatis.*

F f

(a) Ex quo patet, quam immerito *Theophilus Alexan-  
drinus*, et *Joan. Hierosolymitanus* ipsam *Epiphanium* et  
rioris *Antropomorphitarum* insinulaverint apud *Socratem*  
*Lib. VI. Hist. cap. 10.* A qua criminatione egregie se put-  
gavit in Concione Hierosolymis habita, teste *Hieronymo*  
*Lib. ad Pammach. De error. Joan. Hieros.*

## PROPOSITIO III.

*Non est in Deo compositio Logica ex genere, et differentia.*

*Prob. I. auctoritate Patrum. Clemens Alex. Lib. V. Strom. Quomodo, inquit, ineffabilis non esset, qui non genus est, neque differentia, neque species, neque individuum, neque numerus, neque accidens ullum, neque id, cui accadat quidquam. Idem alii docent.*

*Prob. II. ratione. 1.º quia quidquid est sub aliquo genere, mente concipitur tamquam ipso genere posterior, et refertur ad genus, tamquam actus ad potentiam. Atqui Deus nulla re posterior est, nec est in eo potentia, et actus. Ergo etc. 2.º Si Deus esset sub genere aliquo, hoc genus esset ens. Atqui ens non potest esse alicujus rei genus; quia genus concipitur tamquam diversum a differentia, quae illi advenit; nulla autem differentia potest enti superaddi, quae non sit ens aliquod. Ergo etc. 3.º Si Deus esset sub aliquo genere, deberet in eo genere cum creaturis convenire; at falsum hoc esse constat, quia ens, et substantia alio sensu praedicantur de Deo, ac de creaturis: in Deo enim significant ipsum esse necessarium, interminatum etc. in creaturis limitatum, pendens ab alio, et contingens. Ergo.*

## Corollaria.

*I. Cum nulla creatura tantam simplicitatem habeat, quantam ipse Deus; in omnibus enim creaturis compositionem aliquam agnoscimus ex potentia, et actu; essentia, et existentia; natura, et supposito; genere, et differentia; substantia, et accidentibus; merito Patres solum Deum incorporeum dixerunt, hoc est omnino simplicem. Et hoc sensu Hilarius animam humanam, et cuncta praeter Deum appellavit corpora.*

*II. Sequitur etiam hinc, nullam creaturam ad eam pertingere unitatem, qua Deus unus est, maxime omnium Unus, imo et Unitas, ut Patres loquuntur.*

*Hinc*

*Hinc per omnem Theologicam tractationem divinitatem illam omnium principem celebrari sic cernimus, tamquam et Monadem, et Unitatem propter simplicitatem, ac singularitatem excellentis indivisibilitatis, inquit Auctor Lib. De div. nom, Cap. I.*

## C A P. V.

*De Infinitate Dei.*

*Adv.* **I**nfinitum triplex est. 1.<sup>o</sup> quoad quantitatem; 2.<sup>o</sup> quoad virtutem; 3.<sup>o</sup> quoad essentiam continentem omne genus perfectionis in gradu infinito. Porro Deum non esse infinitum quoad quantitatem, ex iis, quae superius diximus, patet, cum non sit extensus: de infinita ejus potentia dicemus infra, ubi de omnipotentia: restat ergo videndum de infinita ejus essentia, quam negant Sociniani, et inter Calvinistas Vorstius, quibus etiam adhaesit Thomas Hobbesius. (a)

## P R O P O S I T I O.

*Deus est secundum essentiam infinitus. Est dogma fidei.*

*Prob. I. Job. XI. 7. Forsitan vestigia Dei comprehendes, et usque ad perfectum omnipotentem reperiēs? Excelsior caelo est, et quid facies? profundior inferno, et unde cognosces? Longior terra, mensura ejus, et latior mari. Psalm. CXLIV. Magnus Dominus, et laudabilis nimis, et magnitudinis ejus non est finis. Baruch III. 25. Magnus est, et non habet finem. Ergo etc.*

*Prob. II. ex PP. 1.<sup>o</sup> Gregorius Nys Lib. XII. cont. Eunom. Neque major, inquit, neque minor fit vel accessione, vel decessione. Nam quod in majus fit incre-*

F f 2

---

(a) *De Civ, Cap. 15. Leviath. P. 1.*

mentum, in infinito locum non habet. 2.<sup>o</sup> Augustinus in *Psal. CXLIV*. Ipse non finitur, illius magnitudo sine fine est. 3.<sup>o</sup> Damascenus *Lib. de fide Cap. 12*. Ex omnibus porro nominibus, quae Deo triuntur, nullum aequae proprium videtur, atque  $\theta\ \omega\nu$  (sive qui est) ... nam totum esse, velut immensum quoddam, ac nullis terminis definitum essentiae pelagus complexu suo ipse continet (a) Ergo etc.

*Prob. III.* ratione. 1a. est, quam hic insinuat Damascenus. Deus est ipsum esse. Atqui ipsum esse nullius limitibus circumscriptum intelligitur; quod enim circumscriptum est, non est ipsum esse, sed aliquod singulare ens. Ergo. 2.<sup>o</sup> Deus est ens simplicissimum; ut supra ostendimus. Sed ens simplicissimum, ut observat Nyssenus *Lib. I. cont. Eunom.* infinitum est; si enim finitum foret, compositum esset ex subjecto, et finita illa qualitate, quam habet. Ergo etc. 3.<sup>o</sup> Deus est actus perfectissimus, non solum nullius potentialitatis, ut Scholae ajunt, aut imperfectionis capax, sed quo nihil majus, aut perfectius excogitari potest. Atqui talis non esset, si non esset infinitus, ut patet. Ergo.

*Dices.* I. Scriptura non semel appellat infinitum per hyperbolam quod revera finitum est, ut *Deuteron. XXVI. 5*. Crevit in gentem magnam, et robustam, et infinitae multitudinis. Ergo simili ratione intelligi potest de Deo.

*W. Neg. cons.* pro diversis enim subjectis rebus diversa est ejusdem vocabuli notio. Cum ergo creaturae, quantumcumque augeantur vel quantitate, vel numero, semper finitae sint, non potest eis infiniti nomen nisi improprie aptari; eo magis quod ipsa scriptura, quae aliquas earum vocat infinitas, ostendit simul, esse alias, atque alias, praeter ipsas, aequalis; vel majoris perfectionis. At cum Deus sit ipsum esse; nec alicubi Scriptura eum, nisi infinitum

---

(b) Item docent Hilarius in *Psal. XLI*. Dionysius *De div. nom. Cap. 9*. Maximus Mart. apud Euthymium *P. 1 tit. 2*. aliq. Conseruiunt Graeci Philosophi Anaxagoras, Aristoteles, Zeno, Melissus apud Huesium.

tum dicat, profecto in propria significatione intelligi debet infinitus.

*Dices.* II. Si Deus esset infinitus, omne aliud ens excluderet, vel esset omne eus, alioquin Deus cum aliis entibus esset aliquid majus solo Deo, atque ideo Deus non esset infinitus. Ex quo sequeretur *Spinozæ* Pantheismus. Atqui falsum consequens. Ergo et antecedens.

*R. Neg. seq. maj.* Imo esset imperfectus, si non haberet potestatem, ac vim producendi ex nihilo alia entia. Licet autem Deus cum creaturis efficiant aliquid majus quoad numerum, non tamen majus efficiunt quoad perfectionem, quia quidquid perfectionis in creaturis est, id *formaliter*, vel *eminenter* est in Deo, ut *infra* dicemus.

*Corollarium.*

Cum Deus ideo sit infinitus, quia est ipsum esse a se, omnis imperfectionis expers: nulla vero creatura fingi possit hujusmodi, ut supra ostendimus, sequitur, nullam posse fingi creaturam infinitam secundum essentiam, imo contradictionem involvere creaturam infinitam, quia esse ab alio, jam aliqua imperfectione est.

C A P. VI.

*De immutabilitate Dei.*

*Ado. I.* **E**x simplicitate, et infinitate Dei, immutabilitas sequitur: immutabile autem dicitur, quod nec perfectionem ullam amittere potest, nec novam adquirere.

II. *Sociniani* licet fatcantur, Deum esse immutabilem quoad substantiam, cum tamen in decretis suis mutabilem esse docent. Hos secutus est *Worstius* Calvinista.

## PROPOSITIO.

*Deus omnino est immutabilis. Est fidei dogma.*

*Prob. I. ex Script. Num. XXIII. 19. Non est Deus quasi homo, ut mentiatur, nec ut filius hominis, ut mutetur. Dixit ergo, et non faciet? Locutus est, et non implebit? Malach. III. 6. Ego Dominus, et non mutor. Jac. I. 17. Apud quem non est transmutatio, nec vicissitudinis obumbratio. Prov. XIX. 21. Multae cogitationes in corde viri, voluntas autem Domini permanebit. Psalm. CI. Tu autem idem ipse es. Sap. VII. 27. Cum sit una, omnia potest, et in se permanens, omnia innovat. Ergo etc.*

*Prob. II. ex definitione Concilii Nicaeni apud Hilarium (in fragment.) et Ambrosium Lib. I. de fid. cap. 9. Eos, qui dicunt . . . mutabilem, aut convertibilem Filium Dei, eos anathematizat Catholica, et Apostolica Ecclesia.*

*Patres proferre supervacaneum est (a), cum inter ipsos Gentiles philosophos multi id agnoverint. Philolaus Pythagoricus (apud Rhilonem de Mundi Opificio) Est, inquit, auctor, et princeps rerum omnium Deus, semper existens, unus, stabilis, immobilis, ipse sui similis, aliorum dissimilis (b).*

*Prob. III. Quidquid mutatur, aut novam acquirit perfectionem, aut aliquam amittit; atqui neutrum potest in Deum cadere, cum semper sit ens perfectissimum. Ergo.*

*Sal-*

---

(a) Augustinus *Lib. XI. De Civ. Cap. 10. et al.* Cyrillus *Lib. XIII. Thesaur.* Fulgentius *Lib. de fid. ad Pet. Cap. 3.* Lactantius *Lib. II. Cap. 8.* Prosper *Epigr. 3. et Sent. 3.* Methodius *Lib. I. cont. Manich.* Maximus Mart. *ap. Enchym. Part. 1. tit. 3.* aliique apud Petavium *Lib. III. Cap. 1. et Thomassinum Lib. V. cap. 8. 9. et 10.*

(b) Vide similia Philosophorum loca apud Huetium in *Atacianis Lib. II. cap. 2. et seqq.*

## Solvuntur Objecta...

*Objic.* Deus, qui non creavit mundum ab aeterno, factus est in tempore creator. Ergo mutatus est.

¶ *Neg. cons.* Creaturae, enim mutatae sunt, cum esse inceperunt, quae antea non erant. Deus vero ab aeterno voluit, ut creaturae in tempore existerent. Hoc igitur tempore non est mutata Dei voluntas, sed effectus impleta. Ex hac autem mutatione creaturarum, nova extrinsecus denominatione dicitur Deus *Creator*, *Dominus*, quae denominatio nullam in eo intrinsecus mutationem arguit: sicut si quis equum a dextera ad sinistram columnae transferat, columna, sine sui mutatione, nunc sinistra, nunc dextera dicitur respectu equi. Unde Augustinus *Lib. V. de Trin. cap. 16.* Quamvis, inquit, temporaliter incipiat de eo dici (creator) non tamen ipsi substantiae accedit aliquid, sed illi creaturae, ad quam dicitur, et *Lib. XII. De Civ. cap. 17.* Quia nempe ad opus novum, non novum, sed sempiternum adhibet consilium.

*Inst. 1.º* Qui a statu non operantis transit ad statum operantis, is intrinsecus mutatur. Atqui Deus in tempore ex non creante factus est creator. Ergo.

¶ *Dist. ant.* Si transit per novam operationem interiorem, *conc.* Si per operationem externam, quae nihil est aliud, nisi effectus externus internae, atque aeternae, et immutabilis voluntatis ejus, *neg.* Vide Augustinum *Lib. XIII. de Civ. Cap. 17.*

*Inst. 2.º* Atqui transit aliquando Deus ad novam interiorem operationem. *Genes. VI. 6.* Poenituit Deum, quod hominem fecisset. Odit hominem peccatorem, quem antea diligebat, cum esset justus. Denunciavit Ninivitis excidium *Jon. III. 4* et Ezechiae mortem *Isai. XXXVIII. 1. et 5.* quod postea decretum mutavit. Ergo.

¶ *Neg. Ant.* Ad 1.º. poenitere, aut mutare decretum dicitur Deus per metaphoram, quando exterius opera mutat; quae ab aeterno mutare decrevit, ac proinde tota mutatio in creaturis est: neque enim homo est, ut agat poenitentiam *I Reg. XV. 29.* Ad 2.º. mutatio

non



non in Deo est, sed in homine. Deus enim perpetua, atque immutabili voluntate odit peccatum, et justitiam diligit; ipse ergo homo se immutat, cum a justitia ad iniquitatem declinans, sit objectus odio divino. *Quemadmodum*, inquit Augustinus in *Psal. LXXII.* sol oculos puros, sanos, vegetos, fortes habenti tranquillius apparet; in oculos autem lippos quasi tela aspera jaculatur, intuentem illum vegetat, hunc excruciat non mutatus, sed mutatum; sic cum coeperis esse perversus, et tibi Deus perversus videbitur: tu mutatus es, non ille, erit ergo tibi poena, quod bonis gaudium. Ad 3m. praedictiones illae erant conditionales, si scilicet Ninivitae poenitentiam non egissent, aut Ezechias non orasset.

Alias objectiones a libertate Dei petitas dissolvemus inferius.

#### Corollarium.

Cum ergo Deum oramus, non id postulamus, ut voluntas ejus mutetur; hoc enim repugnat; sed ut fiat voluntas ejus in nobis; nosque voluntatem nostram divinae subjiciamus. *Non ores, ut fiant quae fieri velis, sed potius ora, sicut orare didicisti, ut fiat voluntas Dei in te*, inquit S. Nilus *Lib. de Orat. cap. 29.*

### C A P. VII.

#### De Dei aeternitate.

**I.** Immutabilitatem sequitur aeternitas, seu po-  
*Adv.* I. **I**tius ipsa immutabilitas aeternitas est; quod enim immutabile est, nec initium, nec finem, nec successionem habet.

**II.** Definitur aeternitas a Boëtio *Lib. V. de consol. pros. 6.* *Interminabilis vitae tota simul, et perfecta possessio.* Dicitur 1.<sup>o</sup> *possessio* ad explicandam ejus stabilitatem. Dicitur 2.<sup>o</sup> *vitae* potius, quam *esse*; quia etsi aeternitas non potest esse sine immutabilitate, quae perfectiones omnes complectitur; possessio tamen non est nisi viventium rationalem vitam, per quam

quam reliquae omnes perfectiones non solum inesse, sed et possideri dicuntur. 3.<sup>o</sup> Dicitur *interminabilis*, hoc est nec initio, nec fine terminata. Dicitur 4.<sup>o</sup> *tota simul et perfecta*, ut arceantur imperfectiones temporis, scilicet divisio, et successio. Augustinus in *Psalm. CI. In aeternitate*, inquit, nec praeteritum quidquam est, quasi esse desierit, nec futurum, quasi nondum sit, sed non est ibi, nisi *EST*. Quapropter tres sunt aeternitatis proprietates, nempe ut careat initio, careat fine, careat successionem. Sociniani aliquam in aeternitate successionem lingunt, ut videre est apud Clericum in *Ontolog. Cap. 5. §. 4.* Eos sequuntur Arminiani plerique: Limborchius tamen inter eos celebris rem in ambiguo putat relinquendam. *Theolog. Christ. Lib. II. Cap. 5. §. 3.*

# PROPOSITIO I.

*Deus est aeternus. Est dogma fidei.*

*Prob. I. Deuteron. XXXII. 40. Vivo ego in aeternum Psalm. LXXXIX. Priusquam montes fierent, aut formaretur terra, et orbis; a saeculo, et usque in saeculum tu es Deus. Psalm. CI. Tu autem idem ipse es, et anni tui non deficient. Innumera alia sunt in Scripturis hujusmodi.*

*Prob. II. Patres omnes idem asserunt. Sufficiant pauci. 1.<sup>o</sup> Tertullianus Lib. cont. Hermog. Cap. 4. Quis enim, inquit, alius Dei census, quam aeternitas? 2.<sup>o</sup> Nyssenus Lib. I. cont. Eunom. At vero nullius egens illa, et aeterna, omnia quae sunt, complexa natura, neque in loco est, neque in tempore. 3.<sup>o</sup> Prosper (in sententiis ex Augustino n. 184.) Vera aeternitas, inquit, Dei est, qui solus habet immortalitatem, quoniam ex nulla specie, motuque mutatur, nec temporalis est voluntatis. Non enim immortalis est voluntas, quae alia, et alia est (a).*

*Prob.*

---

(a) Addi possunt Tertullianus *Lib. cont. Marcion. Cap. 3.* Nazianzenus *Orat. XXXVIII.* Dionysius *de divinis nom. Cap.*

*Prob. III.* ratione. 1.° Deus est ens a se, ac proinde necessarium. Ergo aeternus est. 2.° Est immutabilis; atqui quod est immutabile, nec initium, nec finem, nec successionem habere potest. *Summum bonum*, inquit Augustinus (*Lib. de natura boni*) quo superius non est Deus est, ac per hoc incommutabile bonum est, et ideo vere aeternum, et vere immortale. Quod et agnoverunt gentiles philosophi. *Plutarchus* (*Lib. de ei apud Delphos*) Est Deus in nullo tempore, sed in aeternitate, cuius nihil est prius, nihil posterius, neque futurum, neque praeteritum, at solum est per se revera ens, quod neque fuit, neque futurum est. Unde Boëtius *Lib. V. De consol. Pros. 6.* Deum, inquit, aeternum esse, omnium ratione utentium commune iudicium est. Ergo etc. 3.° Tempus non est, nisi in mente nostra, quae rerum mutabilium, vel suarum cogitationum successionem notat, unde inquit Poëta: *Tempus item per se non est, sed rebus ab ipsis Consequitur sensus transactum quid sit in aevo; Tum quae res iustet* etc. Ergo in Deo, in quo nulla est mobilitas, nulla successio cogitationum, non est tempus, sed aeternitas.

### Objectiones.

*Objic. I.* In Deo sunt differentiae temporis, *Joan. I. 1.* *In principio erat Verbum.* *Apoc. I. 4.* *Qui est, et qui erat, et qui venturus est.* Ergo.

*W. Dist. ant.* Sunt differentiae temporis *formaliter* (a) *neg. Eminenter, conc.* quatenus scilicet aeternitate sua omnia tempora complectitur, et ipse immobilis cunctarum rerum mobilitatem sub se intuetur, et regit. Unde Augustinus *Tract. XCIX. in Joan.* *Quamvis, inquit, natura illa ineffabilis non recipiat fuit, et erit, sed*

---

*Cap. 5.* Gregorius M. *Lib. IX. Moral. Cap. 26. et alibi.* *Isidorus Lib. I. Sentent. Cap. 8.* etc. Vide Petavium *Lib. III. Cap. 3. et 4.* ubi etiam *Thalesis, Platonis, Procli, Plotini* loca recitat.

(a) *Formaliter* apud Scholasticos significat quod est secundum propriam rei formam, sive essentiam, ac naturam.

sed tantum est, ipsa enim veraciter est, quia mutari non potest; tamen propter mutabilitatem temporum, in quibus versatur nostra mortalitas, et nostra mobilitas, non mendaciter dicemus fuit, erit, et est. . . . fuit, quia nunquam defuit, erit, quia nunquam deerit, est, quia semper est.

*Inst. 1.º* Cum dicitur erat Verbum significatur, generationem Verbi jam factam, non fieri hodie, alioquin Verbum non esset ab aeterno. Ergo differentiae temporum sunt in Deo formaliter.

*¶ Dist. ant.* Significatur, generationem Verbi non fieri hodie, si illud hodie usurpetur ad excludenda praecedentia tempora, *conc.* Si ad significandam rei perpetuam durationem, et praesentiam, quae est hodie, sicut ab aeterno fuit, *neg.* Manet enim, et in aeternum manebit actus ille, quo Pater ab aeterno generat Verbum, unde etiam dicitur *Psalm. II.* Ego hodie genui te, quem in locum apposite Petrus Damiani *Epist. IV. Cap. 8.* Omnia, inquit, quae apud nos elabendo discurrunt, apud illud hodie stant, et immobiliter perseverant. In illo hodie dies adhuc immobilis est, in quo mundus iste sumsit exordium: in illo jam et ille nihilominus est, in quo judicandus est per aeterni judicis aequitatem. Utitur autem Scriptura verbo praeteriti temporis, ut significet, generationem esse ab aeterno perfectam, et ut Scholae loquuntur, semper in facto esse, nunquam in fieri.

*Inst. 2.º* Generatio Verbi, ipseque Deus hodie plus duravit, quam ante mille annos. Ergo ejus duratio suscipit magis, et minus, quae sunt differentiae temporis.

*Dist. ant.* Plus duravit per novam ad illum relationem creaturarum, quae mutantur, *conc.* per novam accessionem sibi intrinsicam factam, *neg.* Quemadmodum enim columna, in littore fluminis erecta, nihil novi acquirit ex eo, quod novae in dies aquae prope eam labuntur, sed tota mutatio in aquis est, quae semper novam ad ipsam columnam adquirunt relationem; ita Deus.

## PROPOSITIO II.

*Æternitas, modo superius explicato, ita est Dei propria, ut creaturis non possit convenire. Est dogma fidei.*

*Prob.* Æternitas est tota simul, et perfecta possessio vitæ interminabilis; ac proinde perfectam complectitur immutabilitatem, ut supra diximus. Atqui hæc perfecta immutabilitas nulli creaturæ convenire potest: Omnis enim creatura transivit a non esse ad esse; transire potest ab esse ad non esse, et mutari potest momentis singulis vel proprio corporum motu, vel motu suarum cogitationum, si sit creatura spiritalis, cujus durationem Theologi ævum appellant. Ergo etc. Hinc Patres 1.º contra Arianos concludunt, Verbum esse Deum, ex eo quod est æternum; 2.º solum Deum vere esse immortalem, ut inquit Apostolus *I. Tim. VI. 16.* non modo quia solus id habet a seipso, verum etiam, quia omnis creaturarum mutatio quædam mortis imitatio est, ut inquit Bernardus *Serm. LXXXI. in Cant.*, et ipsa mutabilitas mors quædam est, ut ait Gregorius *Lib. XII. Moral. Cap. 17.* *In omni enim mutabili natura nonnulla mors est ipsa mutatio, quia facit aliquid in ea non esse, quod erat, ut observat Augustinus Lib. III. cont. Maximin. Cap. 12.*

## Corollarium.

Quoniam nihil creatum æternum est; profecto si mentis nostræ oculis adsidue obversaretur æternitas, nihil esset in mundo, quod nos aut frangeret, aut attolleret, aut alliceret. Unde Gregorius M. *Lib. XVIII. Mor.* Quisquis, inquit, in solo æternitatis desiderio figitur, nec prosperitate attollitur, nec adversitate quassatur, dum nihil habet in mundo, quod appetat. Quis enim appetat ea, quæ velut umbra evanescent, et licet diu ardentem expetita ante absunt pene, quam veniant, et cum venerint stare non possunt? ut loquitur Augustinus in *Psal. XXXVIII.*

## Scholion.

Disputant Scholastici, utrum Mundus a Deo condipotuerit ab aeterno. Verisimilior quidem est eorum sententia, qui negant. Creatura enim est ab alio, est ex nihilo, ac proinde semper mente concip debet instans, sive momentum, quando non erat. Irgo repugnat esse ab aeterno. Athanasius *Lib. II. ont. Arianos*: Tametsi, inquit, Deus possit semper facere, at res creatas aeternas esse facere non potest: quippe ex non extantibus sunt, et non erant, antequam fierent. Quae autem non sunt, antequam fiant, quam poterant cum Deo, qui semper est, existeret? Sed etsi demus, id fieri potuisse, quod suo loco expodemus, non sequeretur, mundum esse aeternum (i. falso asseruit Aristoteles, et quidam Platonici) propter rationes superius explicas. Esset igitur ab aeterno, sed in tempore, quia mutabilis.

II. Quaerunt etiam anxie Scholastici, utrum aeternitas possit dici duratio, et mensura esse diuini. Nos, si ab hisce vocabulis removeantur defectus quos includit durationis nomen in rebus mobilibus quae successione capaces sunt, et notio mensurae in rebus finitis, quae mensura terminantur, non abnuus, posse aeternitatem dici et durationem Entis immutabilis, et mensuram infinitam Entis infiniti. Vide si libet, *Gonetum Tom. I. Disp. IV. art. 7.*

## C. A. P. VIII.

## De immensitate Dei.

*Adv. I.* IMMENSITAS est virtus existendi infinitis locis. Potest autem res triplici modo alicubi esse, 1.º per substantiam, ut sol in caelo, 2.º per potentiam, ut idem sol in visceribus terrae, in quibus calore suo operatur; 3.º per praesentiam, cum videt quae loco sunt.

II. Rursus res potest alicubi esse per substantiam triplici ratione. *Circumscripte*, sive *Circumscriptive*,  
ut

ut ajunt, quando scilicet ita extenditur cum spatio, ut singulae ejus partes singulis spatii partibus respondeant, quod proprie est corporum: 2.<sup>o</sup> *Definitive*, cum tota est in toto, et tota in qualibet totius parte, nec tamen est alibi, ut anima rationalis in corpore, 3.<sup>o</sup> *Repletive*, quando scilicet non uno loco definitur, sed omnia loca replet, et continet; quod proprie Dei est.

III. Dei substantiam esse ubique, inficiati sunt 1.<sup>o</sup> non solum Gentiles, qui creaturas colebant ut Deos, verum etiam Judaei nonnulli crassiores, qui, teste Hieronymo in Cap. LXVI. *Isaiae*; incomprehensibilem Deum templo Hierosolymitano includi arbitrabantur; 2.<sup>o</sup> *Seuchus Eugubinus* in *Psaln. CXXXVIII.*, qui Deum per substantiam tantum in Caelo esse putat, in reliquis autem locis per praesentiam, et potentiam; quem errorem secutus est *Vorstius Calvinista*. Sociniani in *Apologia Confessionis* editae anno 1650. *Crellius Lib. de Deo* cap. 27. *Episcopus Lib. IV. Instit. Sect. 2. de Deo* cap. 4 id saltem dubium esse putant. *Erasmus* quoque, teste eodem *Vorstio*, dubitabat, an Deus in locis immundis esset per substantiam. Sed non videtur ille in hac dubitatione versatus.

IV. Disputant Scholastici, per quid Deus formaliter sit in loco. Thomistae docent, Deum esse formaliter ubique per operationem ad extra; aliis placet, Deum esse in loco per sui indistantiam (ut ajunt) a rebus creatis.

## PROPOSITIO I.

*Dogma fidei est, Deum esse ubique non solum per praesentiam, et potentiam, verum etiam per substantiam.*

*Prob. I. ex Scriptura. Deuteron. IV. 39. Scito ergo hodie, et cogitato in corde tuo, quod Dominus ipse sit Deus in caelo sursum, et in terra deorsum. Job. XI. 7. Excelsior caelo, profundior inferno, longior terra, latior mari. Psalm. CXXXVIII. Quo ibo a Spiritu tuo. a quo a facie tua fugiam? si ascendero in caelum, tu illic*

*illic es, si descendero in infernum, ades. Jerem. XXIII. 24. Numquid non caelum, et terram ego impleo, dicit Dominus? Act. XVII. 27. Non longe est ab unoquoque nostrum, in ipso enim vivimus, et movemur, et sumus. Ergo.*

*Prob. II. ex traditione. Longum esset loca Patrum proferre. 1.º Augustinus Lib. VIII. de Gen. ad li. cap. 26. Deus est, inquit, extra omnia non exclusus, intra omnia non inclusus, supra omnia non elatus, subter omnia non depressus, interior omni rei, quia in ipso sunt omnia, exterior omni rei, quia ipse est super omnia. 2.º Origenes Hom. XII. in Genes. Nonne ubique est Deus? nonne ipse dixit: caelum, et terram repleo, dicit Dominus? 3.º Chrysostomus in Psalm. CXII. in ea verba: quis sicut Dominus Deus noster, qui in altis habitat etc. Non enim, inquit, tamquam caelo inclusus respicit eminens quae sunt in terra, sed ubique praesens, et omnibus assistens. Supervacaneum est citare reliquos, qui omnes idem docent, cum hanc veritatem cognoverint quidam ex ipsis Ethnicis philosophis. Seneca Lib. de beneficiis cap. 8. Quocumque, inquit, te flexeris, ibi illum videbis occurrentem tibi. Nihil ab illo vacat, opus suum ipse implet (a).*

*Prob. III. ratione. Deus ubique agit, et operatur. Quidquid enim est, ab illo est, et conservatur. At Dei operatio ab ejus essentia, et substantia distincta non est, ut supra probavimus. Ergo ubique per substantiam praesens est. Adde, quod Deus est, quo nihil majus cogitari potest. Non esset autem hujusmodi, si non ubique per substantiam praesens esset, ut patet. Ergo.*

---

(a) V. alla Zenonis, Procli, Empedoclis locum apud Hecataium in Alnasianis Lib. II. Cap. 7. Grotium in Cap. XVII. Act.



## Solvuntur Objecta.

*Obje. I.* Scriptura Deum in caelo esse docet, *Psalm. CXIII. Deus autem noster in caelo ..... Caelum caeli Domino. terram autem dedit filiis hominum; et Psalm.*

*Dominus in templo sancto suo, Dominus in caelo sedes ejus; quae verba videntur innuere, Deum esse in caelo non in terra, quam filiis hominum reliquit. Ergo.*

*R. Dist. ant.* Scriptura docet, Deum esse in caelo peculiari quadam ratione, quod ibi potentiam, bonitatem, et majestatem suam plenius ostendat, *conc.* Quod alibi non sit, *neg.* Ita Bernardus *Serm. I. in Psalm. Qui habitat: Licet,* inquit, *Deum ubique esse non dubitem; sic tamen in caelo est, ut ad ejus comparisonem nec esse videatur in terris. Propter quod orantes dicimus: Pater noster, qui es in caelis. Sicut enim anima, cum in toto quoque sit corpore, excellentius tamen, et singularius est in capite, in quo sunt omnes sensus . . . ita etc.* Similia docent Damascenus *Lib. I. Cap. 13.* alique PP.

*Inst. Genes. XI. 5. Descendit Dominus, ut videret civitatem, non est ergo ubique qui de loco in locum migrat. Item Genes. III. 8. Adam abscondit se a facie Domini, Gen. IV. 16. Cain egressus est a facie Domini. Jonae I. 3. Fugit Jonas a facie Domini. Genes. XXV. 22. Rebecca perrexit ut consuleret Dominum. Ergo.*

*R. Neg. cons.* Haec enim per metaphoram dicta sunt ad Dei operationem significandam; tunc quippe accedere dicitur Deus, vel recedere cum vel novam operationem ostendit, vel ea cessat. Item in Scripturis a facie Domini fugere dicuntur, qui ab eo loco recedunt, ubi Deus majestatis suae praesentiam per operationem aliquam ostendit; et contraria ratione ad Deum accedere. Ceterum non locorum spatiis ad Deum pergitur, vel ab eo recedimus, sed affectibus animorum. *Quo enim ibimus a spiritu ejus? Ps. CXXXVIII.*

*Obje. II.* Deus inhabitat in justis, et absurdum est

est dicere, eum habitare in daemonibus, aut in locis obscenis, et immundis. Ergo.

*II. Dist. ant.* Habitat in iustis, et non in daemonibus per inhabitantem Spiritum Sanctum, et gratiam, *conc.* Per substantiam tantum, per quam est ubique, *neg.* Augustinus *Epist. CLXXXVII. al. LVII.* *Fa-* tendum est, inquit, ubique esse Deum per divinitatis praesentiam, et non ubique per inhabitationis gratiam. In locis autem obscenis, et immundis longe minus maculatur Deus, quam radii solis, qui eadem loca pervadunt.

*Objic. III.* Si Deus esset ubique, extensus esset. Atqui non est extensus. Ergo. Hinc Patres nonnulli docent, Deum nullibi esse, hoc est non esse in loco, ut Chrysostomus *Homil. V. in Epist. ad Coloss.* alii docent, eum non esse ubique diffusum, ut Clemens Alex. *Lib. V. Strom.* et Lactantius *Lib. VII. Instit. Et Lib. de Opificio Dei cap. 16.*

*Dist. maj.* Esset extensus, si esset ubique more corporum, et eo sensu docent Patres, cum non esse in loco *circumscriptive*, aut *definitive*, *conc.* Si esset ubique more spirituum, sicut anima rationalis extensionis expers in toto corpore est, quod regit, et movet, *neg.* Hinc Augustinus *Epist. CLXXXVII. al. LVII.* In eo, inquit, quod dicitur Deus per cuncta diffusus, carnali resistendum est cogitationi, ne quasi sic spatiosa magnitudine cogitemus Deum per cuncta diffundi: sed sic est per cuncta diffusus, ut non sit qualitas mundi, sed substantia creatrix mundi, sine labore regens, et sine onere continens mundum. De Lactantio, non desunt qui eum in errore versatum esse latentur, quod nobis non incommodat. Sed potest defendi distinctione supra posita. Ait enim ipse in *Lib. de Opificio Dei Cap. 16.* unde objectio sumta est. *Divina mens Dei per universas mundi partes intenta, omnia regit, .... ubique praesens, ubique diffusa.*

## Scholion.

Cogitatio immensitatis Dei, ubique praesentis, magnam est virtutis incitamentum, frænumque vitiorum. *Hac enim ratione fit, ut quis numquam labatur, si Deum sibi semper adesse recogitet, inquit Clemens Alex. Lib. III. Paed. Cap. 5.*

## PROPOSITIO II.

*Verisimilius est, Deum esse ubique praesentem per operationem ad extra.*

*Prob. I. Scriptura exprimit praesentiam Dei in rebus per ejus operationem. Act. XVII. 27. Non longe est ab unoquoque nostrum; in ipso enim vivimus, et movemur, et sumus. II. Idem docent PP. Tertullianus Lib. cont. Prax. cap. 23. Ceterum, inquit, scimus, Deum etiam intra abyssos esse, et ubique consistere; sed vi, et potestate. III. Ideo Deus rebus omnibus praesens adest, quia eas creavit, et servat; si enim ab hac operatione cessaret, nec res existerent; ac proinde nec in ipsis esset Deus. Ergo.*

## PROPOSITIO III.

*Deus non est in spatiis imaginariis; quæ a nobis mente concipiuntur extra universum.*

*Prob. Ibi Deus non est, ubi non operatur; sive enim formaliter sit alicubi per operationem, quod verisimilius esse supra diximus; sive operatio sequatur ejus presentiam in loco, certum est apud omnes, Deum non esse ubi non operatur. Atqui in spatiis imaginariis non operatur. Spatia enim hæc non existunt, sed sunt feriantis ingenii figmenta, ut loquitur Augustinus Lib. XI. de Civ. cap. 5. Ergo.*

*Dices. Si Deus in spatiis illis non esset, plura sequerentur absurda; 1.º Deus esset in hoc mundo tantum, et non alibi, ac proinde non esset immensus;*

*2.º Si*

2.<sup>o</sup> Si Deus aliud crearet extra mundum, tunc ibi inciperet existere, ubi ante non erat, ac proinde mutabilis esset. 3.<sup>o</sup> Si duo corpora a se invicem distantia crearet in spatiis illis, in ambobus existeret, nec tamen esset in interjecto spatio, ideoque esset dividuus. Ergo.

R. *Neg. seq. ant.* Nullum scilicet absurdum ex illis sequitur. Deus enim, ut sit immensus, non indiget, ut actu repleat infinita loca, alioquin locus esset ens necessarium; sed satis est, ut existat in seipso, habens potestatem infinita loca creandi, conservandi, et replendi. Sicut ergo antequam mundum conderet, immensus erat, etsi *solus Deus erat ipse sibi, et mundus, et locus, et omnia*, ut ait Tertullianus (*contra Prax. cap. 5.*) ita post mundum conditum, non includitur mundo, sed *excelsior caelo est Job. XXII. 12.*, et extra mundum in seipso est. Nec continetur Deus loco, sed potius continet locum. Et sicut, cum mundum creavit, non est ipse mutatus, incipiens esse ubi non erat, sed creatura mutata est, incipiens esse, quae non erat, ita si alium crearet mundum, etiam si ponatur ab hoc mundo distans, tota mutatio, et divisio non in Deo esset, sed in effectu, nempe in creatura.

Schölion.

Si qui sunt, qui spatium non solum in mente nostra, sed revera extra mundum extare putant, quod philosophis examinandum relinquimus, ii merito Deum revera in illis spatiis esse docent.

C. A. P. IX.

*De invisibilitate, et incomprehensibilitate Dei.*

*Adv. I.* Cum Apostolus *I. Tim. I. 17.* dicat, Deum esse invisibilem: *Regi saeculorum immortali et invisibili*; et Christus in Evangelio *Matth. V. 8.* mundis corde visionem Dei promittat: *Beati mundo corde quoniam ipsi Deum videbunt*; hinc qua ratio-

ne Deus invisibilis, qua ratione visibilis dicatur, explicandum est.

II. Quoniam autem videre dicimur non solum ea, quae corporeis oculis contuemur, sed etiam quae intellectu cognoscimus, unde ait Cicero *Lib. VI. Epist. 13. Idem exitus, quem ego tam video animo, quam quae oculis cernimus*; hinc quaeritur, utrum Deus visibilis, an invisibilis sit utroque modo.

III. Rursus visio haec intellectus, duplex in Scholis distinguitur, altera imperfectior, et veluti obliqua, quam barbare *abstractivam* vocant, nos naturaliter possumus dicere; altera clarior, et directa, quam dicunt *intuitivam*, quamque visionem claram, aut beatam appellabimus. Prior est, qua res non videtur ipsa per se, sed cognoscitur per effectum, sicut videmus praesentem hominis animam per motus corporis, solem per lucem, seu calorem, et *invisibilia Dei per ea, quae facta sunt*. Altera vero, seu clara et intuitiva est, qua res videtur in seipsa, sicut cum ipsum solem directe aspicimus.

IV. Verum haec posterior visio iterum duplex est: altera, quae simpliciter *intuitiva* dicitur, qua scilicet res tota videtur, sed non omni ea perspicuitate, qua a Deo cognoscitur; altera exquisitissima, quam Graeci *καταληψιν, περιληψιν, περιγραφην*, Latini *comprehensionem*; Scholastici *visionem comprehensivam* vocant, qua scilicet res ex toto ita clare, et distincte percipitur, ut cognitio totam ejus magnitudinem exaequet, et exhaustiat, ac circumscribat. Praeclare Augustinus *Epist. XCII. Aliud est, inquit, videre, aliud totum videndo, comprehendere. Quandoquidem id videtur, quod praesens utcumque sentitur: totum autem comprehenditur videndo, quod ita videtur, ut nihil ejus lateat videntem, aut ejus fines circumscribi possunt*, addunt recentiores Theologi, ut tantum res videatur, quantum in se visibilis, et cognoscibilis est.

V. Varii autem hac in re, et oppositi fuerant errores. Nonnulli enim, de quibus Augustinus *Ep. XCIII. al. VI. et CXLVIII. al. CXI.* asserebant, Deum a beatis oculo corporis aliquando videndum; nec defuerunt Theologi, ut *Greg. Valentia*, qui id, saltem

ex Dei absoluta potestate, possibile statuunt. At alii e contrario Deum, ut in se est, ne mente quidem, seu intellectu divina ope roburato, clare cognosci posse affirmarunt, ut quidam obscuri nominis apud Gregorium M. *Lib. XVIII. Moral. cap. 54.* Armeni apud Armachanum *Lib. XIV. de Quaestionib. Armen. Cap. 1.* et Palamitae, seu Gregorii Palamas discipuli apud Petavium *Lib. VII. Cap. 7.* Anomoei vero Saec. IV. et Beguardi Saec. XIV. assercbant, Deum etiam per vires naturae clare cognosci posse, imo et perfecte comprehendi juxta Anomoeos ( Beguardi enim non videntur comprehensionem agnovisse ). Nonnulli visionem illam claram aliquibus sanctis, etiam in hac vita, concessam esse putarunt *ex. gr.* Moysi, Paulo. Ita censet cum aliis S. Thomas *I. P. Q. XII. art. ix. ad 3.*, at alii, ne in altera quidem vita, sanctis concessam esse ajunt, sed differri ad extremum judicii diem. Ita sensit IV. Saec. *Vigilantius*, teste *Hieronymo*, et Saec. XVI. *Lutherus Praelect. in Gen. Calvinus. Lib. IV. Instit. cap. 25. §. 6.* Sociniani in *Vindiciis Christianae Confes. cap. 25.* In eundem errorem inclinavit, vel lapsus est *Joan. XXII.*

VI. Celebris etiam est hac in re error *Millenariorum*, qui sic dicti sunt, quod crederent, post resurrectionem Sanctos regnatu- ros cum Christo, in terra mille annis: qui quidem divisi sunt in partes duas. Primi post infamem *Cerinthum* putarunt, hos millo annos traducendos inter epulas, et libidines, tumque restituendum Templum, et Mosaicos ritus, ut testatur *Eusebius Lib. III. Hist. Cap. 28.* alii vero post *Papiam* Hierapolitanum, qui cum Joannis auditor fuerit, multos in suam sententiam traxit; innoxias tantum, sanctasque delicias in hoc millenario regno fore affirmabant, easque nonnulli putabant futuras tantummodo spirituales, alii corporeas etiam, modo tamen essent licitae, non respuebant; nec censendi sunt haeretici, quia versabantur in errore nondum ab Ecclesia damnato. *Tertullianus* ( qui etiam in hoc erravit ) a communi lege excipiebat martyres, quos statim a morte cum Christo gaudere, et regnare docuit.

VII. Nos octo articulis rem totam breviter tractabimus. 1.<sup>o</sup> Utrum Deus clare, seu intuitive videri possit oculo corporis; 2.<sup>o</sup> utrum intellectu; 3.<sup>o</sup> utrum aliqui in hac vita Deum clare viderint; 4.<sup>o</sup> utrum sancti plene purgati, jam nunc clare Deum videant; 5.<sup>o</sup> an admittendum sit regnum millenarium; 6.<sup>o</sup> Quomodo beati Deum clare videant; 7.<sup>o</sup> quid videant; 8.<sup>o</sup> utrum aequaliter omnes videant.

## §. I.

*Utrum Deus oculo corporis videri possit.*

## P R O P O S I T I O

*Deus non potest oculis corporeis ne supernaturaliter quidem videri.*

*Prob. I. ex Script. I. Tim. VI. 16. Quem nullus hominum vidit, sed nec videre potest:* quae verba de oculis corporis praecipue intelligenda sunt, non soluta propter obvium sensum, sed etiam propter communem PP. interpretationem, *Origenis, Hieronymi, Athanasii apud Augustinum Epist. CXLVIII. al. CXI.*

*Prob. II. ex PP. 1.<sup>o</sup> Cyrillus Hieros. Cathec. IX. Carnis quidem oculis, inquit, cernere Deum impossibile est; quod enim incorporeum est, sub carnis oculos cadere non potest. 2.<sup>o</sup> Fulgentius Epist. XIV. ad Ferrandum: Hoc quippe habent oculi corporis, ut non solum corpora non videant, sed nec videre possint, si non inter ipsos, et ea, quae vident, spatii cujusquam media interealla fuerint .... Quisquis ergo putat, Deum posse oculis corporalibus cerni, prius est, ut ipsum dicat ab ipsis oculis corporali spatio separari. 3.<sup>o</sup> Augustinus Epist. XCII. al. VI. idem probat ex eo quod alioqui Deus sicut oculis, ita aliis etiam sensibus percipi posset, quod est absurdum. Sonus ergo Deus, ut possit etiam auribus percipi et halitus erit, ut sentiri possit olfactu? et liquor aliquis erit, ut possit et bibi? et moles erit, ut possit et tangi? Non, inquiunt. Quid ergo? an illud potest Deus, et hoc non potest? ..... eum solis oculis fa-*

*favent, invident autem ceteris sensibus? ..... an quousque volant desipiunt? Quibus verbis laudati PP. rationes etiam indicant, cur Deus oculis corporeis videri non possit.*

*Objicies. Job. XIX. 26. : in carne, inquit, mea videbo Deum meum, quem visurus sum ego ipse, et oculi mei conspecturi sunt. Ergo.*

*¶ Dist. ant. Deum Redemptorem incarnatum, conc. Deum in propria divinitatis substantia, neg. Ita Augustinus Lib. XXII. De Civ. Cap. 29. qui et aliam ibidem hujus loci explanationem tradit: Et in carne, inquit, mea videbo Deum, resurrectionem quidem carnis sine dubio prophetavit; non tamen dixit: per carnem meam. Aliud quippe est videre in carne, aliud videre per carnem.*

*Inst. Idem Augustinus Epist. CXLVIII., et alibi, videtur dubius utrum oculi corporis in resurrectione eleventur ad videndum Deum. Ergo.*

*¶ Dist. ant. Videtur dubius utrum oculi corporis ad hoc eleventur, mutata aliquatenus eorum natura, conc. Ea retenta, neg. Constantur enim asseruit, oculos corporis, ut nunc sunt, videre Deum non posse. Sed quia vidit, Episcopum quandam contraria sentientem, aliquatenus offensum; mirando charitatis, et pacis exemplo ita temperavit sententiam, ut in dubio relinqueret, utrum oculi corporis in resurrectione ita spirituales efficiantur (juxta illud Apostoli surget corpus spirituale) ut Deum videre possint: sed in hac ipsa dubitatione in partem negantem propendet tum in laudata Epistola, tum in Lib. XXII. de Civ. ubi uberius rem tractat. Illud certum est, longe clarius tunc videri per corpora Deum, quam nunc invisibilia ejus conspiciantur per ea, quae facta sunt, ut S. Thomas observat P. I. Q. XII. art. 3. Ait enim Augustinus: Quamobrem fieri potest, valdeque credibile est, sic nos visuros mundana tunc corpora caeli novi, et terrae novae, ut Deum ubique praesentem, et universa etiam corporalia gubernantem, per corpora quae gestabimus, et quae conspiciemus, quaquaversum oculos duxerimus, clarissima perspicuitate videamus, sicut videmus praesentem hominis animam per corporis motus.*



## §. II.

*Utrum Deus ab intellectu creato clare videri possit,  
et comprehendi.*

*Adv.* Quod supra *Cap. II.* demonstravimus, Dei essentiam hic a nobis naturaliter cognosci non posse, id nunc plenius pertractandum est, et ad omnem creatum spiritum, et intellectum est extendendum. Deinde inspicendum, utrum id fieri possit supernaturali auxilio. Qua in re jam diximus, duos fuisse contrarios haeticorum errores, 1.<sup>o</sup> Eunomianorum, qui iactabant, se naturae viribus claram Dei habere notitiam, imo, et comprehensionem, quam scilicet Deus de seipso habet; quam stultitiam commemorant Epiphanius *Haeres LXXVI.* Basilii *Lib. I. cont. Eunom.* quibus haeticis ex parte adhaeserunt Saec. XIV. Beguardi in Concilio Viennensi damnati, teste Clemente V. *Clementin. Ad nostrum Lib. V. tit. 3.* 2.<sup>o</sup> Armenorum, Palamitarum, et aliorum, qui ne per gratiam quidem fieri posse claram Dei visionem, affirmabant.

## PROPOSITIO I.

*Visio Dei clara, sive intuitiva non est intellectui  
creato naturaliter possibilis. Dogma fidei est.*

*Prob. I. ex Scrip.* quae visionem Dei auxilio supernaturali attribuit. *Joan. XIV. 21. Qui diligit me . . . manifestabo ei meipsum.* *Rom. VI. 23. Gratia Dei ultra aeterna*, quae vita utique in clara Dei cognitione sita est, ut ait Christus *Joan. XVII. 3. Haec est autem vita aeterna, ut cognoscant te solum verum Deum, et quem misisti Jesum Christum.* *I. Tim. VI. 16. Lucem inhabitat inaccessibilem, quem nullus hominum vidit, sed nec videre potest.* Quae verba generatim dicta, non solum de visione oculorum, ut obvius habet sensus, sed de quacunque visione intelligenda esse, Patres docent, illa tantummodo excepta, quam ipsae Scri-

Scripturae per supernaturale auxilium pollicentur electis. Ergo etc.

*Prob. II.* ex PP. qui ante *Eunomium* scripserunt; nam eos, qui data opera *Eunomium* confutarunt, certum est, hunc errorem damnasce, ut *Basilium*, *Gregorium Nazianzenum*, et *Aysseum*, *Chrysostomum*, aliosq. 1.<sup>o</sup> *Irenaeus Lib. IV. cap. 37.* Videbitur, inquit, *Deus in regno caelorum*, spiritu praeparante hominem in filium Dei 2.<sup>o</sup> *Origenes Lib. I. Peri Arch. cap. 1.* Mens nostra ipsum per se Deum, sicut est, non potest intueri. 3.<sup>o</sup> *Tertullianus Apolog. cap. 17.* Quod immensum est, soli sibi notum est. Ergo etc.

*Prob. III.* ratione duplici, prima quidem S. *Thomae I. P. Q. XII. art. 4.* Omnis cognitio naturalis in cognoscente est, non secundum objecti naturam; sed secundum naturae cognoscentis modum, quia operatio naturam operantis sequitur. Ideoque nec Angeli substantiam videre possumus, etsi Angelis non multum minores simus, ut advertit *Chrysostomus Orat. V. cont. Anom.* Cum ergo Dei natura ejuscumque intellectus naturam insuite excedat, quia Deus est suum esse subsistens; nulla autem creatura talis est; consequens est, ut videre Dei naturam, ut in se est, non possit esse, nisi soli intellectui Divino naturale. Altera vero ratio est, quod nihil intellectus videre possit, nisi objectum non modo sit praesens, verum etiam aliquo modo illum ad sui perceptionem excitet. Haec autem excitatio actio Dei est, et quidem libera. nulla vero creatura naturaliter efficere potest, ut Deus ubique praesens illam ad sui perceptionem moveat, et excitet. Ergo.

*Objic.* Intellectus creatus naturaliter desiderat videre Deum, ut in se est, eaque visio est naturalis ejus finis. Ergo Deum naturaliter videre potest; Deus enim unicuique creaturae dedit instrumenta naturalia, quibus finem suum naturalem posset attingere.

*g. Transeat ant. neg. cons.* Licet enim ponamus, claram visionem Dei esse finem hominis naturalem, qua in re variae sunt Theologorum sententiae, ut a libi dicemus, non sequitur, ad hanc visionem pares esse

esse naturales vires; sed hoc ad dignitatem intelligentis naturae pertinet, ut ad imaginem Dei effecta, ad eum finem sit naturaliter ordinata, ad quem non possit, nisi supernaturali auxilio pervenire. Nec Deus deficit in necessariis, quia supernaturale hoc auxilium a principio homini dedit, et licet homo ipse per peccatum eo se reddiderit indignum, Deus tamen per merita Salvatoris adhuc paratus est dare.

*Inst.* Deus est objectum maxime intelligibile. Potest igitur intellectus naturali virtute illud attingere.

*¶ Dist. ant.* Est objectum maxime intelligibile, sed infinitum, et libere movens intellectum ad sui perceptionem, *conc.* Secus, *neg.* Responsio patet ex his, quae supra dicta sunt.

### Scholion:

I. Cum non possit Deus naturaliter videri, ut in se est, fit hinc, neque per fidem id fieri posse, primo quidem quia repugnat, per fidem videri Deum ut in se est, cum fides sit non apparentium *Heb. XI.* 1. imo et per visionem fides ipsa evanescat ex Apostolo: deinde vero, quia licet assensus fidei supernaturalis sit, ipsa tamen perceptio eorum, quae fide credenda proponuntur, naturalis esse potest, atque ideo si naturaliter non possumus ut in se est videre Deum, nec per fidem possumus. Et certe *Anomoei*, ut ostendit *Petavius* cum asserebant, posse a nobis clare Deum videri, ajebant id fieri, posita fide.

II. Solent hic Scholastici movere quaestionem; utrum possit Deus creaturam spiritalem efficere, quae naturali virtute eum clare videat, qua in quaestione in contraria studia scinduntur. *Durandus*, alique affirmant; Thomistae passim negant; et quidem, ut videtur, verisimilius; rationes enim supra positae ostendunt, repugnare naturae creatae naturalem Dei visionem. Ceterum semper periculose definimus he-

be-

besi ingenio nostro quid omnipotentia sua efficere possit, quid non possit Deus, nisi cum manifesta rerum repugnantia cernitur. V. Gonet. *Tract. II. De Deo Uno. Disp. I. art. 1. §. 3.*

## PROPOSITIO II.

*Dogma fidei est, beatos clare, seu intuitive Deum videre, atque ideo visionem hanc esse supernaturaliter intellectui creato possibilem.*

*Prob. I. Matth. V. 8. Ait Christus: Beati mundo corde, quoniam ipsi Deum videbunt: et Matth. XVIII. 10. Angeli eorum semper vident faciem Patris mei, qui in caelis est: quod erit commune etiam hominibus, de quibus ait Christus Matth. XXII. 30. erunt sicut Angeli Dei. Et Apostolus I. Cor. XIII. 12. Videmus nunc per speculum in aenigmate, tunc autem facie ad faciem: nunc cognosco ex parte, tunc autem cognoscam, sicut et cognitus sum. Et I. Joan. III. 2. Charissimi, nunc filii Dei sumus, et nondum apparuit, quid erimus. Scimus, quoniam cum apparuerit, similes ei erimus. quoniam videbimus eum sicuti est. Ergo etc.*

*Prob. II. ex unanimi PP. consensu. 1.º Irenaeus Lih. IV. cap. 37. Homines, inquit, videbunt Deum, et vivent per visionem, immortales facti, et pertinentes usque in Deum. 2.º Augustinus Epist. CXLVII. al. CXII. in ea verba Apostoli: Regi saeculorum immortalis, et invisibilis. Invisibilis, inquit, non in saecula saeculorum, sed tantum in hoc saeculo. 3.º Qui seriem traditionis concludit Bernardus Serm. IV. in festo omn. Sanct. Triptliciter in aeterna illa, et perfecta beatitudine fruemur Deo, videntes eum in omnibus creaturis (scilicet longe perfectius, quam nunc eam videamus, ut supra notavimus ex Augustino Lib. XXII. de Civ. cap. 29.) habentes enim in nobis ipsis, et quod longe jucundius sit, atque beatius, ipsam quo-*

quoque cognascentes in semetipsa Trinitatem, et gloriam illam sine denigmate mundo cordis ocula contemplantes (a).

*Prob. III* ex definitione Concilii Florentini *Sess. XXVI. in Decreto unionis*, in quo, post Benedictum XII. in *Extravag. Benedictus Deus*, declaratum est, animas piorum intueri clare ipsum Deum trinum, et unum, sicut est.

*Prob. IV* ratione; tum quia desiderium videndi Deum, sive illud ab ipsa natura sit inditum, sive ita a natura comparati simus, ut eo omnes flagremus, simul ac Deum esse novimus, omnino frustra esse non potest, quo argumento utitur Augustinus *Epist. CXII.* tum quia intellectus, saltem per Dei auxilium, potest cognoscere objectum, quod est per se intelligibile; Deus autem maxime intelligibile objectum est. Ergo.

#### Solvuntur Objectiones.

*Objic. I.* Sacrae litterae absolute pronunciant, Deum esse invisibilem. *I. Tim. V. 17. Regi saeculorum immortalis, et invisibilis.* Ergo.

*W. Dist. ant.* Est invisibilis oculo corporis, ex *Origene*, vel intellectui naturae viribus, ex *Nazianzeno*, et *Nysseno*, vel etiam ex gratia est invisibilis visione exquisita, sive comprehensione, ex *Ambrosio*, et *Augustino*, *conc.* Est invisibilis visione clara, seu intuitiva per gratiam; *nég.* Etsi enim Apostoli verba absoluta sint; tamen cum ipsa Scriptura, imo ipse Apostolus polliceatur electis visionem Dei facie ad faciem; sicut est, etc. eo sensu intelligendum est, Deum esse invisibilem, qui huic promissae visioni non sit contrarius.

*Inst.*

(a) Add. *Clemens Alex. Lib. V. Strom.* *Nazianzenus Orat. XXXIV.* Auctor *Lib. de Trinis.* inter *Opp. Tertull.* cap. 26. *Ambrosius Comment. in Luc. Lib. III.* *Augustinus Ep. CXI. et CXIII. et al.* *Hieronymus ap. August. loc. cit.* *Gregorius M. Lib. X. III. Moral. cap. 28.* *Prosper, sive Auctor Lib. De Vita contempti. Lib. I. Cap. 4.*

*Inst. Joan. I. 18. Deum nemo vidit umquam: Unigenitus, qui est in sinu Patris, ipse enarravit: et Joan. VI. 46. Non quia Patrem vidit quisquam, nisi is, qui est a Deo.*

¶ *Dist. ant. Nemo hominum, conc. tunc enim nulli hominum adhuc janua regni caelorum patebat. Nemo angelorum, subdist. visione perfectissima, sive comprehensione, qualis est visio, quam habet Unigenitus, qui est in sinu Patris, conc. Visione intuitiva, neg. Ita Chrysostomus Hom. XIV. in Joan. Multo amplius, inquit, quam videre, est esse in sinu Patris. Nam qui solum videt, non accuratam omnino rei visae cognitionem habet.*

*Inst. Ipsi Angeli desiderant videre Deum: in quem desiderant Angeli prospicere. I. Pet. I. 12. Ergo non vident.*

¶ *Etiam posita hac lectione (exemplaria enim Graeca, complura Latina, et versio Syriaca, Ambrosius, et Isidorus Pelusiota habent non in quem, sed in quae; h. e. in mysteria redemptionis Christi, quae per Ecclesiam Angelis innotuerunt, et quotidie innotescunt) Dist. ant. Desiderant prospicere desiderio excludente fastidium, conc. Excludente praesentiam, neg. Desiderant sine labore, quia desiderium satietas comitatur. Et satiantur sine fastidio, quia ipsa satietas ex desiderio accenditur, inquit Gregorius M. Lib. XVIII. Moral. cap. 54.*

*Obje. II. Multi PP. praesertim Graeci, et praecipue Chrysostomus, et Theodoretus negant, divinam naturam esse visibilem et hominibus, et Angelis. Chrysostomus Hom. XIV. in Joan. Id quod est Deus, non modo Prophetae non viderunt, sed neque Angeli, neque Archangeli. Idem saepe repetit Homil. II. III. IV. de Incomprehensibili Dei natura. Unde Vasquez in I. P. Disp. XXXVII. non dubitavit Chrysostomum recensere iis, qui negarunt claram Dei visionem. Theodoretus vero in Cap. XIII. J. in ea verba, tunc autem facie ad faciem, ait: videbimus eum, non quae sub aspectum non cadit, naturam, sed eam, quae de nobis sumita est. Et Dial. I. cum Eutychianis; Si ergo nec hominibus (dico ego nec Angelis) videri po-*  
tens

test divina natura, dic quomodo in terra visus est qui cerni, et conspici non potest? Et cum concederet *Erranistes*, etiam S. Patriarchis visum esse Deum, per quandam *συγκαταβατικὴν* accommodationem, sive condescensum, ut Scholae loquuntur, hoc est quasdam revelationes, captui eorum accommodatas; inde infert Orthodoxus: Sic ergo de Angelis intelligamus, audientes, quod semper vident faciem Patris vestri. Non enim vident divinam substantiam, quae nec comprehendi, nec circumscribi, nec mente percipi potest, et quae universa comprehendit; sed per speciem quandam ipsorum naturae accommodatam.... Post incarnationem vero visus est etiam Angelis ..... non in similitudine gloriae, sed vero, ac viro utens quasi velamine, carnis integumento. Ex quo vides, Theodoretum non aliam visionem attribuisse Angelis ante incarnationem, quam illam, quae etiam Patriarchis per quandam revelationem data est. Similia docent Auctor *Quaestionum ad Antiochum* inter Op. Athanas. cap. 20. Basilii Lib. I. cont. Eunom. Gregorius uterque, Nazianzenus Orat. XXXIV. et Nyssenus Orat. XII. cont. Eunom. Ambrosius. (in Luc. initio) Hieronymus Epist. CXLVIII. ap. August. Cyrillus uterque, Hierosolymitanus Cathéc. VI. et Alexandrinus Lib. XXXII. Thesauri et alii bene multi, quorum loca vide apud Witassium. Ergo.

R. Dist. ant. Negarunt, divinam naturam esse visibilem visione exquisita, ac perfecta, quae comprehensio dicitur (de qua inferius.) conc. Visione intuitiva neg. Scribebant enim praecipue contra Anomoeos, qui naturam divinam se comprehendere affirmabant, et stulte non minus, quam impie faciliabant, se ita Deum nosse, ac Deus ipse novit, ut inquit ipse Chrysostomus Hom. II. De incomprehens. Unde visi sunt adversariis quasi in oppositum errorem declinasse, sicut et Cyrillus contra Nestorium scribens, visus est Eutychianis negare duas in Christo naturas: et Augustinus peccatum originale adstruens, visus est Pelagianis ad Manichaeos deflectere; sed quamvis aliquando loqui videantur paulo durius, benigne interpretandi sunt. Cum enim nemo de hac re dubi-

taret, ita intelligi se putaverunt, quomodo in catholica Ecclesia credebatur.

Quod ad *Chrysostomum* adinet, mira est injuria *Vasquez*, qui erroris accusat tantum doctorem, excusat vero *Anomoeos*, cum ipse titulus *Homiliarum de incomprehensibili Dei natura* demonstret, intelligendas esse de visione perfectissima, sive comprehensione. Imo ipse *Chrysostomus* se explicat, cum ait cit. *Hom. XIV. in Joan. Substantiam ejus nemo novit, nisi is, qui ex ipso natus est. Cognitionem enim hic dicit certam visionem, ac comprehensionem, qualem Pater de Filio habet*, quibus verbis cum clare statum quaestionis aperiat, nullum relinquit dubitandi locum, nisi iis, qui sunt plus aequo litigiosi. Qualis autem fuerit ejus mens de clara Dei visione, ex aliis ejus scriptis manifestum est. Sic in *Parenesi I. ad Theodor.* in ea verba *Petri Matth. XVII. Bonum est, nos hic esse: Quid, inquit, dicetur, quando ipsa rerum veritas aderit? Quando apertis Regis aedibus, ipsum Regem conspiciere licebit, non ultra in aenigmate, neque per speculum, sed facie ad faciem? non ultra per fidem, sed per speciem?* Vide *Natalem Alexand. Saec. IV. cap. 5. art. 30. Petavium Lib. VII. cap. 5. et 6. Dupinum in Biblioth.*

Idem de *Theodoreto* dicas. Disputabat contra *Eutychianos*, qui naturam humanam in Christo absorptam a divinitate asserebant. Probat ergo, absorptam non esse, quia aliter Christus fuisset adhuc invisibilis, sive *incomprehensibilis*, cum contra *Apostolus* dicat, eum fuisse visum ab hominibus, et Angelis, quod non potest intelligi de natura divina, quae nec comprehendi, nec circumscribi, nec mente percipi potest. Ergo de humana. Quibus verbis satis ostendit, intelligenda esse ejus verba de visione exquisita, atque perfecta, quae humana tantum, non vero divina natura comprehendi potest. Quod autem claritatem Dei visionem in sanctis agnovit, satis exponit *Comment. in epist. ad Ephes. Nunc, inquit, bonorum, quae sperantur, magnitudo est quidem omnino ignota fidelibus; per fidem enim ambulant, non per speciem: tunc*

ait-



*autem vid. hunc facie ad faciem.* (a). Neque vero te moveat, quod Patres dicunt, videri Deum ab Angelis per quandam *συνκατάθεσιν*, sive accommodationem, sicut a Patriarchis; haec enim per *analogiam*, sive proportionem intelligenda sunt, ita ut pro diverso statu, et gratia intelligentium, varia sit hujus accommodationis ratio, sicut Magister captui auditorum se semper accommodat, sed varie pro varietate ingeniorum.

*Obje. III.* Aliqua debet esse proportio inter facultatem, et *objectum*. Atqui nulla est inter intellectum creatum, et Deum clare conspiciendum. Ergo.

*¶. Dist. maj.* Proportio habitudinis, *conc.* naturae, sive entitatis, *neg.* *Dist. etiam min.* inter intellectum creatum, et Deum nulla est proportio naturae, sive entitatis, *conc.* Habitudinis, *subdist.* Nulla est proportio naturalis, *conc.* Supernaturalis, si lumine gloriae illustretur, *neg.*

### PROPOSITIO III.

*Natura divina nec naturaliter, nec supernaturaliter ab intellectu creato comprehendi potest. Est dogma fidei quoad primam partem.*

*Prob. I. Job. IX. 10.* Qui magna facit, et incomprehensibilia, et *Cap. XI. 7.* Forsitan vestigia Dei comprehendes, et usque ad perfectum Omnipotentem reperies? *Jerem. XXX. 19.* Magnus consilio, et incomprehensibilis cogitatu. *Rom. XI. 33.* Incomprehensibilia sunt judicia ejus, et investigabiles viae ejus. Ergo etc.

*Prob. II. ex PP. 1.º Augustinus Serm. CXVII. al. XXXVIII. de verb. Dom.* Quid mirum, inquit, si non comprehendis? Si enim comprehendis, non est Deus: attingere aliquantum mentē Deum, magna beatitudo est, comprehendere autem omnino impossibile. 2.º *Epiphanius Haeres. LXX.* docens, Deum a beatis videri quidem

(a) Vide Garnerium in *Austario Operum Theodoret* Dissert. III.

dem, sed non comprehendi, illud affert exemplum: veluti si quis per angustum foramen caelum adspiciat, et dicat, video caelum, non utique mentietur; videt enim revera caelum: quod si quis acute ei dicat, non vidisti caelum, neque iste mentietur... Quippe non vidit illius exporrectionem, neque altitudinem (a): Ad di possunt Patres, qui contra Anomoeos scripserunt. Hinc Concilium Lateranense IV. C. Firmiter, *De summa Trin. Credimus, quod sit Deus incomprehensibilis.*

*Prob. III. ratione.* Nulla creatura capax est actus infiniti. Atqui comprehensio Dei, qui infinitus est, et infinitorum possibilium causa, actus est infinitus, ac proinde solius Dei proprius, qui seipsam, quantum est visibilis, videt, et comprehendit. Ergo etc. (b).

### Objectiones.

*Objic. I.* Apostolus *I. Cor. IX. 24.* ait: *Sic currite, ut comprehendatis:* et *Philip. III. 12.* *Sequor autem, si quo modo comprehendam.* Ergo.

¶ *Neg. cons.* Comprehendere enim ibi nihil aliud est, nisi apprehendere praemium, ad quod curritur.

*Objic. II.* Idem Apostolus *I. Cor. XIII. 12.* *Tunc autem, inquit, cognoscam, sicut, et cognitus sum;* Atqui cognitus erat a Deo cognitione exquisita, ac perfectissima, sive comprehensione. Ergo.

¶ *Dist. maj.* Et adverbium *sicut* significat naturam cognitionis, *conc.* Significat quantitatem, et modum cognitionis, *neg.* Ait ergo Apostolus, sicut cognoscor, sic cognoscam, h. e. sicut cognoscor clare,

H h

re,

---

(a) Add. Irenaeus *Lib. IV. Cap. 36.* Clemens Alex *Lib. V. Strom.* Nazianzenus *Orat. XXXIV.* Chrysostomus *Hom. IX. cont. Anom.* Cyrillus Alex *Lib. XXX. Thesauri.* Marius Vict. *Lib. I. cont. Arium.* S. Thomas *Lib. III. cont. Gent. Cap. 54.* Gregorius M. *Lib. XVIII. Moral. Cap. 28.* etc.

(b) Vid. S. Thom. in *III. Dist. XIV. Q. 1. art. 2.* et ad Annibald. *Dist. XLIX. art. 1.*

re, sic clare cognoscam: sed non ait; quantum cognoscor, tantum cognoscam.

*Objic. III.* Deus est ens simplicissimum. Ergo aut comprehenditur, aut omnino non videtur.

¶ *Neg. cons.* Ex eo enim quod Deus ens est simplicissimum, illud tantum consequitur, Deum non posse videri, nisi totum; sed non sequitur, eum videri omni ea claritate, quā visibilis est; et cognosci etiam omnia possibilia, ad quae ejus omnipotentia se extendit. Utrumque autem ad comprehensionem pertinet. Causa enim universe cognosci non potest, nisi omnia ejus effecta noscantur.

*Objic. IV.* Anima Christi Deum non solum videt, verum etiam comprehendit. Ait enim Isidorus *Cap. 2. in Exod. Sola sibi integre nota est Trinitas, et humanitati susceptae.* Idem etiam variis in locis videtur sensisse *Fulgentius.* Ergo etc.

¶ *Neg. ant.* Damnata enim est haec propositio inter theses Augustini Romani a Concilio Basileensi *Sess. XXII.* ut dicemus *Lib. VI.* Patres ergo, si quæ sunt, qui quandam comprehensionem animæ Christi tribuere videantur, intelligendi commode sunt de visione excellentissima, et maxima, quam ulli creaturae concedere ordinariè possit Deus.

#### Scholion.

Deum naturaliter nec videri, nec comprehendere posse, fidei dogma est. Item dogma est fidei, beatos Deum non comprehendere actu; sed utrum ex potestate absoluta, et extraordinaria possit Deus creaturam suam ita roborare, ut Deum comprehendat, salva fide, inter Catholicos disputatur, et quidem Vasquez in *I. P. Disp. LII.* affirmantem sententiam defendit. Sed rationes superius explicatae contrarium evincunt.

## §. III.

*Utrum aliqui in hac vita Deum clare viderint.*

*Adv.* Quin Deus id concedere potuerit, et revera Christo concesserit, non est dubium. Disputatur ergo, utrum aliquis, praeter Christum, homo visione Dei aliquando sit donatus, praesertim Moyses, et Paulus. S. Thomas *I. P. Q. XII. art. 11. ad 2. et 2a. 2ae. 2. Q. CLXXV. art. 3.* id affirmat, eumque multi Theologi sequuntur. Sed communior Patrum, et Theologorum sententia negat.

## P R O P O S I T I O.

*Verisimilius est, nemini in hac vita claram Dei visionem esse concessam.*

*Prob. I.* ex Scriptura, quae absolute pronunciat, neminem umquam vidisse Deum. *Deum nemo vidit umquam Joan. I. 18. Quem nullus hominum vidit I. Tim. VI. 16.* Joannis autem Evangelium, et Epistola ad Timotheum scripta sunt post Epistolam ad Corinthios, in qua Paulus dixerat, se raptum esse in Paradisum. *Exodi XXXIII. 20. Non videbit me homo, et vivet.*

*Prob. II.* ex PP. quorum plurima testimonia profert Carolus Witasse *Tract. de Deo Quaest. XI. art. 2. Sect. 9.* Nos paucis erimus contenti. 1.<sup>o</sup> Irenaeus *Lib. IV. cont. haeres. Cap. 37. Neque Moyses vidit Deum, neque Elias, neque Ezechiel, qui multa de caelestibus viderunt: quae autem ab iis videbantur, erant similitudines claritatis Domini quod multis probat argumentis.* 2.<sup>o</sup> Origenes in *Cap. I. Isaiae: Dei faciem non vidit Isaïas, nec Moyses: posteriora viderunt, ut scriptum est.* 3.<sup>o</sup> Augustinus *Quaest. CXLIV. in Exod. explicans illa verba non videbit homo faciem meam, et vivet, inquit: ostendens huic vitae, quae agitur in sensibus mortalibus corruptilibus carnis, Deum sicuti est, apparere non posse. Et Tract. III.*

in Joan. n. 17. in illud: *Deum nemo vidit unquam, ait: Quid vidit Moyses? vidit nubem, vidit Angelum, vidit ignem. Omnis illa creatura erat, typum Domini sui gerebat, non ipsius Domini praesentiam exhibebat.* Idem alibi repetit (a). Similia docet Tertullianus *Lib. cont. Prax. cap. 14.* Clemens Alex. *Lib. V. Strom.* Cyrillus Hierosolymitanus *Catech. IV.* et alii (b).

*Objectiones diluuntur.*

*Obje. I. Sacrae litterae Exod. XXXIII. 11. et Num. XII. 6. et seq. ostendunt, Moysen vidisse Deum facie ad faciem, palam, et non per aenigmata, et figuras; ore ad os locutum esse cum Deo, sicut solet loqui homo ad amicum suum. Num. XII. 6. Si quis fuerit inter vos propheta Domini, in visione apparebo ei, et per somnium loquar ad illum. At non talis servus meus Moyses .... ore enim ad os loquor ad eum, et palam, et non per aenigmata, aut per figuras Dominum videt. Exod. XXXIII. 11. Loquebatur autem Dominus ad Moysen facie ad faciem, et v. 18. Ostende mihi, inquit Moyses, faciem tuam. Cui respondit Deus: Ego ostendam omne bonum tibi. Atqui non aliis vocabulis utantur sacrae litterae, cum asserunt Sanctis claram Dei visionem, sicut ait Apostolus I. Cor. XIII. 12. Videmus nunc per speculum in aenigmate, tunc autem facie ad faciem. Ergo aut neganda est sanctis visio beata, aut asserenda est Moysi, ac proinde merito S. Thomas, a cuius doctrina recedere non est tutum, docet, Moysen visione Dei clara per actum transeuntem esse donatum, neque ab hac sententia abhorret ipse Augustinus Lib. XII de Genes. ad lit. cap. 27. Hilarius Lib. I. de Trin. cap. 3. Basiliius Hom. 1. in*

(a) *Lib. II. De Trin. Cap. 16. Lib. III. cont. Maximin. Cap. 12. Lib. IV. De Symb. Cap. 3.*

(b) Athanasius, Nazianzenus, Nyssenus, Basiliius, Epiphanius, Chrysostomus, Theodoretus, Ambrosius, Gregorius M., Bernardus, etc. apud Sylvium I. P. Q. XII. art. II. Petavium *Lib. VII. Cap. 12.* Et Witassium *loc. cit.*

1. in Hexam. Rupertus De Victor. verb. Dei Lib. III. cap. 28.

¶ *Dist. maj.* Et tamen eadem Scriptura insinuat alibi, nec ipsum Moysen clare vidisse Deum, quia *Deum nemo vidit unquam*, et quia Moyses non cum Deo, sed cum Angelo, Dei vicem gerente, loquebatur *Act. VII. 30.* et *Galat. III. 19. conc.* Secus, nego. Imo ex ipsis locis, quae obijciuntur, concludi potest, Moysen non clare vidisse Deum, sed tantum clarius ceteris Prophetis, alioquin cur Deum postulasset: *Ostende mihi faciem tuam?* Cui quidem desiderio non annuit Deus, sed respondit: *Non poteris videre faciem meam; non enim videbit me homo, et vivet. . . Videbis posteriora mea: faciem autem meam videre non poteris.* Quapropter omne bonum ostendit Dominus Moysi, quantum capax erat mortalis natura. Quod attinet ad *S. Thomam*, non negamus, contrariam sententiam esse verisimilem, praesertim propter auctoritatem tanti doctoris, et aliorum quorundam veterum, sed nostram, et verisimiliorem, et inter Patres communius receptam defendimus. Augustinus *loc. cit.* disputando, et inquirendo potius, quam afirmando, loquitur, ut fatetur *Lib. II. Retract. cap. 24.* *In quo opere plura sunt quaesita, quam inventa; et eorum, quae inventa sunt, pauciora firmita.* Quatenam vero ejus sententia fuerit, cum ex propria sententia definite locutus est, supra vidimus.

*Obje. II.* Paulus raptus est in Paradisum *II. Cor. XII. 4.*; atqui haec verba significant, eum clare Deum vidisse, sicut cum ait Christus Latroni *hodie mecum eris in Paradiso Luc. XXIII 43.* Praeterea idem privilegium B. Virgini, et S. Benedicto graves Theologi concessum esse affirmant. Ergo etc.

¶ *Neg. min.* Paradisi enim nomen varie in Scripturis intelligitur, sicut cum dicitur Adam positus in Paradiso, Enoch translatus in Paradisum, et Sodomam et Gomorrhā fuisse olim, *sicut Paradisus Domini.* Nec valet comparatio Latronis; nam illi promissio facta est, post mortem implenda: Paulus adhuc in corpore mortali erat. Deus autem in Scripturis absolute pronuntiat: *Non videbit me homo,*

et

et vivet. De auctoritate vero Theologorum, jam diximus, rem esse in controversia positam.

#### §. IV.

*Utrum Sancti plene purgati, seu quibus nihil expiandum superest, statim clara Dei visione fruantur, an vero judicii diem expectent.*

### PROPOSITIO

*Dogma fidei est, Sanctos plene purgatos statim clara Dei visione frui.*

*Prob. I. ex Scriptura. Apostolus II. Cor. V. i. et seq. Scimus, inquit, quoniam si terrestris domus nostra hujus habitationis dissolvatur, quod aedificationem ex Deo habemus, domum non manufactam, aeternam in caelis... Audentes igitur semper, scientes quoniam dum sumus in corpore, peregrinamur a Domino (per fidem enim ambulamus, et non per speciem) audemus autem, et bonam voluntatem habemus magis peregrinari a corpore, et praesentes esse ad Dominum. Nihil hoc loco clarius esse potest. Hortatur enim Apostolus fideles, ne morte terreantur, imò eam libenter oppetant, quoniam dum in corpore sumus, ambulamus per fidem, at soluti corpore, Deo praesentes erimus, et ambulabimus per speciem. Sed hoc falsum esset si visio Dei, quae fidem evacuat, ad resurrectionem corporum differretur. Ergo etc.*

*Sed et idem Apostolus Philip. I. 21. Mihi, inquit, vivere Christus est, et mori lucrum. Quod si vivere in carne, hic mihi fructus est, et quid eligam ignoro. Coarctor autem e duobus: desiderium habens dissolvi, et esse cum Christo, multo magis melius, permanere autem in carne necessarium propter vos. Si autem ad resurrectionem usque differretur visio Dei, non fuisset mori lucrum, nec dissolutio corporis consociasset Christo, etc. Ergo.*

*Prob. II. ex longa Patrum serie, quam texere possemus, excurrendo per omnia Ecclesiae saecula, nisi ob-*

obstaret ins titutū brevitās. Primo saeculo Ignatius M. Epist. ad Rom. *Sinite*, inquit, *me ferarum escam fieri per quas liceat Deū adipisci . . . sinite purum lumen haurire. Meus amor crucifixus est, et non est ignis amans ullam aquam, sed vivens, et loquens in me: veni ad Patrem. Quod non diceret, nisi statim post mortem beatam vitam speraret. Idem docent Clemens Romanus Epist. I. ad Corint. Hermas Lib. III. Pastoris Similit. 8. nec ullus eo saeculo contrarium docuit.*

Saeculo II. Athenagoras Apolog. *Persuasi sumus, nos hac mortali defunctos vita, alteram hac terrestri longe meliorem, nempe caelestem esse victuros, ut apud Deum et cum ipso simus. Idem docent Polycarpus ap. Euseb. Lib. III. Hist. cap. 36. Auctor Actorum S. Symphorosae apud Ruinartum in actis synceris p. 20. etc. Ecclesia Syriensis ap. Euseb. Lib. IV. Hist. Cap. 15.*

Saeculo III. Cyprianus Exhortat. ad martyrium: *Quanta dignitas, et quanta securitas exire hinc laetum, exire inter pressuras, et angustias gloriosum: claudere in momento oculos, quibus homines videbantur, et mundus, et aperire eosdem statim, ut Deus videatur et Christus? Tam feliciter migrandi quanta velocitas! Terris repente subtraheris, ut in regnis caelestibus reponaris. Idem docent Clemens Alex. lib. V. Strom. Origenes Lib. II. Peri arch. Cap. 12. et Hom. V. De diversis. Dionysius Alex. apud Eusebium Lib. III. Hist. cap. 28. Methodius Martyr apud Photium.*

Saeculo IV. et seqq. tot sunt traditionis testes, ut etiam nomina, et loca citare longum esset. Sufficiat eorum recitare testimonia, de quibus aliqua extitit suspicio 1.º Ambrosius Lib. De bono mortis cap. 11. ait, *animas corporibus solutas, aeternam possidere haereditatem. Hinc remunerationem habent, ut videant faciem Dei, et lumen, quod illuminat omnem hominem. Tunc revelata facie gloriam Dei speculari licebit.* 2.º Augustinus, licet antea de hoc dubitaverit, tamen Lib. XII. De Genes. ad lit. cap. 34. ait, *animam secretam, et remotam, atque omnino abreptam a sensibus carnis, atque mundatam, ea, quae in illo caelo sunt, et ipsam Dei substantiam, Verbum Deum, per quod facta sunt omnia, videre, et audire.* 3.º Bernardus Serm.



*II. in S. Victorem.* Jam caelos, inquit, ingressus, verè nunc revelata facie speculatur gloriam Dei . . . beata visio, qua in eandem imaginem transformatur. Idem docent Athanasius, Basilus, Gregorius uterque Nazianzenus, et Nyssenus, Hilarius, Epiphanius, Chrysostomus, Hieronymus, etc. (a), ita ut mira sit impudentia Dallaei, et aliorum, qui ut argumenta, e traditione deducta, enervent, falso asserunt; prioribus saeculis traditionem pro millenariis stetisse.

*Prob. III. ex communi, et perpetuo sensu Ecclesiae,* quae pro certo semper habuit, Sanctos in caelis jam nunc reguare, eorumque suffragia postulavit, ut suo loco demonstrabimus *Lib. VI. Legem autem credendi statuit lex supplicandi*, ut inquit Caelestinus I. *Epist. II. ad Episc. Gall.*

*Prob. IV. ex Sum. Pontificum decretis, ut Innocentii III. Cap. Apostolicam: De Presbyt. non baptiz. Benedicti XII. in Extravag. Benedictus Deus, et aliorum.*

*Prob. V. ex Conciliis.* Definita enim est haec controversia in duobus Conciliis Oecumenicis, Lugdunensi ( *in formula fidei* ), et Florentino *Sess. XXV.* Imo hoc dogma, ut jam definitum habuit Conc. Trid. *Sess. XXV.* agens de invocatione Sanctorum cum Christo regnantium.

*Prob. VI. ex ratione Theologica.* Deus ad miserendum prior est, quam ad ulciscendum. Atque impii statim post mortem addicuntur poenis; ut constat ex historia divitis *Luc. XVI. 22. mortuus est enim dives et sepultus est in inferno. Elevans autem oculos suos, cum esset in tormentis etc.* Ergo et pii plene purgati statim post mortem potiuntur praemio; unde dicitur *Eccl.*

---

(a) Athanasius in *vita Antonii.* Basilus *Orat. de Gord. Mart. et Orat. in XL. Mart. et de S. Julitha.* Nazianzenus *Orat. X XI., et XX.* Nyssenus *Orat. funeb. Palchias, et Orat. II in XL. Mart.* Hilarius in *Psalm. I.* Ambrosius *Epist. ad Thessalonic. de Acholio.* Epiphanius *Haer. vet. LXXVIII.* Chrysostomus *Hom. VIII. in 2. ad Cor.* Hieronymus *libro contra Vigilant. et Epist. ad Marcellum* Leo M. Gregorius M. etc.

*Eccl. XI. 28. Facile est Deo in die obitus retribuere unicuique secundum vias suas.*

*Solvantur Objectiones ex Scripturis.*

*Objic. I.* Scriptura ubique spem piorum usque ad corporum resurrectionem producit, ac suspendit. Sic *Luc. XXI. 28.* describens Christus signa futuri iudicii, ait: *His autem fieri incipientibus respicite, et levate capita vestra, quoniam appropinquat redemptio vestra.* Similia habentur *Rom. VIII. 23. Matth. XXV. 34. II. Tim. IV. 8.* et alibi saepe. Ergo etc. Ita Calvinus *Lib. III. Inst. cap. 25. n. 6.*

*¶. Dist. ant.* Suspendit spem, et beatitudinem completam, et generalem, *conc.* non completam, et singularem, *neg.* Itaque beatitudo non completa solius animae separatae, et singularis uniuscujusque animae est, eum ab omni peccati lae expiata, ad beatam visionem admittitur. At beatitudo completa tum animae, tum corporis, et generalis omnium justorum in resurrectione erit. Scriptura vero praemium justorum describens, praecipue diem resurrectionis respicit, et commemorat, tum quia tunc erit gloria integra, et generalis totius corporis Christi, quod est Ecclesia, tum quia fideles corpore cruciati, et afflicti, in spem erigendi erant, proposita etiam corporis gloria.

*Inst.* Apostolus *I. Cor. XV. 32.* docet, frustra esse spem fidelium, si mortui non resurgunt. Si ad bestias pugnavi *Ephesi*, quid mihi prodest, si mortui non resurgunt? Quod etiam innuit auctor *Lib. II. Machab. Cap. XIII. v. 44.* Nisi enim eos, qui ceciderant, resurrecturos speraret, superfluum videretur, et vanum orare pro mortuis. Ergo nullum praemium ante resurrectionem.

*¶. Neg. cons.* Scriptura enim ostendit, inanem esse spem fidelium, si mortui non resurgant, non quia ante resurrectionem piorum animae beatitudine non fruuntur, sed duabus de causis, 1.<sup>o</sup> quia si mortui non resurgent, religio Christiana, quae hoc dog-

ma

ma tenet, ut a Deo revelatum, falsa est, ac proinde falsa sunt praemia justorum, 2.<sup>o</sup> quia in Scripturis resurrectio mortuorum ponitur ut necessario connexa cum immortalitate animarum; ita ut si negetur resurrectio mortuorum, animarum etiam immortalitas, ac proinde omnis spes futurae gloriae negetur, oporteat. Hinc Christus *Matth. XXII. 31.* probat contra Sadducaeos resurrectionem mortuorum ex immortalitate animae.

*Objic. II.* Apostolus *Heb. XI. 13.* de Patriarchis, et Prophetis ait: *Et hi omnes testimonio fidei probati, non acceperunt repromissionem, Deo pro nobis melius aliquid providente, ut non sine nobis consummarentur.* Ergo omnibus simul fidelibus servatur corona gloriae in resurrectione.

¶ *Dist. cons.* Gloria completa animae simul, et corporis, *conc.* gloria non completa solius animae, *subdist.* Et haec gloria dicitur ab Apostolo nondum data Patriarchis, quatenus eam non acceperunt ante Christi adventum, *conc.* Secus, *neg.* Docet igitur Apostolus, triplici ratione Patriarchas non accepisse repromissionem, primo quidem quia terram Chanaan ipsis promissam, non ipsi, sed eorum nepotes ingressi possederunt: deinde quia beata visione politici non sunt ante Christi adventum: tertio quia completam gloriam non nisi in extremo cum omnibus electis accepturi sunt. Vide Estium *Comment. in h. l.*

*Objic. III.* *Apoc. VI. 9.* haec habentur: *Vidi subtus altare animas interfectorum propter verbum Dei, et propter testimonium, quod habebant; et clamabant voce magna, dicentes: usquequo Domine . . . . non iudicas, et non vindicas sanguinem nostrum de iis, qui habitant in terra? Et datae sunt illis singulae stolae albae: et dictum est illis, ut requiescerent adhuc tempus modicum, donec compleantur conservi eorum, et fratres eorum, qui interficiendi sunt, sicut et illi.* Ergo sancti, antequam compleatur numerus impium electorum, patienter expectare debent promissum praemium, quod ardentius desiderant.

¶ *Dist. cons.* Expectare debent praemium completum, scilicet animae, et corporis, *conc.* incompletum solius

solius animae, *neg.* Animae enim illae apparuerunt subtus altare, super quod erat agnus, altare autem illud, quo humana Christi natura significatur, in caelo erat, et datae sunt illis singulae stolae albae, quod demonstrat, animas illas jam esse in caelo, et gaudere incompleta beatitudine (a).

*Objic. IV. Matth. XX. 8.* Denarius operariis non solvitur, nisi ad vesperam. Atqui per denarium significatur vita aeterna, per vesperam autem mundi finis. Ergo.

*¶. Dist. min.* Per denarium significatur vita aeterna, et per vesperam mundi finis, si sermo est de beatitudine completa, *conc.* si sermo est de beatitudine non completa solius animae, *neg.* Igitur si de beatitudine completa loquimur, vespera significat finem mundi, et ita hunc locum multi Patres sunt interpretati (b). Si vero de beatitudine incompleta solius animae, per vesperam intelligitur finis vitae uniuscujusque hominis, vel postrema mundi actas, quae ab adventu Christi usque ad mundi finem excurrit, juxta illud *I. Joan. II. 18. Filioli novissima hora est.* Et ita alii Patres citatum *Matthaei* locum intellexerunt (c).

*Solvuntur Objectiones ex Patribus.*

*Objic. I. Papias Hierapolitanus Episcopus, Joannis Apostoli discipulus, contrariam sententiam docuit, scilicet piorum gaudium differendum esse usque ad corporum resurrectionem, et tunc eos regnatos cum Christo mille annis, teste Eusebio Lib. III. Hist. cap. 39. Ergo etc.*

*¶. Neg.*

(a) Vide Dupinum *Analyse de l'Apocalypse Dissert. XI, et X.*

(b) Irenaeus *Lib. IV. Cap. 70.* Origenes *Tract. X. in Matth.* Hilarius in *Cap. XX. Matth.* Optatus Milev. *Lib. V. cont. Parmen.* Gregorius M. *Hom. XIX. in Evang.* Beda etc.

(c) Hieronymus, Chrysostomus, aliiq.

*¶ Neg. cons.* 1.<sup>o</sup> quia non constat, utrum *Papias* auditor fuerit *Joannis* Apostoli, an alterius *Joannis*. Ait enim ipse *ap. Eusëb. loc. cit.* se curiose interrogasse eos, qui Apostolos audiverant, et ab iis sciscitatum, quid *Andreas*, quid *Petrus*, quid *Joannes*, quid *Matthaeus* dicere soliti erant. Non ergo ipse audiverat *Joannem*, aut alios Apostolos; 2.<sup>o</sup> quia, teste *Eusebio*, vir fuit mediocri admodum ingenio, qui male intellexit Apostolorum narrationes, 3.<sup>o</sup> quia *Papias* secundi saeculi auctor est; inter Patres autem primi saeculi nemo, ut vidimus, eam sententiam tenuit; ac proinde nostrum dogma est prius traditum, *Papiae* vero posterius immisum; ideoque falsum, juxta illud *Tertulliani*: verum, quod prius traditum, falsum, quod posterius immisum, 4.<sup>o</sup> quia quae *Papias* docuit, non traditione nituntur, sed verbis *Apocalypsis*, quam ipse suo mediocri ingenio interpretari conatus est.

*Objic. II.* *Justinus*, *Irenaeus*, *Tertullianus*, *Lactantius*, *Victorinus Petabionensis*, *Sulpitius Severus* *Papiae* sententiam amplexi sunt. Ergo.

*¶ Dist. ant.* Eam sententiam amplexi sunt, ut probabilem, *conc.* ut dogma fidei, transeat. Quare *neg. cons.* Dixi transeat, quia licet pauci isti Scriptores, *Papiae* auctoritate decepti, putassent, suam sententiam ad fidem pertinere ex Apostolica traditione, non possent tamen contra universae Ecclesiae sententiam praevalere. Sed ipsi suam sententiam proponebant, ut probabilem, quia fatebantur, alios catholicos contraria sentire. Sic *Justinus Dial. cum Tryph. Confessus sum*, inquit, tibi, et ante me quidem et alios, eadem mecum sentientes, arbitrari id futurum (nempe millenarium regnum post resurrectionem), multosque etiam, qui purae, piaque Christianorum sunt sententiae, hoc non agnoscere. Similia docet *Irenaeus Lib. V. cap. 35.* *Tertullianus* a communi lege excipiebat martyres. *Lactantius*, eloquentia quidem fuit celebris, at non rerum Theologicarum admodum peritus. *Victorinus* eruditionis expertus, ex *Hieronymo Epist. ad Magnum.* *Severus Sulpitius* non sibi constat;

de S. Martino enim scribit: *Martinus hic pauper, et modicus caelum dives ingreditur* (a).

*Obje.* III. Hilarius, cujus opera *inoffenso pede decurri* posse, docet Hieronymus *Epist. ad Laetam*: in *Psalm. CXXXV.* ad ea verba: *si descendero in infernum ades*, ait: *Humanae lex necessitatis est; ut conspultis corporibus, ad inferos animae descendant, quam descensionem Dominus ad consummationem veri hominis non recusavit.* Ergo.

¶ *Dist. ant.* Lex est, ut animae descendant ad inferos, mox evasurae, *conc.* In inferis mansurae usque ad diem judicii, *neg.* Putavit enim Hilarius post Tertullianum *Lib. de anima cap. 55.* quod sicut Christus non recusavit ad inferos descendere, ita omnium Christianorum animae eodem descendere debeant, brevi tamen tempore ibidem mansurae, quae tamen singularis est sententia, nec alios Patres suffragatores habet; quia tamen ab Ecclesia damnata non erat, *inoffenso, pede decurri Hilarii opera*, merito affirmavit Hieronymus.

*Inst.* Hilarius in *Psalm. CXX.* docet, animas in sinu Abrahae interim collocari. . . . quousque introeundi rursus in regnum caelorum sit potestas, et *Lib. XI. de Trin. n. 39.* de die judicii loquens, et respiciens ad verba Apostoli *I. Cor. XV. 24.* Deinde finis, cum tradiderit regnum Deo, et Patri, ait: *Tradet autem Christus Deo Patri regnum, et tunc quos regnum Deo tradiderit, Deum videbunt.* Ergo antea in regnum Dei non introierant, nec Deum viderant.

¶ *Neg. cons.* Distinguit enim Hilarius regnum Christi, quod usque ad resurrectionem duraturum est, a regno Dei, et Patris, quod in aeternum durabit; non quod ante resurrectionem Deus, et Pater non regnaverint, aut post resurrectionem Christus regnare desinat, *cujus regni non erit finis*; sed quia in extremo judicio Christus publice agnoscetur ab omnibus filius Dei, a quo omnis potestas, et imperium

---

(\*) Vide Nicolaum le Nourry in *Apparatu ad Biblioth. Patr. Dissert. I.*

rium, et ipse filius procedit. Sed non excludit a regno Christi ante resurrectionem visionem Dei. Ait enim in *Psalm. I. n. 9.* omnes justos cum pio latrone in paradiso esse, hoc est, ut ipse explicat, in possessione regni Dei: et in *Psalm. LIII.* habeat innocens religio fiduciam. . . . . excedentem habitaculo corporis animam, sciat, in Dei susceptione requiescere.

*Objic. IV.* Augustinus *Serm. CCLIX.* docet, animas piorum post resurrectionem *Sabatismum* in terra cum Christo acturas, antequam in caelum admittantur. Ergo.

*¶. Dist. ant.* Id docuit Augustinus initio sacerdotii, quando errabat cum *Millenariis*, ut ipse fatetur *Lib. XX. de Civ. cap. 7. conc.* Semper, *neg.* Milles enim contrarium docuit. Sic *Lib. XX. de Civ. cap. 9.* ait, animae justorum postquam mortalia membra posuerunt, cum Christo utique regnaverunt, et regnant. Idem docet *Lib. IX. Confess. cap. 7. Lib. V. de Bapt. cap. 18. Tract. CXXIV. in Joan. Lib. IV. cont. Julian. cap. 8. et alibi.*

*Inst.* Augustinus *Cap. 109. Enchirid.* ait: *Tempus, quod inter hominis mortem, et ultimam resurrectionem interpositum est, animas abditis receptaculis continet.* Idem ante Augustinum scripserat Ambrosius *Lib. De bono mortis cap. 10.* In his receptaculis utrum beatitudinem possideant cum Sanctis Angelis, aliquando dubitat, ut *Lib. I. Retract. cap. 14. Angeli quidem sancti, quod ibi sint, nulla quaestio est: Sed de sanctis hominibus jam defunctis, utrum ipsi saltem in illa possessione consistant, merito quaeritur.* Aliquando vero absolute pronuntiat, sanctos nondum in possessione beatitudinis consistere, ut *Enarrat. in Psalm. XLIII.* *Ille visio facie ad faciem liberatis in resurrectione servatur.* Ergo.

*¶. Dist. ant.* In locis citatis Augustinus dubitat de loco, ubi sunt illa receptacula, *conc.* de beatitudine Sanctorum, *subdist.* De beatitudine completa; et perfecta, quam vocat *visionem facie ad faciem, possessionem beatitudinis, conc.* De beatitudine non completa, et imperfecta, *neg.* Dubitavit itaque Augustinus de loco

loco, ubi sunt interim animae sanctorum: licet de earum felicitate certus esset, quam felicitatem putavit in resurrectione fore perfectam.

Et de loco quidem Augustinus definit, illum non esse in inferis *Lib. XX. de Civ. cap. 13.* *Profecto*, inquit, *deinceps boni fideles effuso illo (sanguinis Christi) pretio jam redempti prorsus inferos nesciunt.* Voeat autem saepe sinum Abrahæ, quem sinum aliquando distinguit a regno caelorum, ut in *Psalm. XXXVI. Serm. 1.* *Post vitam*, inquit, *istam parvam non dum eris, ubi erunt sancti, quibus dicetur: venite benedicti patris mei . . . nondum ibi eris, quis nescit? Sed jam poteris ibi esse, ubi illum quondam ulcerosum pauperem dives ille superbus in tormentis vidit a longe requiescentem.* Aliquando vero sinum Abrahæ cum regno caelorum confundit, ut *Lib. II. Quaest. Evangelic. Quaest. 28. n. 1.* *Sinus Abrahæ requies est beatorum pauperum, quorum est regnum caelorum, in quo post hanc vitam recipiuntur*, et *n. 5.* *Sinus Abrahæ intelligitur secretum Patris, quo post passionem resurgens Dominus assumptus est.* Aliquando rem dubiam relinquit, ut *Lib. IX. Confess. cap. 3.* *quidquid illud est, quod illo significatur sinu*; et *Lib. XII. de Gen. ad lit. cap. 32.* postquam de sinu Abrahæ, de paradiso, et de tertio caelo fuisse disseruit, subjungit: *si tamen non aliquid est diversis nominibus appellatum unum, ubi sunt animae beatorum.*

Quod autem pertinet ad felicitatem justorum, putavit Augustinus cum pluribus veteribus, eam in resurrectione fore perfectam, quia ante resurrectionem animae justorum propter inclinationem, qua propendunt ad resumenda corpora (quae tamen propensio eas non angit, nec miscras reddit, propter voluntatem Dei, cui perfectissime obsequuntur) non toto impetu in Deum ferri possunt, unde simplicem Dei visionem, a possessione beatitudinis distinguebat. Ita semetipsum explicat S. Doctor *Lib. XII. de Genes. ad lit. cap. 35.*, ubi quaerens, *quid opus sit spiritibus defunctorum corpora sua in resurrectione recipere, si potest et sine corporibus summa illa beatitudo praeberi?* respondet? *Minime dubitandum est, et raptam hominis a carnis sensibus mentem, et post mortem ipsam, carne de-*  
po-



posita . . . non sic videre posse incommutabilem substantiam, ut Sancti Angeli vident, sive alia latentiore causa, sive ideo quia inest ei naturalis quidam appetitus corporis administrandi, quo appetitu retardatur quodammodo, ne tota intentione pergat in illud summum caelum, quamdiu non subest corpus, ejus administratione appetitus ille conquiescat. S. Thomas quidem Augustinum intelligit eo sensu, quod beatitudo in resurrectione erit major quoad extensionem, quatenus scilicet gaudium animi refundatur etiam in corpus, sed fortasse laudatus Augustini locus hunc sensum pati non potest.

*Objic. V.* Bernardus Serm. II. in Festo omnium Sanctorum haec habet: Consummato militiae tempore, gaudium habent Sancti etiam in spiritu suo, donec adveniat dies illa, qua introire mereantur in gaudium Domini sui, gaudium habituri et in ipso corpore suo. Adhuc ergo signatum est super eos lumen vultus dominici et licet non plenam, habent tamen laetitiam multam in corde suo, donec veniat dies illa, qua implebit eos laetitia cum vultu sup. Et rursus Serm. IV. in Dedicatione tres distinguit animarum mansiones, in tabernaculis, sive in hac vita, in atriis, sive post mortem ante resurrectionem, in domo Domini post resurrectionem: et ait: In tabernaculis est gemitus poenitentiae, in atriis est gustus laetitiae, in te ( h. e. in domo Domini ) satiety gloriae. Ergo censuit Bernardus, differri visionem Dei ad resurrectionem.

*¶ Dist. cons.* Differri quoad ultimum perfectionis gradum, conc. quoad substantiam, neg. Censuit enim ut Augustinus, post resurrectionem majus fore gaudium beatorum, sive extensive, ut omnes fatentur, sive intensive. Ait enim Serm. III. de Omn. SS. Adeo viget in eis desiderium hoc naturale, ( resurrectionis ) ut necdum tota eorum affectio libere pergat in Deum. Et Serm. LXXXVII. de Diversis: In hoc statu positi Sancti, bibere quidem possunt, sed inebriari non possunt, quoniam a perfectissima contemplatione divinitatis quodammodo retardantur: dum adhuc sui corporis resurrectionem in fine saeculi praestolantur. Agnoscit ergo visionem Dei, sed non perfectissimam, nisi in resur-

rectione; quod etiam ex aliis locis clarioribus constat, ex quibus explicari debent, si quæ obscurius alibi dixit. Ait enim loco supra laudato *Serm. II. in S. Victorem*: Jam caelos ingressus, vere nunc revelata facie speculatur gloriam Dei . . . beata visio, qua in eandem imaginem transformatur. Et *Serm. XIX. de divers. Hauriunt* (Sancti) aquas in gaudio de fontibus Salvatoris, et nulis, ut ita dicam, oculis divinitatis intuentur essentiam. Idem alibi docet (a). Ita ut male nonnulli, inter quos Durandus, et Petavius, S. Doctorem contrario errori patrocinatorum esse putent.

*Objic. VI.* Joannes XXII. teste Okamo (in *Compendio errorum Papae Joannis*), libellis, et constitutionibus definiivit, animas piorum non videre Deum ante resurrectionem. Testatur etiam post eundem Okamum Hadrianus VI. in *IV. Sentent. Tract. de Confirm.* eundem Pontificem statuissse; ne quis in Academia Parisiensi Magistri gradum adipisceretur, nisi prius jurasset, se eam sententiam defensurum. Ergo.

*¶ Neg. ant.* Licet enim Joan. XXII. ut doctor privatus disputando in contrarium errorem inclina-verit; numquam eum ex cathedra definivit, et docuit, ut constat ex variis testimoniis apud Raynaldum ad ann. MCCCXXXIII. imo ex publica protestatione ejusdem Pontificis, facta anno MCCCXXXIV. die 3. Januarii apud eundem Rayn. et ex duabus Bullis Benedicti XII. ejus successoris, quarum una incipit *Sicut habet*, apud Raynaldum an. MCCCXXXIV. altera incipit *Benedictus Deus*, ap. Bavium ad an. MCCCXXXVI. Imo et morti proximus, ea ipsa, quæ non definiendo, sed disputando dixerat, retractavit his verbis, quæ recitat Raynaldus ad ann. MCCCXXXIV. *Fatemur, et credimus, quod animæ purgatæ, separatæ a corporibus, sunt in cæli cælorum regno, ac paradiso, et cum Christo in consortio Angelorum congregatæ, et vi-*

I i

dent

---

(a) *Lib. De diligendo Deo Cap. 10. In Vita S. Malachie Cap. ult. Serm. V. De Dedicat. Serm. VI. in Cantu Epist. CCLXVI. etc.*

*dent Deum, ac divinam essentiam facie ad faciem clare.* Non ergo habenda fides est *Okamo*, infensissimo *Joannis* hosti, quippe qui adhaesit *Ludovico Bavaeo* Imperatori, et Antipapae *Petro de Corbaria*, quos nemo nescit, fuisse acerbissimos ejus Pontificis inimicos. Imo ipse *Okamus*, a quo postea *Hadrianus VI.* ducentis post annis scribens, deceptus est, testatur, se ex aliorum rumoribus rem retulisse (a).

*Objic. VII.* In veteribus Liturgiis tum Graecis, tum Latinis pro omnibus animabus defunctis sine ulla exceptione orat Ecclesia; imo quaedam Liturgiae habent orationes pro animabus Sanctorum. Sic antiqua Missalia Romana, teste Innocentio III. Cap. *Cum Marthae, De Celebr. Miss.* in festo *S. Leonis* habebant: *Annue quaesumus, Domine, ut animae B. Leonis haec prosit oblatio.* In Liturgia *Gregorii Naz.* et *Cyrilli* orat Sacerdos pro animabus *Patriarcharum, Apostolorum, martyrum, Confessorum, et ipsius B. Virginis, Ignatii, Julii, Athanasii* ut animae eorum requiescant in Paradiso: Similia habentur in Liturgia *Mosarabica, Syriaca, Aethiopica*, quas vide apud *Renaudotium Collecta Liturg. Tom. II.* Ergo etc.

*W. Dist. ant.* Orat pro omnibus animabus, quae nondum aeternam beatitudinem adeptae sunt, *conc.* Pro omnibus omnino, *subdist.* diverso sensu, *conc.* eodem sensu, *neg.* Quippe SS. Patres, qui illius utebantur liturgiis docent, animas sanctorum in paradiso esse: et injuriam irrogare Sancto, qui pro eo orat, ut requiescat. Sic *Augustinus Serm. CLIX. Injuria est*, inquit, *pro martyre orare; cujus nos debemus orationibus commendari.* Itaque orabat, et orat Ecclesia pro omnibus defunctis diverso sensu, ita scilicet, ut qui nondum in beata vita sunt, ad requiem perveniant; qui vero jam ibi sunt, habeant non solum gloriam corporis, et

---

(a) Longiori Disertatione opus esset pro Joan. XXII. Sed satis est, ipsum Natalem Alex. ntrum *Dissert. XII. in Hist. Saec. XIV. art. 2.* patrocinium illius suscepisse copiose, et erudite. Vide etiam *P. Berti Lib. III. Cap. II.*

et cum ea beatitudinem perfectam, sed etiam gloriam *accidentalem* apud homines, quae gloria in maiorem Dei gloriam, et hominum utilitatem redundat.

*Objic.* VIII. Christus non ascendit in caelum ante resurrectionem. Ergo nec iusti, qui sunt ejus membra, quae capiti assimilari debent.

*R. Neg. cons.* 1.<sup>o</sup> Quia Christus etiam ante resurrectionem visione Dei fruebatur; ideoque ubicumque esset, beatus erat; 2.<sup>o</sup> quia licet iusti Christo capiti assimilari debeant quoad tolerantiam passionis in terra, et gloriam in caelo; tamen non in omnibus assimilari debent, quae Christo capiti peculiaribus ex causis conveniebant.

*Objic.* IX. Anima simul cum corpore meretur, non enim meretur anima seorsim, sed totus homo. Ergo totus homo praemium referre debet, ideoque non nisi post resurrectionem.

*R. Transeat ant.* Meritum enim proprie est in animo, qui movet corpus, multisque etiam interioribus actibus sine corpore meretur. *Neg. cons.* Cum enim anima corpore utatur, ut instrumento bonorum operum; ideoque primas in merendo partes habeat, et aliunde capax sit beatae visionis, etiam a corpore sejuncta, non est absurdum, eam fieri beatam ante resurrectionem, cum impiorum animae etiam ante resurrectionem poena afficiantur, licet anima simul cum corpore peccaverit.

## §. V.

*Utrum admittendum sit regnum Christi millenarium post resurrectionem.*

## PROPOSITIO

*Dogma fidei est, non esse agnoscendum regnum Christi millenarium nec in sensu Cerinthi, nec in sensu Papiae, et aliorum.*

*Prob.* 1.<sup>o</sup> Haec propositio ex iis, quae superius demonstrata sunt in §. IV., manifeste consequitur.

Si enim Sancti plene purgati, jam ante resurrectionem cum Christo regnant, et post resurrectionem, resumtis corporibus, gaudium habebunt perfectum in visione Dei, et gloria corporis, fictitium est hoc aliud mille annorum regnum. 2.<sup>o</sup> Regnum Christi non est terrenum *Joan. XVIII. 36. Regnum meum non est de hoc mundo*; nec habet finem: *Regni ejus non erit finis Luc. I. 33.* quae verba Symbolo inserta sunt a Concilio Constantinopolitano contra Apollinaristas, qui, praeter alia absurda, etiam millenariorum dogma sunt amplexi. Ergo.

Supervacaneum autem videtur confutare *Cerinthi* dogma putidum, et obscenum, qui hoc millenarium regnum in voluptatibus carnis transigendum putavit. *Non est regnum Dei esca, et potus Rom. XIV. 17. In resurrectione neque nubent, neque nubentur, sed erunt sicut Angeli Dei in caelo Matth. XXII. 30.*

#### Objectiones.

*Objic. Apocalypsis Cap. XX. 4. Vidi, inquit Joannes, animas decollatorum propter testimonium Jesu ... et regnaverunt cum Christo mille annis. Ceteri mortuorum non vixerunt, donec consumentur mille anni. Haec est resurrectio prima. Beatus, et sanctus, qui habet partem in resurrectione prima, in his secunda mors non habet potestatem, sed erunt Sacerdotes Dei, et Christi, et regnabunt cum illo mille annis. Et cum consummati fuerint mille anni, solvetur satanas etc. Et vidi mortuos, stantes in conspectu throni, et libri aperti sunt etc. Ergo docet Joannes, duas fore resurrectiones, unam sanctorum, quae est resurrectio prima, post quam justi regnabunt cum Christo mille annis, quibus expletis, solvetur satanas, veniet Antichristus, resurgent impii, judicabuntur, et morte aeterna plectentur, quae est mors secunda. Hic erat millenariorum Achilles.*

¶ *Neg. cons.* Sacrae enim litterae ubique pronuntiant, unam fore simul corporum resurrectionem tum piorum, tum impiorum; *in momento, in ictu oculi, in novissima tuba; canet enim tuba, et mortui resur-*  
gent.

gent. I. Cor. XV. 52. Idque ex eo manifestum est, quod si primo resurgerent omnes justī, et regnarent per mille annos, quibus expletis veniret *Antichristus*, et resurgerent impii, sequeretur, per eos mille annos nullum fore in terra hominem justum, qui mortalem adhuc vitam ducat, ideoque perituram Ecclesiam militantem ante finem mundi; *Antichristum* non persecuturum Sanctos, qui nulli erunt, quae omnia absurda sunt, et Scripturis contraria. Millenarii ergo fictitium illud regnum statuere debebant post generalem omnium resurrectionem, ac proinde post adventum *Antichristi*. At Joannes docet, regnum illud mille annorum praecedere adventum *Antichristi*. Non ergo favet millenariis, sed sensus est, homines pios resurgere a peccato ad vitam spiritalem, et post mortem, si perseverant, regnare cum Christo mille annis, hoc est per longum temporis intervallum, quod fuit ab eorum morte usque ad resurrectionem. Justificatio enim dicitur in Scripturis resurrectio, juxta illud Apostoli: *si consurrexistis cum Christo Colos. III. 1.* et longum temporis spatium per numetum mille exprimi solet, juxta illud *Psal. CIV. verbi, quod mandavit in mille generationes.* Unde Augustinus *Lib. XX. de Civ. cap. 7.* mille annos pro annis omnibus hujus saeculi posuit.

Loca autem Scripturae, quibus promittitur justis manducare, bibere, ac saturari in Regno Dei, praetermittimus. Cum enim non sit *Regnum Dei esca, et potus*, loca illa per metaphoram intelligenda esse, perspicuum est.

## §. VI.

*Quoniam modo Beati clare Deum videant.*

*Adv.* Cum mens naturaliter Deum clare videre nequeat, ut supra §. II. h. e. contra Eunomianos, et Beguardos probavimus, certum est, requiri ad videndum Deum supernaturale auxilium, quod *lumen gloriae* dicitur: *lumen* quidem, quia Deum menti manifestat, *omne autem quod manifestatur, lumen est*, ut ait

ait Apostolus *Ephes. V. 3.* gloriae vero, quia in illa visione, et lumine, est gaudium, et gloria beatorum. Unde in *Psal. XXXV.* dicitur: *Inebriabuntur ab ubertate domus tuae, et torrente voluptatis tuae potabis eos; quoniam apud te est fons vitae, et in lumine tuo videbimus lumen.* Sed quid sit lumen gloriae, et utrum praeter illud requiratur ad videndum Deum species aliqua impressa, vel expressa, magnas agitant Scholastici controversias, quas leviter attingemus, cum non possint ex Scriptura, aut traditione ad liquidam veritatem pervenire.

Quaerunt itaque 1.<sup>o</sup> utrum lumen gloriae habituale sit, an actuale. Et verisimilius est, esse habituale, quia in aeternum in beatis durabit; posset tamen Deus illud per actuale, et transiens auxilium supplere.

Quaerunt 2.<sup>o</sup> an lumen gloriae sit habitus a charitate distinctus. *Scotus in III. dist. 3.* censet, nullum alium habitum esse necessarium ad videndum Deum, praeter charitatem, quae tunc augetur, et concursus Dei extraordinarium, et actuale. Reliqui verisimilius docent, lumen gloriae esse habitum a charitate distinctum, quo intellectus elevetur ad videndum Deum, quem naturali facultate videre non poterat; charitas enim est in voluntate, visio in intellectu. Sed ii rursus in duas partes dividuntur; *Petravius* enim, et *Thomassinus* docent, lumen gloriae esse ipsam Deum animae beatorum perpetuo assistentem, quia, inquiunt, Scripturae, et Patres docent, Deum esse lumen beatorum. Alii vero probabilius putant, esse qualitatem quandam a Deo in anima creatam, neque alia de causa Deum dici lumen beatorum, nisi quia luminis illius causa est effectrix, quae *metonymia* est in Scripturis frequentissima. Hanc vero qualitatem Thomistae volunt, esse realiter ab anima distinctam; alii vero modificationem, sive dispositionem ipsius animae, supernaturaliter a Deo inditam, quod verisimilius est.

Quaerunt. 3.<sup>o</sup> Utrum sicut in aliorum *objectorum* cognitione est quaedam objecti species, sive similitudo menti impressa, quaecumque tandem illa sit, qua

mouetur ad cognoscendum objectum, et quaedam species, siue verbum, siue idea ab ipsa mente expressa, atque formata, per quam objectum sibi repraesentat, ita etiam in clara Dei cognitione species impressa, et expressa sit. Et impressam quidem speciem communiter rejiciunt, ut inutilem; Deus enim menti beatorum praesentissimus non indiget vicaria sui specie, ut mentem moveat ad sui cognitionem. Sed de expressa specie non convenit inter Theologos. Nonnulli eam propugnant propter illud Augustini Lib. IX. de Trin. cap. 11. *Quemadmodum cum per sensus corporis videmus corpora, fit eorum aliqua similitudo in animo nostro .... ita cum Deum novimus, fit aliqua Dei similitudo illa cognitio.* Sed alii verba Augustini, intelligentes de visione Dei naturali, melius docent, nullam expressam speciem in visione beata agnoscendam. Species enim illa expressa est aliquid finitum, et creatum; nulla autem finita res Deum, ut in se est, repraesentare potest. Unum enim est Verbum, quod vere, et ad vivum divinae substantiae est imago, quod est Verbum divinum, a Patre ab aeterno productum, ut docent Patres (a).

## §. VII.

*Quid Beati in Deo videant.*

## PROPOSITIO I.

*Objectum primum beatæ visionis est essentia Dei, ejusque attributa tum absoluta, tum relativa.*

*Prob. 1a. pars.* Visio Dei beata tendit ad videndum Deum, sicut in se est. Atqui non potest eo modo videri, nisi videatur ipsa Dei essentia. Ergo.

*Prob.*

---

(a) Si quem delectant ejusmodi quaestiones, adeat *Generalem*, aliosque Scholasticos.



*Prob. 2a. pars.* Essentia Dei, ut in se est, non distinguitur re ipsa ab attributis tum absolutis, tum relativis. Ergo non potest videri, ut est in se, quin simul attributa omnia tum absoluta, tum relativa videantur;

*Corollarium.*

Ergo recte Thomistae post ipsum S. Thomam 2a 2ae. Q. II. art. 8. ad 3. docent contra Scotistas, ne ex potentia quidem Dei absoluta posse beatos videre divinam essentiam sine attributis, aut unum attributum sine alio, aut personam unam sine alia.

PROPOSITIO II.

*Objectum secundarium beatae visionis sunt etiam creaturae, quarum cognitio ad perfectionem, et beatitudinem sanctorum pertinet, non tamen omnes creaturae possibiles; imo non omnes existentes.*

*Prob. 1a. pars.* Beatitudo est status, omnium bonorum aggregatione perfectus. Sed talis non esset, si aliqua deesset notitia ad perfectionem, et beatitudinem, vel essentialem, vel accidentalem pertinens. Ergo. Hinc Ambrosius in Orat. funeb. de Theodosio ait, Theodosium in caelis filiorum ejus Arcadii, et Honorii tutelam suscepturum. Gregorius M. Lib. XII. Moral. cap. 17. docet, Sanctos videre, et diligere fratres suos in terris periclitantes, et de eorum salute esse sollicitos: et S. Thomas P. III. Q. X. art. 2. Nulli, inquit, intellectui beato deest, quin cognoscat in Verbo omnia, quae ad ipsum spectant. Ergo etc.

Quae autem ad beatorum perfectionem, et beatitudinem spectant, sunt non solum mysteria omnia, quae in terris crediderunt, ut advertit Augustinus Lib. XX. de Civ. Cap. 21. et rerum omnium existentium notitia quoad species, verum etiam multarum singularium rerum, in quibus Dei gloria elucet, et praecipue quae ad ipsos pertinebant, dum in terris agerent, et preces, quae ad eos diriguntur; maxime  
enim

enim decet eorum excellentiam, ut cognoscant petitiones ad eos factas vel voce, vel corde, ut inquit S. Thomas 2a. 2ae. Q. LXXXIII. art. 4. Praeterea vident beati se se invicem, et suos in patria agnoscunt, sine qua cognitione nulla esset Sanctorum societas. Hinc Tertullianus *Lib. de Monogam. cap. 10. In meliorem statum*, inquit, *destinamur resurrecturi in spirituale consortium, agniture tam nosmetipsos; quam nostros.* Et Cyprianus *Lib. De Mortalitate: Magnus illic nos charorum numerus expectat, parentum, fratrum, filiorum ... ad horum conspectum, et complexum venire, quanta et illis, et nobis in commune laetitia est?*

*Prob. 2a. pars.* Beati non comprehendunt omnipotentiam Dei, ut supra ostendimus *Cap. IX. §. II. prop. 3.* Atqui comprehenderent, si omnia possibilis in Deo viderent. Ergo.

*Prob. 3a. pars.* Licet beati videant creaturas omnes, prout *e minenter* sunt in Deo tamquam in causa, imo videant scientiam, et decreta Dei, prout sunt unum cum essentia Dei, non sequitur, eos videre creaturas omnes, prout in seipsis sunt. Sic Angeli ignorant iudicii diem *Matth. XXIV. 36.* et solus Agnus in caelo potuit solvere librum, in quo signata erant futurorum decreta *Apoc. V. 3.* Cujus rei ea ratio est, quia licet decreta, et scientia Dei sint unum cum Dei essentia; libere tamen a Deo diriguntur ad hos, vel illos effectus, quos Deus pro suo arbitrio beatis revelat, aut abscondit.

### Scholion.

Thomistae nonnulli putant, non esse impossibile, beatos videre omnia possibilis, non quidem in Deo, tamquam in causa, hoc enim esset Deum comprehendere, sed in seipsis per Dei revelationem. Cum enim omnes creaturae possibilis sint aliquid minus, quam Deus est, et in seipsis finitae, qui illas hoc modo cognosceret, non simul ipsum Deum comprehenderet. Nos istae de rebus possibilibus controversiae non multum delectant.

PRO-

## PROPOSITIO III.

*Beati vident creaturas in Verbo, et in seipsis.*

*Prob. Auctoritate PP. Augustinus Lib. IV. de Genes. ad lit. cap. 24. duplicem distinguit in beatis cognitionem, matutinam, et vespertinam; illam, qua creaturas clarius vident in Verbo, sive in ipsa Dei essentia: hanc vero, qua obscurius eas vident in seipsis. Quapropter, inquit, cum Sancti Angeli, quibus post resurrectionem coequabimur, semper videant faciem Dei, Verbo ejus unigenito filio, sicuti Patri aequalis est, perfruantur, procul dubio universam creaturam, in qua ipsi sunt principaliter conditi, in ipso Verbo Dei prius noverunt, in quo sunt omnium, etiam quae temporaliter facta sunt, aeternae rationes, tanquam in eo, per quod facta sunt omnia... Ac deinde in ipsa creatura, quam sic noverunt, tanquam infra despicientes, eamque referentes ad laudem illius, in cujus incommutabili veritate rationes, secundum quas facta est, principaliter vident. Idem docet Bernardus Lib. V. de Consider. Cap. 1.*

Utrum autem beati uno actu, an vero successive videant omnia, quae in Verbo vident, quaestio est, de qua disputat Augustinus Lib. XV. de Trin. cap. 16. et Lib. XII. Confess. cap. 13. Certe quae non viderunt ab initio, sed tractu temporis a Deo revelantur, non simul vident.

## Scholion.

Licet Beati, praeter Deum, alia etiam tum in Deo; tum in seipsis videant; in sola tamen visione Dei eorum essentialis beatitudo est, juxta illud Augustini Lib. V. Confes. cap. 4. *Beatus est qui te novit, etsi alia nesciat: qui autem te, et alia novit, non est propterea beatior, sed propter te solum.* Aliarum vero rerum cognitio ad accidentalem beatitudinem pertinet.

§. VIII.

*Utrum beata visio sit aequalis in omnibus*

*Adv.* Licet visio beata sit ejusdem speciei in Angelis, et beatis omnibus, quia idem est in omnibus principium, et *objectum formale* visionis; quaeritur tamen, utrum sit in omnibus aequalis. *Jovinianus Saec. IV.* assueruit, aequalia esse merita, et praemia Sanctorum, teste *Hieronymo Lib. II. cont. Jovin.* Quem errorem *Saec. XVI.* renovarunt Protestantes.

PROPOSITIO I.

*Dogma fidei est, inaequalem esse visionem beatorum.*

*Prob. I.* *Joan. XIV. 2.* In domo Patris mei mansiones multae sunt. Et *I. Cor. XV. 41.* Alia claritas solis, alia claritas lunae; alia claritas stellarum. Stella enim differt a stella in claritate, sic et resurrectio mortuorum. Et *II. Cor. IX. 6.* Qui parce seminat, parce et metet. Ergo etc.

*Prob. II. ex PP.* 1.<sup>o</sup> Tertullianus in *Scorpiac.* Quomodo multae mansiones apud Patrem, si non pro varietate meritorum? 2.<sup>o</sup> Augustinus *Lib. de Sancta Virginitate*, in illud Apostoli: stella differt a stella: Haec sunt, inquit, merita diversa Sanctorum. 3.<sup>o</sup> Irenaeus *Lib. IV. cap. 72.* Si plus dilexerimus, clariores erimus apud Deum. Et Fulgentius *Lib. de Trin.* Tantum amplius alius alio in alia vita Deum videbit, quantum amplius in hac vita eum dilexit.

Consonat ratio Theologica. Sicut enim pro varietate peccatorum varia sunt supplicia, ut ex eo loco perspicuum est *Apoc. XVIII. 7.* quantum glorificavit se, et in deliciis fuit, tantum date illi tormentum, et luctum; ita etiam pro varietate meritorum varia esse debent praemia.

Hinc merito Concilium Mediolanense, de quo meminit Ambrosius *Epist. XLII.* contrarium *Vigilantiis* errorem damnavit, et *Conc. Trid. Sess. VI. can. 31.*

Si

*Si quis dixerit, hominis justificati bona opera non vere mereri augmentum gratiae, vitam aeternam, atque etiam gloriae augmentum, anathema sit.*

*Objic. Matth. XX. unus denarius datur omnibus, qui inaequaliter in vinea laboraverant. Ergo par omnibus tribuetur gloria.*

*¶ Neg. cons.* Unus quidem erit denarius, una merces omnibus, nempe idem Deus beata visione possidendus, sed inaequaliter pro inaequalitate meritum. Una igitur erit merces *objective*, ut Scholae ajunt, non *formaliter*, et in eodem gradu, sicut in eadem mensa idem omnibus apponitur ferculum, quamvis inaequaliter inde cibum capiant convivae, ita ut omnes saturentur, nec qui minus sumit plus sumentibus invidet. *Id etiam*, ait Augustinus *Lib. XXII. de Civ. cap. 30.* beata illa Civitas magnum in se videbit, quod nulli superiori ullus inferior invidet, sicut nunc non invidet Archangelis Angeli ceteri; nollet enim esse unusquisque quod non accipit, sicut nec in corpore vult oculus esse qui est digitus.

Ergo, inquires, parum refert, utrum quis majora, vel minora opera faciat; dummodo enim ad patriam illam perveniat, non minus erit sortis sua contentus qui minimum laboravit, quam qui maxime.

*¶ Neg. sequel.* Licet enim inferiores superioris gloriam non desiderent, quia alioquin non diligerent Dei justitiam, tamen admirantur sapientiam, et iustitiam Dei in distributione praemiorum, et qui despiceret majorem gloriam, ad quam a Deo destinatus, ac vocatus est, non diligeret Deum.

## P R O P O S I T I O II.

*Causa moralis hujus inaequalitatis est inaequalitas meritum, causa vero physica est inaequalitas luminis gloriae.*

*Prob. 1a. pars.* Causa moralis est, quae causam efficientem movet ad operandum. Atqui inaequalitas meritum est ratio, cur Deus inaequale praemium beatis distribuat ex *Prop. 1.* Ergo.

*Prob.*

*Prob. 2a. pars.* Solum gloriæ lumen, non vero naturale acumen ingenii mentem elevat ad videndum Deum, quam visionem, cum mens necessario rapiatur, ne per liberum quidem arbitrium aut augere potest, aut minuire. Ergo sola inæqualitas luminis gloriæ inæqualem visionem efficit. Merito igitur Academia Parisiensis anno MCCXL. hanc propositionem damnavit: *Cujus meliora fuerint naturalia, necessario major erit gratia, et gloria.* Quod et ulterius probatur, quia alioquin qui inæquali ingenio sunt, æquali lumine gloriæ inæqualiter Deum viderent, ac proinde gloria non pro ratione meritorum, sed ingenii daretur, quod absurdum est.

## C A P. X.

### *De perfectione Dei.*

*Adv. I.* **N**unc de attributis affirmantibus, sive positivis agendum est; et primo de perfectione Dei. Perfectio est qualitas (a) aliqua, vel proprietas entis: perfectum autem aliquod dici potest vel *absolute*, quod scilicet in omni genere perfectum est, vel *secundum quid*, quod scilicet est in genere aliquo perfectum. Si ergo de perfectione *secundum quid* loquamur, constat omnia entia perfecta esse, quia unamquodque est in suo genere perfectum, h. e. nihil ei deest de perfectionibus ad ejus naturam necessariis. Si vero de perfectione absoluta, hæc solius Dei propria est.

II. Perfectiones in scholis dividuntur in classes duas. Aliae enim dicuntur perfectiones *simpliciter simplices*, aliae vero simplices, et *secundum quid*. Priores sunt, quæ nullam involvunt *imperfectiorem*, nec cum æquali, aut majori perfectione pugnant, ut sunt sapientia, bonitas, vita, ideoque dicuntur ab Anselmo *Monolog*, Cap. 14. *meliores ipsæ, quam non ipsæ.*

---

(a) *Schol. entitas.*

*ipsae*. Posteriores vero sunt, quae aequali, vel majori perfectioni adversantur, ut sunt, extensio, motus, ratiocinatio, et ceterae creaturarum differentiae *specificae*, et individuae; quae omnes dicantur *non meliores ipsae, quam non ipsae*. Sed hae rursus in duo genera a nonnullis dividuntur; aliae enim ita cum aequali perfectione pugnant, ut nihil imperfectum contineant, ut *paternitas, filiatio, spiratio*; aliae vero ita cum aequali perfectione pugnant, ut aliquid admixtum habeant imperfecti. His positis quaeritur 1.<sup>o</sup> utrum Deus sit absolute perfectus: 2.<sup>o</sup> utrum omnes creaturarum perfectiones in se habeat; 3.<sup>o</sup> utrum Deus cum creaturis sit aliquid perfectius, quam solus Deus.

### PROPOSITIO I.

*Deus, et quidem solus, est absolute perfectus.*

*Est dogma fidei.*

*Prob. 1a. pars.* 1.<sup>o</sup> Deus est ipsum esse, ut supra ostendimus *Cap. II. prop. 4.*, hoc est in eo est plenitudo totius esse. Ergo est absolute, seu in omni genere perfectus. 2.<sup>o</sup> Deus est infinitus, ut supra dictum est. Atqui non esset hujusmodi, si non esset absolute, seu in omni genere perfectus. Ergo. 3.<sup>o</sup> Deus est totus in actu, nullatenus vero in potentia, ut supra docuimus. Ergo est in omni genere perfectus, alioquin esset in potentia quoad illud, quod ei deesset. Ergo etc. Hinc Augustinus *Tract. XIV. in Joan.* Deus, inquit, *nec crescit, nec minuitur, si enim crescit, perfectus non est, si minuitur, Deus non est.* Et a Dionysio *Lib. de divin. nom. Cap. 13.* dicitur Deus *αυτοτελής*, hoc est *per se absolutus, ac perfectus*, et *υπερτελής*, hoc est *perfectionem omnem excedens.*

*Prob. 2a. pars.* Solus Deus est ipsum esse, est infinitus, et purus actus. Ergo etc. Vide S. Thomam. *I. P. Q. IV. Art. I. et seq. et Lib. I. cont. Gent. Cap. 28. et 38.*

PRO-

## PROPOSITIO II.

*Omnes creaturarum perfectiones vel simpliciter simplices, vel simplices quidem, sed quae nullam imperfectionis mixtionem habent, sunt in Deo formaliter, reliquae in Deo sunt eminenter, vel virtualiter.*

*Prob. 1.<sup>a</sup> pars.* Esse aliquid in aliquo *formaliter* est esse in eo secundum propriam sui naturam, sicut ratio (a) *formaliter* est in homine. Atqui perfectiones simpliciter simplices, et quae nihil imperfectum involvunt, ut sapientia, bonitas etc. sunt in Deo secundum propriam sui naturam, alioquin Deus non esset in omni genere perfectus. Ergo etc. Hinc Deus dicitur *formaliter* justus, sapiens, bonus etc. licet alio modo quam creaturae, quia ab ipsa Dei essentia non distinguuntur perfectiones illae.

*Prob. 2.<sup>a</sup> pars.* Esse aliquid in aliquo *eminenter* vel *virtualiter* est esse in eo non in propria sui natura, sed nobiliori modo, et tamquam effectus est in sua causa, sicut domus est in mente artificis modo spiritali, et intelligibili, fructus est in semine, vel in sole tamquam in causa. Atqui perfectiones *secundum quid* non sunt in Deo secundum propriam sui naturam, sed modo nobiliori, et tamquam effectus in causa. Non sunt quidem secundum propriam sui naturam, quia cum hujusmodi perfectiones imperfectionem aliquam naturaliter includant, vel cum majori perfectione pugnent; si essent in Deo secundum propriam naturam; ponendae etiam essent in Deo imperfectiones illae, vel majores perfectiones excludendae. Sunt vero in Deo *eminenter*, vel *virtualiter*, quia illae perfectiones habent aliquam rationem

---

(\*) Scholast. *Rationalitas.*



tionem boni, licet imperfecti; ac proinde cum in Deo sit quidquid boni rationem habet; nihil vero imperfectum; sequitur, perfectiones illas esse in Deo secundum rationem boni, quam habent, et non secundum id, quod habent imperfecti. Ergo sunt in Deo nobiliori modo, sive eminenter. Sunt vero etiam in Deo virtualiter quia Deus est prima causa, ex qua perfectiones omnes ortum habent. Hinc Augustinus in *Psal. XLIX*. Quid enim, inquit, cum illo non est? cum illo ager, cum illo species terrae, cum illo species caeli, cum illo omnia volatilia, quia ipse omnia. Ergo etc.

### PROPOSITIO III.

*Deus simul cum creaturis non est neque secundum intentionem, neque secundum extensionem, sive neque intensive, neque extensive perfectior, quam si seorsim consideretur.*

*Prob. 1a. pars. 1.º* Si Deus cum creaturis esset intensive perfectior, non esset ipse ens perfectissimum; quippe aliquid ei deesset, quo perfectior fieri posset. *2.º* Nulla est in creaturis perfectio, quae non sit in Deo vel formaliter, vel eminenter, hoc est nobiliori modo, quam sit in creaturis, ut ostendimus in *prop. 1. Ergo.*

*Prob. 2a. pars. contra Durandum. 1.º* Augustinus *Tract. XI. in Joan.* Si fueris, inquit, sine Deo, minor eris. Si fueris cum Deo, major Deus non erit. Non ex te ille major, sed tu sine illo minor. *2.º* Finitum additum infinito, in quo eminenter, vel virtualiter continetur, majorem extensionem non facit, sicut tempus additum aeternitati, alioquin illud non fuisset vere infinitum. At perfectiones creaturarum finitae sunt; Dei vero perfectiones sunt infinitae, et illae in istis eminenter, vel virtualiter continentur. Ergo.

*Dices.* Perfectiones creaturarum reipsa distinguuntur a perfectionibus Divinis. Atqui quae reipsa distinguuntur, si simul addantur, majorem numerum,

et extensionem, efficiunt. Ergo perfectiones creaturarum, additae perfectionibus divinis, maiorem numerum, atque extensionem efficiunt, ac proinde Deus cum creaturis est extensive perfectior. Ergo.

*¶ Conc. min.* quoad numerum, quoad extensionem vero, *Dist. min.* Quae reapse distinguuntur, si simul addantur, maiorem extensionem efficiunt, si unum in altero non contineatur, *conc.* Secus, *neg.* Porro perfectiones creaturarum continentur in divinis, tamquam finitum in infinito, a quo productae sunt.

### Corollarium.

Ergo solus Deus est propter se diligendus, reliqua in ipso, et propter ipsum, utpote quae sint emanationes, et participationes infinitae illius perfectionis. Nec qui Deum cum creaturis possidet, beator est, quam si solum Deum possideat, in quo, quidquid in creaturis est amabile, nobiliori modo existit. Qui ergo minus se felicem putat, quod creata bona, quibus frui concupiscit, non possidet, contra ordinem charitatis peccat.

## C A P. XI.

### De bonitate et sanctitate Dei.

*Ad.* **B**onum triplex est *absolutum, relativum, et morale.* Absolutum idem est, ac perfectum, seu id, cui nihil deest, sive ex principiis *essentialibus*, sive ex principiis *accidentalibus*. Relativum est, quod est alteri conveniens, seu rem alteram perficiens, sicut sapientia bona est homini. Morale est firma adhaesio voluntatis summo bono, a quo qui voluntarius recedit, in malum morale incidit. Bonitas autem moralis sanctitas etiam dicitur.

## PROPOSITIO

*Deus est summe bonus bonitate absoluta, relativa,  
et morali. Est dogma fidei.*

*Prob. 1a. pars.* Bonum absolutum idem est, ac esse perfectum. Atqui Deus est summum esse, et summe perfectus ex dictis. Ergo summe bonus est. Hinc Boëtius *Lib. III. de Consol. pros. 10.* Deum, inquit, rerum omnium principem, bonum esse, communis humanorum conceptio probat animarum, etiam Gentilium, ut supervacaneum sit, Scripturas, et Patres in re tam aperta recitare.

*Prob. 2a. pars.* Bonum relativum est, quod rem alteram perficit. Atqui quidquid bonitatis, et perfectionis est in creaturis, a Deo est. Ergo.

*Prob. 3a. pars.* Deus firmissime adhaeret, hoc est infinite diligit summum bonum, idest semetipsum, nec quidquam operatur, nisi bonum, et propter summum bonum, hoc est propter semetipsum. *Prov. XVI. 4.* Universa propter semetipsum operatus est Dominus. Hinc in Scripturis dicitur magnificus in sanctitate. Et *I. Reg. II. 2.* Non est sanctus, ut est Dominus: quia creaturae, utcumque sanctae, non habent, nisi particulam sanctitatis a Deo derivatam; Deus vero sanctitatem habet essentialem. Et *Isai. VI. 3.* Angeli assidue clamant Sanctus, Sanctus, Sanctus, quia per hoc attributum sanctitatis accessum habent ad Deum, cui creaturae, nisi sanctae, placere non possunt. Ergo.

*Objic.* Si Deus esset summe bonus in omni genere, non permetteret malum morale; atqui etc. Ergo etc.

*¶ Dist. maj.* Si non esset adeo omnipotens, et sapiens, et bonus, ut sciret, et posset de malis bona facere, *conc.* secus, *neg.* Cum ergo creatura sit natura sua mutabilis, Deus vero provisor universalis, qui aliquando potest ad majus bonum mala permittere subditorum, dedit quidem ipsis, vel praeparavit auxilium, sine quo peccatum vitare non possent, sed melius judicavit de malis bona facere, quam

quam mala nulla esse permittere, ut inquit *Augustinus*.

*Inst.* Cum Deus sit omnipotens, poterat maiora bona, et meliora facere de bonis, quam de malis. Ergo.

*R. Dist. ant.* Alterius generis; *conc.* Eiusdem generis, *neg.* Quomodo enim fuisset ex. gr. patientia martyrum sine injusta persecutione tyrannorum? Hoc igitur Deus iudicavit melius, quam meliora, et alterius generis bona facere sine permissione mali.

*Quaeres*, utrum solus Deus sit bonus *per essentiam*.

*R.* Si esse bonum *per essentiam* intelligatur eo sensu, quod ipsi *essentiale* sit existere, et infinitam habere bonitatem, solus Deus est *per essentiam* bonus; unde Christus *Luc. XVIII. 19.* Nemo, inquit, bonus nisi solus Deus. Si vero accipiatur pro eo, cui nihil deest de proprietatibus essentialibus, quidquid est, bonum est *per essentiam*. Unde demonstrat *S. Thomas*, bonum; et ens idem esse *I. P. Q. V. art. 1.* Ex quo rursus ostenditur, Deum esse summum bonum, quia est summum ens.

Porro quae de perfectione, bonitate, et sanctitate Dei diximus, cum non possint a Dei existentia sejungi; facilius enim inveniuntur, qui negaverint esse Deum, quam qui cum perfectum, bonum, sanctum negaverint; hinc eatenus pertinent ad fidem, quatenus ad fidem pertinere Dei existentiam, supra diximus.

## C A P. XII.

### De Omnipotentia Dei.

*Adv. I.* **O**mnipotentia est absoluta potestas facienti quidquid placet.

*II. Petrus Abaelardus*, teste Bernardo *Epist. CXC.* docuit, Deum non posse facere meliora iis, quae facit, imo non posse facere aliud, quam quod actu vult, et facit; quem errorem Estius *in I. Dist. 43.* Calvino etiam, et Bucero tribuit; licet illi haeretici non adeo perspicue id videantur asseruisse. Certe eam *Abaelardi* sententiam nonnulli receptiores

philosophi secuti sunt, quorum systema *Optimismus* appellatur.

## PROPOSITIO I.

*Deus est omnipotens. Est dogma fidei.*

*Prob. I. Genes. XVII. 1. Dicit Dominus: Ego Deus omnipotens. Exod. XV. 3. Omnipotens nomen ejus. Eccli. 1. 8. Unus est Altissimus Creator Omnipotens. Job. XLII. 2. Scio quia omnia potes. Matth. XIX. 26. Apud Deum omnia sunt possibilia. Luc. I. 37. Non erit impossibile apud Deum omne verbum. Et alibi saepe Scriptura omnipotentiam Dei commendat, quae maxime ad nostram fidem, et spem excitandam, et ad mundanum timorem expellendum valet. Idem docent uno ore Patres omnes, quos Petavius fusius laudat Lib. V. Cap. 5. imo et ipsi Gentiles Philosophi, quorum testimonia collegit Huetius Lib. II. Quaest. Alnet. ita ut vere dixerit Augustinus Serm. CXXXIX. De Temp. Non dico da mihi Christianum, da mihi Judaeum, sed da mihi Paganum, idolorum cultorem, daemonum servum, qui non dicat, Deum esse omnipotentem. Negare Christum potest: negare Deum omnipotentem non potest. Ergo etc.*

*Prob. II. Deus est ens summe perfectum, atqui omnipotentia est excellens perfectio.*

*Objic. Deus non potest mentiri, non potest efficere, ut praeterita facta non sint, et alia ejusmodi, quae dicuntur absolute impossibilia. Ergo non potest faceret quidquid vult.*

*¶ Neg. cons. Quae enim impossibilia sunt, Deus velle non potest, quia illa dicuntur impossibilia, quae contradictionem involvunt; ex. gr. mons sine valle, circulus quadratus, quae se mutuo destruunt, ac proinde non possunt esse objectum nec scientiae, nec voluntatis Dei. Contradictionem autem implicat, Deum mentiri, mori, etc. Quia Deus est ens perfectissimum, mentiri autem, et alia hujusmodi maximam imperfectionem significant. Hinc Augustinus (Serm. CLX. de tempore): Multa, inquit, Deus non potest.*

*potest facere, et tamen omnipotens est, imo ideo omnipotens, quia ista non potest . . . non potest mori, non potest peccare, non potest falli, tanta non potest, quia si posset, non esset omnipotens.*

*Scholion.*

Docent etiam Patres, et Theologi, non posse Deum ea efficere, quae licet contradictionem non involvant, tamen Dei sapientiam, bonitatem, ac providentiam non decent. Quo sensu nos quoque *Lib. I. Cap. 6.* diximus, non posse Deum vim, et potestatem permittere daemonibus miracula patrandi; idque etiam in aliis passim libris usurpabimus. Quod quidem non Dei omnipotentiam coarctat, cum Deus ea facere absolute possit, sed sapientiam, ac bonitatem commendat.

PROPOSITO III.

*Deus potest facere meliora iis, quae facit. Est. dogma fidei.*

*Prob.* Praeter ea, quae Deus fecit, mente concipia alia possunt meliora, et meliora in infinitum, quae nullam involvunt contradictionem. Ergo si Deus ea facere non posset, non esset omnipotens. At Deum esse omnipotentem, supra est demonstratum *Prop. I.* Ergo. Hinc Apostolus *Ephes. III. 20.* Potens est, inquit, Deus omnia facere superabundanter, quam petimus, et intelligimus.

*Solvantur Objecta.*

*Objic. I.* Deus est optimus; ergo efficere debet optima; ac proinde non potest facere meliora. Hinc Damascenus *Lib. II. de Fid. Orth. cap. 29.* Necesse est, inquit, omnia, quae Dei providentia fiunt, secundum rectam rationem, et optima, et Deo decentissima fieri, ita ut nequeant meliora fieri.

*Dist. ant.* Debet facere optima quoad modum, sive

sive ad finem ipsi propositum, ideoque in omnibus, quae efficit, propter efficiendi modum elucet ejus sapientia, et potentia infinita *cons.* Optima absolute, *neg.* Non aliud sibi vult Damascenus. *Deus ita est artifex magnus in magnis, ut minor non sit in parvis: quae parva non sua granditate, nam nulla est: sed artificis sapientia metienda sunt, inquit. Augustinus Lib. II. de Civ. Cap. 22.*

*Objic. II. Augustinus Lib. LXXXIII. Quaestionum Quæst. L. probat, Filium Dei esse Patri aequalem, quia, inquit, alioquin Pater fuisset invidus, si quem poterat aequalem gignere, noluisset. Deus, quem genuit, quoniam meliorem se gignere non potuit (nihil enim Deo melius) generare debuit aequalem. Si enim voluit, et non potuit, infirmus est: si potuit, et non voluit, invidus est. Ergo a pari si Deus potuisset facere meliorem, et non fecisset, esset invidus.*

*¶ Neg. cons. et parit.* Dispar enim ratio in eo est, quod Filio debetur aequalitas cum Patre, quam si Pater dare noluisset, fuisset invidus. At creaturis non debentur optima, alioquin creaturae deberent esse infinite bonae, quod repugnat, quia, posito quocumque bono finito, aliud melius cogitari posset.

### PROPOSITIO III.

*Deus potest facere alia ab istis, quae actu vult, et facit. Dogma fidei est.*

*Prob. I. ex Scriptura. Dan. III. 17. Deus noster potest nos eripere de camino ignis, et de manibus talis liberare; quod si noluerit etc. II. Machab. VIII. 18. Deus potest uno nutu universum mundum delere. Matth. XXVI. 53. An putas, quia non possum rogare Patrem meum, et exhibebit mihi modo plusquam duodecim legiones Angelorum? Et Matth. III. 9. Potens est Deus de lapidibus istis suscitare filios Abrahæ. Potest igitur Deus alia facere, quae non facit. Unde Athanasius Lib. III. cont. Arian. Póterat, inquit, etsi numquam advenisset Christus, solummodo loqui Deus, et maledictionem solvere. Idem alii constanter affirmant. Ergo.*

*Prob.*

*Prob. II.* Deus a nulla creatura pendet. Sic ergo circa eam operatur, ut possit non operari. Adde quod non esset omnipotens, si non posset alia facere, quam quae facit.

*Objic.* Deus est immutabilis, ac proinde non potest nunc nolle quod ab aeterno voluit, nec velle quod ab aeterno noluit. Ergo non potest alia facere, quam quae actu ab aeterno vult. Hinc in Scripturis dicitur Deus non posse, quae noluit. *Non potero facere quidquam, donec ingrediaris illuc*, ait Dominus ad Loth. *Gen. XIX. 22*, et Christus *Matth. XXVI. 39* Patrem orans ait, *si possibile est, transeat a me calix iste. h. e. si vis.*

*¶. Dist. cons.* Non potest in sensu composito, *conc.* in sensu diviso, *neg.* Hoc est, posito hoc quod aliquid ab aeterno voluerit, non potest nunc velle contrarium, ac proinde nec facere. Cum enim immutabilis sit, ideoque idem nunc velit, quod ab aeterno voluit, si posset nunc velle, et facere contrarium, posset idem simul velle, et nolle; facere, et non facere quod contradictionem implicat. Sed potuit ab aeterno nolle quod voluit, aut velle quod noluit, si agitur de creaturis, cum nullam bonum finitum necessario movere ejus voluntatem potuerit. Vide Estium in *I. Dist. XLIII. Sylviu. Q. XXV. art. V.* Thomam Valdensum *Tome. I. Lib. I. art. I.* Petavium, etc.

## C A P. XIII.

### *De Scientia Dei.*

**D**e scientia Dei quatuor hic quaerenda sunt, 1.<sup>o</sup> de ejus existentia, et proprietatibus; 2.<sup>o</sup> de ejus objecto; 3.<sup>o</sup> de medio; 4.<sup>o</sup> de varia ejus divisione.

#### §. I.

*De existentia, et proprietatibus scientiae Dei.*

*Adv.* Cum scientia ab Aristotele definiatur cogni-

tionem



tio certa, et evidens, acquisita per demonstrationem, in ea duo sunt distinguenda; ipsa nimirum certa, et evidens cognitio, et demonstratio, per quam acquiritur.

## PROPOSITIO I.

*Est in Deo agnoscenda intelligentia, et scientia, sed sine ratiocinatione. Est dogma fidei-*

*Prob. 1a. pars. I. Reg. II. 3. Deus scientiarum Dominus est. Job. XII. 13. Apud ipsum est sapientia, et fortitudo, ipse habet consilium et intelligentiam, Prov. III. 19. Dominus sapientia fundavit terram, stabilivit caelos prudentia. Esther. XIV. 14. Qui habes omnium scientiam. Rom. XI. 33. O altitudo divitiarum sapientiae, et scientiae Dei (a). Id etiam evidenti ratione monstratur. Deus enim est id, quo melius cogitari non potest. At ejusmodi non esset, si ipsi decesset scientia, ut cuique manifestum est. Hinc ipsi Ethnici Philosophi Dei scientiam praedicarunt. Sic Menander ap. Clement. Alex. Lib. V. Strom. Deum appellat oculum omnia cernentem.*

Secunda pars patet; cum enim ratiocinatio sit a re nota ad rem ignotam progressus, imperfectionem arguit, quae a Deo ableganda est. Videt ergo Deus conclusiones in principiis, sed non eruit ex principiis conclusiones.

*Dices.* Ea est essentia, et natura scientiae, ut adquiratur per ratiocinationem. Ergo aut in Deo non est proprie dicta scientia, aut est ratiocinatio.

*¶ Neg. ant.* Scientiae enim natura id tantum requirit, ut cognoscantur evidenter effectus in causis, consequentia in principiis: quod autem mens nostra per gradus quosdam cognoscat ex causis effectus, et ex principiis conclusiones, id ex ejus infirmitate est. PRO-

---

(a) Adde Job. XXVIII. 12. Ps. CXXXVIII. Sap. XII. 15. Eccli. XXII. 19. Coloss. II. 3.

## PROPOSITIO II.

*Scientia Dei est actus simplicissimus, immutabilis, infinitus, et causa omnium rerum. Tres priores prop. partes ad fidem pertinent.*

*Prob. 1. pars. Sap. VII. 22. dicitur de Sapientia Dei: Est in illa Spiritus Intelligentiae Sanctus, unicus, et multiplex, h. e. qui unico obtutu multiplicia objecta pervadit.*

*Prob. 2a. pars. Ipse Deus immutabilis est, ut supra docuimus Cap. VI., et perfectissimus. Ergo mutari non potest ejus scientia, quae est idem reapse cum ejus essentia; alioquin vel novam scientiae perfectionem acquireret, vel amitteret quam habebat, quod utrumque imperfectum est, ac Deo repugnat, Hinc Augustinus Lib. XIII. Confes. cap. 16. Sicut, inquit, omnino tu es, tu scis solus, qui es incommutabiliter, et scis incommutabiliter; et vis incommutabiliter.*

*Prob. 3a. pars. Psal. CXLVI. Sapientiae ejus non est finis, non est numerus. Infinita ergo est non solum extensive; ut ajunt, propter infinita objecta, quae cognoscit, verum etiam intensive, quia certissima, et evidentissima est, et objecta omnia intime pervadit, et comprehendit. Unde ait Augustinus Lib. XII. De Civ. cap. 20. In una Dei sapientia esse immensos quosdam, atque infinitos thesauros rerum in intelligibilibus, in quibus sunt omnes invisibiles, atque incommutabiles rationes rerum etiam visibilibus, et mutabilibus. Tres autem istae priores propositionis partes ad fidem pertinent.*

*Prob. 4a. pars. I. ex Scriptura. Prov. VIII. 30. Sapientia de seipsa loquens ait: cum eo eram cuncta componens. Et Joan. I 3. Omnia per ipsum facta sunt, nempe per Verbum, quod est sapientia Patris.*

*Prob. II. ex PP. Gregorius. M. Lib. XX. Moral. cap. 23. Quae sunt, inquit, non ab aeternitate ejus ideo videntur, quia sunt, sed ideo sunt, quia videntur. Quod et docuit Augustinus Lib. XV. de Trin. cap. 13. Dio-*

nysius *Lib. De Div. Nominib. cap. 7. alique (a).*

*Prob. III. ratione D. Thomae.* Se habet scientia divina ad res omnes, sicut ars in artifice ad res effectas. Unde dicitur *Sap. VII. 21. Omnium artifex est Sapientia.* Atqui scientia artificis est causa operis simul cum voluntate, et potentia artificis. Ergo et scientia Dei simul cum ejus voluntate, et omnipotentia est causa rerum. Præterea si scientia Dei non esset rerum causa, res ipsae causa essent scientiae Dei. Repugnat autem, res creatas esse causas scientiae divinae. Ergo.

#### Corollaria.

I. Cum ergo Deus per suam voluntatem, et omnipotentiam non solum res omnes creaverit, verum etiam ad omnes creaturarum actiones concurrat, hinc scientia etiam Dei causa est non modo rerum omnium, sed et omnium motuum cujuscunque creaturae saltem per concursum.

II. Cum in peccato ( quod est etiam quidam creaturae motus ) duo sint, actio scilicet *physica*, ac materialis, et ipse defectus, qui est *formale* peccati, patet, scientiam Dei non esse causam peccati, quoad ejus formalem rationem, quia in ea ratione non est aliquid *positivum*, sed *negativum*, quod non oritur a causa efficiente, sed deficiente, ut suo loco dicemus.

#### Objecta diluuntur.

*Objic. I. cont. 4. partem.* Patres multi videntur asserere, ideo res a Deo praesciri, quia futurae sunt, non ideo futuras esse, quia praesciuntur. Sic Origenes in *Cap. VIII. Ep. ad Rom. Quia futurum est*, inquit, *aliquid, ideo scitur a Deo antequam fiat.* Et Justinus, seu quivis auctor *Lib. Quaest. ad Orthod. Quaest.*

LVIII.

---

(a) Ambrosius *Lib. 1. Hex. m. Cap. 2.* Maximus Mart. in *Schol. ad Cap. 5.*

*LVIII. Non est praenotio causa ejus, quod futurum est, sed quod futurum erat, causa est praenotionis. Hieronymus Dial. III. cont. Pelagian. Non ideo peccavit Adam, quia Deus hoc futurum noverat, sed praescivit Deus quod ille erat propria voluntate facturus. Similia docent Cyrillus Alex. Damascenus, Chrysostomus, et alii, quos congerit Suarez. Ergo.*

*R. Neg. cons. Laudati enim Patres vel loquuntur de peccatis, quorum scientia Dei causa non est, vel si de omnibus actionibus loquuntur, intelligendi de scientia mere speculatrice, quae non est conjuncta cum voluntate, et omnipotentia ad opus efficiendum: sed opera jam effecta contuetur; de qua scientia dicitur Gen. I. 31. Vidit Deus cuncta, quae fecerat, et erant valde bona. Quae quidem scientia mere speculatrix, licet in Deo reipsa non distinguatur a practica; distinguitur tamen ratione.*

*Obje. II. Prius est rem esse, quam cognosci. Ergo.*

*R. Dist. ant. prius est rem esse, quam cognosci scientia mere speculatrice, conc. Scientia practica, qualis est scientia artificis, neg.*

### PROPOSITIO III.

*Praescientia Dei ita est causa rerum, ut causis liberis necessitatem non imponat. Fidei dogma est.*

*Prob. prop. contra Joannem Hus in Concilio Constantiensi damnatum, et veteres Stoicos. Ille enim post Manichaeos, et Priscillianistas, posita Dei praescientia, negavit hominum libertatem: isti e contrario, posita hominum libertate, Dei praescientiam negarunt, quam falso putabant, cum libertate hominis stare non posse. Stoicorum insaniam secutus est Socinus. Ita etiam sensit Cicero Lib. II. De divin. Unde Augustinus Lib. V. De Civ. cap. 9. Tullius, inquit, erepta Deo praescientia, ne libertatis damnum homo sentiret, homines dum vult facere liberos, fecit sacrilegos.*

*Prob. itaque prop. I. ex iis Scripturarum, et Patrum,*

trum testimoniiis, quibus suo loco adstruemus Angelorum, et hominum libertatem. Cum enim omnia a Deo praescita sint, et tamen creaturae illae spirituales libere operentur, manifestum est, Dei praescientiam non imponere illis necessitatis jugum.

*Prob. II. ratione.* Cum praescientia Dei, et sapientia, quae est omnium artifex, sit immutabilis, ut supra ostendimus, ac proinde falli nescia, necessarium est, ut cuncta in tempore eveniant eo modo, quo Deus ab aeterno praescivit, et ordinavit. Atqui praescivit, et ordinavit, quaedam eventura necessario, quaedam autem libere, ac proinde quibusdam effectibus aptavit causas necessarias, aliis vero liberas. Ergo tantum abest, ut praescientia Dei imponat causis liberis necessitatem, quin potius ab ipsa Dei praescientia oritur, et servatur earum libertas. Movet enim certissime Deus creaturam suam, secundum naturam, quam ipse creavit, et servat. Simili ratione utitur S. Thomas *I. P. Q. XIX. art. 8.* ut probet, voluntatem Dei, quae semper cum praescientia juncta est, non imponere causis liberis necessitatem. Alias rationes vide apud Anselmum *Lib. De Concordia praescientiae Dei cum libertate*, Augustinum *Lib. III. de lib. arb. Cap. 3. 4. et Lib. V. De Civ. Cap. 10.* Boetium *De consolat. Lib. V. Prosa 4.*

*Solvuntur objectiones.*

*Objic. I.* Quod Deus ab aeterno praescivit, non potest non evenire, alioquin Dei praescientia falleretur. Ergo necessario evenit.

*W. Dist. ant.* Non potest non evenire eo modo, quo Deus praescivit, *conc.* Alio modo, *neg.* Cum Deus praesciverit ab aeterno, quaedam libere eventura, profecto si illa in tempore necessario evenirent, tunc Dei praescientia falleretur; non fallitur autem cum eveniunt libere.

*Inst. 1<sup>o</sup>.* Contradictionem implicat dicere, aliquid non posse non evenire libere. Quod enim liberum est, potest non evenire, quod autem non potest non evenire, liberum non est. Ergo.

*W. Dist.*

*Dist. ant.* Si loquamur *absolute*, *conc.* Si loquamur *hypothetice*, *neg.* Absurdum enim esset absolute dicere: Petrus non potest non currere libere. Sed facta *hypothesi*, quod Petrus jam libere currit., recte dicere possumus: Petrus non potest non currere libere, quia non potest simul currere, et non currere. Cum ergo Deus ab aeterno praesciverit, et ordina-verit, quaedam certissime, sed libere eventura; posita *hypothesi* illa, contradictionem non implicat, ea non posse non evenire libere. Est igitur haec necessitas *hypothetica*, et *consequentiae*.

*Inst. 2.º* Si libere eveniant, fieri potest *hypothesis*, ut actu non eveniant; in hac autem *hypothesi* Dei praescientia falleretur, quod est absurdum. Ergo.

*Nego. seq. maj.* Hoc enim posito, quod Petrus libere currat, idque ab aeterno praesciverit Deus, fieri nequit *hypothesis*, quod simul non currat.

*Inst. 3.º* Possibili posito in actu, nihil sequitur absurdi, ut commune habet effatum. Ergo fieri potest *hypothesis*, ut quae possunt non evenire, non eveniant.

*Dist. ant.* Eo modo, quo possibile est, *conc.* Alio modo, *neg.* Porro possibile non est, ut Petrus libere currat, et simul non currat. Potest quidem dum currit non currere in *sensu diviso*, hoc est potentia cum actu conjuncta.

*Inst. 4.º* Antequam Petrus currere inciperet, poterat actu non currere. Tunc ergo falsa fuisset Dei praescientia.

*Nego. cons.* Nam si Petrus actu non cucurrisset, hoc ipsum praescisset Deus.

*Obje. II.* Praescientia Dei est necessaria, aeterna, immutabilis; ergo quae a Deo praevidentur, cuncta sunt necessaria.

*Dist. ant.* Est necessaria quoad *substantiam*, *conc.* quia quidquid est in Deo, est ipse Deus, purus, simplex, et necessarius actus. Est necessaria quoad *connotationem*, ut ajunt, sive *relationem* ad objecta, *neg.* Unus enim, idemque actus Dei necessarius infinita respicit objecta, quorum alia sunt necessaria, alia libera, alia *possibilia*.

## §. II.

## De Objectio Scientiae Divinae.

## P R O P O S I T I O

*Objectum scientiae Dei est primo Deus ipso, deinde caetera omnia praeterita, praesentia, futura absoluta, et conditionata, possibilia, et ipsae internae cordium cogitationes.*

*Est dogma fidei.*

*Prob. 1.º Deus seipsum, et attributa omnia absoluta, et relativa cognoscit, et comprehendit. Cum enim scientia Dei perfectissima sit, habeat necesse est objectum perfectissimum, quod est ipse Deus. Hinc scientia ista in Scripturis tribus personis Divinis, tamquam ipsis propria tribuitur. Luc. X. 22. Nemo scit quis sit Filius, nisi Pater, et quis sit Pater, nisi Filius, I. Cor. II. 11. Quae Dei sunt nemo cognovit, nisi Spiritus Dei.*

*2.º Caetera omnia. Heb. IV. 13. Non est ulla creatura invisibilis in conspectu ejus, omnia autem nuda sunt, et aperta oculis ejus.*

*3.º Praeterita, praesentia, et futura absoluta. Psal. CXXXVIII. Tu cognovisti omnia novissima, et antiqua. Eccli. XXIII. 29. Deo antequam crearentur omnia sunt agnita. Rom. IV. 17. Vocat ea, quae non sunt, tamquam ea quae sunt. Et Isaiae XLI. 23. praescientia futurorum contingentium, tamquam proprius divinitatis character ponitur. Annunciate quae ventura sunt in futurum, et sciemus quia Dii estis vos. Unde Tertullianus Apolog. cap. 20. Idoneum testimonium divinitatis est veritas divinationis, et Lib. II. cont. Marc. cap. 5. Praescientia Dei tantos habet testes, quantos fecit Prophetas (a).*

4.º

---

(a) Franciscus Junius contrarium Socini errorem late confutat in *Refutat. Praelim. Socini Tom. II. Praelect. Theolog.* Idem praestat Hornebekius in *Socinianismo Confutato*.

4°. Etiam futura conditionalia, *Matth. XI. 21. Vae tibi Corozain, vae tibi Bethsaida, quia si in Tyro, et Sydone factae fuissent virtutes, quae factae sunt in vobis, olim in cinere, et cilicio poenitentiam egissent.* Et *I. Reg. XXIII.* interroganti Davidi, an ciues Ceitac ipsum tradituri essent Sauli, si ibi David morari pergeret, respondit Dominus *Tradent.*

5°. Possibilia. Si enim seipsum, suamque omnipotentiam comprehendit, utique omnia possibilia videt.

6°. Denique internas eordum cogitationes. *Psal. CXXXVIII. Intellexisti cogitationes meas de longe. I. Paralip. XXVIII. 9 Omnia eorda scrutatur Dominus, et universas mentium cogitationes intelligit. Jerem. XVII. 10. Ego Dominus scrutans cor, et probans renes Eccli. XXIII. 28. Oculi domini multo plus lucidiores sunt super solem. . . . hominum eorda intuentes in absconditas partes. Ergo etc.* Mittimus alia innumera Scripturae loca, et Patrum testimonia.

Objectiones solvuntur.

*Objic. I.* Deus aliquando de futuris dubitando loquitur, ut *ex. gr. Jerem. XXVI. 3. Noli subtrahere verbum, si forte audiant, et convertantur, Ergo.*

*W. Dist. ant.* Id facit, ut explicet, rem esse apud homines liberam, dubiam, et difficilem, *conc.* apud Deum, *neg.* Hieronymus in *Cap. XXVI. Jerem. Verbum, inquit, ambiguum forsitan maiestati divinae non potest convenire, sed nostro loquitur affectu, ut liberum homini servetur arbitrium.* Simili ratione rem explicat Augustinus in *Psal. II. et Tract. XXXVII. in Ioan.*

*Objic. II.* Nonnulla praedixit Deus, quae postea non evenerunt, ut *IV. Reg. XX. 1. per Isaiam praedixit Ezechiae: Praeceptum domui tuae; morieris enim tu, et non vives, qui tamen ab infirmitate convaleuit. Et Jonae III. 4. Adhuc quadraginta dies, et Ninive subvertetur; quae tamen subversa non est. Ergo.*

*W. Dist. ant.* Et ea Deus praedixit eventura, spectato caussarum ordine, *conc.* Spectato decreto, et praescientia Dei, *neg.* Ezechias enim revera moriturus erat, spectata vi morbi, et Ninive subvertenda



da propter peccata; sed sciebat Deus, se daturum praeter ordinem causarum secundarum Ezechiae vitam propter orationem, et Ninivitis veniam propter poenitentiam. Ita S. Thomas 2a. 2ae. Q. CLXXI art. 6. ad 2.

*Objic.* III. Dens in Scripturis dicitur peccata non videre. *Mundi sunt oculi tui, ne videant malum. Habacuc. I. 13.* Et merito; peccatum enim in sua formali ratione non est aliquod positivum; sed mera privatio boni; *quid est aliud, quod malum dicimus, nisi mera privatio boni?* inquit Augustinus, *Enchirid. cap. 11.* Atqui mera privatio videri non potest. Ergo.

*W. ad 1m. Dist. ant.* Dicitur peccata non videre, quatenus ea non approbat; aut non cito in hac vita castigat, *conc.* quatenus ea non cognoscit, *neg.* Deus itaque in Scripturis saepissime dicitur peccata omnia videre. *Videns Deus, quod multa malitia hominum esset in terra, Genes. VI. 5. Delicta mea a te non sunt abscondita: Psal. LXXVIII. etc.* sed tamen aliqua dicitur non cognoscere, quae non probat, ut *Matth. VII. 23. Numquam novi vos, discedite a me, qui operamini iniquitatem:* et *Matth. XXV. 12. Amen dico vobis, nescio vos.* Vide Augustinum *Quaest. CLII. in Exod. et in Psal. C.* sicut e contrario dicitur cognoscere quae diligit, et probat, ut *Psal. I. Novit Dominus viam iustorum,* et *Rom. XI. 2. Non repulit Deus plebem suam, quam praescivit.* Aliquando etiam dicitur non cognoscere quae nondum castigat; ita enim se gerit, quasi ea ignoraret. *Projecisti, inquit, post tergum tuum omnia peccata mea. Is. XXXVIII. 17. Omnium iniquitatum ejus non recordabor, Ezech. XVIII. 22.*

*Ad 2. dist. min.* Mera privatio videri non potest per se ipsa, *conc.* per bonum sibi oppositum, *neg.* Per hoc ipsum, inquit S. Thomas I. P. Q. XIV. art. 10. *quod Deus cognoscit bona, cognoscit etiam mala, sicut per lucem cognoscuntur tenebrae.* Et revera cum Deus sit supremus iudex, qui reddet unicuique secundum opera ejus *Rom. II. 6.* absurdum est, cum ignorare mala, quae pro merito punit. Imo e contrario ipse solus peccati malitiam, comprehendit, quia ipse solus summum bonum comprehendit, cui peccatum adversatur.

*Objic.*

*Objic. IV. Genes. XXII. 12. ait Deus Abrahæ: Nunc cognovi, quod times Deum; ergo antea inter-*

*nam Abrahæ justitiam non plene cognoverat.*  
*¶ Neg. opns.* Ea enim locutio metaphora est. Quia enim apud homines occulta cordium per opera externa noscuntur, ideo dicitur Deus cognoscere Abrahæ obedientiam, cum per externos actus se prodidit. *Cognovi* igitur idem est, ac *feci manifestum*, sicut dicitur etiam *Rom. VIII. 26. Spiritus postulat pro nobis, hoc est postulare facit.*

### Scholion.

Etsi Augustinus *Lib. V. de Civ. cap. 9.* dicat: *confiteri esse Deum, et negare præscium futurorum, apertissima insania est;* tamen *Lib. II. ad Simplic. Quaest. 2.* ostendit, præscientiam Dei longe esse ab humana dissimilem duabus rationibus; 1.<sup>o</sup> enim quæ homines præsciunt, remota ab ipsis sunt; Deo autem omnia sunt præsentissima; 2.<sup>o</sup> cum res, quas prævidebamus, eveniunt, accedit aliquid perfectionis notitiæ nostræ, at contra nihil in tempore potest addi scientiæ Dei. *Scit ergo Deus, inquit, et præscit Deus ineffabili modo.*

### §. III.

#### *De medio scientiæ Dei.*

*Adv. I.* Videndum modo est, quo in medio videat Deus ea, quæ superiore articulo scientiæ divinæ objecta esse diximus. Medium autem scientiæ Dei vocant Theologi id, in quo, tamquam in causa, Deus aliquid cognoscit. Et quidem in quo Deus videat seipsum, et omnia creata, imo et omnes actus creaturarum necesarios, facile crit edocere. At gravissima controversia est inter Theologos, quo in medio Deus actiones creaturarum liberas cognoscat. Quæ quidem quaestio cum pendeat ab alia,

quaenam scilicet sit causa, creaturas libere movens ad agendum, potius rejicienda esset ad Tractatum de Gratia Dei. Sed quia Theologi omnes eam hic agitant, de illa nos etiam paucis hic agemus; uberio-rem enim ejus notitiam, nisi pertractatis de Gratia quaestionibus, tirones accipere non possunt.

II. Cardinalis *Cajetanus*, cui accessit etiam *Gonet*, aliique putant, actiones creaturarum liberas praevi-deri a Deo in reali eorum *coexistentia* cum aeterni-tate, non quod illae extiterint ab aeterno, sed quia ipsa aeternitas non habet *prius*, et *posterius*, sed est interminabilis vitae tota simul, et perfecta possessio, indivisibilis, omnia simul tempora comprehendens. Quae quidem sententia manifeste aberrat a veritate. Futura enim non existunt ab aeterno, ergo non coe-sistunt aeternitati. Licet autem aeternitas indivisibilis sit, tamen *virtualia* quaedam puncta, seu *instantia* sunt, quae praecedunt futurorum existentiam. Sicut et humana Christi natura, ut suo dicendum est loco, licet conjuncta sit Verbo, quod est simplicissimum, et indivisibile; tamen non *coexistit* ubique, ubi Ver-bum existit. Ergo *antequam res fierent, erant in Dei scientia, non erant in sua natura*, inquit *Augustinus Lib. V. de Gen. ad lit. cap. 18.*

III. At Thomistae fere omnes putant, actiones om-nes creaturarum rationalium videri a Deo in decre-to, quo statuit ab aeterno illa *physice praemovere* ad agendum; docent enim ipsi; nullum fieri posse a creatura rationali actum sine physica Dei praemo-tione.

IV. Pugnant ex adverso *Ludovici Molinae* sectato-res, qui nullam agnoscunt *praemotionem*, docentque actus omnes creaturarum, sive sint naturales, sive supernaturales; sive in statu naturae integrae, sive in statu naturae lapsae videri a Deo in seipsis; qua-tenus in essentia divina tamquam in speculo reprae-sentantur.

V. Theologi, quos *Augustinianos* vocant, media incedunt via. Distinguunt enim inter actus natu-rales, et supernaturales: item inter actus supernatu-rales naturae integrae, et actus supernaturales natu-  
rae

rae lapsae. Et quoad actus quidem naturales, et supernaturales naturae integrae Molinae assentiuntur; Thomistis vero quoad actus supernaturales naturae lapsae.

## PROPOSITIO I.

*Deus in nullo medio essentiam suam, et attributa videt.*

*Prob. 1. pars.* Medium divinae scientiae illud est, in quo tamquam in causa videt Deus, objectum. At nullum fingi potest medium quod sit, etiam nostro intelligendi modo, prius essentia divina, aut illius causa, aut radix. Ergo.

*Prob. 2.º pars.* Etsi attributa divina nostro intelligendi modo fluere concipiantur ab essentia, non ita tamen ea videt Deus, sed ut sunt in seipsis. nempe reipsa idem cum essentia sua, unusque simplicissimus actus; ac proinde si essentiam in nullo medio videt, idem de attributis dicendum est, quidquid alii Theologi in contrarium afferant.

## PROPOSITIO II.

*Deus videt cetera omnia in seipso.*

*Prob. I. ex PP. 1.º* Dionysius de divin. nominibus, cap. 7. Divina, inquit, Sapientia seipsam cognoscens, scit omnia. 2.º Ambrosius Tract. in Symbol. cap. 1. Nihil extra intelligere, sed singula intueri dicitur. 3.º S. Thomas I. P. Q. XIV. ar. 5. Deus seipsum videt in seipso, alia autem a se videt non in ipsis, sed in seipso (a).

L I 2

*Prob.*

---

(a) Add. Maximus M. in Scholiis ad D'onyt. Augustinus Lib. 82. Quaest. Q. XLVI., et Lib. XI. De Civ. cap. 7. et alibi, Anselmus Monolog. cap. 9 et 32. Concinnunt ipsi Philosophi. Plotinus Ennead. V. Lib. 9. Cap. 5. Alcinous Lib. de Dogm. Plat. Ammonius in Arist. Lib. Peri ermenias.

*Prob. II. ratione 1.º* Operationes intellectus speciem, et perfectionem accipiunt ab *objecto* primario. Si ergo Deus non in seipso videret res alias, sed in se ipsis, essent illi primarium objectum divinae operationis, ac proinde haec ab illis speciem, ac perfectionem acciperet. *Hoc autem*, inquit S. Thomas *Lib. I. cont. Gent. cap. 48. est impossibile, cum ejus operatio sit ejus essentia, et haec, quippe ens a se, nequeat ab alio distincto speciem accipere. Sic igitur impossibile est, quod intellectum a Deo primo, et per se sit aliud ab ipso.*

*2.º* Res, quae a Deo noscuntur, vel sunt possible, vel creaturae, vel creaturarum actiones necessariae, vel liberae. Si sunt possible, vel creaturae, vel earum actiones necessariae; patet, Deum illas videre tum in sua ipsius scientia; tamquam in arte sua, tum in decreto; quo ab aeterno statuit illas producere talibus instructas proprietatibus, ex quibus certae actiones necessario prodeunt. Si vero sunt actus liberi; licet inter creaturarum naturam, illosque liberos actus non sit necessaria connexio, est tamen (positis circumstantiis) infallibilis nexus, quem nos non videmus, sed videt Deus, cui intime perspecta est natura rerum. Ergo etiam in systemate *Moliniano* verum est, Deum omnia videre in seipso; a fortiori igitur in systemate Thomistarum, et Augustinianorum.

#### *Corollarium.*

Habet ergo Deus in seipso omnium rerum tum existentium, tum possible *ideas*, hoc est similitudines intelligibiles, quibus tamquam in speculo res omnes repraesentantur, quae quidem ideae non sunt ab ipsa Dei substantia distinctae. Id aliquo pacto veteres Philosophi cognoverunt, in primis Plato, qui ex Clemente Alex. *Lib. V. Strom.* duplicem distinguebat mundum, intelligibilem in Deo, et materialem extra Deum, sicut in mente Architecti est exemplar spiritale operis, extra Architectum est opus ipsum materiale. In eo tamen ab *Aristotele* repre-

henditur *Lib. I. Metaphys.* quod ideas illas posuerit a mente divina distinctas, licet *Platonem* nonnulli defendant, *Aristotelem* calumniae postulent (a). *Boetius Lib. III. de Consol. metr. 9.*

... Tu cuncta superbo

Ducis ab exemplo, pulchrum pulcherrimus ipse  
Mundum mente gerens, similique ab imagine formans.

*Damascenus Lib. I. de Fide cap. 3.* Deus omnium auctor est; ergo omnium, quae sunt, rationes in se, et causas, hoc est ideas jam ante in ipso praehabet. Mundum hunc intelligibilem *Philo Judaeus (de Mundi Opificio)* appellat ipsum Verbum Dei. *Joannes in Evangelio Cap. I. 4.* quod factum est in ipso (Verbo) vita erat. Verbum enim Dei est ipsa substantialis, et subsistens Sapientia, et Intelligentia Patris, in qua sunt rerum omnium aeternae rationes, et ideae. Cum autem Dei sapientia una sit, hinc revera unica est in Deo rerum omnium idea, virtualiter multiplex, propter infinita objecta, quae repraesentat.

*Dices.* Si Deus omnia cognosceret in seipso, ejus cognitio non esset intuitiva, sed obliqua, et ut ajunt, abstractiva, sicut cum videmus effectum non in ipso, sed in causa. Falsum consequens, quia visio abstractiva imperfecta est. Ergo.

*¶. Dist. ant.* Si Deus res alias cognosceret in seipso secundum rationes generales, et non in propria ipsarum idea, *conc.* Si secundum rationes individuas, et in propria ipsarum idea *neg.* Nos itaque oblique, et imperfecte videmus effectum in causa, *ex. gr.* in arbore brumali frigore veluti emortui futuros fructus, quia non videmus fructus ipsos, nisi secundum generales quasdam rationes, nec in propriis singulorum fructuum ideis. At Deus in seipso videt usque ad minutissimas rerum omnium atomos, et quidem in propriis, et perfectissimis earum ideis.

PRO-

---

(a) De ideis Platonis vide *Petavium Lib. IV. Cap. 9.*  
*Bruckerum Huser. Phil. Klozium in Theolog. natur. Disp. XII.*

## PROPOSITIO III.

*Futura libera ordinis supernaturalis in statu naturae lapsae videt Deus in suo decreto efficaci; reliqua vero in essentia sua tamquam in idea, quae voluntatem creatam, omnesque ejus motus certissime repraesentat.*

*Prob. 1a. pars.* Deus ab aeterno decrevit, se facturum per gratiam efficacem, ut homines in statu naturae lapsae actus illos supernaturales exercent. Ergo in eo decreto actus illos vidit. *Prob. ant. Ezech. XXXI. 26. Auferam*, inquit, *cor lapideum de carne vestra, et dabo vobis cor carneum; et spiritum meum ponam in medio vestri, et faciam, ut in praeceptis meis ambuletis.* Haec Apostolus *Ephes. I. 4. Elegit nos in ipso ante mundi constitutionem, ut essemus sancti, et immaculati in conspectu ejus in charitate. Qui praedestinavit nos... secundum propositum voluntatis suae in laudem gloriae gratiae suae... in quo etiam et nos sorte vocati sumus, praedestinati secundum propositum ejus, qui operatur omnia secundum consilium voluntatis suae.* Et *Cap. II. 8. Gratia enim estis salvati per fidem, et hoc non ex vobis; Dei enim donum est: non ex operibus, ut ne quis gloriatur; ipsius enim sumus factura, creati in Christo Jesu in operibus bonis, quae praeparavit Deus, ut in illis ambulemus.* In quae verba sole clariora scribit Augustinus *Lib. de Praedest. Sanct. cap. 17. Haec est immobilis veritas praedestinationis, et gratiae... ait Apostolus: Elegit nos in ipso ante mundi constitutionem, ut essemus sancti; quod profecto si propterea dictum est, quia praescivit Deus credituros, non quia facturus fuerat ipse credentes, contra istam praescientiam loquitur Filius dicens: non vos me elegistis, sed ego elegi vos. Electi sunt itaque ea praedestinatione, qua Deus utique sua futura facta praescivit... elegit... non quia sancti, et immaculati futuri eramus, sed elegit, praedestinavitque, ut essemus.* Sed de his fusius in Tract. de Gratia.

*Prob. 2a. pars.* Reliquae actiones creaturarum li-  
be-

berae vel sunt supernaturales in statu naturae innocentis, vel naturales in utroque statu. At neutras Deus efficaci motione operatur in tempore, ac proinde neutras decrevit, se operaturum ab aeterno. Ergo non videt in suo decreto efficaci. *Prob. min.* de actibus supernaturalibus naturae innocentis. S. Augustinus *Lib. de Corrept. et grat. cap. 10. 11. et 12.* docet, Angelos, et homines in statu innocentiae non fuisse a Deo motos auxilio quo certissime operarentur, sed auxilio versatili, sine quo non possent. *Istam*, inquit, *gratiam non habuit homo primus, qua numquam vellet esse malus, sed sane habuit, in qua si permanere vellet, numquam malus esset, et sine qua etiam cum libero arbitrio bonus esse non posset ... tale quippe erat adjutorium, quod desereret cum vellet, et in quo permaneret si vellet, non quo fieret ut vellet. Haec est gratia; quae datum est primo Adam, sed haec potentior est in secundo Adam. Prima est enim, qua fit, ut homo habeat justitiam, si velit; secunda ergo plus potest, qua etiam fit, ut velit ... Fortissimo quippe permisit, atque dimisit, facere, quod vellet; infirmis servavit, ut ipso donante, invictissime quod bonum est vellent, et hoc deserere invictissime nollent. Quod fuisse prosequitur loco citato, nosque uberius suo loco tractabimus. Si autem ad actus supernaturales naturae innocentis decretum efficax non fuit necessarium, a fortiori ad actus naturales. Ergo.*

*Prob. II. ead. 2a. pars.* Decretum divinum physice praemovendi voluntates creatas ad actus liberos naturales requirit *exigentiam*, ut ajunt, creatarum voluntatum, ne destruat liberum earum arbitrium. Ergo decretum illud non est sufficiens *medium*, quo Deus videat futuros creatae voluntatis actus liberos, sed recurrit quaestio, in quonam medio Deus illam videat *exigentiam*.

Cum ergo Deus non videat eos actus in suo decreto efficaci, et aliunde eos videat in seipso, ut supra est demonstratum, sequitur, Deum illos videre in sua essentia, in qua tamquam in arte sua, et universali omnium rerum idea, videt omnes creatas



voluntates, earumque propensiones, et motus, qui inde certissime, licet libere eveniant.

*Dices.* Effectus, qui pendet a duplici causa, non potest in una earum certissime videri; atqui actus supernaturales, tum a Gratia Dei, tum a creata voluntate pendent. *Non ego autem, inquit Apostolus I. Cor. XV. 10. sed gratia Dei mecum.* Ergo.

¶ *Dist. maj.* Si una causa alteram non determinet, conc. Secus, nego. Porro in statu naturae lapsae gratia certissime voluntatem movet; in statu innocentiae, ut suo loco monstrabimus, secus se res habuit.

#### PROPOSITIO IV.

*Futura conditionalia, quae tamen non erunt, quia non ponetur conditio, videt Deus in sua essentia tamquam in idea, quae cuncta possibilis cognoscit.*

*Prob.* Futura illa, de quibus loquimur, essent quidem, si conditio poneretur, sed quia scit Deus, conditionem numquam exituram, videt ut mera possibilis. Ergo.

#### §. IV.

##### *De divisione scientiae Dei.*

*Ado. I.* Licet unica, et simplicissima sit scientia Dei, tamen, nostro intelligendi modulo, propter multiplicia objecta, multiplex ejus divisio est.

I. Dividitur ergo 1.<sup>o</sup> in speculatricem, sive *speculativam*, et *practicam*. Prior respicit objecta non producenda a Deo, ut cognitio sui ipsius, et rerum possibilium; altera res a Deo producendas, ut cognitio hujus universi.

II. Dividitur 2.<sup>o</sup> in necessariam, et liberam. Prior est de objectis, quae a libero Dei decreto non pendent, ut cognitio possibilium: altera est de objectis, quae a decreto illo pendent, ut cognitio rerum existentium.

III. Dividitur 3.<sup>o</sup> in scientiam *simplicis intelligentiae*, et scientiam *visionis*. Prior est de rebus mere possibilibus, quae nec fuerunt, nec futurae sunt: altera vero de rebus existentibus in aliqua *differentia* temporis, h. e. sive praeteritis, sive praesentibus, sive futuris.

IV. De hac postrema scientiae Dei divisione gravis extitit Saec. XVI. controversia inter Theologos. *Ludovicus* enim *Molina Lib. de Conc. Quaest. XXIII. art. 4.* docet, *adaequatam* non esse divisionem ejusmodi, sed inter scientiam simplicis intelligentiae, et visionis *mediam* quandam agnoscendam esse *scientiam*, qua praevidentur a Deo res, quae non sunt mere possibiles, nec futurae, sed futurae essent sine efficaci Dei decreto, si aliqua conditio poneretur, ut *ex. gr.* conversio Tyriorum, si apud ipsos Christus miracula patrasset. Haec Molinae doctrina arctissime conjuncta est cum ea, quam articulo superiore confutavimus, atque ideo sicut pro scientia media, tamquam pro aris, et focis Molinistae certarunt, ita in eam totis viribus insurrexerunt Thomistae simul, et Augustiniani; nisi quod posteriores isti concedunt, agnosci posse scientiam mediam de actibus naturalibus; imo et supernaturalibus Angelorum, et hominum in statu naturae innocentis.

## PROPOSITIO.

*Adaequata est scientiae Dei divisio in scientiam simplicis intelligentiae, et visionis, ideoque tamquam commentum rejicienda est scientia media.*

*Prob. I.* Quidquid ab aeterno cognoscit Deus, vel erit, vel non: ipsa etiam conditio, sub qua nonnulla dicuntur futura, vel vera erit aliquando, vel non: nihil medium est. Atqui si res erit, pertinet ad scientiam visionis; si non erit, est utique mere possibilis, et ad scientiam simplicis intelligentiae pertinet. Ergo nulla agnoscenda est media scientia.

*Prob. II.* speciatim de actibus supernaturalibus in statu naturae corruptae. Augustinus disputans contra  
Pe-

Pelagianos, et Semipelagianos non solum rejicit, ac refellit abusum scientiæ mediæ, quo illi hæretici explicare nitebantur, cur e duobus parvulis morientibus unus baptizetur, alter sine baptismo pereat (quippe effluebant illi, ideo hoc accidere, quia praevidebat Deus unius mala opera, alterius vero bona, si ad aetatem adultam uterque pervenisset): verum etiam ipsam scientiam mediâ. Ait enim, in hoc statu Deum nulla bona opera hominûm supernaturalia praescire, nisi quae ipse decrevit futura: *praedestinatione quippe ea praescivit, quae fuerat ipse facturus.* Lib. De praedest. Sanct. cap. 10. Addit etiam Lib. de dono persever. cap. 19. nomine praescientiae in Scripturis, et PP. si agitur de vocatione electorum intelligendam praedestinationem. *Quid prohibet quando apud aliquos verbi Dei tractatores occurrit praescientiae nomen, et agitur de vocatione electorum, eandem praedestinationem intelligere?* Atqui hoc omnino destruit scientiam mediâ, qua ponitur, Deum aliqua praescire sub conditione futura, sine ejus efficaci decreto. Ergo etc.

#### Solvuntur Objectiones.

*Objic. I.* Inter rem mere possibilem, et rem absolute futuram, aliquod est medium, nempe res non quidem absolute futura, nec mere possibilis, sed futura sub conditione. Sic ex. gr. interroganti Davidi, utrum *Ceilitae* eum in manu Saul essent tradituri, non respondit Dominus *tradere poterunt*, id enim jam sciebat David; sed *tradent*: et Christus increpans Corozaitas, et Bethsaitas, non ait, Tyrios, et Sydonios *potuisse* agere poenitentiam, si sua miracula vidissent, sed *poenitentiam egissent*, at contra neutrum erat absolute futurum, quia revera neutrum accidit. Ergo ec.

*W. Neg. ant.* Deus enim per scientiam simplicis intelligentiae prodictionem Davidis, et conversionem Tyriorum at mere possibilem videbat; sed per scientiam visionis noscebat etiam pravam Ceilitarum mentem, et minus obduratum cor Tyriorum, ex quo futu-

futurum certo fuisset, ut illi Davidem proderent, si apud ipsos morari pergeret, isti converterentur, si apud ipsos Christus miracula patrasset, cum quibus gratiam quoque efficacem conjunxisset, ut fusius dicemus in Tractatu de Gratia, ubi alias etiam Molinistarum objectiones refutabimus.

*Obje. II.* Sunt nonnulli Augustiniani Theologi, qui docent, poni posse scientiam mediam de actibus humanis mere naturalibus, imo et de supernaturalibus in statu innocentiae. Ergo non videtur rejicienda omnino.

✱ *Neg. cons.* Licet enim de naturalibus operibus, imo et de supernaturalibus in statu innocentiae, quae ab efficaci Dei decreto non pendeant, quaestio mere Philosophica sit, utrum agnoscenda sit scientia media, quae in quaestione licuit Theologis illis quod sibi verisimilius videbatur sentire; tamen etiam de iis operibus verum est, quod diximus, aut conditionem aliquando extitutam, aut non: si primum, rem videri a Deo per scientiam visionis; si alterum, per scientiam simplicis intelligentiae; atque ideo rejiciendam esse scientiam mediam. Vide rem copiose tractatam apud Conetum, *Tom. I. Disp. VI. et Lib. IV. Cap. 10.*

## C A P. XIV.

*De voluntate Dei.*

*Adv. I.* **E**SSe in Deo voluntatem, tota Scriptura praedicat. *Omnis voluntas mea fiet Is. XLVI. 10. Fiat voluntas tua Matth. VI. 10.* Definitum etiam est in Conc. VI. generali contra Monothelitae, esse in Christo duplicem voluntatem, divinam, et humanam; idque etiam ratio demonstrat; cuilibet enim enti sua naturalis in finem inclinatio est, quae in mente praeditis voluntas appellatur. Quamvis autem voluntas Dei una sit, simplicissima, nec ab ejus essentia reapse distinguatur; tamen propter varia ob-  
*jecta*, quae respicit, varie a nobis dividitur, variasque nobis contemplandas exhibet proprietates. Igitur

tur quaeremus 1.<sup>o</sup> quodnam sit divinae voluntatis ob-  
jectum ; 2.<sup>o</sup> quae divisio ; 3.<sup>o</sup> quae proprietates.

## §. I.

*De objecto divinae voluntatis.*

*Adv. I.* Objectum cujuscumque voluntatis duplex in Scholis distinguitur , *materiale* , et *formale*. *Materiale* est res ipsa , quam volumus ; *formale* est ratio movens , seu *motivum* , sive id propter quod volumus ; sicut medicina est materiale objectum voluntatis aegroti ; sanitas vero est ejus objectum formale. Objectum autem voluntatis sive materiale , sive formale non potest esse , nisi bonum , ut in Metaphysicis ostenditur , sicut objectum intellectus non potest esse , nisi verum. Videamus ergo quodnam sit voluntatis divinae objectum tum materiale , tum formale.

## P R O P O S I T I O I.

*Objectum materiale primum divinae voluntatis est ipse Deus , secundarium vero sunt creaturae omnes sive praeteritae , sive praesentes , sive futurae.*

*Prob. 1a. pars.* Omnis voluntas primario suam appetit beatitudinem. At Dei beatitudo alia esse nequit , nisi ipse Deus summum bonum , alioquin esset aliud melius , quo Deus perficeretur , et beatus esset , quod est absurdum. Ergo.

*Prob. 2a. pars.* quae ad fidem pertinet , 1.<sup>o</sup> ex Scriptura , Sap. XI. 25. *Diligis omnia , quae sunt , et nihil odisti eorum , quae fecisti.* 2.<sup>o</sup> ratione. Quidquid est extra Deum , nonnisi ex voluntate Dei est , alioquin vel esset a seipso , vel ab alio principio praeter Deum , quod est absurdum. Deinde quidquid est , quatenus est , bonum est , unde ens , et bonum idem sunt , ut supra docuimus Cap. XII. Atqui voluntas divina , cum sit infinita , omne bonum existens complectitur. Ergo.

Co-

## Corollarium.

Hinc sequitur, creaturas mere possibles non esse divinae voluntatis objectum.

## PROPOSITIO II.

*Objectum formale divinae voluntatis est ipsa Dei bonitas.*

*Prob. I. Proverb. XVI. 4. Universa propter semetipsum operatus est Dominus. Ergo etc.*

*Prob. II. Motivum voluntatis divinae non potest esse, nisi aliquid perfectissimum. Ergo non nisi ipse Deus. Praeterea si objectum formale divinae voluntatis esset aliquid praeter Deum, sequeretur, voluntatem Dei moveri ab alio extra se, et ab illo speciem accipere: voluntas enim ab objecto formali, si-ve motivo speciem sumit. Atqui utrumque absurdum est. Ergo. Apposite S. Thomas I. P. Q. XIX. art. 2. ad 2. In his, quae volumus, inquit, propter finem, tota ratio movendi est finis, et hoc est quod movet voluntatem, sicut qui vult sumere potionem amaram, nihil in ea vult, nisi sanitatem. Unde cupit Deus alia a se non velit, nisi propter finem, qui est sua bonitas, non sequitur, quod aliquid aliud moveat voluntatem ejus, nisi bonitas sua. Et sic, sicut alia a se intelligit intelligendo essentiam suam, ita alia a se vult volendo bonitatem suam.*

## Solvuntur objectiones.

*Objic. I. Si Deus omnia vellet propter seipsum, non amaret creaturas rationales amore amicitiae, quae tendit in amicum propter ipsum, sed amore concupiscentiae, qui alia appetit propter seipsum. Atqui falsum consequens; ait enim Christus Joan. XV. 15. Jam non dicam vos servos . . . . vos autem dixi amicos: ut nos alibi fusius dicemus. Ergo etc.*

*¶. Dist. ant. Si diligret rationales creaturas propter*

pter suam ipsius utilitatem, et non esset in hoc posita creaturarum utilitas, ut diligerentur a Deo propter seipsum, *conc.* Si ideo diligeret propter seipsum, quia hoc in ipsarum creaturarum utilitatem redundat, *neg.* Sicut igitur amor noster perversus esset, si non diligeremus aut nos ipsos, aut amicum propter Deum; ita si Deus non diligeret amicos suos propter seipsum, esset amor ejus inordinatus, atque perversus. Et sicut nos tunc vere diligimus amicos, cum eos diligimus propter Deum, quia tunc verum bonum illis volumus, quando optamus, ut Dei gloria in illis manifestetur; sic Deus ideo vere diligit creaturas rationales, quia vult, ut in eis sua bonitas refulgeat, in quo sita est ipsarum creaturarum utilitas. Quodnam enim est creaturarum bonum, nisi Deus? Amor autem concupiscentiae est alia appetere propter utilitatem nostram; at Deo nihil utilitatis potest ex creaturis accedere; cum bonorum nostrorum non egeat. Puschre Bernardus *Serm. III. Pentec.* Omnia propter semetipsum fecit Deus, omnia propter suos: aliter tamen propter se, aliter propter suos. Omnia fecit propter seipsum, gratuita scilicet bonitate; omnia propter electos, pro eorum scilicet utilitate.

*Objic. II.* Negari non potest, Deum aliquas creaturas fecisse propter alias; sicut dicit Apostolus *II. Cor. IV. 15.* Omnia propter vos. Ergo habet aliud objectum formale praeter solam bonitatem suam.

*¶. Dist. ant.* Propter alias, idest in commodum, et utilitatem aliarum, *conc.* Propter alias, tamquam finem, et motivum suae voluntatis, *neg.* Quod breviter explicat S. Thomas *I. P. Q. XIX. art. 5.* Vult ergo, inquit, Deus esse hoc propter hoc, sed non propter hoc vult hoc. Sicut artifex vult, primum scalae gradum ducere ad alterum, sed non propter alterum gradum, tamquam propter finem, gradum primum format, et aptat, quin etiam primum, et omnes reliquos scalae gradus ad alium finem dirigit. Et sicut Deus intelligit conclusiones fluere ex principiis, et effectus ex causis creatis, sed principia, et causae creatae non sunt ei ratio intelligendi conclusiones, et effectus; ita vult unam creaturam alteri inser-

vire

vire, sed altera creatura non est ei ratio, cur velit primam.

*Corollarium.*

Ergo divina bonitas est prima rerum omnium causa, fons, et origo. Cujuscumque enim operis prima causa est finis, qui agentem movet; ac proinde cum sola bonitas Dei sit finis, et ratio suae voluntatis; quia scilicet, cum nihil possit adquirere Deus, amat bonitatem suam effundere extra se, ut advertit S. Thomas cit. Q. XIX. art. 2. sequitur, ipsam esse rerum omnium causam, et originem. Hinc Augustinus Lib. I. De Doct. Christ. cap. 32. Quia Deus, inquit, bonus est, sumus, et in quantum sumus boni sumus. Ex quo ulterius consequitur, non posse Deum esse mali auctorem, cum enim omnium Divinorum operum prima causa sit ejus bonitas, magis repugnat, posse inde manare malum, quam ex igne frigus, ex luce tenebrae.

§. II.

*De divisione divinae voluntatis.*

Adv. I. Voluntas Dei, quae unus est, et simplex actus, nostro intelligendi modo dividitur. 1.º in voluntatem signi, et beneplaciti, 2.º in voluntatem antecedentem, et consequentem, 3.º a nonnullis Theologis in absolutam, et conditionalem.

II. Voluntas signi per metaphoram dicitur signum aliquod, per quod Deus exterius aliquod se velle significat, sicut cum Deus aliquid

*Praecipit, aut prohibet, permittit, consulit, implet* ( seu operatur ), quinque enim hisce signis aliquid se velle ostendit; signa autem per metaphoram accipiunt nomen ipsarum rerum, quarum signa sunt. Voluntas vero beneplaciti est ipsum Dei decretum, seu ipsa in Deo *volitio*, qua aliquid ab aeterno statuit. Licet vero voluntas signi semper cum aliqua voluntate beneplaciti conjuncta sit, alioquin signum  
esset



esset mendax, ut advertit S. Thomas *I. P. Q. XIX. art. 11. et 12.* non semper tamen conjuncta est cum ea voluntate beneplaciti, quam nos putamus. Sic cum Deus praecepit Abraham, ut filium Isaac immolaret; putabat ille, Deum velle ejusmodi sacrificium; cum tamen vellet Deus, manifestam fieri Abrahami fidem, et obedientiam.

III. Voluntas antecedens est, qua Deus aliquid vult, quatenus in se; et sine singularibus ejus circumstantiis bonum est: sic Judex vult omnes cives vivere, et mercator omnes servare merces, quatenus utrumque in se, et sine peculiaribus circumstantiis, bonum est. Voluntas vero consequens est, qua Deus aliquid, inspectis omnibus singularibus circumstantiis, absolute decernit. Sic mercator tempestate deterritus, et periculo naufragii, voluntate consequenti merces in mare projicit, et judex civem homicidam morte damnat.

IV. Porro haec divinae voluntatis divisio in antecedentem, et consequentem apud omnes Theologos invaluit, imo nec Patribus fuit ignota. Ait enim Chrysostomus *Homil. I. in Epist. ad Ephes. Prima (voluntas) est, ut non pereant, qui non peccarunt. Voluntas secunda est, ut qui facti sunt mali, pereant.* Et clarius Damascenus *Lib. II. de Fid. cap. 29. Prima quidem voluntate Deus vult omnes homines servari, et regni sui compotes fieri; neque enim supplicii, aut cruciatus causa; verum ad hoc, ut bonitatis ipsius participes simus, nos effinxit: ut justus autem iis quoque, qui peccant, poenam infert. Prima voluntas dicitur antecedens . . . secunda autem consequens.*

V. Sed duplex agitur inter Theologos controversia. Prima, utrum voluntas Dei ideo dicatur antecedens, et consequens, quia vel antecedit, vel sequitur praevisum voluntatis humanae consensum. Secunda, utrum voluntas antecedens sit voluntas beneplaciti, an signi.

VI. Et in priori quidem quaestione Ludovicus Molina, qui statuit contra veterum doctrinam nullum esse decretum Dei efficax, et absolutum de actionibus creaturarum liberis, ut supra diximus, docet; ideo

ideo voluntatem Dei dici antecedentem, aut consequentem, quia nostro intelligendi modo vel antecedit, vel consequitur praevisum creatae voluntatis consensum. Quam doctrinam Thomistae, et Augustiniani totis viribus oppugnant.

VII. In posteriori vero controversia *Estius in I. Dist. XLVI, §. 3.* Sylvius *in I. Part. Q. XIX. art. 6.* Bannez, alique Thomistae putant, voluntatem antecedentem esse in Deo *metaphoricam*, seu signi. Alii omnes docent, eam esse proprie voluntatem beneplaciti.

# PROPOSITIO I.

*Voluntas Dei non eo sensu dicitur antecedens, aut consequens, quia antecedit; aut consequitur praevisum voluntatis humanae consensum, sed ideo potius, quia nostro intelligendi modo antecedit, vel sequitur considerationem singularium circumstantiarum, in quibus versatur creatura rationalis.*

*Prob. 1a. pars.* In statu enim naturae lapsae, ut supra docuimus *Cap. XIII. §. 3.* et uberius demonstrabimus in *Tract. de Gratia*, actus humani ad salutem aeternam pertinentes non antecedunt, sed sequuntur voluntatem Dei, suntque ejus voluntatis effectus. Ergo voluntas consequens non est illa, quae consequitur praevisum voluntatis humanae consensum cum ipse consensus voluntate Dei consequente sit posterior.

*Prob. 2a. pars. ex S. Thoma I P. Q. XIX. art. 6.* ubi, posita divisione voluntatis antecedentis, et consequentis, haec habet: *Ad cujus intellectum considerandum est, quod unumquodque secundum quod bonum est, sic est volitum a Deo: aliquid autem potest esse in prima sui consideratione, secundum quod absolute consideratur, bonum, vel malum, quod tamen, prout cum aliquo adjuncto consideratur, quae est consequens consideratio ejus, e contrario se habet. Sicut hominem vivere, est bonum, et hominem occidi, est malum, secundum absolutam considerationem, sed si addatur circa aliquem hominem, quod*

Mm

sit

sit homicida, vel vivens in periculum multitudinis; sic bonum est, eum occidi, et malum est, eum vivere; unde potest dici, quod iudex justus antecederet vult hominem vivere; sed consequenter vult homicidam suspendi. Similiter Deus antecederet vult, omnem hominem salvari, sed consequenter vult, quosdam damnari secundum exigentiam suae justitiae.

## PROPOSITIO II.

*Voluntas antecedens, ex gr. salvas faciendo omnes rationales creaturas, est in Deo vera, sincera, et beneplaciti.*

*Prob. I.* Cum voluntas Dei vera, et propria infinita sit, complectitur quidquid est bonum, et optabile, ut supra diximus. Atqui omnes rationales creaturas, in finem supernaturalem a Deo ipso creatas, et ordinatas, salvas fieri bonum est, si creaturae considerentur in se ipsae et sine peculiaribus peccatorum circumstantiis. Ergo id Deus vere, et proprie vult.

Licet autem Deus non possit considerare objecta sine circumstantiis; quia capax non est huiusmodi praecisionum, et abstractionum, quae fingit humana mens, non valens uno obtutu omnes simul objecti proprietates, et circumstantias intueri; tamen certum est, voluntatem divinam veram, et propriam, quamvis simplicissimam, esse virtute multiplicem, pro varietate scilicet objectorum. Cum ergo in creatura rationali duo sint, et quod natura est a Deo condita ad finem supernaturalem: et quod peccatrix est; quidni voluntas Dei vera, et sincera erga creaturam hanc sit virtute multiplex, ita ut naturam velit salvam fieri, et naturam peccato infectam damnari, quorum primum est voluntas antecedens, posterius consequens?

*Prob. II.* auctoritate S. Thomae *Lect. I. in Cap. II. 4. I. ad Timoth.* ubi antecedentem Dei voluntatem comparat cum voluntate mereatoris, qui omnes merces servare cupit voluntate antecedente, quas tamen consequente voluntate in mare projicit metu naufragii: constat autem, illam mercatoris volun-

tatem veram esse, atque sinceram. Et *Quaest. XXIII. de Verit. art. 3.* ait, voluntatem beneplaciti dividit per antecedentem, et consequentem. Et in *IV. Sent. dist. 47.* Possumus, inquit, loqui de voluntate beneplaciti vel signi, et de voluntate beneplaciti vel antecedente, vel consequente. Ergo voluntas antecedens beneplaciti est. Et S. Bonaventura in *I. Dist. XLVI. quaest. 1.* Deus voluntate beneplaciti vult omnes homines salvos fieri; voluntate antecedente vult omnium salutem. Idem docet Scotus in *I. Dist. XLVI. q. unic.* Et ante hos idipsum SS. PP. tradiderant. Prosper in *Resp. ad 2m. Object. Vincent.* Hieronymus in *I. ad Tim.* Chrysostomus *Homil. in cap. 2. I. ad Tim.* Augustinus *Lib. de Sp. et lit. Cap. 33. et 34.* Damascenus *Lib. II. de Fid. Orth. cap. 29.* Adde etiam Patres ex hac voluntate Dei servandi omnes erigere fideles in spem, et fiduciam suae salutis, quod nullius esset roboris, si voluntas illa Dei vera, et sincera non esset. Ergo etc.

*Prob. III.* Verba Apostoli *I. Tim. cap. II. 4.* Deus vult omnes homines salvos fieri: si ad litteram intelligantur, de vera, et sincera voluntate accipienda sunt, ut patet. Atqui verba Scripturae revera ad litteram sunt accipienda, quando sic intellecta nihil continent absurdum, aut bonis moribus, aut aliis Scripturae textibus contrarium ex generali regula Augustini *Lib. III. de Doct. Christ. cap. 15., 16.* Ergo.

### Objectiones solvuntur.

*Objic. I.* Augustinus saepe docet, verba illa Apostoli quae supra posita sunt: Deus vult omnes homines salvos fieri: intelligenda esse vel in sensu metaphorico, quia scilicet facit nos id velle, sicut *Rom. VIII.* dicitur Spiritus Sanctus postulare pro nobis, quia postulare facit, *Lib. de corr. et gr. cap. 15.* vel per distributionem accommodam, quia scilicet omnes, qui salvi fiunt nonnisi ejus voluntate salvi fiunt, sicut dicitur, Magistrum docere omnes pueros civitatis, quia nullus docetur nisi ab ipso: *Enchirid. cap. 13.* vel de generibus singulorum,

non de singulis generum, sicut dicitur de Pharisaeis: decimatis omne olus; De corrept., et grat. cap. 14. Ergo ex Augustino voluntas Dei salvos faciendi omnes, et singulos homines, vera, ac propria non est: idem dicas de omni voluntate antecedente.

*¶. Dist. cons. quoddam partem.* Si loquamur de voluntate absoluta, et consequente, de qua loquebatur Augustinus, contra Pelagianos, et Semipelagianos disputans, conc. si de voluntate antecedente, neg. ac proinde altera consequentiae pars, qua inferbatur: idem dicas de omni voluntate antecedente; absolute neganda est. Illi ergo, contra quos disputabat S. Doctor, negabant gratuitam electorum praedestinationem, docentes, Deum aeque omnes velle salvos, si ipsi per liberum arbitrium legem servant, aut saltem habeant fidei initium; ideoque laudatis Apostoli verbis abutebantur. Augustinus ergo, qui praedestinationem sanctorum ex aliis Scripturae locis demonstraverat, respondebat, ex laudato Apostoli loco non erui contrarium, quia si de voluntate absoluta, et consequenti intelligatur, ut adversarii intelligebant, in sensu figurato intelligendus est, alioquin omnes revera salvi fierent. Ceterum, quando Augustinus non respondet objectionibus haereticorum, sed sententiam proponit suam, non abquit, verba Apostoli intelligi posse de voluntate Dei vera, et sincera salvos faciendi omnes. *Vult autem Deus*, inquit *Lib. de Sp. et lit. cap. 33. omnes homines salvos fieri, et in agnitionem veritatis venire, non sic tamen, ut eis adimat liberum arbitrium, quo vel bene, vel male utentes, justissime iudicentur. Quod cum sit, infideles quidem contra voluntatem Dei faciunt, eum Evangelia non credunt; nec ideo tamen eam vincunt, verum seipsos fraudant magno, et summo bono, malisque poenalibus implicant, experturi in suppliciis potestatem ejus, cujus in bonis misericordiam contemserunt.*

*Objic. II. S. Thomas in Summa retractavit quod junior scripserat de voluntate antecedenti. Ait enim I. P. Q. XIX. art. 6. ad 1. voluntatem antecedentem esse voluntatem secundum quid, esse meram velleitatem: magis, inquit, potest dici velleitas, quam simplex voluntas. Ergo.* *¶. Neg.*

*neg. ant. Ad confirm. n. dist. ant. Vocat voluntatem secundum quid, et velleitatem, si comparatur cum voluntate consequenti, quae fertur in obiectum cum omnibus suis circumstantiis, semperque est efficax, conc. si spectetur in seipsa, neg.*

*Objic. III. Voluntas, quae fertur in obiectum sine circumstantiis, otiosa, et imperfecta est. Ergo non est in Deo.*

*Dist. ant. Otiosa est in Deo, neg. In hominibus, suddist. aliquando, conc. semper neg. Itaque in hominibus quidem haec voluntas aliquando otiosa est, ut in peccatore, qui salvus esse vellet, nihil boni agendo: sed non semper, ut videre est in mercatore, qui quantum potest conatur, ne merces in mare projiciat; semper tamen aliquid imperfectionis, involuntarii, et infirmitatis adjunctum habet, sicut ipse mercator invitus merces projicit quia servare non potest. At in Deo voluntas antecedens otiosa non est, quia ex illa Deus vel praebet, vel saltem praeparat hominibus etiam reprobis auxilia, quibus salvi esse possent, nec arguit aliquid involuntarii, aut imbecillitatis, quia ita vult, omnes salvos fieri, ut sciat etiam, et velit, et possit eos, qui misericordiam noluerunt, justitia punire, ut observat Augustinus loc. cit. de Sp. et lit.*

### PROPOSITIO III.

*Si per voluntatem conditionalem intelligatur Dei decretum, absolutum quidem in ipso Deo, sed adjunctam habens conditionem, libere a creatura implendam, quod Scholae dicunt absolutam ex parte subjecti, et conditionatam ex parte objecti, non est absurda divisio voluntatis divinae in absolutam, et conditionalem.*

*Prob. I. contra Vasquesium, Annatum, aliosque ex Scriptura, quae saepe commemorat hujusmodi conditionalia decreta. Ita Samuel Sauli inobedienti denuntiat: Si non fecisses, jam nunc praeparasses regnum tuum super Israel in sempiternum; nunc autem nequaquam regnum tuum ultra consurget I. Reg. XIII.*

13. Et *Lib. IV. Reg. XIII.* 19. Eliseus sic alloquitur Joas Regem Israel; qui jussus a Propheta terram baculo percutere, ter percusserat: *si percussisses quinquies, aut sexies, aut septies; percussisses Syriam usque ad consumptionem.* Et Jeremias *Cap. XXXVIII.*

17. Sedeciae Regi ait: *Si profectus fueris ad principes regis Babylonis, eiet anima tua, et civitas haec non succendetur igni.* Durissimum autem est quod reponunt adversarij, verba ista Samuelis, Elisei, et Jeremiae non esse ipsis a Deo revelata, sed addita ab ipsis Prophetis ex humano more, et conjectura loquentibus.

Ergo. *Prob. II. ex auctoritate S. Thomae in I. Dist. XLVI. Q. 1. articulo 2. Voluntas antecedens potest dici conditionata, nec tamen est imperfectio ex parte voluntatis divinae.*

*Prob. III. ratione.* Debet supremum rerum Dominum creaturis suis imponere modum, et conditiones quibus sua vult beneficia largiri. Ergo.

*Obje.* Voluntas conditionalis est voluntas ab eventu suspensa, et a conditione pendens. Atqui repugnat Deo hujusmodi voluntas. Ergo.

*Dist. maj.* Si sit voluntas conditionalis in subiecto, seu, ut ajunt, *subjective*, et conditio ab alio sit imposita, *conc.* Si sit tantum *objective* conditio-

nalis, et conditio ab ipso volente sit imposita, *neg.* Fatemur quidem, voluntatem *subjective* conditionalem non esse voluntatem *actu*, sed *in potentia*, sus-

pensam scilicet ab eventu, ut si quis dicat: *volo Romam proficisci*, sed si tunc amicus itineris socium cupiet, ad proficiscendum me inducet. Item volun-

tas, quae adjunctam conditionem habet ab alio impositam, ab ipsa conditione pendet. At Deus *actu*

voluit, Saulis Regnum esse in sua familia perpetuum, si non esset inobediens, quae conditio ab ipso Deo,

ut duorum suorum supremo Domino fuit apposita, ac proinde ejus voluntas fuit tantum *objective* condi-

tionalis, nec ullo modo a conditione pendens.

## Corollarium.

Ergo voluntas Dei antecedens salvos faciendi omnes homines, si in bono perseverent, dici merito potest *conditionalis*. Et quamvis homines nequaquam in bono perseveraturi sint, nisi Deus ipse det illis speciale perseverantiae donum, ut suo loco dicemus; non sequitur tamen, nugatoriam esse Dei voluntatem quoad reprobos, quasi velit eos salvos facere, posita conditione, quae a solo Deo pendet, quamque Deus ipse ponere non vult. Deus enim non denegat, vel saltem praeparat ipsis auxilia, quibus perseverare possunt, quae auxilia si ipsi actu non accipiunt, ut parvuli in utero materno morientes, id oritur ex aliis causis, quas Deus ut generalis rerum moderator impedire non debet, si vero accipiunt, et non utuntur, eorum culpa est. Vide ista fusius apud Gonet. Tom. I. Disp. V.

## §. III.

*De voluntatis divinae proprietatibus.*

*Adv.* Cum multae sint voluntatis divinae proprietates, nos hic de quatuor pertractabimus; 1.º utrum sit causa rerum omnium; 2.º utrum semper impleatur; 3.º utrum sit libera; 4.º utrum in ea locum habeant justitia, misericordia, tristitia, amor, odium, ira.

## PROPOSITIO I.

*Voluntas Dei est causa rerum omnium.*

*Est dogma fidei.*

*Prob.* Sap. XI. 26. Quomodo posset aliquid permanere, nisi tu voluisses? Psalm. CXXXIV. Omnia quaecumque voluit, fecit. 1.º Ephes. I. 11. Operatur omnia secundum consilium voluntatis suae. Etiam mala naturae, et poenae a Dei voluntate proficiuntur Amos

III.



III. 6. Si est malum in civitate, quod Dominus non fecerit? Isaiæ XLV. 7. Ego Dominus faciens pacem, et creans malum. Eccli XI. 14. Bona, et mala, vita, et mors, paupertas, et honestas à Deo sunt. Hinc Augustinus Lib. XIII. de Trin. cap. 4. omnes tum creatoras, tum creaturarum motus, et actiones a voluntate Dei, tamquam a prima causa pendere docet; excepto tamen formali peccato, quod nihil est, nisi privatio boni, ut supra docuimus Cap. XIII. §. 1. prop. 2. corol.

## PROPOSITIO II.

*Voluntas Dei consequens semper impletur: non item voluntas antecedens, et voluntas signi. Est dogma fidei quoad primam partem.*

Prob. 1a. pars. I. Isaiæ XLVI. 1. Consilium meum stabit, et omnis voluntas mea fiet. Dan. IV. 32. Juxta voluntatem suam facit, tam in virtutibus caeli, quam in habitatoribus terrae, et non est qui possit dicere ei: quare fecisti? Esther XIII. 9. Non est qui possit tuae resistere voluntati. Psal. CXXXIV. Omnia quaecumque voluit fecit in caelo, et in terra. Ergo.

Prob. II. ex PP. Augustinus Enchirid. Cap. 96. Neque veraciter, inquit, ob aliud vocatur omnipotens, nisi quia quidquid vult potest, nec voluntate cujuscumque creaturae voluntatis omnipotentis impeditur effectus. Idem docent unanimi consensu Patres alii.

Prob. III. ratione. Si voluntas Dei consequens non impleretur, id accideret, vel quia ipse Deus sententiam mutavit, vel quia non potuit exequi quod voluit, vel quia creaturae ejus effectum impederunt. Atqui omnia haec absurda sunt, ut patet. Nam de ejus immutabilitate, et omnipotentia jam diximus supra Cap. VI. et XII. Creaturam vero impedire posse voluntatem omnipotentis, indignum dictu est. Quod est indignius, ideo non fecit, quoniam ne fieret quod volebat omnipotens, voluntas hominis impedivit, inquit, Augustinus Enchir. Cap. 96.

Prob. 2a. pars. Matth. XXIII. 37. Quoties volui congre-

gregare filios tuos, quemadmodum gallina congregat pullos suos sub alas, et noluisti? I. Tom. II. 4. Deus vult omnes homines salvos fieri, et ad agnitionem veritatis venire; constat tamen non omnibus id contingere. Ergo.

### PROPOSITIO III.

*Voluntas Dei libera est, non quidem ad amandum ipsum Deum, sed ad creaturas. Est dogma fidei.*

*Prob. 1a. pars.* Si voluntas Dei libera esset ad ipsum amandum, posset illum non amare, hoc est deficere a summo bono, quod est absurdum. Ergo.

*Prob. 2. pars. 1. ex Script.* Ephes I. 11. *Operatur omnia secundum consilium voluntatis suae*, ac proinde non ex necessitate. I. Cor. XII. 11. *Dividit singulis prout vult*, quod explicans Ambrosius *Lib. de Fide Cap. 3.* ait: idest libero voluntatis arbitrio, non necessitatis obsequio.

*Prob. II. ex unanimi Patrum consensu*, qui omnes uno ore docent, Deum potuisse mundum non condere, quem condidit, et potuisse facere alia, quae non fecit; item potuisse non incarnari etc. Nullam necessitatem patitur Deus, neque necessitate facit, quae facit, sed summa, et ineffabili voluntate, ac potestate, inquit Auctor Libri de Fide contra Manichaeos. *Inter Opp. S. August. ad calc. Tom. VIII. (a)*

*Prob. III. ratione.* Finis, et ratio, sive motivum voluntatis Dei, ut supra ostendimus §. I. *prop. 2.* est ipsa bonitas sua, quam, necessario amat, creaturae vero non sunt, nisi instrumenta, sive media ad hunc finem. Atqui creaturae non sunt ad finem instrumenta necessaria, et motivum divinae voluntatis, alioquin Deus eas condidisset ab aeterno, nec esset sine ipsis in seipso beatus. Ergo eas non vult necessario.

Absur-

---

(a) Addi potest Basilii *Hom. I. in Hexam.* Ambrosii *Lib. I. Hexam. Cap. 5.* Hieronymi *in Epist. ad Philem.* Augustini *Lib. De fide cont. Manich. Cap. 3.* Damasceni *Lib. II. De fid. Cap. 3.* Bernardi *Lib. de grat. et lib. arb.*

Absurdum est enim amare necessario, quod cum fine non est necessario connexum; et e contrario extrema perfectio est, quae Deo negari non potest, amare res pro earum merito, hoc est non necessario, quae cum fine non sunt necessario connexae, et inter eas eligere. Omnis enim natura, cui inest ratio, inest etiam volendi, notendique libertas, inquit Honorius Augustodunensis *Lib. De Praedest. et Lib. arb.*

*Solvuntur Objectiones.*

*Objic. I. cont. 1m. part. Augustinus* saepe docet, Deum non necessario, sed libere amare seipsum suamque justitiam. Sic *Lib. I. Op. Imperf. cont. Julian.* dicenti Juliano; *Liberum non est, nisi quod duo potest velle, bonum, et malum,* reponit Augustinus: *Liber ergo Deus non est, qui malum velle non potest, de quo etiam ipse dixisti; Deus nisi justus esse non potest. Si ocine Deum laudas, ut ei plimas libertatem?* Et Bernardus *Lib. de Grat. et Lib. arb. cap. 4* *Deus ipse permanet libere bonus, propria videlicet voluntate, non aliqua extrinseca necessitate.* Concinit, S. Thomas *De potentia Q. X. art. 2. ad 5.* docens, Spiritum S. libere procedere; procedit autem Spiritus S. ex amore divinae bonitatis. Ergo.

*¶ Dist. ant.* Et Augustinus ibi necessitatis nomen adhibet pro coactione, et libertatem pro libertate naturae, quo sensu etiam intelligendi sunt Bernardus, et Thomas, *conc.* Adhibet necessitatis nomen pro intima, ac necessaria adhaesione voluntatis ad objectum sine potentia eligendi contrarium, et libertatem pro libertate arbitrii, *arg.* Augustinus, ergo, sicut et Bernardus necessitatis nomen aliquando usurpant, latius pro coactione, quae ab exteriori causa inferitur. Ita *Lib. de Nat. et Grat. cap. 46.* ait, Deum non necessitate, sed voluntate amare justitiam, ubi manifeste voluntatem coactioni opponit. Praeterea libertas apud Augustinum, aliosque Patres duplex est, alia naturae, alia arbitrii. Prior est facultas attingendi finem siue impedimento, sicut dicimus, aquam libere fluere, cum nihil obstat, ne in proclive feratur. Altera est fa-

vultus, quae, positis omnibus ad agendum requisitis, potest quis agere, vel non agere.

*Objic. II. cont. 2m part.* Actus divinae voluntatis est necessarius; est idem cum Dei essentia. Ergo liber non est.

*Dist. ant.* Est necessarius quoad entitatem, conc. quoad externam relationem ad creaturas, neg. Quomodo enim Deus actum hunc necessarium, qui est sua voluntas, et sua essentia, non retulit ad creaturas possibles, poterat non referre ad eas, quas creavit.

*Inst. 1a.* Non potest idem actus esse simul necessarius, ac liber. Atqui ex concessis actus divinae voluntatis necessarius est. Ergo.

*Dist. maj.* Sub eodem respectu, conc. Sub diverso, neg. Responsio patet, exemplo avari, qui beatitudinem suam in divitiis ponit. In eo enim unus, et idem actus, quia divitias amat, necessarius est, quatenus amat beatitudinem; liber est, quatenus in divitiis beatitudinem constituit.

*Inst. 2a.* Ad rationem libertatis requiritur indifferentia. Atqui actus divinae voluntatis, cum sit ex concessis secundum entitatem necessarius, non est indifferens.

*Confirmatur.* Qui jam aliquod objectum elegit, non est amplius erga illud indifferens. Deus autem ab aeterno, quae vult, voluit, nec ullam fuit momentum, quocumque, quae vult, nondum voluerit. Hinc Damascenus *Lib. II. de Fid. Orth. cap. 22.* docet, in eo non esse electionem. Ergo.

*Ad Ludovicum Thomassinum Tract. X de Incarn. ali-que Theologi Lovanienses docent, indifferentiam non pertinere ad libertatis essentiam, licet fateantur, ad meritum, et demeritum in statu naturae lapsae indifferentiam requiri, ut effugiant censuram ab Innocentio X. latam contra tertiam Jansenii propositionem: Ad merendum, et demerendum in statu naturae lapsae non requiritur libertas a necessitate. Verum rejecta ea doctrina, de qua alibi commodius;*

*Dist. maj: Indifferentia activa, conc., Indifferentia su-*

su-

*suspensa* ( ut ita dicam ) (a), *neg.* Suspendere actum ante electionem, ut inquirantur rationes eligendi, non est perfectio, sed defectus libertatis; demonstrat enim, mentem non videre uno jctu rationes omnes, quibus res aut eligi mereatur, aut rejici. Hic autem defectus a mente divina abest, ac proinde ab aeterno vidit uno actu, elegitque, quae voluit.

Pari ratione *ad confirmationem* respondeo, cum, qui jam voluntate in aliquo fixus est, non habere amplius indifferentiam *suspensam*, sed habere *activam*; hoc est ita esse in voluntate sua fixum, ut poterit non eligere, quod elegit. Et hoc sensu Damascenus ait, in Deo non esse electionem, hoc est, non esse eam, quae in nobis est, judicii, et electionis suspensionem.

*Inst. 2º.* Qui post electionem ab ipso factam pergit habere *activam* indifferentiam, potest mutare sententiam, atque ab actione cessare. Atqui Deus ita est ab aeterno in voluntate sua fixus, ut mutare sententiam non possit. Ergo neque *activam* habet indifferentiam.

*n. Dist. maj.* Potest mutare sententiam propter imbecillitatem mentis, quae novas in objecto detegit rationes, quas ante non viderat, vel in seipsa experitur mutationem aliquam, ex qua objectum non est amplius ipsi conveniens, ut acute docet S. Thomas I. P. XIX. art. 7. *conc.* Potest mutare sententiam, quia mutabilitas haec pertinet ad rationem, seu essentiam libertatis, et indifferentiae, *neg.* Possesse igitur mutare sententiam non perfectio, sed defectus libertatis est. Unde, quanto mens perfectior est, tanto minus potest a proposito dimoveri. Quod quidem in hominibus plerumque in vitio est, oriaturque ex superbia, qua se putant, omnia recte vidisse, ac perpendsisse. Sed exinde nonnulli Theologi concludunt, Angelos in eo, quod semel elegerunt, immutabiles esse, quod nos suo loco expendemus. Ceterum mens divina, cum perfectissima sit,

---

(a) Scholast. *Suspensiva*.

mutationis non est capax, nec id destruit, sed perficit ejus libertatem, et indifferentiam, quia si liber, et indifferens fuit ab aeterno, talis in aeternum manet respectu creaturarum.

Ergo Dei libertas est modus, quo extrinsecus tendit in objectum; qui quidem modus est Deo intimus, licet ipsa relatio sit exterior. Hinc non sequitur ex nostra sententia, Deum esse liberum per denominationem extrinsecam, ut nonnullis Scholasticis visum est post Aureolum.

#### PROPOSITIO IV.

*In Dei voluntate non est, stricte intellecta, justitia commutativa, sed tantum distributiva, et vindictiva, et vera; et propria misericordia.*

*Prob. 1a. pars.* Justitia commutativa, stricte intellecta, in aequalitate dati, et accepti posita est, quae quidem aequalitas, postulat, ut quod datur, sit ex propriis bonis, nec alio titulo debitum. Atqui nihil habent de suo creaturae, quod aut priores Deo dent, aut post accepta beneficia ad aequalitatem rependant, quodque non sit ipsius Dei donum, illique alio titulo debitum. Ait enim Apostolus Rom. XI. 35. *Quis prior dedit illi, et retribuetur ei?* et S. Thomas I. P. Q. XXI. art. 1. *Cum omnia nostra ex Deo sint, nec quisquam quidpiam dederit, pro quo sibi a Deo retribuat; jure ergo in ipso justitia commutativa non est (a).* Est tamen latiori sensu haec justitia in Deo, quia tanta ejus est bonitas, ut voluerit esse merita nostra, quae sunt dona sua, ut observat Augustinus.

Quoties ergo docuere Patres; aut etiam sacrae litterae, Deum ex justitia aliquod facere debuisse, latiori sensu justitiae nomen usurparunt ad significandum, quod decet sapientiam, et bonitatem suam; eo fide-

---

(a) Adverte, non hic posita asse. S. Thomae verba, sed sensum.

fidelitatem in promissis. Quo sensu *Heb. VI. 10.* dicitur: *non injustus est Deus, ut obliviscatur operis vestri boni.* Et Augustinus *Lib. IV. cont. Jul. cap. 3.* *Deus ipse, inquit, quod absit, erit injustus, si ad ejus regnum verus non admittatur justus.*

*Prob. 2a. pars.* *Justitia distributiva* est constans voluntas retribuendi cuique pro merito. Atqui talis est Dei voluntas. Inquit enim Apostolus *II. Tim. IV. 7.* *Bonum certamen certavi, cursum consummavi, fidem servavi, in reliquo reposita est mihi corona justitiae, quam reddet mihi Dominus in illa die justus iudex.* Et *Rom. II. 6.* *Reddet unicuique secundum opera ejus.* Ergo etc.

*Prob. 3a. pars.* *Justitia vindicativa* est constans suppremi provisoris voluntas criminibus poenam infligendi. Atqui voluntas divina est hujusmodi. Quantum glorificavit se, et in deliciis fuit; tantum date illi tormentum *Apoc. XVIII. 7.* *Revelatur ira Dei de caelo super omnem impietatem* *Rom. I. 18.* *Mihi vindictam, et ego retribuam* *Rom. XII. 19.* *Ibunt in supplicium aeternum* *Matth. XXV. 46.* Denique plenae sunt singulae Scripturarum paginae tum testimoniis, tum exemplis divinae justitiae vindicantis in impios; ut supervacaneum sit hic ulterius immorari.

*Prob. 4a. pars.* *Misericordia* est voluntas alienam miseriam sublevandi. Atqui in Deo est hujusmodi voluntas, imo Deus in Scripturis de hac voluntate, tamquam de praeclarissimo inter omnia attributa sua millies gloriatur. *Dominator Domine Deus misericors, et clemens, patiens, et multae miserationis. . . . qui custodis misericordiam in millia* *Exod. XXXIV. 6.* Et *Psal. CXLIV.* *Miserator, et misericors Dominus, longanimis, et multum misericors. Miserationes ejus super omnia opera ejus.* *II. Cor. I. 3.* dicitur *Pater misericordiarum.* *Ephes. II. 4.* *dives in misericordia etc.* Ergo. Non est tamen misericordia Dei conjuncta cum imperfectione, quae in nobis est, nempe cum animi tristitia, quae in Deum cadere non potest.

*Dices cont. 2m. part.* Cujuscunque justitiae ratio in eo sita est, ut reddatur debitum. Atqui in Deo nullum potest esse debitum. Ergo nec justitia distributiva.

¶ *Dist.*

¶. *Dist. min.* Nullum potest esse debitum, ortum ex jure creaturae, cui Deus obligetur, *conc.* Nullum potest esse debitum, ortum ex naturali rectitudine, et lege aeternae sapientiae (quae est ipse Deus) ex qua supremus Moderator debet praemia pro meritorum ratione tribuere, *neg.* *Debitum est Deo* inquit S. Thomas I. P. Q. XXI. art. I. ad 3. ut impleatur in rebus id, quod ejus sapientia, et voluntas habet, et quod suam bonitatem manifestet, et secundum hoc justitiam Dei respicit decentiam ejus, secundum quam reddit sibi, quod sibi debetur.

*Urgebis.* Ergo justitia Dei est ad seipsum, non ad alterum. Atqui hoc destruit strictae justitiae rationem. Ergo.

¶. *Neg. seq. maj.* Licet enim finis, et motivum justitiae Dei sit ipsa Dei bonitas, quae est objectum formale voluntatis ejus, revera tamen ad alterum diffunditur, nempe ad creaturas.

## PROPOSITIO V.

*In Dei voluntate est vere, et proprie amor boni, et odium mali, sive culpae; desiderium vero; tristitia, et ira nonnisi per metaphoram.*

*Prob. 1a. pars.* Esse in Deo amorem tum erga creaturas, tum erga seipsum, est ex Scripturis, et Patribus manifestum. Sap. XI. 25. *Diligis omnia, quae sunt, et nihil odisti eorum, quae fecisti.* Matth. III. 17. *Hic est Filius meus dilectus.* Hunc autem amorem esse verum, non *metaphoricum*, sic probat S. Thomas I. P. Q. XX. art. 1; et I. cont. Gent. cap. 91. Quicumque habet voluntatem, habet et amorem proprie dictum; amor enim est primus voluntatis motus, a quo ceteri omnes affectus oriuntur. Atqui in Deo est voluntas, ut supra ostendimus. Ergo et amor. Praeterea amare est bene alteri velle. Atqui Deus bene vult tum creaturis, quibus tribuit existentiam et cetera bona, tum sibi ipsi. Ergo etc. Ex quo sequitur 1<sup>o</sup>. amorem Dei esse efficientem, actuosum, et ut ajunt, *effectivum*, quia cum voluntas ejus con-



sequens sit efficax, imo etiam antecedens, saltem quoad instrumenta, sive *media*, quae praeparat ad salutem; ii, quibus absolute bene vult, bene etiam facit; 2°. creaturas possibles non esse objectum divini amoris, quia illis existentiam non tribuit, nec habet erga illas, nisi (ex sententia nonnullorum) meram quandam complacentiam.

*Prob. 2a. pars.* Esse in Deo odium Scriptura testatur. *Sap. XIV. 9. Odio sunt Deo impius, et impietas ejus.* Esse autem hoc odium verum, probatur contra Thomistas. Odium est animi aversio a malo illo, quod bono vehementer amato adversatur. Atqui in Deo necessaria est hujusmodi aversio a malo culpae, quod bono summe dilecto, nempe sibi ipsi opponitur. Ergo etc. Diximus a *malo culpae*, quia non potest in Deum cadere odium inimicitiae, erga res, vel personas a se creatas, quae, quatenus sunt, bonae sunt, ideoque a Deo diliguntur juxta illud *Sap. XI. 25. Diligis omnia, quae sunt, et nihil odisti eorum, quae fecisti*; nec ullo pacto possent existere, nisi eas Deus diligendo conservaret, etiam tum cum poena rebelles plectit non odio personarum, sed amore justitiae.

*Prob. 3a. pars.* Desiderium etiam Deo tribuit Scriptura. *Osee X. 10. Juxta desiderium meum corripiam eos*: sed hoc per metaphoram accipiendum, evincitur contra nonnullos Theologos, ex eo quod desiderium est boni absentis. Atqui nullum bonum Deo abest, qui omnia in se habet vel *formaliter*, vel *eminenter*. Ergo.

*Prob. 4a. pars.* Tristitia est dolor animi ob bonum amissum, vel ob malum praesens. Atqui Deus dolere non potest, cum sit in seipso infinite beatus, nec ullum possit aut amittere bonum, aut subire malum. Ergo etc. Hinc per metaphoram dicitur contristari *Ephes IV. 30. Nolite contristare Spiritum Sanctum*: et poenitere *Genes. VI. 6. Poenituit eum, quod hominem fecisset*.

*Prob. 5a. pars.* Ira est appetitus vindictae propter tristitiam, ex injuria illata conceptam. Atqui in Deum cadere non potest desiderium, nec tristitia,  
ut

ut paulo ante ostendimus. Ergo nec ira. Quoties ergo in Scripturis dicitur Deus irasci, tristani, desiderare, per metaphoram id est intelligendum, quia scilicet id exterius operatur, quod homines, qui desiderant, tristantur, irascuntur, facere consueverunt. Ita S. Thomas *Lib. I. cont. Gent. cap. 89. et I. P. Q. XX. art. 1. ad 2. Deus*, inquit Chrysologus *Serm. XLV. nec subjacet passioni; nec ira accenditur, nec furore turbatur, sed ira Dei est delinquentium poena, furor Dei est supplicium peccatorum.*

*Dices.* Odium proptie dictum necessario personam respicit; cui optatur malum sub ratione mali, quod enim personam non respicit, potius abominatio, quam odium dicitur. Atqui Deus nullum personae creatae potest velle malum sub ratione mali. Non quidem personae, quia persona, ut est res aliqua subsistens, bona est; non etiam potest ei velle malum sub ratione mali, quia unica ratio, et motuum divinae voluntatis est sua bonitas; ac proinde nihil cuiquam sub ratione mali velle potest. Ergo.

*N.* Nos de nomine non movere quaestionem. Si ergo odium definiatur esse id, quod respicit personam aliquam, cui malum sub ratione mali optetur, fatemur, illud in Deo non esse. Sed quia abominatio illa, qua quis aversatur id, quod bono amato opponitur, non immerito vocatur odium, ideo illud in Deo agnovimus.

## C A P. XV

### De Providentia Dei.

*Adv. I.* **P**rovidentia duplici ratione spectari potest vel in mente Provisoris, vel in exteriori gubernatione. Priori modo spectata definitur a Boetio *Lib. IV. de Consol. Prosa 6. Aeterna ratio in summo Principe constituta, qua cuncta disponit*; posteriori modo est ipsum exterius Dei regimen, et ordo rerum in finem.

*II.* Et quia rerum omnium finis vel naturalis est, vel supernaturalis, duplex quoque distinguitur a Theo-

logis providentia: naturalis scilicet, quae cuncta regit, et dirigit in finem naturalem, et supernaturalis, quae creaturas rationales ad finem dirigit supernaturalem, nempe ad Deum clare videndum, ac possidendum in patria.

III. Rursus providentia supernaturalis species sub se habet duas *praedestinationem*, et *reprobationem*. Praedestinatio est efficax Dei decretum perducendi electos ad gloriam. Reprobatio vero est. Dei decretum, quo statuit, impios non eligere ad gloriam, sed poenis addicere sempiternis. Hinc Theologi passim hoc in loco de Praedestinatione, et Reprobatione disserunt. Nos, quia ea doctrina satis perspecta tironibus esse non potest, nisi pertractatis quaestionibus de Gratia, quae cum praedestinatione intimo nexu juncta est, satius duximus uno, eodemque libro de gratia, et praedestinatione disputare. Quapropter hic contenti erimus, ipsam generatim Dei providentiam asserere contra Epicureos, qui omnia fortuito atomorum concursui tribuebant; Stoicos, qui fatum ineluctabile adstruebant ex siderum motu, atque influxu, et recentiores quosdam Graeculos, qui scelorum suorum vindicem Deum metuentes, quanta maxima vi poterunt, ejus providentiam saltem ab acie mentis suae removere consti sunt; vel saltem ei relinquunt generalem quandam superiorum causarum motionem, quae intima non attingat.

### PROPOSITIO

*Summa est in Deo providentia, eaq. ad minutissima quaeque extenditur, nec umquam falli potest.*

*Est fidei dogma:*

*Prob. 1a. pars. I. ex Scriptura. Sap. XII. 13. Non est alius Deus, quam tu, cui cura est de omnibus. Et cap. XIV. 3. Tua, o. Pater, providentia ab initio cuncta gubernat. Psal. CXVIII. Ordinatione tua perseverat dies, quoniam omnia serviunt tibi. Hanc providentiam ad liberos etiam hominum motus extendi, Scriptura docet Prov. XVI. 9. Cor hominis disponit*  
*viana*

viam suam, sed Domini est dirigere gressus ejus. Et Cap. XX. 24. A Domino diriguntur gressus viri. Imo ad ipsa peccata, quae Deus non facit, sed vertit, atque ordinaat in bonum. Exod. IX. 16. ait Dominus Pharaoni: Posui te, ut ostendam in te fortitudinem meam, et naretur nomen meum in gentibus; et Petrus de morte Christi, quae omnium scelerum exitus maximum, ait Act. II. 23. Hunc, definito consilio, et praescientia Dei traditum, per manus iniquorum affigentes, interemistis. Denique ad illa ipsa, quae nobis maxime fortuita videntur. Provi. XVI. 33. Sortes mittuntur in sinum, sed a Domino temperantur. Ergo etc.

Prob. II. ex PP. Quis operator, inquit Ambrosius, negligat operis sui curam? quis deserat, et destituat quod ipse condendum putavit? Si injuria est (a) regere, nonne major injuria fecisse, et non curare? cum aliquid non fecisse, nulla injustitia sit, non curare quod feceris, summa inclementia Lib. I. de Offic. cap. 13. Augustinus Lib. de utilit. credendi cap. 16. Si Dei providentia non praesidet rebus humanis, nihil est de Religione satagendum. Supervacaneum est proferre omnes. Lege praecipue aureum Salviani librum De providentia, et Theodoretum de eodem argumento (b).

Prob. III. ratione. Quicumque intellectu, et voluntate agit, utique agit propter finem, quem primo elegit, et ad quem omnia opera sua dirigit. Atqui Deus intellectu, et voluntate cuncta creavit, et conservat. Ergo ea suum ad finem dirigit. Sed haec directio providentia est. Ergo etc. Tam perspicua est haec veritas, ut ipsis innotuerit Gentilibus Philosophis, imo totius humani generis consensione fir-

N 2

(a) Hoc est, si videtur Deo indecorum minima curare.

(b) Lectu digna est Editio Salviani cum notis Baluzii, Paris: an. 1669, quae recusa fuit Breae anno 1688. cum notis Riterhusii, Veitzi, Adams, etc. Add. Tertullianus Lib. II. conc. Marc. cap. 24. Origenes Lib. VI. cont. Cels. Nazianzenus Orat. 1. cont. Jul. Nyssenus Orat. De iis qui rapiuntur immatura morte, et alii innumeri. Testimonia veterum Philosophorum vide apud Huetium in Alnetanis, et Petavium Lib. VIII.

mata sit. Unde inquit Clemens Alex. Lib. VI. Strom. Constat jam, supplicium magis, quam consolationem mereri illum omnem; qui providentiam esse non patat, et revera esse atheum.

Prob. 2a. pars. I. ex Scriptura Luc. XII. 6. Nonne quinque passeret veniunt dipondio, et unus ex illis non est in oblivione coram Deo? Sed et capilli capitis vestri, omnes numerati sunt: nolite timere etc. Et ibidem volatilia caeli; lilia; et socum agri divina providentia regi, dicitur. Vide etiam Math. VI. et Psalm. CIII. ubi David Deum exhibet, ut Patrem familias, a quo vel minima animantia petunt, et expectant escam in tempore opportuno: Dante te illis, colligent, aperiente te manum tuam, omnia implebuntur bonitate etc.

Prob. II. ratione, quam paulo ante explicavimus. Si enim vel minutissimas quasque universi partes Deus creavit, et servat, utique certum ad finem dirigit, quae directio providentia est.

Prob. 3a. pars. Directio rerum in finem est ex voluntate Dei consequente; qui enim aliquid in finem dirigit, illud utique cum omnibus circumstantiis respicit. Sed voluntas Dei consequens semper impleatur, ut supra ostendimus. Ergo et providentia. Hinc merito Ecclesia: Deus, inquit, *cujus providentia in sui dispositione non fallitur*. Ergo.

*Solvuntur Objectiones (a).*

Obje. I. Quidquid in natura videmus accidere, oritur utique ex certis, aeternis, et immutabilibus naturae legibus, ut Physici demonstrant. Vicissitudines anni tempestatum, dierum, et noctium inaequalitas, pluviae, venti, tonitrua, terrae motus, plantarum, atque animalium ortus, vita, et interitus, et cetera omnia naturae miracula ex causis natura-

(a) Mira est P. Baelii stoliditas, qui in *Diction. Hist. Cris.* variis locis asserit, argumenta Epicureorum contra Dei providentiam non posse solus rationis lumine dissolvi.

libris tam necessario eduntur; ut portentum esset, si non evenirent. Hinc Patres docent, Deum administrare media per suprema, et infima per media. Ergo vel in Deo non est providentia, et cuncta naturae legibus permisit, vel saltem est in eo generalis quaedam providentia, quae ad minima non extenditur.

*Res. Dist. ant.* Finit haec ex naturae legibus, Deo tamquam cum causis secundis *quodammodo immediate concurrente*, et agente, *conco.* Secus, *neg.* Causae enim naturales nihil agere possent, nisi conservante, et concurrente, seu simul operante Deo, qui earum vim aliquando impedit, imo contra earum virtutem miracula edit, sicut accidit cum sol, jubente Josue, stetit *Jos. X. 13.* et umbra ejus decem hincis regressa est in horologio Achaz *IV. Reg. XX. 11.* Mare rubrum, et Jordanis iter praebuit. Filius Israel, et cetera. Hinc Deus in Scripturis saepe filiis Israel denuntiavit, se pro eorum merito vel pluvias, et frugum abundantiam, vel siccitatem, et sterilitatem daturum *Levit. XXVI.* Plena est omnis Scriptura exemplorum, quibus constat, effectus etiam causarum naturalium a Deo regi, et certum ad finem ordinari, ita ut nulla cadat pluviae gutta, nisi certo Dei consilio; ideoque Christus ait, *Joan. V. 17.* Pater meus usque modo operatur, hoc est licet die septimo requieverit ab omni opere creationis, non cessat tamen singulis momentis operari in creaturis, illas movendo ad effectus suos producendos juxta leges naturae, aliquando etiam praeter leges.

*Inst. 1.<sup>a</sup>* Indecorum est, majestatem Dei ad minima, et abjectissima quaeque deducere, sicut indecorum esset Regi, si villissima officia per seipsum, et non per ministros obire vellet. Unde Hieronymus *in Cap. I. Habacuc:* Absurdum est, inquit, ad hoc deducere majestatem, ut sciat quod per singula menta nascantur culices, quoties moriantur. Ergo.

*Res. Neg. ant. et parit.* Ut enim supra arguebat *brosius*, si non fuit divinae majestati indecorum, re minima ista, et quae nobis videntur abjectissima (taliter enim non sunt in conspectu Dei, sed

in  
Dei  
mo-  
Am-  
crea-  
miri-  
fice

sice conspirant ad complementum, et ornatum Universi; multo minus indecorum est fegere: imo valde indecorum esset creasse, et non ea dirigere ad finem suum. Exemplum autem ex Rege deductum valde dispar est a proposito, ut observat S. Thomas I. P. Q. XXII. art. 3. ad 3. homo enim cum non possit simul curare omnia, si velit minimis se immiscere, necesse est ut majora negligat, ex quarum neglectu omnia pessum ibunt. At non eadem est ratio de mente infinita. Qui enim omnia administrando implet, regit implendo, nec unisversis deest, cum disponit unum, nec uni deest, cum disponit universos, inquit Gregorius Lib. XXV. Moral. Cap. 13. Denique Hieronymus, cujus verba fatemur cum Pelavio esse duriora, et melius ab eo concipi potuisse; benigne interpretandus est; ut velit, non eandem curam esse Deo hominum, et viliorum animalium. Non simus, inquit loc. cit. tam fatui adulatores Dei, ut dum potentiam ejus ad ima detrahimus, in nos ipsos injuriosi simus, eandem rationabilium, quam irrationabilium providentiam esse dicentes. Quod si verba ejus aliquanto duriora nimis urgere velis, erit non veritas, sed ipse Hieronymus ea, quae par est, reverentia deserendus.

Inst. 2. Sunt nonnulla in universo supervacanea, atque inutilia; quid enim deesset ex. gr. de ejus perfectione, si una minus nasceretur musca; aut villius animalculum? sunt etiam multa noxia, et inordinata, quae se se invicem destruunt, ac proinde inutilia, imo contraria fini, quem in eorum creatione spectare debuisset Deus. Ergo ad ea non pertingit Dei providentia.

R. Neg. ant. Ideo enim supervacanea quaedam videntur imperitis, quia non comprehendunt totius universi structuram, et relationem, quam singulae particulae habent ad totum. Cum ista dicunt, inquit Augustinus Lib. I. de Gen. ad lit. cap. 16. non intelligunt quemadmodum omnia pulchra sunt conditori, et artificis suo, qui omnibus utitur ad gubernationem universitatis, cui summa lege dominatur. Quod si ingressi artificis cujusdam hominis officinam, non andemus

mus iudicare supervacanea multa instrumenta, quorum usum nescimus, quanto minus id audebimus in operibus supremi, et sapientissimi artificis Dei? Certe si Physici vel unius animalculi corpusculum, aut folium arboris contemplantes, obstupescunt, et mirantur sapientiam conditoris, qui nihil in illis supervacaneum, aut inutile posuit, quanto minus erit aliquid inutile in toto universo, cum omnis artifex magis de toto, quam de partibus sit sollicitus? Ut una minus nasceretur musca, aut planta, deberent e medio tolli leges naturae, ex quibus tot, et non minus nasci debent: ablatis autem naturae legibus, totius universi machina conquassata rueret, Quod quaedam se mutuo destruant, sapientissime factum est, ne nimis succrescendo toti Mundo crearent incommodum. Denique quod attinet ad noxia, iis iustissime, et sapientissime utitur Deus, vel in poenam, vel in remedium peccatorum.

*Inst. 3°. I. Cor. IX. 9. ait Apostolus: Numquid de bobus cura Deo est? Ergo.*

*¶. Dist. ant.* Non est cura praecipua, *conq.* Non est cura ulla; *neg.* Vult ergo Apostolus, ea quae iussit Deus *Deut. XXV. 4. non alligabis os bovi trituranti*, scripta esse praecipue ad instructionem nostram, ut sciamus, eum, qui in vinea Domini laborat, debere ali de fructibus. *Providentiam ceteris creaturis non negamus, curam sponsa vindicat sibi*, inquit Bernardus *Serm. LXXIII. in Cant. n. 2.*

*Inst. 4°. Si iis, quae sunt in mundo noxia, uteretur Deus in poenam peccatorum, videremus hic impios obrui miseriis, bonis e. contrario affluere iustos. Atqui contrarium saepe videmus accidere. Ipse David suam hac de re admirationem non semel exponit in Psalmis. Mei autem, inquit Psal. LXXII. pene moti sunt pedes, pene effusi sunt gressus mei, quia zelavi super iniquos, pacem peccatorum videns etc. ecce ipsi peccatores, et abundantes in saeculo obtinuerunt divitias etc. Quare via impiorum prosperatur: bene est omnibus, qui praeparantur, et inique agunt? inquit Jeremias Cap. XII. 2. Ergo sequitur, Deum istis inferioribus non providere.*

*¶. Dist.*



*Dist. maj. et min.* Aliquando, *conc.* Semper, *neg.* Etenim ne homines putarent, nullam esse Dei providentiam, æquum erat aliquando malis temporalibus hic opprimi sanctos; sed ne putarent homines, non esse alteram vitam, in qua Deus iudicaret, et puniret impios, æquum etiam erat, ut eorum poena aliquando ad aliam vitam differretur, præsertim si aut essent in eis aliqua bona opera naturalia, quæ Deus bonis temporalibus remunerari vellet, sicut ex *Augustino* remuneratus est Romæ-  
 pos, et *Ægyptias* *Exod. I. 21.* aut vellet Deus justo iudicio eos majoribus abundare bonis, quibus culpa sua deteriores effecti maiorem sibi poenam in altera vita accumularent, quasi pecora, quæ sinuntur errare per prata libere, ut pinguiora veniant ad lanimum, ut idem *Augustinus* observat in *Psalm. LXXV.* Idem de bonis temporalibus dicas quoad justos. Etenim ne homines putarent, nullam esse providentiam, decebat bonis temporalibus aliquando justos abundare: sed ne putarent, hæc sola bona habere Deum, quæ redderet piis, ipsique justi nimio affectu rerum terrenarum implicarentur, aut Deo propter ista servirent, decebat etiam, aliquando iis spoliari, præsertim si leviores haberent culpas, quæ Deus tum egestate, tum aliis malis temporalibus vellet eluere, ipsosque ita reddere in caritate puriores: *quis enim filius, quem non corripit pater?* inquit *Apostolus Heb. XII. 7.* Et sicut pater aliquando per villissimum famulum corripit filium; aut per virgam, quam mox in ignem projicit; sic Deus aliquando corripit justum per hominem impii, tamquam per virgam, quam mox confringet et in ignem conjiciet. Ideo nos non solum in poenam, sed remedium etiam peccatorum diximus, Deum uti malis temporalibus. Hac igitur ratione aliquando impii bonis affluent, justis malis affligantur, aliquando vero contra accidit. Semper tamen verum est, impios inter ipsa temporalia bona esse miseros, et justos inter ipsa mala felices; *nil enim infelicius est felicitate peccantium, quia poenalis nutritur impunitas, et mala voluntas velut hostis interior roboratur,* inquit

inquit Augustinus *Epist. CXXXVIII. ad Marcellin.* At contra diligentibus Deum omnia cooperantur in bonum, inquit Apostolus *Rom. VIII. 28. Et II. Cor. I. 5. Sicut abundant passiones Christi in nobis; ita et per Christum abundat consolatio nostra.* Verba autem illa Prophetarum dicta sunt ex persona hominum infirmorum, unde ipsi Prophetae illis infirmorum objectionibus respondent, ut patet ex contextu.

*Inst. 5<sup>o</sup>.* Videmus nonnulla casu evenire, ut si ex gr. lapis e tecto sponte excisus, transcurrentem hominem opprimat. Ergo.

*¶ Dist. ant.* Casu accidunt, quoad nos, *conc.* In conspectu Dei, qui omnia praevidit, et ordinavit, *neg.* Nihil enim omnino accidit, quod non de aula summi Imperatoris aut jubeatur, aut permittatur; inquit Augustinus *Serm. LVIII. ap. Prosper.* Unde infert, fortunae nomen a Christianis usurpari non debere.

*¶ Objic. II.* Si Dei providentia ad omnia pertingeret, non permetteret peccatum, quod omnino adversatur bonitati divinae. Atqui contrarium perpetua, et luctuosa probat experientia. Ergo.

*¶ Dist. maj.* Sicut ad simile argumentum supra respondimus. Non permetteret peccatum, si non esset provisor generalis adeo sapiens, omnipotens, et bonus; ut sciret, et posset bona facere de ipsis malis, *conco.* Secus, *neg.* Vide quae ibi diximus.

*¶ Objic. III. cont. 3. part.* Deus omnes rationabiles creaturas ad aeternam felicitatem ordinavit. Atqui non omnes eam assequuntur. Ergo providentia Dei aliquando in sui dispositione fallitur.

*¶ Dist. maj.* Ordinavit ad felicitatem omnes rationabiles creaturas, ita tamen, ut non eis admitteretur liberum arbitrium, quo vel bene, vel male utentes, justissime judicentur, *conc.* Secus, *neg.* Deus ergo ordinavit quidem rationales creaturas ad gloriam, sed eodem decreto statuit, ut si quae per liberum arbitrium eligeret contrarium, non gloria, sed supplicio afficiatur; atque ideo ejus providentia erga creaturas rationales semper finem suum assequitur, qui finis non alius utique est, nisi manifestatio suae gloriae vel per praemium iustorum, vel poenam

impiorum. Tunc autem providentia falleretur, si impii, nolentes, uti misericordia Dei, possent effugere iudicium, quod fieri non potest. *Si quis enim dicit: volo ut omnes servi mei laborent in vinea, et post laborem requiescentes epulentur, ita ut quisquis eorum hoc noluerit, in pistrino semper molat; videtur quidem quicumque contemserit contra voluntatem domini sui facere, sed tunc eam vincet, si pistrinum contemnens effugerit, quod nullo modo fieri potest sub Dei potestate.* voluntas Dei semper invicta est: verba sunt Augustini Lib. de Spirit. et lit. c. 33. *Ugu*

*et area, conchaeque, ambrosia et c. qui dicitur*  
*gratiam in sibi.* **Corollaria,** *sup. dicitur: quod*

Si nomen fati intelligatur in sensu Stoicorum pro ferrea quadam, et ineluctabili vi, orta ex siderum situ, atque influxu, patet, fatum nihil esse: *absit a fidelium cordibus, ut fatum esse aliquid dicant,* inquit Gregorius M. Homil. X. in Evang. Si vero usurpetur pro ipsa providentia; non falso diceretur, cuncta subjecta esse fato, sed abstinendum esse ab eo nomine, moxnet Augustinus Lib. V. de Civ. cap. 1. *Quia id homines quando audiunt, usitata loquendi consuetudine non intelligunt, nisi vim positionis siderum, qualis est quando quis nascitur, vel concipitur.*

II. Providentia necessitatem non imponit causis libere, quia ita earum actus ordinavit, ut quidquid eligerent, providentia finem suum assequatur.

III. Quidquid in historia rerum humanarum narratur, dici quodammodo posset historia providentiae Dei, qui omnibus usus est prout voluit, ad finem suum, cui illi, nescientes, serviebant, dum ambitioni, et superbiae suae servire arbitrabantur. Sic victoriae Assyriorum serviebant divinae providentiae ad puniendos Israelitas, ei alios Palaestinae incolas, unde Deus ipse ait, *Nabuchodonosor sibi servisse in obsidione Tyri, quamvis ille solam dominandi cupiditatem explere vellet.* Sic victoriis Romanorum usus est Deus, ut tot populos cupius imperio subderet, ex quo facilius extitit per universum orbem dilatatio Christianae religionis.

IV. Quoniam Deus per sapientiam, ac scientiam suam, quæ ut supra diximus, causa rerum est, cuncta creavit, et mirabili providentia administrat; profecto si res omnes non more pecudum inspiciamus, infinitam in ipsis relucentem Dei scientiam, et paternam providentiam mirabimur. Cui considerationi, atque contemplationi naturæ, si adsuascere incipimus, occurrentem nobis ubique Deum videbimus; quocumque oculos conjiciamus; ut dicere possimus: *Auditu auris audiui te; nunc autem oculus meus videt te Job. XLII. 5.*

V. Quoniam Dei providentia ad omnia etiam minima extenditur, si quid nobis aliquando accidat adversi, id non nisi ex voluntate Dei, Patris nostri, accidisse scientes; agamus ei gratias, et humiliemur sub potenti manu ejus, sicut S. Job dixit, Dominum abstulisse quod latrones Chaldaei rapuerant; et nomini ipsius benedixit. Si quod vero impendens malum timeamus, non tam creaturas, quam ipsum timeamus Deum. *Nolite timere eos, qui occidunt corpus Matth. X. 28. Et quis vobis noceat si boni aemulatores fueritis? I. Pet. III. 13. Fera saevit? Deum time, inquit Augustinus Enar. in Psal. XXXII. homo te odit? Deum time: Diabolus te impugnat? Deum time: tota enim creatura sub illo est, quem jubetis timere.* Atque hujus quidem corollarii doctrina, si penitus animo nobis insederit, erit hic totius hujusce Tractatus, imo et Theologiæ universæ fructus uberrimus.

*Finis Libri III.*

VAI 1530086

## INDEX CAPITUM.

<i>Dissertatio prodroma</i>	1
CAP. I. <i>Theologiae definitio, atque divisio</i>	ibid.
§. I. <i>Theologiae definitio</i>	ibid.
§. II. <i>Theologiae partitio.</i>	7
CAP. II. <i>Ostenditur, Theologiam positivam non singulis fidelibus, sed Ecclesiae necessariam esse, Scholasticam non necessariam, sed maxime utilem</i>	8
CAP. III. <i>Partitio totius oneris</i>	14
LIBER. I. seu <i>Tractatus de veritate religionis Christianae</i>	16
CAP. I. <i>Recensentur hujus religionis hostes</i>	ibid.
CAP. II. <i>Ostenditur, necessariam esse homini religionem, et cultum Dei tum internum, tum externum</i>	17
CAP. III. <i>Ostenditur, religionem naturalem humano generi non sufficere etc.</i>	21
CAP. IV. <i>Ostenditur, divinam bonitatem maxime decuisse, ut humano generi in its ignorantiae tenebris, de quibus dictum est Capite superiori, succurreret, verumque religionem revelaret</i>	27
CAP. V. <i>Si Deus homini veram religionem revelare voluisset, demonstratur, eum, sicut nihil proponere poterat humanae rationi contrarium, multa proponere potuisse dogmata, quae rationem humanam exsuperant</i>	29
CAP. VI. <i>Si Deus homini aliquid revelare voluisset, expenditur, quibus signis revelationem confirmare pro sua sapientia debuerit</i>	32
CAP. VII. <i>Demonstratur, religionem Christianam veris confirmatam esse prophetiis, et miraculis</i>	37
§. I. PROP. <i>Christiana religio veris confirmata est prophetiis</i>	40
§. II. PROP. <i>Certissimum est, Christum innumera patrusse miracula, et quod omnium est maximum, post mortem resurrexisse, et in caelos ascendisse.</i>	43
	§. II.

§. III. PROP. Discipuli Christi, qui post eum religionem Christianam praedicarunt, et propagarunt, innumera ediderunt miracula	573
§. IV. PROP. Post mortem discipulorum Christi usque ad nostram aetatem non defuerunt in Ecclesia Christi miracula, licet stabilita jam Ecclesia, non tam frequentia, quia non tam necessaria	52
§. V. PROP. Christianae religionis propagatio maximum miraculum est, praesertim si nullis miraculis facta est	53
§. VI. PROP. Ipsa Christianae Religionis diuturnitas, et stabilitas miraculum est	55
§. VII. Constantia martyrum evidenter demonstrat veritatem miraculorum Christianae religionis	62
§. VIII. PROP. Ipsa doctrinae Christianae puritas, sanctitas Auctoris, ejusque discipulorum, humanae virtutis opus non est	64
CAP. VIII. Consecraria praecedentis Capitis, ac praesertim de veritate, ac divinitate librorum Sacrae Scripturae	70
CAP. IX. Sola Ecclesia Romano-catholica veram Christi religionem profitetur	73
CAP. X. Indifferentismus in religionis negotio absurdissimus est	83
LIBER II. De locis Theologicis.	85
CAP. I. Locorum Theologicorum definitio, et divisio. Errores in hoc libro refutandi.	91
CAP. II. De Traditione	ibid.
§. I. Traditionis definitio, atque divisio	93
§. II. Existit Traditio divina, eaque agnoscenda est ut locus Theologicus, seu regula fidei, et morum, continens etiam multa ad salutem necessaria, quae non habentur in Scripturis	ibid.
§. III. Regulae, quibus traditio divina ab Apostolica, Ecclesiastica, et humana discernitur	94
CAP. III. De Sacra Scriptura	107
§. I. Sacrae Scripturae notio, et definitio	112
§. II. De Canone Scripturarum	113
§. III. De auctoribus Librorum veteris, novaeque Testamenti	120
	126
§. IV.	

§. IV. De Libris Scripturarum apocryphis	138
§. V. De idiomate textus originalis Sacrae Scripturae	140
§. VI. De sacrae Scripturae versionibus	143
§. VII. De multiplici Scripturae sensu	155
§. VIII. Sensus Scripturae non est ubique clarus, etiam in rebus ad salutem necessariis	158
§. IX. Privatus cujusque spiritus non est legitimus et infallibilis interpret Scripturae, et Traditionis	165
CAP. IV. De Ecclesia	171
§. I. Ecclesiae notio, et definitio	ibid.
§. II. De membris Ecclesiae. Et primo de haereticis, et apostatis	175
§. III. De Schismaticis	182
§. IV. De excommunicatis	184
§. V. De non baptizatis	186
§. VI. De praedestinatiis, et reprobis	188
§. VII. De justis, et peccatoribus	193
CAP. V. De notis verae Ecclesiae	200
§. I. Veritas doctrinae, et legitima Sacramentorum administratio, et usus, non sunt nota verae Ecclesiae	201
§. II. Notae Ecclesiae quatuor sunt simul sumtae, nempe ut sit Una, Sancta, Catholica, et Apostolica.	204
§. III. De unitate Ecclesiae	205
§. IV. De sanctitate Ecclesiae	219
§. V. De catholicitate Ecclesiae	224
§. VI. De Apostolicitate Ecclesiae	231
CAP. VI. De Ecclesiae proprietatibus	239
§. I. De Ecclesiae visibilitate	ibid.
§. II. De Ecclesiae perpetuitate, seu indefectibilitate	242
§. III. De Ecclesiae veritate, sive infallibilitate in rebus fidei, et morum	250
CAP. VII. De supremo interprete Scripturae, et traditionis, et judice controversiarum fidei, et morum	254
CAP. VIII. De regimine Ecclesiae	263
CAP. IX. De Conciliis	285
CAP. X. Utrum R. Pontifex ex cathedra definiens	

	575
controversias fidei, et morum errare possit	298
CAP. XI. De auctoritate Scholasticorum	311
CAP. XII. De locis Theologiae externis	313
CAP. XIII. De Theologicis propositionum censuris	315
EXERCITATIO de Romani Pontificis in defini-	
endis ex cathedra fidei, morumque controver-	
siis auctoritate	321
APPENDIX AD LIB. II.	357
CAP. I. De Summis Pontificibus	ibid.
CAP. II. De Conciliis oecumenicis	364
CAP. III. De Patribus, aliisque Scriptoribus	
Ecclesiasticis	375
CAP. IV. De haeresibus	392
LIBER III. De Deo uno.	410
CAP. I. De existentia, et unitate Dei	ibid.
§. I. Utrum Dei existentia demonstrari possit	411
§. II. Utrum Dei existentia possit invincibiliter	
ignorari	418
§. III. Utrum Dei existentia sit fidei objectum	420
§. IV. Unus tantum existit Deus	423
CAP. II. De natura, sive essentia Dei	427
CAP. III. De divinis attributis generatim	434
CAP. IV. De attributis Divinis speciatim, et pri-	
mo de ejus simplicitate	444
CAP. V. De Infinitate Dei	451
CAP. VI. De Immutabilitate Dei	453
CAP. VII. De Dei aeternitate	456
CAP. VIII. De Immensitate Dei	461
CAP. IX. De Invisibilitate, et Incomprehensibi-	
litate Dei	467
§. I. Utrum Deus oculo corporis videri possit	470
§. II. Utrum Deus ab intellectu creato clare vi-	
deri possit, et comprehendi	472
§. III. Utrum aliqui in hoc vita Deum clare vi-	
derint	483
§. IV. Utrum Sancti plene purgati, seu quibus ni-	
hil expiandum superest, statim clara Dei visione	
fruantur, an vero Judicii diem expectent	486
§. V. Utrum admittendum sit regnum Christi	
millenarium post resurrectionem	499
§. VI. Quonam modo beati clare Deum videant	501
§. VII.	



§. VII. <i>Quid beati in Deo videant</i>	503
§. VIII. <i>Utrum beata visio sit aequalis in omnibus</i>	507
CAP. X. <i>De Perfectione Dei</i>	509
CAP. XI. <i>De Bonitate, et sanctitate Dei</i>	513
CAP. XII. <i>De Omnipotentia Dei</i>	515
CAP. XIII. <i>De Scientia Dei</i>	519
§. I. <i>De existentia, et proprietatibus scientiae Dei</i>	ibid.
§. II. <i>De objecto scientiae divinae</i>	526
§. III. <i>De medio scientiae Dei</i>	529
§. IV. <i>De divisione scientiae Dei</i>	530
CAP. XIV. <i>De Voluntate Dei</i>	539
§. I. <i>De objecto divinae voluntatis</i>	540
§. II. <i>De divisione divinae voluntatis</i>	543
§. III. <i>De voluntatis divinae proprietatibus</i>	551
CAP. XV. <i>De Providentia Dei</i>	561

In pag. II. pro mutilantur leg. mutilentur : item pag. IV. pro persuadam leg. persuadeam : pag. 13. pro ridiculus leg. ridiculus : pag. 23. pro pateat leg. patet : pag. 25. pro Deos leg. Deus : pag. 26. pro plautu leg. plausu : ib. pro Pilato leg. Pilato : pag. 28. pro si leg. ei : pag. 44. pro remanent leg. remaneant : pag. 59. pro Ipse leg. Ipsae : pag. 60. pro XVIII. S. leg. XVIII. 8 : pag. 99. pro traditione leg. traditiones. pag. 103. pro quandod. leg. quando id : pag. 108. pro aliisque nonnisi leg. aliisque, qui nonnisi : pag. 229. pro te leg. et : pag. 235. pro quacrela leg. querela : pag. 284. pro juri divino leg. jure divino : pag. 301. pro ludibro leg. ludibrio : pag. 302. pro Alex. V. et VIII. Pius leg. Alex. VIII. et Pius : pag. 317. pro Quae in re leg. Qua in re : pag. 345. pro evomis- sent leg. evomissent pag. 365. pro in ecerat leg. in- fecerat : pag. 407. pro cum ipsis leg. cum ipsi : pag. 544. pro absoluta leg. absolute : pag. 559. pro ju- stitiam leg. justitia. Cetera levioris momenti liben- ter omitimus.

Α. Σ. Ε.

IL CARDINALE ARCIVESCOVO DI NAPOLI

PRESIDENTE DELLA GIUNTA PERMANENTE DELLA  
PUBBLICA ISTRUZIONE.

**G**ennaro Reale Pubblico stampatore di questa fedelissima Città umilmente espone che desidera ristampare un' opera intitolata *Institutiones Theologicae* per uso della gioventù divisa in 6. tomi dell' Autore D. Gaetano de Fulgore, perciò prega l' Eminenza Sua di accordarli un revisore, e l' avrà ut Deus.

*Addì 15 Gennaro 1822.*

Per disposizione di Sua Eminenza, il Regio Revisore Signor Canonico Lavitrano avrà la compiacenza di rivedere la soprascritta opera, ed osservare se vi sia cosa contro la Religione, ed i dritti della Sovranità, col farne rapporto in iscritto alla Giunta.

*Il membro della Giunta Deputato*

FIRMINANDO CANONICO PANICO

Napoli 4 febbrajo 1822

**L**a Giunta permanente per la Pubblica Istruzione.

Veduta la domanda di Gennaro Reale Pubblico Stampatore per dare alle stampe l'opera intitolata *Institutiones Theologicae*.

Veduto il parere del Regio Revisore Signor Canonico Lavitrano; permette che la Indicata opera si stampi, ma ordina che non si pubblichi se prima lo stesso Regio Revisore non attesti di aver nel confronto riconosciuta la impressione uniforme all' Originale approvato, e non sia eseguita la consegna ad essa Giunta delle sedici copie ordinate dal Real Decreto de' 24 Dicembre 1817.

Il Presidente = firmato

**L. CARDINALE ARCIVESCOVO**

Il Segretario Generale, e Membro  
della Giunta = firmato

**ANGELO ANTONIO SCOTTI**

*Neapoli die 25 Januarii anni 1822*


**I**nstitutiones theologiae a viro doctissimo Cajetano de Fulgure Canonico Aversano conscriptae et, jam a prima editione mihi notae, et probatae, dignissimae sunt, quae novis typis evulgentur. Tanta enim aviditate ab adolescentibus clero adscriptis exoptantur, ut Exemplaria, quae adhuc supersunt, eorum votis, sufficere non possint. Accedit doctorum hominum iudicium, qui has Institutiones commendant, quum contineant sanam, et Catholicam doctrinam, accuratam theologiae scientiae discussionem, selectam propositionum seriem, quae aut ipsam Catholicam Fidem, aut in rebus non definitis saniores, probatiores, graviores sententias complectuntur. Nihil in iis extat, quod regulis morum, aut regni tranquillitati adversetur. Mihi igitur gratulor, quod expectationem publicam, quam in ipso huius operis ortu aliquo modo familiari epistola praeoccupavi, publico iudicio confirmatam viderim. Teque, Eminentissime, et Reverendissime Praesul, exoro, ut novae huic editioni libenter assentiaris.

*Humillimus, addictissimus famulus*

CANONICUS JOACHIM LAVITRANO







23 Nov. 1835

Manca i fogli da 375 a 392.

~~164~~  
~~13~~

164

~~13~~

13





